

瓶粟斋诗话

沈瘦东

文硕阁

wenshuoge.com

目录

关于我们	3
瓶粟斋诗话初编	5
●余沛	6
●初编·卷一	13
●初编·卷二	18
●初编·卷三	23
●初编·卷四	29
●初编·卷五	35
●初编·卷六	41
●初编·卷七	46
●初编·卷八	51
●初编·卷九	56
●初编·卷十	61
瓶粟斋诗话续编	67
●续编·卷一	68
●续编·卷二	75
●续编·卷三	81
●续编·卷四	86
●续编·卷五	94
●续编·卷六	101
瓶粟斋诗话三编	108
●三编·卷一	109
●三编·卷二	117
●三编·卷三	125
●三编·卷四	134
瓶粟斋诗话四编	144
●四编·上卷	145
●四编·下卷	158
瓶粟斋诗话五编	173
●五编	174

版权声明

本书版权保护已经过期，属于公版书！并由"文硕阁"网站的用户制作并发布于文硕阁 网站内,请大家在“合理使用”范围内使用

这本电子书可供中华人民共和国（the People's Republic of China）和世界上大多数其他地区的任何人免费使用，几乎没有任何限制。您可以根据本文件中包含的"传硕公版书许可条款"中的授权许可进行复制、赠送或改编它。

如果您不在中华人民共和国，您必须在使用本电子书之前查看您所在国家/地区的法律。

什么是公版书？

根据我国现行「著作权法」第 20、21 条的规定，除署名权、修改权、保护作品完整权外，中国公民对其著作的法定权利均于作者死亡后第五十年的 12 月 31 日截止。超过著作权法保护日期后，其作品就进入了公有领域（公共版权）

这种因作者死亡超过 50 年而丧失发行权、改编权等著作权利的书籍，就称为“公共版权书籍”，简称“公版书”。

传硕公版书保护计划

中华文明5000多年绵延不断、经久不衰，在长期演进过程中，形成了中国人看待世界、看待社会、看待人生的独特价值体系、文化内涵和精神品质，这是我们区别于其他国家和民族的根本特征，也铸就了中华民族博采众长的文化自信。

文化是一个国家、一个民族的灵魂。文化兴国运兴，文化强民族强。

所以我们发起了公版书保护计划。来帮助把中国五千年的文明硕果进行电子化并服务于大众，我们网站所有内容都是免费、自由、无版权的。对所有的读者免费！

使用 **文硕阁** 中的公版书 不需要获得许可（在中国，这属于“合理使用”）。这适用于所有用途，包括商业用途。换句话说，即使是商业盈利用途，也无需支付版税。

我们希望能有更多的用户加入到文硕阁网站中来，让我们一起来保护传承文明的硕果。

源浚者流长，根深者叶茂。文化自信是一个国家、一个民族发展中最基本、最深沉、最持久的力量。

如何联系我们？

网站：www.wenshuoge.com

邮箱：7sbook@duck.com



(扫码访问网站)



(扫码加客服微信)

瓶粟斋诗话初编

●余沛

《雪坡集》文十二卷、诗《独行稿》八卷、《醉吟稿》九卷，明江西安福万节（资中）著。板嘉靖间毁。光绪三年，其二十三世孙覲清得节嗣孙曰恭钞本，重刊之，有彭序，附弘治丁巳欧阳旦原序，末附万震《苍莨诗存》一卷。震，雪坡兄弟行也。雪坡，永乐末进士，由御史出为广西按察副史。其文畅利平正，诗规摹晚唐而少变化，且大半为题人堂室、图卷、赠送、寿挽之作，无甚可观。余爱其“红树酒香春雨后，青山人影夕阳边”十四字。

余年十四五时辄喜诵“狭巷短兵相接处，杀人如草不闲声”之句，不知其为谁作也。近阅明诗，乃知为鄞人沈明臣作。其起句云：“街枚夜度五千兵，密须军符号令明。”按明臣字嘉则，世宗时人。《甬上耆旧集》云：“少保胡公宗宪行部七闽，宴将士於烂柯山上。酒酣乐作，命嘉则为凯歌十章。至‘狭巷’句，少保起，捋其须曰：‘何物沈郎，雄快乃尔！’即命刻山石上。”“杀人”云云，一说杀倭寇也，俟考。”《列朝诗集》：“万历间，山人布衣豪於诗者，吴门王伯谷（樾登）、松陵王承父（叔承）及嘉则三人，而嘉则诗为最。嘉则尝渡江见王元美，持所为诗求序，曰：‘我先后诗为篇者七千余，今仅四百，不欲以礪砍乱玉也。’可谓有自知之明。厥后，有程大科：者荆士之，非其意也。”有《丰对楼诗》三十四卷，《四库》著目。

嘉则有《七夕阻风泖上，柬长卿明府、开之吉士》云：“此夕明河烂不收，相逢犹是隔南楼。花边灵鹊迷桥影，水上孤槎滞石尤。湖雨凌空仙佩湿，纤云约月凤箫愁。北门学士谁为赋，千古令人恨未休。”长卿，屠隆字，时为青浦县；开之未详。

曩在友人家见《六如居士集》，木刻本，楷法极精。无何，遂失所在。六如诗多俚俗。忆其句云：“去日苦多休检历，知音谅少莫修琴”、“生涯画笔兼诗笔，踪迹花船与酒船”。山《艺苑卮言》论诗至苛，其评伯虎诗，谓“如乞儿唱莲花落”云。伯虎《言志诗》云：“不炼金丹不坐禅，不为商贾不耕田。常时写就青山卖，不使人间造孽钱。”此诗世人多能诵之，惟第三句作“闲来写幅丹青卖”，略有不同。

王伯谷《吴越王祠》诗：“禾黍故都州十四，波涛残岸弩三千。”对仗极工。余亦有句云：“山亦锦衣遭异数，潮於强弩屈雄威。”

朱家角圆津禅院，自清初诗僧语石开山，厥后蕉士、振华、慧照继之，皆以诗画名於时。院中弃藏之富，为峰泖间名蓝第一，谈书画者无不知之。民国以来，累遭兵乱，加以贾贩窥窃，僧众不肖，渐至散亡。至解放后，仅有存者，多舁入江苏文物保管会保管。松江杜君诗庭（镐）为余言，曾於沪市见绢本语石大师《桐阴趺坐图》，有王监、曹鲁元、诸嗣郢等十三人题咏，其中冯王献诗：“千寻石壁迴闻风，静里光明万象通。杖锡飞来常近鹤，坐看直上碧天空。”曹鲁元诗：“振拂谈微妙，真堪点石头。萧疏清影下，冥默契江流。”录之聊志烟云一瞥。冯字吉甫，诸生，善书

，见《青浦县志》卷廿二《艺术传》；曹字思邈，与王鸿绪父广心为友，见县志卷三十杂记。

吴君湖帆见示《为孙鸿士成题赳婕妤玉印拓本》调《浣溪纱》云："宠贮文房藉自珍，汉宫回舞楚腰身，掌中飞燕玉精神。妾蛸鸳笺迷粉黛，（印文四字：'婕妤妄捎。'捎旧释作赵。）秘辛鸿爪认脂痕，相怜佩解苕夫人。（余家藏漠苕夫人白玉印，今移赠庐陵周苕珍秘矣。）"囚玉燕印而及汉苕夫人印，因苕夫人而及解佩，天衣无缝，绝妙好辞。按况氏《蕙风移随笔》卷二："余前记定盒先生藏飞燕玉印事，阅姚氏（衡）《寒秀草堂笔记》，与余所记微有异同。印以羊脂玉为之，盘凤组，为余记所未详。定盒以宋拓《化度寺碑》易之，姚作《夏承碑》。此印后归潘仕诚，姚云潘德舆，又云传为某伪作以给定盒。余曾於云自在宠儿钤本精绝，决其非贋品"云云。玉印文曰："婕妤妾赵。"见况氏《随笔》，与湖帆所见拓本同，不知潘氏旧藏即此印否？潘为岭南人，名仕诚，有海山仙馆，同治初籍没，亦见《随笔》。

了卯冬至，海上名流丁云轩（宝书）、高野侯（时显）、姚虞琴（景瀛）、郑梅庵（遗孙）、丁鹤庐（补之）、赵叔儒（时桐）、赵雪侯（士鸿）、郭和庭（兰祥）、唐吉生（熊），结消寒社沪城之芸庐，人各画梅一枝，曰《九梅图》。周梦坡（度云）复邀集程十发（颂万）、冒鹤亭（广生）、夏剑丞（敬观）、黄笃友（庆曾）、金甸侯（蓉镜）、潘兰史（飞声）、姚虞琴、陈豪生（宝书）於晨风庐作消寒会，约为联句，每句末字，甲吟则乙拈点以相限，诗曰："九客图消九九寒（发句鹤限），野梅春意动江干（剑句发限）。繁英似蝶香博翅（鹤句剑限），老干成笼骨换丹（笃句琴限）。天地各留心数点（豪句笃限），韭菰分荐甲双盘（甸句豪限）。当筵诗向香山乞（兰句句限），捻断吟髭一字安（琴句兰限）。"诗成即题《九梅图》。后虞老言此会去今已三十余年，诸人大都墓木已拱，存者寥若晨星矣，不可不纪。

程生景溪自梁溪迁於沪，因索陆俨少为画《翦淞图》，余为题之，有云："远势欲吞沧海影，清光如展水图。"按郭磨《灵芬馆诗话》："魏禹平（坤）《水第二图》多见於前辈诗中，朱竹垞《曝书亭集》所题，乃禹之鼎所作。今观《倚晴合诗钞》，有《赠梅雪坪兼索画水第三图诗》云：吾家白鹤湖边住，耕把一犁钓一竿。水之中无长物，放眼但觉鸥波宽。"景溪言："第一图乃赵松雪作，前此未闻有著名者。后人袭其意，辄题'仿赵承旨'。我家藏有查梅壑画册，亦然"云云。余因忆乾隆时吴江叶调生（树枚）《题吴云傲分湖秋泛图》云："不道鸥波带长后，居然又见《水村图》。"则景溪之言可信。题《翦淞图》者吴眉老、前运之，皆极工。吴诗云："携取渔竿并酒筒，浮家如入画图中。一蓑烟雨长相忆，合有诗人陆放翁。（'一蓑烟雨忆吴淞'，放翁句。）""投老最耽烟水趣，林塘收得《晚归图》。绮添画名贤像，定是陶张苏米徒。（万历间，无锡安希范罢官归，出必乘一舫，图陶渊明、张季鹰、苏东坡、米海岳於绮窗，称为烟水伴。）""鸥鹭寻盟莫等闲，故乡也有好湖山。春来倘忆桃□港，试放扁舟一往还。"俞诗云："拨酷江水鸭头妍，画裹应添载酒船。菰

叶蛤蜊都入梦，更教拆洗惠山泉。""曾访幽人水北居，凭栏宴坐笑谭余。风云百变频经眼，不犯清波意自如。（'不犯清波'，唐船子和尚语。）""炉香茗足清娱，逸思翩翩属五湖。绝似只陀村裏客，虚堂高挂《鹊华图》。（高斋有香光居士摹赵吴兴《林塘晚归图》，精妙绝伦。"

乾嘉间，篝山何铁山（王模）先生医有重名，其诗已略载《诗话》。先生诗清和平达，有《萍香馆诗钞》，楷书精刻，数十年前曾见之。迭经兵乱，藏者恐鲜。近杜君诗庭钞示其诗迹，为再补录之。《舟行南梁至春申浦，为风雨所阻，坐守篷窗感作，寄瘦樵》云："每觉衰残甚，舟行亦较迟。风翻云影合，雨压稻梢披。骨瘦偏多苦，心空似欲痴。为来申浦畔，那得不惊疑。"注："时年七十有四。"《花朝后一日邓尉探梅》云："才过花朝后，风微雨乍晴。山云犹带湿，溪水自涵清。渐觉愁怀展，还教老眼明。探梅情久切，急急促行程。"杜君又言："见兰泉司寇姬人许玉晨女史所绩花卉四叶，钤印'琴画楼'，又钤'百花庄主人'，殊为创见，亟为收藏。何日得图良觐，并几共读云。"

又钞示吴江陆雪亭（日爱）致沈南一（曰富）手札，略云："昨赴青浦，无意中得王述庵先生《三泖渔庄图》四册，名人题咏百余家，如沈归愚宗伯、翁覃溪学士、钱竹汀少詹、王西庄光禄。吾兄此后便道敝镇，可来一阅，当亦赏叹不止"云云。诗庭云："《青浦续志遗事》载："《三泖渔庄图》，清末王裔曾控其戚叶某於郡守。'岂知是图在洪杨时已归之陆氏矣。此书可证当日一重公案也。"

杨黻堂徵君三俊，居於县东郊之杨家窑，走我家故居南村三里许。嘉庆间，尝馆我族授徒。其《松筹堂稿》中有《庚戌二月二十八日同主人闻兰等游佘山诗》云："春风二月天，处处足花柳。烟景若相招，芳辰良不负。主人剧多情，劈柑携斗酒。各各换春衫，扁舟十人受。村前袅炊烟，村后吠鸡狗。行行至山麓，山灵笑迎某。捷足蹶其颠，长啸振林藪。"所称"主人"，我家九世祖也。杨氏为明吴中成化进士、礼部主事杨循吉（君谦）后裔。礼部尝读书支硎山中，折松枝为筹，有《松筹堂集》十二卷，徵君诗稿盖沿旧称也。其稿旧在余家，未刊，兵乱失之。已刊者有《四勿斋集》。

我邑东乡刘夏杨氏，诗礼旧家，荫三（新槐）、振声（克家）父子，皆诸生。振声少倜傥自喜，清末武进盛氏尝延为教读，馆诸苏州之留园。晚避倭乱，入川。乱定归，白号逸叟。生平邃於《易》，颇多笺释。诗皆散失，仅记其"心如止水物情见，诗到忘机天籁生"一联。我嗣祖娶於杨，杨氏多蓄书。荫三先生修髯长身，余童时见之。振声了未春与余同看曹家庙牡丹，寻卒，年七十余。

杭县姚虞琴先生，身登大耋，仪干伟然，望若六、七十许人。丙申仲春，年九十，有诗云："觅得人间养老方，加餐第一菜根香。避嚣桑下经三宿，买醉花前罄几觴。（余生花朝前一日）示疾未忘期岁厄，（去年花朝微疾，失去知觉三小时。）行吟

不减少年狂。衰龄屈指春相似，始信壶中日月长。"

俞君运之，今年五十，余作《短歌行》赠之："俞子淹稚今所稀，古辞镶异妃呼稀。今诗风流得天授，芙蓉出水明朝晖。前年寻君淞水暖，头上菊花端可满。为我买醉黄公垆，落落酒人几青眼。嗟君遭逢时命穷，摧眉刺足风尘中。麒麟困蹶鸾凤瘁，万壑一噫迴长风。即今堂堂年五十，维摩居士但示疾。烧香日诵《槃若经》，刀火风轮消佛劫。君家旧住虞山头，剑门萧爽琴川幽。他时献傲归林丘，杖藜更请从君游。"运之恂恂雅饬，熟於三吴掌故，故蘅裳句云："犹有乌衣风范在，珍闻遗献述如流。"又云："埋首好为食字蠹，抚膺奈作触藩羝。"注云："君生於未。"此谓乙酉春间遭遇事。蘅裳名国钧，吴江人，光绪丙午优贡，尝为陈庸庵尚书幕宾，今年七十三矣。忆民初余访庞小雅进士庆麟於吴门，蘅裳其同族也。

张聊止（厚载）《喜瘦东之沪见访，用其怀佳韵》云："揩眼成惊喜，居然瓶粟斋。重逢疑梦寐，久坐罄情怀。酒脯愁难办，茶烟恨欠佳。新诗遍传诵，文采照江涯。"蔬畦每谓聊止诗出之太易，此却语语真挚，有老杜《客至》情景。此甲午秋间事，时聊止年六十，乃别未半载，遽成腹痛，弥为怆然。

丙申岁首，豫中名宿靳仲云先生志以探望诸孙来沪，冒疚老、罗雁峰与仲老雅故，各置酒延宾宴饯。仲老年八十，疚老八十四，澹翁七十九，不啻洛下耆英。座客有徐森玉、尹石公、赵苇佛祖望、瞿兑之（宣颖）、吴湖帆、许效庠（德高）、谢稚柳陈佩秋伉俪、吴青霞、周链霞，裙屐联欢，极一时之盛。澹翁先宴於锦江十一楼，首唱七律一章，云："恰逢人日举觞迎，八十翁犹好远行。陈榻只容留孺子，（重庆汪山）夷门何幸访侯生。（前岁至开封时）袖中汉口新诗草，坐上江南老步兵。雪后汪山梅又放，么鬟无复听歌声。（有本事）"仲老和石："思发花前一笑迎，锦江春早踏莎行。伶俜可忍称词客，通脱何人似面生。老我风怀余梦影，借君语妙触心兵。斜河无赖堪留照，（螺川未终席先去）并入离襟第一声。"疚老《喜仲云至又言别，叠翊云韵饯之》云："故人喜与好春迎，八十翁能遂此行。今日主宾须尽醉，别来岁月作麽生。坐缘江令粲花笔，一纵条侯坚壁兵。（余病戒饮已三月）草草平原留十日，酒醒歌已带离声。"效庠云："细雨知难夕月迎，依依况是客将行。才瞻玉色千寻立，安得车轮四角生。痛饮不辞呈眼擷，微吟何敢斗心兵。贞元朝士今余几，未改中州稚颂声。"此韵翊老至六叠，如云："扁舟早已归张翰，醴酒争先礼穆生。"又云："海市看花宁负屐，诗坛角胜似鏖兵。"仲老亦三叠，如云："敢烦画手霜缣染，不惜衰颜酒晕生。"上句指湖帆、青霞画家也。又云："月露飘香尘劫换，春波泛绿酒鳞生。"题疚师甲午重宴鹿鸣长卷也，皆典切工雅。诸韵以"兵"，字为最难押，而疚师最工，仲老和作所谓"马陵狭路出奇兵"也。澹翁钞录诸作见示，余不觉技痒，题其后石："新诗欢送酒欢迎，并与闲云壮此行。海上月明元夕近，江南春早杂花生。固知汝颖多奇士，肯信吴江有败兵。只是少游仍款段，嚶嚶煞谷莺声。"

诗之纪时政者，香山乐府"讽谕体"也。近见锺锺山（泰）《志喜》诗，盖为上海全

市工商各业庆祝公私合营，进入社会主义社会而作也，诗为赞美体。白诗不用书，锤则经义纷纭，诗人之诗与学人之诗不同如此，然令人感发则一也。诗曰："力恶不己出，货非己所私。徒闻先圣言，今乃亲见之。风声一以树，响应动四垂。京师诚首善，具瞻尤在兹。绾毂江海交，轮船纵横驰。厘肆密林立，百物咸取资。虽曰此一隅，全局关盛衰。工人实始唱，力与先进追。技艺出新巧，往往超等夷。宅心为大群，那顾一身疲。感彼货殖徒，志意亦改移。颇趾同圆方，戴履同高卑。有如并途行，彼速我何迟。自利已深耻，况以胺人为。幡然识趋向，大道无两歧。一动因百和，未用为谋谄。小大齐一愿，上言陈所司。身为天下人，天下共安危。国富民无贫，此理信不疑。人自食其力，何愁寒与饥。资财入公家，公利私岂遣。区区权子母，孰若均平施。委曲悉利害，情知无伪欺。溯自建国来，土地首厘治。田畴日开辟，川泽日被骊。通力而合作，农今粗植基。一国犹一身，四民犹四支。大计日工农，无或令参差。以是请得行，一一如所期。欢声随处发，感澈人心脾。枹金鸣鼓笛，相贺群熙熙。虹霓耀灯火，云霞簇旌旗。攘攘不夜城，无曲巷大逵。欢乐一日深，经营十年规。能者当致力，智者当尽思。孰云我不能，北邻有我师。人人奋自效，各各相提撕。实行无空言，治成近可推。夫孰使之然，领导由得宜。天下者神器，可为不可持。庙堂有圣明，默运司晷仪。执中无偏颇，奉天无后时。亨贞动无咎，大哉义在随。惟余抱残缺，坐食老羸。还如朽樗木，亦受春风吹。薰蒸涵濡间，鼓舞不自知。窃比击壤翁，歌谣自成诗。非敢贡其谏，亦非饰其辞。援引或非伦，一听人瑕疵。"锤诗尚有《除四害》、《喜雨》等作，皆佳。以篇幅过长割爱。

梁溪孙希侠（保圻）尝客京津，晚号慨翁。有诗稿一卷，没后，叶遐庵为之选定行世。慨翁诗宗半山，尤工七律对仗，以为不如是，可作古诗，何必律也。佳句如"湿云出岫疑蒸釜，新水鸣砣当听琴"、"倚竹恰临调鹤地，携柑又值听莺时"、"十年梦醒人初老，三月春残客未还"、"身外犹余行乐地，眼中渐少振奇人"、"海曲藏身携德曜，阳阿曦发眷灵修"、"玩世何妨称市隐，归田早已誓江神"。遐翁跋盛称其胸襟造诣，屹然有不可拔者。

七绝诗清浅有味者，常州钱名山《小池》云："北窗正在小池滨，阴雨连朝起縠纹。藕叶未生鱼断种，不妨映水看春云。"宝山杨瑟民（苕械）《冬日杂咏》云："入冬百卉瘦西风，要看晴芳陞日烘。馋眼独贪花富贵，编柴先束牡丹丛。"广东蔡竹铭（卓勋）《移居》云："三分水竹一分花，风月收来共一家。自喜村居无俗事，山林经济只烟霞。"镇洋沈梦花（兰徵）《病起》云："不到书斋已浹旬，笔留蛛网砚留尘。多情惟有庭前竹，依旧迎风揖主人。"镇海曹梦江《对雪》云："登楼对雪懒吟诗，闲倚阑干有所思。莫怪世人容易老，青山也有白头时。"潘博《沪南龙华寺看花》云："塔铃不语昼阴阴，大有游人布地金。细雨春梦湿，寺门一尺落花深。"闽陈赵亭《消寒吟》云："严寒天气闭穷阴，踏雪人归小巷深。分与邻家箫局火，一贫未改向来心。"南汇顾佛影（宪融）《赤山埠夜归》云："赤山埠外下归船，倦鹭眠鸥各悄然。可有坠欢烟水裏，湖灯红似十年前。"上海郁餐霞（葆青）《寻春》云："镇日寻春不到家，柳丝村店酒旗斜。梅花欲漏春消息，处处偷开三两花。"陈闳慧

《春暮杂诗》云："新纸桃花糊小窗，看书深夜对吟。水仙韵绝黄梅瘦，爱杀俦停影一双。"南汇顾飞女士《题画》云："树老山中忘甲子，鹤眠岩底养灵机。石门久闭松花落，应笑山人去未归。"常州汤澹然（潜）《题画》云："香窗画槛那人家，占尽风流水一涯。相见漫谈沧海事，客来只为看梅花。"湘乡王植槐（义臣）《散步》云："散步园中白袷凉，绿阴如幄百花香。游蜂不怕旁人，飞向枝头劫海棠。"太仓顾震白《游重庆花溪，再过飞泉口》云："百尺山头双瀑悬，飞泉如雨雨如烟。错疑身入桃源洞，十里花溪一钓船。"以上皆《随园诗话》中风调。

律句，写景难在意远，写情难在脱洒，隶事难在精整。兹仿摘句图例，录若干联。慈溪洪佛矢（兆龄）云："桃花红逐春人去，山影青随画舫来"、"客儿诗句芙蓉艳，佛助才华蛱蝶轻。"南汇顾佛影《夕阳》云："立马有人惊岁晚，挂帆何处近天涯。"鄞周歧隐云："蒔难积稿风前雪，梦不留痕雨后云。"我邑戴果园云："头颅如此风中烛，肝胆相倾酒后言"、"人老那堪常作客，河清毕竟在何时"、"书生坐老蝇头字，俗子窥人麝眼篱"、"逋诗有债还难尽，落叶如潮扫不开。"太仓顾震白云："杜陵蜀道音书滞，庾信乡关涕泪多。"镇海宋少芬《牡丹江》云："香衾银烛三更梦，落日荒江万里流。"无锡孙伯亮云："塘拗雏柳绿拖水，屋角夭桃红出墙。"

梁溪孙伯亮，为人敦笃孝友，与名山交最厚。尝写印其师孙慨翁遣稿，助刊乡人杨楚孙遗著。著《晴梅诗稿》一卷。《除夕》云："爆竹千街响彻天，高楼灯烛照无眠。寒家酒断寻常例，一幅梅花醉过年。"风趣独绝。又"落花时节似秋寒"、"夜雪瞒人送旧年"，皆佳句也。

人生有济胜具，山川能说，登高能赋，此便是慧业。陈君器伯，今春畅游蒲中风后陵、雷首山、王官谷等名胜，得诗夥颐。其五古气韵醇雅。《风林寺》云："初游风伯峪，言寻松林寺。松林只两松，环寺千柏翠。两松高百尺，俯视青一气。猗猗间筠竹，亦为绿所醉。谁知佛阶前，牡丹红照地。蔚矣百年物，天香袭衣袂。"近体《自蒲州经解州返运城》云："翠扑车棧一路山，牛尻四掩麦云环。未穷三月将临夏，摺叠春光诗句间。"又"花红春未老，山翠佛能贫"、"云开西岳色，风卷大河声"，皆佳。

严畸庵奇示《北游草》，《陶然亭》一律云："乾坤莽莽一亭高，多难登临亦足豪。香冢劫残留短碣，清溪波软受轻舫。"余爱其起得高朗。《广渠门内吊袁督师墓》一律云："亡徵已定功难补，雄略方摅事见猜。等是血流柴市碧，长城自坏更堪哀。"余爱其收得悲凉。《过末谢文节公祠》云："恸哭摧如意，惟公泪更吞。北来坚死志，东乡渍啼痕。萧寺身尝系，荒宠主尚存。桑田留命在，斜日过祠门。"余爱其起得慷慨，收得沈痛。诗中"恸哭"、"啼"、"泪"等字面太多，似亦缥发之伤，可酌改。畸庵好游，壬辰游天台，观石梁瀑布，乙未游吴、游皖，皆有诗，限于篇幅，不录。

奇句多偶然得之。王植槐有"墙头蝼蚁倒拖花"七字，又云："燕子双双忙不了，衔来

花片砌雕梁。""砌"亦未经人道。陈生雄羽云："曾见明宸濠翠妃《咏梅花》云：'绣针刺破纸糊窗，引透寒梅一线香。蝼蚁也知春色好，倒拖花片上东墙。'"则前人已言之。一作明吴江土族沈氏《春日即事》诗。

"中夜嚎陶常索酒，一生毡噪自圈诗"，曹能始《嘲沈从先》诗也，见《列朝诗传》。沈，吴人，名野。"门前债客雁行立，屋内酒人鱼贯眠"，曲周刘浚逮（逢源）《哭霍亮雅》句也，见《池北偶谈》。"两间东倒西歪屋，一个南腔北调人"，鲁亮侪自署其门联也，见《茶余客话》，又梁章钜《楹联丛话》引《续消夏录》，作张晴岚除夕题门联句，上"两"字改作"三"，下云："一个千锤百链身。"不及鲁联风趣。

果园诗，初学香山、放翁，然其性灵语，实与小仓山为近。乙未冬，奇其诗稿来，委为去取。始乙亥，讫乙未，约千余篇。录其《谢伯未画扇作种种果》，云："我以果园名，种果不盈亩。老饕每贪多，未足饜我口。一朝发奇想，安得罗总有。画饼也充饥，其义某窃取。秦七妙写生，百果出其手。授以一方面，落笔香云走。一一罔不肖，有好亦有丑。可玩亦可弄，可瞰亦可剖。按图试举名，日葡萄莲藕。谏果妙味回，佛手生香久。樱桃小如珠，蟠桃大可斗。青梅宜止渴，杨梅宜醒酒。西瓜滚翠罍，蜀黍绽五豆。石榴兆多子，我以赠新妇。枇杷珍晚翠，我以遗老叟。慈姑并老芋，祭灶饷邻右。殿以长生果，祝我无量寿。为品一十六，问我满意否。我但称夥颐，不觉为顿首。何必再饥驱，一生尽享受。火速扬仁风，庶几报我友。"

余尝有句云："匡梦觉诗为课，邻圃花开醉有乡。"而蔬畦亦云："晚年为诗，最宜今体，可卧而成章。"又每花时喜召客觞咏。蔬畦与余同岁生，而性情亦相似，所不同者，蔬畦犹多女弟子，余则湖楼坛坫，冷落久矣。

鄙人所撰《瓶粟斋诗话》，去冬少事修订，编为卅六卷，由弟子上海陈君雄羽一手写成，纳之篋衍。迺来精力衰迈，满拟不复续矣。乃辱海内知交不嫌浅鄙，珠玉纷贻。因是不忍辍置，又复勉续一卷，以公同好，题曰《余渚》。嗣后是否再有所续，视精神意兴而定。至前《诗话》卅六卷，或铅印、或油印，皆零星出板，式样参差，鄙人明岁年届七旬，或当筹重印一式板本，略取美观。倘亦垂爱诸君子所樱一者乎？

公元一九五六年九月瓶翁自识

瓶粟斋诗话 民国 沈其光

●初编·卷一

唐文宗欲置诗学士，李珣以为诗人浮薄，无益于理，遂寝不行。其实文宗非不可图治之君，苟迎其机而善导之，如孟子之对"好货"、"好色"诸问，引《诗》曲证，陈善闭邪，则朋党之争、阉宦之祸，或不至如是之烈。惜乎珣与郑覃等曲谨小儒，不能见其大也。余谓治乱邪正之迹、闵时病俗之言，莫备于诗。即就唐而言，诗人如子美之歌行、香山之乐府，无不以其悱恻之意达其忠爱之诚。下至冬郎其辞，草麻数语，辞气慷慨，大节凛然，亦岂得以浮薄目之？珣之谬妄，固不待攻而破也。

杨龟山云："渊明诗所不可及者，冲淡深粹出于自然，非苦力之所能也。"熊鞠孙太史祖诒云："陶诗之不易学，在其胸襟不可及耳。"龟山只道得体制，太史从其志趣上说，更高一层。

太史又云："唐人如高、岑、贾、杜等，诗于题中之字，无不一一顾到，所谓'题无漏义'也。"又言："古人之工为诗者，无不工于制题。六朝人与唐宋不同。大抵六朝人题以明净胜至，唐宋则隽约曲畅，各有其长。有短止二三字，长至数百字者。今人读诗，往往玩题忽略，不知古人制题或繁或简，大有斟酌在也。"

陶诗："采菊东篱下，悠然见南山。"东坡谓："采菊之次，偶然见山，初不用意，而景与意会。"此解最得神理。后来如韦应物之"采菊露未晞，举头见秋山"、白居易之"时倾一壶酒，坐望东南山"、韩愈之"清晓卷书坐，南山见高棱"，虽拟陶而皆着色相，深于诗者自能辨之。

张文潜《与友人论文》云："文以意为车，意以文为马。理强意乃胜，气盛文如泻。理惟当即止，妄说即虚假。"又云："譬之张众乐，要以归之雅。区区为对偶，此格最汙下。"余谓文与诗无二致也。柯山论文，亦即论诗。

唐人诗，用字上安适、节族上谐和、意思上含蓄，所谓心气宽柔者，其声温好，其失也平而弱，元白是也；宋人诗，用字上生新、节族上急骤、意思上刻露，所谓心气华诞者，其声流散，其失也犷而悍，山谷、后山、二晁等诗是也。明乎刚柔好恶之辨，斯无流弊矣。

大家各有句法。老杜往往喜用五入声字为句者，如云："业白出石壁"、"石壁滑侧足"、"壁色立积铁"、"渴日绝壁出"、"白日亦寂寞"等是也。又喜用"一"字，如云："宇宙一 亘脘"、"窈窕一林麓"、"昏霾一空阔"、"万古一骸骨"、"青衿一悴憔"、"四海一涂炭"、"溪行一流水"、"青林一灰烬"等句是也。此皆他人集中无之。

乐天诗，喜类聚一时景物以为句者。如"风回云断雨初晴"、"草香沙暖水云晴"、"岸浅桥平池面宽"、"石浅沙平流水寒"、"风清泉冷竹修修"、"树深藤老竹回环"、"笋老

兰长花渐稀"、"野桃山杏水林擒"、"枣赤梨红稻穗黄"、"柳湖松岛莲花寺"、"纱巾草履竹蓑衣"、"短鞦低帽白蕉衫"、"乌帽青毡白毡裘"、"竹鞋葵扇白销巾"、"萝巾蕙带竹皮冠"。其为联语者曰："玉佩金章紫花绶，纓衫藤带白纶巾"、"重裘暖帽宽毡履，小阁低窗深地炉"、"轻履单衣薄纱帽，浅池平岸痺藤床"，此本于子美"风急天高猿啸哀"二语，他人集中亦不多有也。后惟放翁时一效之。

随园论律诗难于古体，余未敢苟同其说。盖古体虽无声律、对偶之拘，譬之李广行军，无部伍行阵，然非训练有素，使人人知守纪律之严，鲜不僨事。此似易而甚难。至于律诗，不过如程不识之刁斗森严，使士卒不敢犯而已，然似难而实易也。葆荪赅余言，以为隼喻。

表兄邹葆荪（尊德），工为诗，画山水亦淡逸可喜。晚年病风，卧床几三载，日以诗酒为遣。生平积稿数千篇，大抵古体追《骚》、《选》，近体效剑南。没后，其弟湛如（尊莹）属为去取。以其繁冗，有难色。惟屡经丧乱，恒以其稿散佚为虑。顷检篋得数篇，录之以当窥豹。《上巳郊游遣兴》云："万汇迎淑暄，原草得风展。意往各有托，所会异深浅。远树浮野烟，流云媚晴潏。胡蝶弄游丝，力趁微风转。流觴永和年，盛会无弦管。动息任天机，寓目恣流览。老庄等蜉蝣，玄运有穷算。惟此杯中浆，生机协同善。抗古缅今兹，遥情转难遣。"《竟日看花，夜集同人饮丁家酒榭》云："今年春暖花事早，低烟匝径暗篁扫。流膏遍野无枯枝，一寸情苗和烟袅。城南地僻多垂杨，东家西家缭短墙。平潭初绿靚明镜，蕤蕤华羽鸾皇翔。弄晴芍药恣娇态，倚醉海棠争艳妆。群萼酝酿各献媚，掩抑百态流神光。春光如许不行乐，奚似束书置高阁。看花不减昔年狂，紫燕相偎集翠幙。美人未识绮罗春，掩袖谁来慰寂寞。黄金不买驻颜丹，拟向芳洲搴杜若。疏灯水阁琉璃屏，酒气薰人花气醒。高城凄烟敛暮色，醉眼直送云冥冥。别含春绪写古怨，波光荡影人娉婷。我诗代券订后约，开窗诵与闲鸥听。"《听方君仁后摘阮歌》云："帘漪绉縠荡秋影，腰支瘦损罗衣冷。碧梧墙角叶初凋，庭院无人清昼静。方子信手拨圆槽，飒然凉意风萧骚。三弦缓二用其一，一弦已足惊秋高。凄凄惻惻鹃啼血，鏦鏦铮铮鸣金铁。忽然故作声悠扬，推宫却羽低复昂。苍虬朝翻尘海浪，素鸾夜拂胡天霜。不知弹者何所怨，红桂金鱼锁深院。不知弹者何所悲，憔悴婵娟泪暗垂。我心悲怨两何依，破空一鹤寥天飞。凄凉诉尽兴亡感，犹似当时玉屑霏。东山妓围闹丝竹，别调难谐里耳俗。成连始信能移情，请鼓天风海涛曲。"《独坐偶成》云："疏尊浅酌郁金香，萧瑟商飈拂槛凉。静爱绿阴常寂寂，坐看白日去堂堂。时嗟递嬗荣枯易，诗谢徵求寿挽忙。卖画得钱谋一醉，忘情毕竟未能忘。"可想见其高致矣。又"荷香雨洗残花尽，桐影风梳病叶飞"、"心系天涯芳草外，客随江上白云来"，佳句类此者，不胜枚举也。

"生涯零落归心懒，多谢殷勤杜宇啼"，王荆公句也；"莫信杜鹃枝上鸟，人归犹道不如归"，梅宛陵句也，一子规耳，在未归人口中说，则云"多谢"；在已归人口中说，则云"莫信"。盖因物兴感，各随人境地而不同也，然皆佳妙。

太仓崔不雕有"丹枫江冷人初去，黄叶声乾酒不辞"之句，渔洋爱之，呼为"崔黄叶"，见《池北偶谈》。博陵崔瘦生《咏红叶·如梦令》云："为爱吴江晚景，渡口斜阳相映。点水似桃花，无数游鱼错认。风定，风定，一样落红堆径。"为洪北江所赏，呼为"崔红叶"，见嘉兴叶松石（炜）《煮药漫钞》。两人同姓崔，又各以咏叶得名，信矣，无独有偶也。

咏物只须一二有力语便足。退之咏李则云："风揉雨链雪羞比，波涛翻空杳无涘。"咏桃则云："种桃处处惟开花，千树万树蒸红霞。"荆公咏桃则云："枝柯蔦绵花烂漫，美锦千雨敷亭皋。"咏荷则云："于时荷花拥翠盖，细浪翻雪千娉婷。"皆以少许胜人多许。

近百年中，邑人之工书画者惟黄雪轩（光燮）、周疏庵（其照）两明经。雪轩久客京津，所交皆当世贤豪。东人士爱其画，亦时以重金求之。疏庵西上广陵，南游粤峤。书法吴兴，画竹石似元人小品。独其诗皆流传绝少，询之老辈，亦无所得。仅知黄有"夕阳红到小楼西"，周有"破伞遮头过野桥"二语而已。余谓诗能传诵，七字已足。"满城风雨近重阳"，古今脍炙。东坡亦有"一颂了伯伦"之语。五代王仁裕多至万首，当时有"诗窖子"之讥，至今无有能道其只字者。然则二公亦足自鸣矣。

疏庵先生尝随黎莼斋公使庶昌至日本。日本樱花最盛，其花略似海棠，彼都人士夸之为国花。先生咏之云："若编海国群芳谱，此是东瀛第一花。"时为人诵之，谓得微婉之旨。先生在东时，东人求指示点画，愿执贽为弟子者甚多，可见其国人讲求字学之专。

先生为余诵"溪澍花影偶，山静屐声孤"句，谓为沈文肃公某幕僚句也。余曰："此山阴邵姜畦诗，载在《随园诗话》。"

子美祖审言自谓："我诗可使苏李为奴，我书可使锺王北面。"然后世言书者，从不及审言，即言诗者，亦未必盛道审言也。故我谓文士翰墨，工拙是一事，传不传又是一事。

子美在耒阳吃牛肉白酒而卒，及太白弄月骑鲸之事，前人辟之，谓出于小说家言。然宛陵诗云："李白死宣城，杜甫死耒阳。二子以酒败，千古留文章。"又云："采石月下闻谪仙，夜披锦袍坐钓船。醉中爱月江底悬，以手弄月身翻然。"则宋人已据为典实用矣。

子美《清明》诗："著处繁华矜是日。""著处"犹云到处，盖当时方言也，子美屡用之。如云："贱子何人记，迷方著处家"、"未成游碧落，著处觅丹梯"，而浦氏解为"然着"之"着"，以为状樱桃之红，误矣。唐人以方言入诗甚多，如"遮莫"、"格是"、"能个"、"劣能"、"赤憎"等语皆是。

又此诗下云："渡头翠柳艳明眉，争道朱蹄骄啮膝。""明眉"说柳，"啮膝"说马，各有关合。而注家以为"柳眉"喻游女也，然则"啮膝"何喻乎？余谓起首"长沙千人万人出"已包括士女在内，二句只状当时景物耳。

表伯张静莲（世昌），晚号顽翁，诗平易，学香山。至其弊，则不免为张打油、胡钉铰之流。尝有句云："浴水鸥同鱼串戏，偷花蜂与蝶分赃。""串戏"、"分赃"，俗语也。顽翁喜谈谐，故其诗涉笔成趣如此。

顽翁善小儿医，生离鼎革，饱更世难，满肚皮不合时宜，往往托之歌咏。如云"钟声杳杳沈长乐，檐影荧荧贯太微"，悲京阙也；"慈猫翻乳同眠鼠，义鹘空诛饱食蛇"，刺当道也。顾其闲适之作，亦多近诚斋、放翁。《晚晴漫兴》云："雨余庭院绝纤埃，绕砌缘墙满绿苔。草伏兰根瞒我长，花藏叶底背人开。趁强猧子驱鸡去，恃爱狸奴捕蝶来。细把物情衡世态，惟须万事付衔杯。"《新春》云："天教芳讯传红杏，人喜晴光转绿苹。"《幽居漫兴》云："宅宽好拓栽花圃，楼小如栖构木巢。邻竹声喧风乍起，庭花影小月方中。"《初冬晚眺》云："担稻人如张翅蝶，辞柯叶似散衙蜂。"

无锡邹翰飞先生弢，以词章名江左，尝以其所著《三借庐诗稿》寄余。顾徐干"时有齐气"，弗之好也。近忽得其《采莲曲》数绝，清词丽句，为其集中所无。诗曰："阿侬家本近前湖，湖上风光似画图。划破烟波双桨入，水中人影万花扶。""一曲田田唱采莲，画船穿过画塘边。只因昨夜催花雨，新水如云绿上天。""晓风吹散一湖烟，舵尾轻寒透薄棉。不信双鸳禁得起，夜深交颈忍凉眠。"

丙辰夏，先生次余《寄怀》韵见赠云："《西都》赋物汉唐余，郑重传来遣李珣。兰臭难亲君子泽，（自注：四年前在卫品纯处知君。去秋以汇生之介两次到沪，竟不得一晤。）寻光幸烛野人居。笔留红艳撩江梦，花在青溪灿洛如。（自注：郡有文士，则生洛如花，见张宝《就印录》。）翘首蓬山高万丈，几时快锡指南车。"先生豪于饮，自号酒勾，因绘《勾酒图》，遍乞文人题咏。六十后得风疾，手震，不能握管。筑守死楼居之，年殊七十卒。

弟子方仲渊（存慎），羸削如碧鹤，人见其行径异，多目笑之，而不知臣叔不痴也。家贫，就昏浞西郁氏。年未三十病瘵亡。仲渊喜咏右丞、左司诗。《浞西秋居寄尧祯海上》云："吾道差堪久，奚嗟旧业贫。故山松阁废，僻壤草堂新。洗梦秋江上，怀人沧海滨。飘然欲何往，天地尽风尘。"《出浞湖》云："晓发浞山下，高林初日明。天黏湖水碧，浪浴布帆轻。旅燕别离恨，沙鸥迎送情。眷怀西塞隐，泛宅寄浮生。"《题樊川诗集》云："水郭山村乘醉游，江南烟雨赴春愁。绝怜词客清狂甚，不倚红楼便寺楼。"其他佳句，《山居》云："饥应争鹤瘦，闲仅许鸥分。"《夏日闲居》云："苦贫衣趁闲时典，斗智棋逢绝处佳。"

李义山诗："身无彩凤双飞翼，心有灵犀一点通。"犀角文备百物之形者，谓之"通"。以"通"对"翼"，自然工整。而张文潜云："玉筋异时空见迹，灵犀千里亦通心。""通"作虚用，似误。

世多谓"韩寿偷香"。按《晋书·贾谧传》云："西域贡奇香，帝以赐充。其女密盗以遗寿。"是明言贾午，非韩寿也。然宋谢无逸《咏胡蝶》云："身似何郎全傅粉，心如韩寿爱偷香。"则其误不始于今日。

《列子·天瑞篇》："冲和气者为人。"知放翁"潞水抱中和气，平远山如蕴藉人"，"中和"乃"冲和"之误。

《家语》："累累若丧家之狗。"王肃注："丧读平声。"然黄山谷诗："顾我今成丧家狗，期君早作济川舟。"则平仄义均可用。

郭麟《小游仙诗》："偷下蓬壶暂破颜，春风吹绿两眉山。当时只有狂徐福，曾隔文窗觑阿环。"然李义山《曼倩辞》云："十八年来堕世闲，瑶池归梦碧桃间。如何汉殿穿针夜，又向窗中戏阿环。"则戏窥上元夫人事乃曼倩而非徐福。

俗谓木笔白者为玉兰，紫者为辛夷，非也。王荆公云："试问春风何处好，辛夷如雪柘冈西。"刘渊材恨海棠无香，亦不尽然。刘屏山云："几经夜雨香犹在，染尽燕支画不成。"至朱夫子又依违其词，其《山馆观海棠》云："乱英深浅色，香气有无中。"

●初编·卷二

孟东野诗，源出谢家集中，如《献襄阳于大夫》及《汝州陆中丞席喜张从事至》、《游枋口》、《柳溪》诸作，时见康乐家数，特其句法出之镌刻耳。洪北江评东野诗，以为篇篇似古乐府，非确论也。又云："昌黎《南山诗》奇警极矣，而东野以二语敌之，曰：'南山塞天地，日月石上生。'然孟诗自是从老杜'仰看塞大明，渴日绝壁出'等句脱化来。

杜诗："诸公衮衮登台省，广文先生官独冷。甲第纷纷厌粱肉，广文先生饭不足。"而东野《吊元鲁山》云："搏鹯有余饱，鲁山长饥空。豪人饫鲜肥，鲁山饭蒿蓬。"杜云："公来雪山重，公去雪山轻。"而东野《悼汤衡评事》云："君生霁水清，君没霁水浑。"人谓东野语多戛戛独造，殊不尽然。

东野《蚊》诗："愿为天下 厨，一使夜景清。"此亦杜老"广厦"、白傅"大裘"意。又《达士》诗云："君看土中宅，富贵无偏颇。"后来杜牧之"公道世间惟白发，贵人头上不曾饶"即本其意。

渔洋评少陵《李潮八分小篆歌》，谓尚有败笔；谓韩《石鼓歌》诗雄奇怪伟，不啻倍蓰过之。此妄下雌黄者也。即以二诗结构言之，韩取杜之结意作为发端，势已不振。中间杜多顿折，而韩则如江河直下而已，第以其笔力排奭，故人不自觉耳。至谓《小篆》之败笔，不知其安在也？且《石鼓》诗："周纲陵迟四海沸，宣王奋起挥天戈。"又曰："蒐于岐阳骋雄骏，万里禽兽皆遮罗。"按岐阳之蒐，在成王五年。《左传》："武有孟津之会，成有岐阳之蒐。"则明非宣王。《诗·车攻》篇，美宣王狩于东都而作，东都乃洛邑，非岐阳也。

《屏山集》，南宋崇安刘子翥著。子翥字彦冲，靖康时通判兴化军。蚤年丧偶，自称病翁，隐居武夷山不出凡十七年。卒谥文靖。集分诗、文，各十卷，为其嗣子坪编次，其门人朱熹校正。有绍兴三十年籍溪胡宪原序。集于光绪十二年重刊，故首列长沙王先谦序，次附《宋史》本传，次朱熹《跋家藏刘病翁遗帖》，次乾道癸巳朱熹《屏山集》跋，次正德七年其十二世孙泽重刊，有建安梁储书后，次輓诗、祭文，次朱子墓表，次谥议。按《屏山集》在宋时，或只有胡序及朱子跋语而已，其本传及《刘病翁遗帖跋》与夫輓诗、墓表等，皆为正德间重刊时增入者。书非佳槧，而十一至十四卷皆五、七言古诗，忽殿以《过邕中》七律一首，恐亦非原本次序。宋人不尚《选》体，而屏山五言步骤齐梁，在当时为别调。近体不逮范陆，然颇得夷犹恬肆之致，如"石乱春溪急，山寒晓日高"、"嫩竹扶檐绿，残花盖地红"、"池清秋过雨，林静晚生烟"、"落梅寒崦静，啼鸟暮村幽"，其下字皆与人不同。

诗家采用诗料如制肴饌，然善烹庖者，五味调和，蔬菽无不可口；其不善者，即熊、鱼在手，亦无所用。明月、白露，至习见者也，而子美云："露从今夜白，月自故

乡明。"白玉、黄金，至陈熟者也，而荆公云："浮云堆白玉，落日泻黄金。"此皆化朽腐为神奇手也。因忆《侯鯖录》载元佑上元，廷臣和御制《观灯》诗，蔡持正叩王禹玉如何使事，禹玉曰："鳌山、凤辇外不可使。"章子厚笑曰："此谁不知。"及登对，上独赏禹玉"五凤云中扶辇下，六鳌海上驾山来"二句。

诗文家刻意摹古，亦是一大病。盖摹李似李、摹杜似杜，所得不过一假李杜而已，我之面目谁识之哉？梅圣俞诗云："韩子于文章，所贵不相侔效。譬彼古今人，同心不同貌。"真金针度人语也。

少陵下"青"、"红"、"碧"、"绿"等字，往往用重笔。如"绿垂风折笋，红绽雨肥梅"、"红入桃花嫩，青随柳色新"、"红稠屋角花，碧萎墙隅草"。后来惟半山时时效之，如云："岸红归欲稠，渚绿合犹晚"、"绿搅寒芜出，红争暖树归"、"绿稍还幽草，红应动故林。"又柯山诗："余天一剑青，远雨万丝白。"又云："风声转谷豪，雨脚射山白。"（《广化遇雨》）又云："晶莹高露湿，断续残河白。"（《赠无咎》）又云："鸦飞朝树疏，虫吊宵月白。"（《效陶》）四押"白"字，亦妙绝。

子美集中投赠太白之什甚多，然其称谓不一。如云："李侯金闺彦"、"南寻禹穴见李白"、"白也诗无敌"、"不见李生久"，前后一人也，曰"李侯"、曰"李生"、曰"白也"，或连姓名呼之，随其所施，此正见古人率直处。后世往往牵扯古人，不择其当否，赠张姓者，则云"留侯"、"博望"，赠陈姓者则用"元龙"、"孟公"之类，岂非可笑。

古人姓名之可以割裂者，如"马迁"、"葛亮"，见于诗文者，不为异也。其不经见者，如东野诗："赏句类陶渊。"又云："姜牙佐周武。"李商隐诗："沈约只自瘦，潘仁岂是才。"山谷诗："南冶从东家。"谓南容公冶长也。柯山诗："欲为洒洒潜，请学涤器如。""如"谓司马相如也，此则不足为训矣。

诗中评鹭一时人物，宋人最善此体。柯山云："长翁波涛万顷陂，少翁巉秀千寻麓。黄郎萧萧日下鹤，陈子峭峭霜中竹。秦文蓂藻舒桃李，晁论峥嵘走金玉。"半山云："冯侯天马壮不羁，韩侯白鹭下清池。刘侯羽翰秋欲击，吴侯葩萼春争披。沈侯玉雪照人洁，潇洒已见江湖姿。"其格防于杜之《饮中八仙》。惟杜诗有人下三四语者，而宋人语简，尤担斤两，故不得不假他物以为喻，且树语尤须坚卓，方得其人精采。

欧公《诗话》盛称晚唐诗人周朴"风暖鸟声碎，日高花影重"、"晓来山鸟闹，雨过杏花稀"等句。然今所传者，上联乃杜荀鹤之《春宫怨》，下联乃姚合《山中述怀》诗也。朴集欧公时已不传矣，公博古，其所举当有所本，不知后人何以窜入他人集中。相传朴自爱"禹力不到处，河声流向西"二语。有一士骑驴而行，遇朴，佯诵"河声流向东"。朴直追数里，告以"流向西，非东也"，当时传以为笑。欧公言其构思极艰，月锻季鍊，朴之苦吟，于此可见。

唐宋诗流传讹舛甚多。或一诗传为二人，并其体亦不同者，偶举一二。如杜牧："楚乡寒食落梅时，野渡临风驻酒旗。[A061]色连云人去住，水纹如縠燕差池。"而刘梦得《外集》作律诗，其下半首云："朱旂尚忆群飞雉，青绶初联左顾龟。非是湓城白司马，水曹何事与新诗。"秦少游《桥南纳凉》云："曳杖来追柳外凉，画桥南畔倚胡床。月明船笛参差起，风定池莲自在香。"而放翁集中作律诗，下半云："半落星河知夜久，无穷[A061]树觉城荒。碧筒莫惜颓然醉，人事还随日出忙。"

"却从巴峡穿巫峡，便下襄阳向洛阳"，杜甫诗也，而东坡效之云："恰从神武来弘景，便向罗浮觅稚川。""鸡声茅店月，人迹板桥霜"，温庭筠《早行》诗也，而欧公效之云："鸟声梅店雨，野色板桥春。""偶题岩石云生笔，闲绕庭松露涳衣"，杨徽之《僧舍》诗也，而放翁效之云："寻碑野寺云生履，送客溪桥雪满衣。"知古人偷模尤格，虽大家不能免，然终觉逊前人一筹。

随园《题子陵庙》云："未必无心助文叔，巢由两个误狂奴。"此偷宋人《题吕仙庙》诗"未必无心唐社稷，金丹一粒误先生"机轴也。又《题施全庙》云："雄心似在将军上，不斩金人斩太师。"此翻东坡《题贾梁道庙》诗"如今更恨贾梁道，不杀公间杀子元"意也。惟梦梁道杀己者乃司马懿，非司马师也，师字子元，东坡误记耳。

诗中用俗字，唐宋人多不同。宋人多用"许"字，如后山云："蝉鸣不余力，蛙腹能许怒。"诚斋云："芍药晚花终是小，戎葵新{忄含}许来多。"又《咏假山》云："细看分明非钉铰，如何雕得许玲珑。"诸"许"字皆作如许解。又诚斋云："略略烟痕草许低。"此"许"字作样字解。又云："倩谁留许春寒着，更放梅花住少时。"此"许"字作少许解。

"底"字，颜师古《纠缪正俗》云："犹言何等也。"然证之唐宋人诗，殊不尽然。杜甫云："花飞有底急。"陈无己云："风流一代今山简，有底樽前着葛强。""底"皆作这样解。

退之诗："泥盆浅小讵成池，夜半青蛙圣得知。""圣"字亦当时口语，而《潯南遗老笔记》以为："初不成池而蛙已知之，速如圣耳。"此望文生义而曲为之解也。又引山谷"罗帟翠幕深调护，已被游蜂圣得知"云。此"知"字何所属耶？若以属"蜂"，则"被"字不可用，此亦误解"圣"字之过。山谷语故稳顺也。诚斋亦云："网罗最密是蛛丝，却被秋蚊圣得知。"

奉贤朱庸先生家驹，举光绪己卯乡试，居于其县之泰日桥，与其兄粥叟（家骅）友于甚笃。粥叟举宣统元年孝廉方正。因筑两廉亭以颜之。先生以书名于时，而诗尤清隽。余与先生以文字为忘年交，自丙辰以还二十年间，书简往还，积稿逾寸。兹录其和余《小园书事三首》云："沈子恬淡人，频年倚书幌。吟诗到王韦，触处标俊赏。一晤隔紫芝，神交缅轩爽。寄我《小园》作，引人辄神往。尔时炎暑蒸，解

衣形骸放。谖然清风来，北窗与俯仰。新秋容易至，眉月天边上。静契谁得知，竹露滴微响。""儒冠世安用，凿枘圆与方。生涯老弥拙，直假睡为乡。魏晋诂足论，置我轩羲旁。闲来事农圃，逍遥拾野芳。新栽牵牛花，引蔓高且长。旧酿黄术酒，兴来时命觞。盲人赴深池，时事岂足伤。恤纬漆室中，徒自搅中肠。""桔槔夜无停，盛夏正渴雨。天运有迤邐，世事成枯树。兰成赋《小园》，玉杯自媚古。河山战一枰，愁翻白黑谱。贪人志已逞，黠货果焉取。高吟带商声，秋风满庭户。"

庚申春，小园杏花盛开。余招同社燕集花下，首唱七古一章，钞示远近同人。忆粥叟和诗有云："清觞速客半野亭，评泊杏花好标格。杏花标格何所似，除是瑶池仙绿萼。簪花不美曲江游，青衫惯耐春寒薄。曹步温又竟陵钵，寄我新诗珠错落。"今园亭易主，花刈为薪，觞咏旧游，多为异物。回首前尘，能无怅惘？

和余《杏花》诗者，徐慎侯孝廉公修云："梅花消瘦桃花夭，汝独嫣然擅标格。朝霞润玉嫩横枝，晓露含珠微破萼。匀碧吴绫映日妍，呈红蜀锦笼烟薄。此生无福入琼林，委弃孤芳傍篱落。"此盖借花而自为写照矣。

上海高太痴（翀），清季保举经济特科。工诗词，与其邑人蔡子（尔康）、南汇黄梦畹（式权）辈齐名。余尝驱车访之，时太痴赁居小校场，年已老矣，伛偻若支离疏，而双 卢炯然，因与剧谈移晷。所居曰百盆花斋。记其《自遣》一律云："占得鹑枝强自安，几人谈笑足盘桓。读书无用生何补，谋食方艰隐亦难。聊可浇愁惟浊酒，除非却病是金丹。百盆花好长勤护，抵得陶公运甕看。"太痴无子，有一女，亦娴词翰，字娟秀，学乃翁，见客能应对。太痴歿，不知其嫁于何所。

蔡紫黻先生，诗不多见，篋中仅存其稿一纸，亟录之。《日月云迈，忧心如焚，作为此诗，其何能淑》云："冷吟闲醉镇蹉跎，回首韶华瞥眼过。宿草凄迷知己少，秋花憔悴累人多。凭将《幻影》酬明月，（自注：尝作《广寒幻影记》，忽忽未遑脱稿也。）剩把柔情付逝波。况值蝸蟠羹沸日，未能忘世欲如何。"

孙作黼先生锦瑚，光绪乙酉拔贡，以词赋擅名。胡公端臣（祖谦）之守吉安也，爱其才，延聘衡文。晚年不得志，浮湛里闾，命俦啸侣，茗酒为欢。先生不多为诗，语诗则必推余。戊午以后，寓于其女夫华亭某氏家，以医自给。时于君仲迟倡修袁海叟墓，有诗。先生和云："堂前燕子尚飞来，海上鳗鱼去不回。（自注：海叟归，太祖语人云：'海上走却大鳗鱼，何处寻得？'）荒 冢秋高围碧黍，残碑雨过剔苍苔。词章惊动才人笔，风采留遗御史台。东望郊原寻往迹，那堪常使没蒿莱。"

汪秋轩先生锡涛《咏白燕次海叟韵》云："翩然宣至是耶非，五色天书近代稀。萧瑟空梁泥自落，吉祥虚室梦先归。素心谁与盟朱缕，皓首何堪补黑衣。铁 冢海庵遗迹在，春来好向故山飞。"二诗一以苍凉胜，一以刻画胜，工力悉敌，且两人之齿亦相若也。秋轩先生居邑之东门外，亦以词翰见称。

昆山龚勉行茂才恕，贫而多病，晚尤潦倒。尝馆邑中潘氏授徒，频与文字之饮。甲子齐卢之战，苏兵略邑城，勉行受惊悸死，稿佚。仅忆其有"灯影撩春思，花香解宿醒"十字。

魏塘张季，故世家女也。壬戌、癸亥之间，以任教员来我邑，袖其诗稿为贽。季年才二十余，自言婚七日而寡。善言笑，能饮，伉爽无脂粉态，而诗特温婉。《西湖花朝》云："苏堤柳腕最长条，燕织莺梭意太娇。一片红绡交付汝，为侬衔去系花梢。"著有《住春楼诗稿》，取东坡词"若到江南赶上春，千万和春住"意，自题云："望望住春楼，住春春不住。"余亦为题一绝，云："徙倚朱阑默怆神，百年俱是可怜身。柳绵飞尽莺花谢，偏是无聊说住春。"季为黯然。

客有自称"铁道人"者，不知其谁何，有句云："行难谐俗将成怪，归已无家尚惜身。"

杭州孝廉赵士新，宦游荆襄。鼎革时，遭乱东归，落魄海上，蒙袂携童仆乞食。有讶之者，即口占云："自从三楚来斯地，历尽千辛万苦中。稚子随亲形影瘦，老奴恋主苦甘同。曾登仕版名何在，今入穷途利更空。作谢诸君悲失路，他年相见报从容。"

上海王巨川（铨济），年少美才。岁己未，以习医寓东门潘氏。爱余"社近应知桑落熟，诗成恰有栗留催"句，愿执贽为弟子。余劝其诵《文选》。巨川心摹一追，不二载，几骖前修之靳。别后每有作，辄就余正可。印有《倚剑楼诗存》。为选录其雅饬者，《清明登天马山》云："寻异展幽眺，巘 杳青冥。绪风款佳节，淑气荡云凝。溪流激渊泻，涧毛舒繁萌。登蹑纵遥览，徙倚无近情。基高耸古寺，峦密建列屏。荒烟幂行径，杂英绣芳塍。低空云若絮，川原树如萍。理来祛群蔽，意得召咸亨。染翰托微咏，庶觉慰此行。"《溪泛》云："草亭独归处，秋色带前溪。落日孤舟远，空林一鸟啼。"《优昙庵》云："禅关面碧漪，寂历江村静。坐久夕阳深，松篁散疏影。"《八月十五日示沈处士》云："客感此佳节，流光空自嗟。孤村黄叶远，沽店碧溪斜。沉醉非吾事，狂吟独尔家。今宵明月好，喜得共光华。"《从童子出游城东，戏折杂花以归》云："城东之山青似黛，城东之水绿于油。野童山客兴不浅，乱折繁花插满头。"以上诸诗，皆其寓青时所作。佳句如"树深萧寺暝，帆落野桥低"、"天远星垂地，江寒月枕山"、"微雨成春梦，孤灯滞客心"、"欲暮残云红过屋，酿寒繁雨白连天"、"花开欲泼酒三斗，茶熟恰成诗半笺"。

余二十年前删削之稿有残句可存者，就记忆所得，姑志于此。"病骨秋同瘦，清愁夜共辰"（秋夜）、"梅熟无风堕，蛙荒到晓闻"（夏日）、"乱蛩声似雨，独树影疑人"（秋兴）、"为收花种先钞谱，故借桐阴当下帘"（初夏幽居）、"村醪淡薄无聊醉，禅榻清幽自在眠"（小昆山）、"人意比荷临水静，诗怀似雁入秋高"（秋怀）。

●初编·卷三

辛、壬已还，废孔之议汹汹朝野，学术风气壤乱益甚。上海姚东木先生文栋，冒当世不韪，首创孔教会，力持尊圣读经之说。梁节庵（鼎芬）、沈子培（曾植）、朱强村（祖谋）诸遗老附和之，东南士大夫稍稍响应。甲寅大成节，会员应赴曲阜助祭。以是年鲁省梗于倭，先生携其子若孙改道来孔宅谒圣。即日得诗三章，其《拜至圣衣冠墓》云："海内六经齐度阁，野人先进若晨星。衣冠于此珍遗蜕，《诗》、《礼》当初忆过庭。疑有壁丝千载响，空余墓草六朝青。吁嗟宫阙成禾黍，犹说南巡御墨馨。"《圣诞日释奠礼成，恭纪，叠前韵》云："万派朝宗归大海，北辰居处列繁星。圣人明德昭天壤，曲阜分枝此庙庭。三月难忘《韶》乐美，九峰遥接岱宗青。盛仪两地时同举，（谓曲阜）展敬宁惟黍稷馨。"《同人集愿学学堂，议立江苏孔教会支部，再叠前韵》云："二千年后沐时雨，五百里间聚德星。共喜朋簪瞻圣域，有如玉帛会王庭。爰兹虚室能生白，欲写遗经再杀青。（拟刊群经读本）文学东南原极盛，还期吾道遍流馨。"先生长于说经，诗非其好也。此则一时精神所聚，不假冥搜，几如凤鸣高冈，万羽息喙。

和东木先生谒圣诗者，占燕齐楚豫江浙闽粤川蜀滇黔辽津诸省之广，都四百三十余家，得诗八百首，刊有专集，可谓盛矣。顾佳什殊不多，病在作者徒搬演孔子故实及祀事套语，令读者不识祭者何时、何地、何人，徒苦其堆垛死尸，嚼蜡无味。此等阔大庄重之题，如何构局、如何置辞，须先斟酌，刘彦和所谓"构位之始，宜明大体"也。认清题旨，下笔自然移动不得。余最爱熊鞠荪太史一首云："东南圣迹衣冠在，盛会当年聚弁星。一自沧桑更故国，几多阶草没荒庭。今朝难得高轩驻，异日常留汗简青。古调独弹振聋聩，更欣兰玉满堂馨。"大气磅礴，包举不漏，自是具大本领者。

又长洲沈休穆先生修和诗，亦典赡工雅，云："一样神扃拥百灵，南方别子溯商星。独高名胜衣冠墓，也辟删修著作庭。经业至文光黝黝，儒衿坠绪色青青。合家《诗》、《礼》成三代，秩谒升堂素德馨。""麟祓今朝旧降灵，及阶瞻拜弁如星。宾趋侧向东西夹，神格先求上下庭。俗论何能淆黑白，圣言常若炳丹青。敷天薄海同遥庆，梦入昌平与荐馨。"

集中和作，次原韵者十居七八。独丹徒赵明湖（永年）七古一篇，气格苍浑，出入韩苏。为录于下，云："昔我游踪经曲阜，下车敬谒宣圣陵。满城杂花杏独盛，夹道表树松青青。时惟上丁际释菜，商彝周鼎陈庙庭。金丝堂前众乐具，当年冠履瞻遗型。驰驱南北二十载，坐看洪水来沧溟。人心向热若秦火，燎原几欲焚群经。乾坤不息道不变，浮云安得遮日星。青浦衣冠有虚墓，遗簪环壁传其灵。淳熙迄今迹可考，由拳亦得同昌平。仲秋习礼事绵，明禋黍稷腾芳馨。诸公辅翼在世教，诂为学子争光荣。虞山龟山共辉映，呜呼吾道其南行。""溟"韵自是探源之论。"经"韵尤奇，盖谓焚书之祸，不过秦政一人，今则人人蔑视圣学，为祸尤烈于烟燎矣。结用

言子墓作陪，亦他人所无。初，孔教会省有总会，县有分会，会有长。至丁未后，渐归涣散。殆道之兴废，固有天焉，不可以人力争乎？

东木先生初以贡士分发直隶县丞，洊保至盐运使分省补用道，官云南、山西甚久，复历使东西各国。生平邃于经及时务之学，著述宏富。其说诗专主乎经，观其《与方仁后书》可见。书曰："承赐青浦三子诗，削肤存翼，固为善矣。瘦东之序，溯源晋贤，而以盛唐为归，得所宗矣。力争上游，高处立，阔处行，此岂时下斗方才子人所得望其项背哉！但不佞更有进者，《周南》、《召南》，圣人时代、圣人区域内之诗人，其心中正和平，其气中正和平，其意亦中正和平。是为诗学之真源，亦为极轨，不可不探讨之。盖不明微言大义，不足以探作者学术、心术之原；不考转韵、间韵等方法，不足以知运笔之妙；不通古音而以今音读之，则韵学全乖而其声不谐。欲祛第一病，阅《圣经传说汇纂》最为简捷（此御纂七经之一）；欲祛第二病，详稽广森之《诗声分例》则笔自灵转（在《皇清经解续编》内）；欲祛第三病，以顾炎武氏《诗本音》作读本（在顾亭林《音学五书》内）。古韵之学，顾、江、段开其先，嗣后愈推愈精，以后者为胜，至常熟庞氏而止（庞书未出版）。"以上所举皆探讨之方法也。书中所谓"三子诗"，指仁后、行百及余三人合印小册。今二子墓丛宿草，而先生亦归道山。此书幸留余篋笥中，亟录存之，以公世之治诗者。

叶行百（春），性褊狭而好迁俗。山谷诗"每与俗物逢，三沐取洁清"二语，可以移状。其诗颇类《江湖小集》，如云："霜痕侵石发，寒意敛花心"、"忍饥餐麦饭，醒睡嚼茶芽"、"花中觅句诗常艳，酒后贪眠梦亦醺"、"家为买书添宿债，屋因依树得秋声"。其没也，东木先生輓以联，云："无聊借花木消闲，芒角未融，嫉俗灌夫常骂坐；不朽待枣梨补寿，心肝尽呕，苦吟长吉早成家。"

仁后长行百五岁，行百长余亦五岁，尝戏结为"岁寒三友"。仁后羸瘦，以松自居，先卒。东木先生亦輓以联，曰："造物不仁夺我友，正学有后昌之诗。"砌"仁"、"后"二字浑然无迹。仁后诗不多，其《怀孙作黼先生云间》云："一雨足生意，苔痕上石台。孤怀聊自适，三径为谁开。花气暖侵袂，茗香清到杯。思君独不见，南望久低徊。"《秋宵有感》云："孤灯成独影，坐听秋虫语。忽忆少年时，喁喁相尔汝。紫玉渺如烟，柔魂复何许。当窗生暗凉，轻风逗微雨。"皆见风格。

唐人诗多含蓄，其工者如云："玉颜不及寒鸦色，犹带昭阳日影来"，又"遥知小阁还斜照，羨杀乌龙卧锦茵"，"寒鸦"、"乌笼"皆托兴之辞，曰"不及"，曰"羨杀"，则语在此，意在彼矣。

司马温公《闲居》云："故人通贵绝相过，门外真堪置雀罗。我已幽慵僮更懒，雨来春草一番多。"宋人绝句，此境最不易到。

宋人绝句清隽可喜，有唐人不能过者尚多，而各家选本皆不录。殆羊枣脍炙，口之

于味，耆好有不同乎？为钞数首于下。刘克庄《海棠》云："几树繁红映碧穹，芟萝山下见芳颜。分明消得黄金屋，却堕荒蹊野径间。"方回《清湖春早》云："楼上春阴覆晓云，一湖天净碧沄沄。雨宜不骤风宜细，闲倚阑干看水纹。"高翥《冬日即事》云："江上凝冰约水痕，门前残雪缀溪云。杖藜独立梅梢月，成就清寒到十分。"叶绍翁《九日呈真直院》云："秋风吹客客思家，破帽从渠自在斜。肠断故山归未得，借人篱落种黄花。"陈起《夜过西湖》云："鹊巢犹挂三更月，渔板惊回一片鸥。吟得诗成无笔写，蘸他春水画船头。"吴惟信《秋夕》云："南风吹露下秋空，乌鹊无声占碧桐。天气微凉人好睡，阑干闲在月明中。"谢翱《秋社寄山中故人》云："燕子来时人送客，不堪离别泪沾衣。如今为客秋风里，更向人家送燕归。"黄庚《池荷》云："红藕花多映碧阑，秋风才起易凋残。池塘一段荣枯事，都被沙鸥冷眼看。"徐献可《书斋》云："十日书斋九日扃，春晴何处不闲行。瓶花落尽无人管，留得残枝叶自生。"

余尝与葆荪论诗，谓今人所以不如古人者，大抵古人诗如画家写烟峦云物，但取其神，故生气远出；今人诗专以描眉画角、刻缯染縠为工，形存而神去矣。

山谷诗，气韵、格调都与人不同，然往往喜剽剥陈旧，不知其何故也。如《过赵景珍墓》云："今日牛羊上邱垄，当时近前左右嗔。"此全用古乐府语，只易"面发红"三字写"左右嗔"耳。又《黔南绝句》云："相望六千里，天地隔江山。十书九不到，何用一开颜。"又云："病人多梦医，囚人多梦赦。如何春来梦，合眼在乡社。"此全本乐天《寄行简》"相去六千里，地绝天邈然。十书九不达，何以开忧颜"、"渴人多梦饮，饥人都梦餐。春来梦何处，合眼到东川"语也。又《次韵吴宣义三径怀友》云："佳眠未知晓，屋角闻晴哢。"此明明孟浩然"春眠不觉晓，处处闻啼鸟"意，只数字不同耳，而叶少蕴以为"诗人点化前作，如李光弼将郭子仪军，重经号令，精采数倍"，真可发笑。

嘉善朱卣香明经锡<耒巨>，为人豪迈，善饮，家贫以训徒为生。诗虽多，然大半怡荆之体。近得其《分湖棹歌》数绝，曼辞清唱，不啻古《竹枝》、《水调》之遗。为录如下，云："郎住湖东妾住西，盈盈一水短长堤。郎身体逐伯劳去，妾意常防姑恶啼。""两岸垂杨一绿溪，小船不碍板桥低。劝郎沙际轻移棹，交颈鸳鸯正稳栖。""妾到郎家种水田，西风乍起一湖烟。菱多棱角莲多子，不爱菱花祇爱莲。""千顷澄波混太虚，泛舟秋夜不嫌孤。月光吞吐双蛇口，（湖有南、北蛇口。）疑似明湖一颗球。"

常州钱名山先生振铎诗善写性灵，皆人人意中所有，人所不能言而先生能言之。其与余论诗书云："诗要有理，有理而后有味，至于有味，斯为天下之至言。"又云："诗要篇篇有我，字字见心见骨，然后被之以古藻，出之以远音，足以历万古而不朽。"其持论之高如此，则其所学可知。余与先生交在辛酉之岁，读其诗于报端而异之，因以书自通，并献诗为贄。而先生谬以知己引重，且屡许拙作为非今世之诗。尝

赠句云："吕大坟头宿草烟，汪伦遥隔海南天。眼前莫道无知已，新得吴兴沈下贤。"嗟夫，庸妄如不佞，何敢居于作者之列，乃辱通人扬谕至于斯乎！吕名光辰，字绪承；汪名兆镛，字惺吾，皆先生文字交也。

先生自言少日为诗，喜驰骋于法度之外，务求快心，故多伤于浅。余谓圣人亦只取辞达而已矣，惟浅，乃能达；若艰深，何能达乎？

先生与余论诗书，前后不下数十通，多精微之论。有经乱而散亡者，不能忆矣。姑录其存者，书云："弟生平爱诵太白、乐天，于明喜袁中郎，于国朝喜随园。中岁始觉近代诗品不高。而鄙人少作则大半化劫灰矣。大率唐宋诗人无过于李、杜、韩、白、苏、陆，又其次为遗山，遗山之后，未有遗山也。"又云："尝观朱夫子论诗，有'上头一关'之说。妄意'上头一关'即'天命之谓性'也。解得'天命之谓性'，则如登华岳，呼吸可通帝座，尚何邱垤之足言！"又云："近日读放翁暮年诗，多选本中所未见，亦快事也。放翁精神，自足千古，其合者，陵轹杜韩矣。所不逮古人者，惟太多耳。然放翁之寿，为从古诗人所未有，穷老且鰥，而牵于未竟之年，不作诗何以遣日？此其诗所以不得不多也。"此论亦前人所未发。

余与名山先生捧手，则在壬戌之冬。初，先生书来，期于沪上相遇，曰："将迟君于一乐天茶社，见癯而髯者，某也。"及期，先生前至，待且久。适有拆字者来，使拾一字猜之，不中，拾数字皆然。情急自拾之，乃一"黄"字。喜曰："寻至矣！'黄'去'田'为'共'，只一田之隔矣。"因谓其人："汝江湖卖术者，乃不我若乎！"有顷，余果至。言其事，相与抚掌。按拆字源于《左传》之"二首六身"，而其法备于汉人之离合诗。隋时，宫中有拆字令，始见"拆字"之名。至流为技术，则盛于宋宣和间之谢石，当时亦谓之"相字"。（《春渚纪闻》有《谢石拆字》一则，则亦谓之"拆字"矣。）《玉堂杂记》载，有士人戏以"乃"字为问。石曰："及'字不成，君终身不及第矣。"又有人遇于涂，告以妇不能产，书"日"字于地。石曰："日'出地上得男矣。"石高宗时以相"春"字谓："秦'头太重，压日无光。"忤秦桧，死戍所。

松江张闻远孝廉锡恭，鼎革后由郡城移居小昆山祠屋中，懔袁闳土室之志，足迹不履城市。生平穷究经史，尤精三《礼》。尝见重于张文襄公，延入湖广督幕。既而膺礼学馆之聘，编纂礼制。与吴门曹君直（元忠）、叔彦（元弼）论《礼》最相得。甲子齐卢之战，先生避兵之张泽而卒。时值两军对垒，市无人迹，几至无以饰终。先生无子，由红十字会为之敛焉。名山先生哀之以诗，曰："先生身居碧玉屏，炯然云间一曙星。终年闭户注《礼》经，神游三代通古灵。髡者到来不拔扃，欲往从之求典型，首阳山前战血腥。今年宣统岁甲子，月日先生赫然死。敛无棺衾拜无子，亡国遗民合如此。君不见沟壑从来属志士，安用污人红十字。"名山不殽发，言必称先朝，宜其吊遗民而辞之哀也！惟诗意似言孝廉没于小→昆，或当时传闻异词乎？

有友为余言，某年郡中拟修志，有司以总纂强闻远先生，赍函往聘，封面书"张闻远先生"字样。先生不开拆，提笔书"先生不来"四字却之。

华亭张兰仲有题其兄伯英《茜青阁听雨填词图》一绝，云："珠箔银灯掩画楼，墨香鬓影太风流。梧桐未冷芭蕉碎，难遗春宵一段愁。"余谓改"秋"字较好。盖秋来蕉桐滴雨，愈觉萧骚，况秋士多悲，不尤难为怀乎？兰仲名联珠，诗甚尚书之孙。尝寓居汉皋。有《湘兰秋景室诗》一卷，诗多缘情绮靡之作，盖学温李而未至者。其《寄李芋仙海上》云："纤厘绵花鸟牵情绪，萧瑟江关感鬓丝。"则不啻自为写照矣。

奉贤庄漱润孝廉礼本，嗜酒好内，不拘仪检，卒年裁三十有五。尝见其《送华亭雷君曜孝廉自彝陵归省》一绝云："长江此去四千里。送子东归欲断魂。我已无家归未得，天涯岁晚又黄昏。"神韵凄然。盖客中送人还乡已属难堪，况其地远在天涯，而其时又岁晚又黄昏乎？此法全从乐天《舟中读元九诗》及《寒食夜有怀》等绝句得来，所谓四、五层写法也。

漱润尝纳一妾，当湖产也。迎归，居之留溪，字之曰竹台，名其所居曰湘秋馆。庚寅将试礼部，书联榜于室曰："玉关杨柳愁边句，金镜夫容梦里人。"未几，竹亭病卒，竟成语讖。漱润效迦陆为作《惆怅词》八首。庄诗不存，今录其邑人郁隽夫明经文盛和诗第三首，云："湘秋馆里夜迢迢，说部荒唐破寂寥。聪颖独怜才子笔，清扬爱谱水仙谣。聊将哀怨传瑶瑟。欲把良缘问玉箫。如此解人真未易，柔魂应恐不胜销。"又佳句如"薄曳香罗频顾影，低颓凉髻学填词"、"好梦难追空写恨，瘦腰如袅不禁秋"、"绣阁谁拈长命缕，蓬山难觅返魂香"，其气味与樊榭悼其姬人"月上"绝相似。

樊榭《悼亡姬》七律十余首，余最爱"将归预想迎门笑，欲别俄成满镜愁"一联，谓非善言情者不能道，然自是从元微之"别常回面泣，归定出门迎"二句脱化来。

隽夫别署醉红词人，工为步韵诗。尝见其稿，有与了公唱和叠韵至数十首者。其人言谈渊永，有静者机。光绪末，为松江府中学堂教员甚久。忆其答余《寄怀》诗云："高山流水许知音，好句传来击节吟。望古每多身世感，含毫想见妙明心。灯窗寂寂摇红影，庭院沈沈罩绿阴。知否怀离何日释，腊梅风里到如今。"诗在宣统初作，乃余交游中最初投赠诗也。

杨石年（轺），字子乘，佻舞生。家奇贫，少时从其舅氏为装潢匠，因得涉猎艺事。其所为书画不俗，而有寒俭气。宣统庚戌入楚，佣书川汉铁路工程局，光复军起，始归。有《感事》云："巴云巫雨感苍凉，楚塞争开逐鹿场。滩接香溪湍似雪，天连铜岭壁如墙。啼猿处处催归急，唳鹤声声引恨长。回首黄尘蒙白帝，东来烽火黯残阳。"石年性介特，在楚囊金稍裕，旧时交游中逋负，皆一一封还之。

吴廉臣（昌寿），诸生也。性孤僻，家贫，然好博，四十后略知医，尝有句云："无钱且袖挥金手，有病常延服药身。"

余爱李秉心"花片已从帘外落，鬓丝怕向镜中看"二语，时为人诵之。秉心好客，喜填词，能度曲。家故饶裕，以不善治生产寝至衰落，弗顾也。尝有《感怀》诗云："有酒不妨同客醉，无心随在与天游。"

●初编·卷四

欧公古诗学韩而不及韩，近体不学韩而胜韩，何也？盖退之古诗如波涛蹴天、风雨疾至，往往横空盘硬语，而欧公无之；欧公律体清新妩丽，如风日流晖、花竹掩映，而退之无之。一能柔而不能刚，一能刚而不能柔也。坡公云："端庄杂流丽，刚健含婀娜。"惟老杜能臻此境。

宋人惟苏子美诗最乏姿韵。子美古体似欧，然句法之圆熟、节奏之谐合不逮欧远甚，由其锻链蕴藉之功少也。昔人评昌黎"以文为诗"，然其《秋怀》、《南溪始泛》等作，清微闲远，虽陶谢不能过。欧公学韩已觉费力，子美无其才，强欲效颦，徒增其丑矣。然其律句则多有可诵者，如"残日花间浮暖艳，断云楼外卷轻阴"、"池中绿满鱼留子，庭下阴多燕引雏"、"春入水光成嫩碧，日匀花色变鲜红"、"竹密似嫌闲客入，梅含应待主人开"、"龙听夜讲寒生席，鸥伴晨斋暖戏庭"。

圣人不以人废言，昔人以荆公为人拗强乖僻，至谓其诗无一语自在者，是直欲以人废言矣。余谓荆公古诗故作惊人语，时或有之，至其近体，无不循声按律，其支对之工整，有非当时苏黄欧苏所能并者，何尝拗强乎？若夫"花枝到眼春相照，山色侵衣晚自迷"、"柳条不动千丝直，荷叶相依万盖阴"、"野草自花还自落，鸣禽相乳亦相酬"、"山鸟自呼泥滑滑，行人相对马萧萧"等句，恐舍此更无有自然者矣。随园不读其全集，随声附和，甚至诋其于诗终身在门外，非所谓信口雌黄耶？随园举荆公"青山扪虱坐，黄鸟挟书眠"二句，讥为"上句乃乞儿向阳，下句乃村童逃学"。然《临川集》中无有也，惟见于《石林诗话》，以谓荆公爱子美"钩帘宿鹭起，丸药流莺啖"而效之者。余谓此或当时偶尔戏笔，不足据为口实也。

荆公古诗多近韩，近体以七言绝句为最精。今撮录其律句下字之新异者，如"草长流翠碧，花远没黄鹂"（《东皋》）、"城云漏日晚，树冻裹春深"（《岁暮》）、"邻鸡生午寂，幽草弄秋妍"（《示无外》）、"日催花蕊急，云避雁行高"（《寄深州晁同年》）、"风泉隔屋撞哀玉，竹月缘阶贴碎金"（《竹》林寺）、"长树老阴欺夏日，晚花幽艳敌春阳"（《答平甫》）；又其语之锤链者，如"露夕吟逾苦，云秋思共高"（《赠简道人》）、"树疏啼鸟远，水静落花深"（《宜春苑》）、"高阴凉易入，闲貌老难增"（《游栖霞庵》）、"落日更清坐，空江无近舟"（《江上》）、"病身最觉风露早，归梦不知山水长"（《葛溪驿》）。至若"僧残尚食少，佛古但泥多"（《重游[A061]堂次韵》），则以荒野见长；"山鸟自呼泥滑滑，行人相对马萧萧"（《送项判官》），以自然取胜；"斜倚水开花有思，缓随风转柳如痴"（《金明池》），以韵致致工，皆为人所不可及。

云间诗派，乾嘉而后大抵祖述陈黄门，以组綦华缙为主，亦间有祈向渔洋者。近数十年转趋北宋，多以清越矫健见长，殆风会使然也。余于云间诗人最先相识者，耿伯齐、杨了公、吴遇春等数公而已。遇春谦和朴诚，而诗则多嫉俗愤时之意。《除

日》云："一褐霜寒强自持，襟期寥落付谁知。病阿高卧空今日，沧海横流感此时。无复拨灰书闷字，联凭清酒祭残诗。明朝年例探 某去，整顿奚囊马后随。"《九日次鹧鸪韵》云："又是登高节物殊，万山敛翠向吾徒。卅年英气当秋尽，九日黄花入世孤。乱后持杯难作健，静中闻磬一为娱。故人溟渤游初倦，（时鹧鸪方自南洋归）能对西风作赋无？"《游莲花庵用郑太夷韵》云："向晚独寻江上寺，萧然万籁意还多。一声清磬沈幽阁，十里晴云照素波。劫后河山花自暗，梦中岁月鸟初过。飘零身世何堪美，只办微吟遣睡魔。"诗亦极意规模海藏。《雨霁怀几园》起句云："落叶寒阶负手行，远山云敛破微晴。""远山"七字，画所不到。《即景》云："俯仰人间事事非，沈沈斜日感芳菲。轻阴阑槛闲凭久，水柳微黄欲上衣。"此则子野所谓"每闻清歌，辄唤奈何"矣。

遇春五言古不多，然亦选词清隽。如《怀几园鹧鸪半淞园沔社》云："经乱少睡眠，《茅屋》杜陵句。风雨送七夕，兰襟间清露。词人例悲秋，莫续《登楼赋》。摘藻追建安，南皮差可步。白沔半淞水，映酒花无数。云树两迢迢，相思隔江路。"其他佳句如"风停香自篆，庵老树忘年"、"砚云还作雨，杯酒欲浮山"、"龙眠潭水静，云冷寺钟秋"、"梅边人去一楼雨，江上寒多五月秋"、"桃天时节饴箫暖，酒熟人家燕笋肥"、"梦魂胡蝶仙将化，诗思梅花冷不如"、"短檠横壁年光老，残柝吹城露气寒"、"江岸飞花三月暮，园林新绿一鸠呼"，大半可书作楹帖。

遇春有"万松人语冷"及"天高凉雁傍云呼"，皆佳句也。惜属对俱逊，可知掘得玉盒子，欲底盖俱称，殊不易能。又"鸦衔缺月立檐端"七字甚奇，惟忆《散原精舍集》中亦有此句，只一二字不同，或无心暗合乎？

了公初名锡章，字子文。清季以明经为宝山教谕，愤郡守戚贪墨，上于中丞某，某受赇左袒，坐是落职。尝或狂歌、或痛哭，郡人咸以"杨痴子"呼之。中岁好参禅，始号了公。其为人不同于俗，亦不迁于俗，以故佗父贾竖无不愿与之交，而不知其皮里有阳秋也。工为绝句，吐语皆蝉蜕尘埃。《西泠杂咏》云："山楼隔雨一尊开，看我轻摇双桨回。静对微风先欲醉，为他吹过酒旗来。""柳边双桨小于艇，点破湖濳一顷青。料有幽人烟雨里，杨花飞后拾青萍。"《示心香》云："沉沉帘幙夜阑珊，照我秋魂月一丸。断吟髭曾未得，回头一笑有双鬟。""生小杨枝金缕烟，嫩春已自解缠绵。撩人愁绪长堤外，一带游丝拂过肩。"《酒后》云："几丝暗笛杂秋悲，商略残春懒画眉。为忆白门姚水部，东风吹梦过江湄。"又"花事浑疑梦，春声半在诗"十字亦隽逸。

壬子之冬，了公客游青溪，信宿寒斋。余作《相逢行》赠之，此为余与了公定交之始。中间一遇于珠里，余又赠诗曰："沧海三年别，星星忽上颠。诗追蒲褐老，秋话木犀禅。小阁看云坐，高斋听雨眠。书生最堪惜，辛苦卖文钱。"忆了公同作，有"横云分片席，与子对高眠"之句。戊辰之秋，余访之于海上之南市时，了公已六十余，以粥字与其姬人赁一小楼。因欢然留饮，酒酣，见其幼子荷衣总角，年可十龄所

。了公指余造之曰："此瘦东先生也。"问"东"字写法，则应声曰："日在木中。"口齿伶俐，老凤之雏，固宜尔尔。是夕，了公欧吐汗茵席，曰："余不饮久矣，不谓竟为君而醉也。"自是以后，遂无音问。未几，阅沪报，知已捐馆舍矣，悲夫！了公工填词，遇能诗者，辄鬻为诗钟。客方沈吟，了公则十数联已叉手而得，其才思敏捷如此。书则初摹板桥，后仿石庵，间出入篆叟，笔润所入，多振瞻困乏。其诗词稿手自写定印行，顾丛残零落尚多，余于遇春处见之。

"乐志昔曾随老叟，一尊今日喜逢君"，此余二十余岁时，耿伯齐先生道冲赠余句也，以沈约斋晚号乐志叟，故举以相勖。先生以光绪乙酉拔贡，朝考一等，授户部七品校书官，久次郎署。鼎革归，就张温和公松风草堂旧第结松风诗社。平生尤耽书，晚年双目失明，犹能窗光弄笔。索书者多，亦不自矜重也。先生为人，不立崖岸。论者谓其人品第一，书次之，诗又次云。

光绪甲申，学使者瑞安黄体芳莅吾郡校士。黄氏躯干短小，而旱烟管甚长。其为人峭直刚正，士皆严惮之。道试之有提覆自其始。时吾邑正场诗题为《牧子唱歌樵子笛得山字》，通常¹童皆茫然不知所出。校毕，黄命诸生前，责让之曰："此贵邑本地风光，凌崑《咏薛山》诗也。尔等读书太少，可去努力用功。"储生唯唯而退，盖当时慑于颂礼，无敢抗辩。其实此等冷僻之句，即老师宿儒之博雅者，亦安能偏览及之？按崑字山英，号石泉。其先少师哲，靖康中，随蹕南迁，遂徙家华亭。崑元时弃举子业，隐九峰间，足迹不履城市。九峰皆有题咏，时称"山史"。其《咏薛山》云："五峰遥隔水村西，薛老曾来隐翠微。牧子唱歌樵子笛，贪看明月夜忘归。"史言其诗"锵鸣秀拔，具有大历之风"。著有《古木风瓢集》。

嘉道间，淀西诗人首推王宾竹（浚）、蒋愚溪（清瑞）二先生。宾竹诗以格胜，愚溪诗以韵胜。愚溪晚年，尤好放翁，如"诗为补成行断续，书因抽读帙纵横"、"键户浑如藏巢²，入城真似怕于菟"、"床头钱为收书罄，盎底粮还与鹤分"，皆可乱《剑南》楮叶。尝与娄县姚春木上舍诗筒往还，而宾竹亦及交王兰泉司寇。顾没后声名翳如，即何藏翁辑《青浦续诗传》，亦未甄录及之。欧阳公所谓"勤一世心力于文字间者，皆可悲也"，诚然。

宾竹所著曰《琴言馆稿》，凡二百余篇，大抵清而不削、秀而不靡。余最爱其"秋高万木霜边落，云散诸峰鸟外看"一联，以谓可与放翁"山从飞鸟行边出，天向平芜尽处低"互争奇胜。宾竹年十五时，塾师命赋《杏花》诗，援笔立就，有"春到江南刚暮雨，吟来村径又清明"之句，为时传诵。

吴江为诗人渊薮，有清一代，如计甫草、潘次耕、郭频伽诸人，皆蜚声坛坫。余于海内诗人识金子松岑（天翮）为最早。松岑天才踔厉，词藻缤纷，而又好壮游。所至，名公钜卿无不倒屣。眼界广，境地高，故其诗沈雄奇伟，骏骥乎欲驾其乡先哲改亭、灵芬诸家而上之。其稿曰《天放楼》，樊山、苏戡诸公皆为之序，而论之详

矣。兹特录其俊逸者，《岁莫纪行》云："檐鸦轧轧鸡喔咿，霜欺蓬背寒入肌。推蓬启窗迎翠微，穿林出罅阳乌逗。乾腥坤膩风刮垢，深山大泽龙蛇瘦，我欲探珠刳其脰。好友王郎东海归，方冬蛰影来穷扉。珊瑚不付钓人手，虽有不龟之药何能为。归来订作十日饮，消寒诗句争先题。趲程前去勿复道，冻萼已破邻墙西。"《仲夏大雨，连日不休，因忆同俊卿、冶民游任氏园，有作柬俊卿》云："盲风怪雨足三日，修竹万竿摇我窗。东龙西龙攫日走，檐溜急涨成秋江。坏墙角塌树折臂，青奴一夕寒凜霜。追思观鱼任昉宅，荷背万雨声琤琮。莲房今倒百亿数，兴至便欲擎小双。故人近日有诗句，莓苔绿到君书幢。"《衡山城外投山家宿》云："衡山负郭风景稀，桑柘夕阴人叩扉。水阁临湘背岳坐，垂竿钓得鳊鱼肥。番茄盐豉伴脱粟，貰酒为典风风衣。酒酣缺月上东岭，熨眼隔江看翠微。衡阳艇子放江溜，夜深掠过门前矶。铁笛惊起雁奴梦，红灯掉头去若飞。乱峰沈沈压江重，衡山负郭风景稀。"《瓜州晓发》云："荒鸡渡头唤客眠，角声咿咿霜满天。榜人欵笑动篙楫，平明好放瓜州船。我行蓬转二千里，水宿星饭尘土缘，眼明喜见江南山。江风吹人试新寒，江波浸湿金焦拳。推蓬大笑江天宽，红日捣碎颇黎盘。"《藤东水榭》云："藤东起芳榭，秋水琅玕净。清风约沧漪，鸡梦微醒。高柳踈长条，丛芦摇瘦柄。夕阳过前川，余霞向谁赠。人生蚁旋磨，红尘苦奔迸。物我两岑寂，颓然百虑凝。烹茶汲寒漪，诗思归幽迥。"《春日石湖寻隐者》云："春畦豆苗长，芳渚鱼肥。一夜东风恶，桃花满钓矶。溪山行蹊屐，冷暖出添衣。言访故人去，隔湖看翠微。"《桐庐客舍题壁》云："乌篷昨夜听雨卧，今日桐江浣客衫。两岸青山帷帐似，独依高枕数风帆。"

松岑诗亦有效古歌行者，如《红曲》、《妾薄命》等作是也，惜篇长，不能录。又《杂咏》云："卒夷花开四月初，梁间燕子双哺乌。乌尔腹中饥，啾啾时对老燕啼。乌也翼燥能习飞，老燕逗之相依依。一夕秋风下庭树，分飞自向海南去。明年小燕亦成家，不认当时哺乌处。"东邻老农筑场圃，西邻小儿习商贾。南邻公子交侠少，使尽黄金买歌舞。天生智力贵自养，蜂房亦自开门户。蜂能作蜜自家甜，谁信当时酿花苦。南山种松柏，志欲成栋梁。桃李当春花，实成蠹已伤。欲走长途须要裒，欲贡明堂非窈窕。河汾安定一朝生，中原大事凭人造。鹵莽下种鹵莽报，石女无儿焦谷槁。"繁声促节，亦得张王遗意。

戊午，余游吴中诸山归，过松岑寓庐。松岑曰："我诗夙以大家自期，今知其不可，甘退而居名家矣。"其自负如此。尝有诗赠余云："清霜夜醉吴枫丹，吴山晓出千髻鬟。九峰诗人过闾阖，萧然曳杖敲禅关。我坐闭门种秋菊，两脚未许骋弩顽。长髯急足走诗札，掇我云烟苍翠间。吴中近来名士少，风雅沦替诗骨孱。君诗迥出意象表，高揖裴王欺谢颜。城东大徐癖耽句，（青浦徐伯匡时客大郎桥）。屐齿同印苔痕斑。方春柳絮集佳咏，恨我体物非素娴。晨风树远鸟相应，平地寸步缘何怪。仲冬怀人天欲雨，舡声秋雁江上还。出郭远望渺云树，暮鸦结阵盘青山。"

自西人研求声光化电之学，于是舟车日用诸物无不巧夺天工，而诗文家集中亦因而

拓一异境。顷得庐江刘锡之《咏火轮车二十二韵》，甚奇伟，云："奇肱驾飞车，驭风行海外。曾闻殷汤年，一至豫州界。遗制绝不传，考工竟茫昧。遐哉欧罗巴，奇技逞譎怪。爰有客德雷，创物巧诚最。剡木为轸衡，范金作机械。阴水蒸洪炉，阳炭鼓巨。火激汽机行，水转轮轴快。后车数十乘，一一相钩带。衙衙龙尾衔，节节蛇骨蜕。疾似箭离弦，轻若舟击汰。初则运煤铁，继乃远行迈。支那幅员长，健步烦竖亥。西南起夏口，直北走燕代。延袤三千里，功费亿万大。凿山通崭岩，架梁度奔瀨。蜿蜒铺铁轨，匍匐驰玉軼。浓烟一缕飘，十丈起埃。有如费长房，缩地咫尺内。朝发汉阳城，夕至卢龙塞。商贾既骈阗，行旅无阻隘。陋彼迂儒言，迂巧古所戒。"此盖咏京汉铁路。锡之字体蕃，著有《双井堂集》。

叶行百有《咏电车》云："世上人争趋捷径，天涯我欲泣岐途。"《电灯》云："纵有光明难烛怪，却无形影可瞒人。"《电扇》云："座上人情都觉冷，世间机变已成风。"《电话》云："播舌元知多好事，闻名终觉是虚声。"正喻夹写，尤见巧思。

海上宰牛有公司，有机器，机埋地穴中，一牛曳入，弹指间出，则皮骨分离矣。每日杀牛以百数，其头累累堆如山阜。以故牛牵近铁栏，泪如雨下，不肯入。强拽之，乃行。名山先生有《哀牛篇》，读之惻然心动。盖西人之残忍惨酷，无有过于宰牛者。诗曰："峨峨铁轮车，衔尾走上洋。中有千百牛，两两自成行。蚤起牛十百，夜来牛百十。牛去无休时，车行不断绝。一去不复还，使我三叹息。海上百年来，久作 亶夷场。 亶夷喜食牛，食牛筋力强。夷人多智慧，杀牛术更奇。驱牛入暗弄，一跌蹈危机。立刃锐绝伦，自项决至脐。皮骨与血肉，倏忽皆分离。更有擢筋法，擢生不擢尸。口箝不得鸣，泪落如纆縻。嗟哉天地间，此痛无人知。中原重耕作，田亩岂尽辟。贫家无牛只，终岁不休息。富家买一生，视作平生业。旱岁田不枯，潦岁田不没。人命与牛命，厥价正相直。在天垂列宿，在《易》著坤德。胡为自弃髦，仅供犬羊食。牛莫仰太息，天道正难知。牛莫向人号，人心正媚夷。不鸣其奈何，怨结有还期。颇闻欧罗巴，蚤触正伏尸。流血赤海赤， 火无歇时。嗟我神灵国，理岂无起伏。会看一夕间，风雷起大陆。蠢彼介鳞俦，么麽不足肉。但有愤泄时，牛死当瞑目。"

世变日亟，其祸且及于禽兽。录名山先生《哀牛篇》竟，复得湖北京山汪觉非（染青）《捕狗谣》，云："官中下令大捕狗，贫家狗亡十八九。捕得一二囚之车，欲脱不脱鱼在筭。狗不知死但苦囚，跳跟奔突兼 皋吼。岂知出生即入死，须臾命尽屠伯手。六七年来变非常，巧法暴力恣践蹂。刀俎鱼肉实多门，菹凤醢麟无不有。"结云："为问狗也何由官，项下一物如垂绶。为问此物何自来，有钱但向官中取。"时当道以城镇之犬有碍卫生，巡警得捕杀之，著之令甲。但蓄狗之家出钱捐一口套，官即保护免其厄。此诗冷嘲、热骂兼而有之。

诗篋中得陈无邪《观猴子戏》古风一首，可谓形容毕肖，诗曰："大猴毛缓缓，小猴足。铜钲声仓琅，旁观立成壁。白日开广场，大猴坐中央。大猴俨若神，小猴

走且僵。大猴有转侧，小猴奉颜色。小猴何殷勤，大猴怒不测。有时大猴舞，小猴旁击鼓。大猴舞不止，小猴鼓声苦。大猴跨小猴，小猴俯作牛。大猴执鞭笞，绕场恣遨游。忽焉思为王，大猴着冕裳。小猴充侍从，屈体能趋跽。薄暮风<风刘>々，猴状演益丑。主人麾以肱，帖耳随之走。赫濯万尊严，顷刻复何有。吁嗟世态奇，猴也能得之。作戏聊自娱，汝猴真可儿。"无邪名训正，慈溪人。此诗似为丙辰袁氏称帝而作。

●初编·卷五

古人评陶谢诗，谓谢康乐、庾义城之于诗，不遗锤炉之功，然陶彭泽之墙数仞，谢庾未能窥者，何哉？盖二子有意于俗人赞其工拙，至于渊明之于诗，直寄焉耳。此非深知诗者不能道。故陆放翁云："俗人犹爱未为诗。"又云："诗到无人爱处工。"后山云："善为文者，因事以出奇。江河之行，顺下而已，至其触山赴谷、风转物激，然后尽天下之变。子云惟好奇，故不能奇也。"余谓诗亦何独不然。张文潜《答李推官书》"决水于江河淮海"一段，亦是此意。然古今好奇者多，自是文人一病。

子美《寄韦郎中》诗有"柴胡通汗"之语。《驱竖子摘苍耳》云："卷耳况疗风，童儿且时摘。"《催宗文树鸡栅》云："愈风传乌鸡，秋卵方漫吃。"他云："药饵憎加减"、"晒药安垂老"、"丸药流莺啖"，可知此老于方药亦颇推究。不然，加减丸晒安得有如是之通晓乎？诚斋诗多使用俗语，而为他集所无者。如云："寂然窗户黄昏后，霍地琼瑶一望中。""霍地"犹蓦地也。"芍药晚花终是小，戎葵新{艹含}许来多"，"许来"犹如许也。"行人自趁斜阳急，关得归鸦更苦催"、"天光淡青日光白，道是云汉也则得"、"儿啼惊觉梦中身，恰则华胥政问津"，"关得"、"也则"、"恰则"，"得"、"则"，皆语助也。"略无好句偿新惠，只么从权只么权"，"只么"，那么也。"只今新暑已歛然，作么禁当六月天"，"作么"，怎么也。"君今结茅阿那边"，"阿那边"，那边也。"迟日何缘似个长"，"似个"，恁个也。其他如"生儿底巧翁何恨"、"看山偶忘归来却"、"一年好处君知么"、"朔风恶剧惊人杀"等，尤不胜枚举。

《梦楼诗集》二十四卷，丹徒王文治著，首有桐城姚鼐序。集中五言律句学王孟，最擅胜场；七古学坡公，间效《长庆》。余最爱其"结客少年看古剑，忍寒通夜待梅花"十四字。先生踪迹东至流求，西至临洮，官云南、临安知府。晚年学佛，又号月禅。乾嘉时，丹徒王梦楼、钱塘梁山舟俱以书名海内。然以诗论，梁颇胜于王。梁诗近诚斋，尤喜用生新冷僻之典。其《频罗庵遗集》十六卷，光绪中镇海鲍景溪为之重刊者，诗仅三卷，其他皆杂文也。首有长沙王先谦序。德遗许宗彦《梁公家传》云："公性不近内，与夫人相见，整衣冠如对宾客。有簞室，亦终其身未御。"然先生诗风情婉缦，如《买垂柳植斋前》云："阿侬未会春愁意，又买杨枝与柳枝。"《咏早秋海棠》云："绛唇已破伤秋早，丹的虽施入月迟。"则谁能知其为一世孤冷人乎？其《答陈宝所戏简》云："未免怨他林处士，梅花冷淡作山妻。"亦绝不作道学语。

张季直先生謇，文章事业，名勋中外。顾其题拂后进，亦非恒流所及。壬戌，余和其《七十自寿诗》，先生即损书垂询所业，至以籍为况，深可愧也。先生评余文近庐陵，诗近三谢，近体似皮陆。尝赠余诗云："举世儒为贱，江南独沈郎。读书忧舜禹，键户咏羲皇。足洗五湖水，心栖一草堂。好收诗卷弃，天地百年长。"结句指齐卢之难，余诗稿失而复得也。先生年衰，病手震，自言此稿三易书而成，可见其意之笃矣。

先生与余论学书不厌十反，尝云："仆于诗，特性好之。读古人诗，必反复讽诵，使窥识其意之所在、趣之所至而止。"此示人以读诗法也。又云："步韵之难，在其意有后先、主客之不同。"又云："诗可拙而不可俚，可朴而不可鄙，可翦裁而不可堆砌。"此示人以作诗法也。

嗇老诗有似"宛陵体"者。如《叶翁蓄一狮猫，丰茸肥硕，异常产而性特驯扰，毙鼠多不食，喜近客。余至慕畴堂，爱焉，从翁索归。寄者送濠南，惧为小儿侮弄，移于濠阳，付一娃司之。卒为匪类惊窜而逸，不知何往，大索三日，不能得。悼之以诗》云："庄生齐大小，秋毫太山一。灵蠢与贤否，人物宁有别。叶公所豢猫，丰硕无偶匹。面虎见善容，膊狮蓄武德。修毫被颈股，みま见白黑。蜷伏好亲人，跳跟不害物。鱼舍宋嫂羹，鼠傲张汤磔。三日慕畴堂，常置嗇翁膝。一旦索之归，筠筐增网密。解网鹰脱鞲，逃虚已远匿。何许恶狸奴，暗鸣反主客。避患倏远走，闯户掠幽壁。去得其所无，否且饿连夕。或乃僵冻死，以爱入戕贼。嗇翁悔多事，非系得与失。"此持较《伤白鸡》何如乎？诗成，僮告得猫，重有感云："死生指屈伸，亦闻喻来去。去不必是屈，来与伸何与。去因来始见，不来去何据。去尚复有来，惟其未死故。毕竟死生大，屈伸不足喻。但以达生观，来去等朝暮。猫尔一去来，生死乃顿悟。窗下一瓯饭，山下一邱墓。"禅语、理语，往往使读者不怡。禅语以不穷葛藤为胜，香山、东坡诗是也；理语以不入理窟为胜，如嗇老此诗是也。

戊辰，余晤朱古微侍郎孝臧于海上。侍郎美须髯，仪状短小，而音吐宏亮。与语时事，辄掉首欷歔。先生词为海内宗匠，诗亦闯杜韩堂奥，顾往往为词名所掩。其《为慧殊题寒灯课读图》云："堕地志四方，桑弧表里间。老来抚杯 卷，乃知前日愚。至乐非外奖，每在有识初。童牙对皓首，一讽十牵裾。声泪杂警柝，抚孩尤艰劬。君也倭指数，一一为土模。表以丹青笔，副以锦段铺。一读霜倒飞，累叹月满除。相活两勤苦，为君起踟蹰。陈情至悱恻，当与令伯俱。《泂冈表》云在，亦只半纸书。塞君无穷悲，明德为令图。"此种诗，石遗先生不肯为，以为千篇一律也。而先生之作，朴雅乃尔。尝以"清新妩丽，掩有鲍谢"二语题余稿，曰："此诚斋评石湖诗语也。"别未几，先生归道山。顷检篋得其遗翰，为之怆然。

安吉吴缶老，微时尝寓朱家角圆津禅院。其诗语多不食人间烟火。《四闲楼》云："四闲楼高风泠泠，寒山钟入烟冥冥。城隅一塔耸孤秀，江上数峰排众青。酌酒自作东道主，卧游胜读《南华经》。日光晨气荡檐角，梅花树树开围屏。"《卧玻 占》云："药裹诗囊绕病身，一灯张雨绝来人。海棠红罢僧鞋菊，只有秋光不厌贫。"五言句云："树带邮亭古，山浮别县青"（《郭吴村杂诗》）、"药烟浮古屋，海气压昏灯"（《病中》）、"短墙扶竹影，虚牖纳江风"（《过鹭老新居》）、"中酒诗肠活，临流病眼明"（《沧浪亭》）；七言句云："红把将离招客泪，青随不借别山灵"（《别阳羨》）、"书到秋声传纸上，酒醒名士隔云端"（《约杨香吟》）、"书癖冷抱石人子，买花狂散金错刀"（《今我不乐》）。缶老诗，大抵少年学右丞，中岁乃学郊岛，一变而为疏野清苦之词，晚年专效山谷、后山矣。有《缶庐诗存》四卷。

世俗生子祝嘏应酬之作，虽杜韩等大家为之，亦不能佳，第以不落寻常窠臼便胜。甲寅，太仓钱伊臣先生溯耆有《七十自寿》诗，一时遗老多有和者，惟缶老一首最工。诗云："相逢海上同七十，苦吟终日拈白须。破屋我如玉川子，侍书君有随清娱。临池笔胜虎仆健，和诗卷比牛腰粗。竹外行歌碧云合，花闲醉倒红袖扶。三多人效华封祝，九老会补香山图。齐年惭愧耳重听，治聋美酒酿也无。"

伊臣先生祖若父俱官至中丞，先生以优行，官直隶深州刺史。拳匪之乱，以不附和刚相去职。鼎革后，寓居海上，与周梦坡、刘翰怡辈结淞社。生平喜聚书、蓄金石，故余和诗有"千里莼鲈张翰思，一堂坟典褚陶娱"之句。先生报书有云："仆避地夷居，乐天知命。半生作吏，曩既无补于清时；七十行吟，今只求全乎乱世。"深得圣人"危行言逊"之旨。

淮安段笏林广文朝端，博学明辩，少与徐宾华齐名金坛。冯梦华中丞煦有"淮南两奇士"之目。其所居曰椿花阁。晚年自号蔗叟。以足疾，不下楼者二十余年。壬戌、癸亥之间，邹湛如表兄尊莹倡鹭庐诗社，凡四方齐侣所作，多乞蔗叟为月旦评。蔗叟蝇头细字，摘索瑕疵，不少假借，时年已八十矣。尝寄湛如书，首推余为青浦诗人。且赠余长歌，云："我诗每从韵脚出，隶事数典乃其职。平时翻尽千卷书，落纸依然无一物。旁人枵腹相訾议，笑而不答心自超。浮云太空资点缀，何如白地光明高。人生难得者清气，为人为文无二致。肝肠如雪照人明，余事讨论到文字。涤除渣滓还清虚，稍以流动救浅易。庾信文章渐老成，孟嘉冠巾偏小异。咄哉吾乡近日多盲聋，独弦哀歌无与同。诗成远寄淞江去，笑倒青溪沈瘦东。""肝肠如雪"云云，为人之道、为文之要，数语尽之矣。蔗叟年八十三卒，余有诗哭之。生平著述有十余种之多，弟子胡超伦长淮安教育，时见之，曾钞示其书目，惜今不能忆。

南门关帝庙僧复参，诗无蔬笋气，好画兰竹。与先君子为山水友，与余及葆荪为诗酒友。年七十一而卒。著有《梅隐庐诗稿》。《游南屏》云："三山连北寺，一水隔南屏。古树落黄叶，轻舟移绿萍。涛飞千丈白，岩压两峰青。心静闻香妙，松关写佛经。"《重游西湖，归途遇雨》云："泛棹西湖遂畅游，六桥无恙淡烟浮。堤边新柳垂青眼，湖上春山笑白头。半壁烟云供蜡屐，一帆风雨送归舟。名山大半高僧住，愧我无缘驻锡留。"结从"天下名山僧占多"意脱出。《游云林》云："林间放鹤衔花去，洞口呼猿摘果来。"《题绿荫山房》云："孤鹤清臞松影里，一僧冷淡月明中。"复参名志禅，本姓王。

近来僧人之好风雅者殊不多。庚申，吴门潘省庵（承谋）、吴九珠（曾源）两舍人招游邓尉观梅，同游者无锡华艺三（文川）、吴县吴咏陶（秉钧）、杭州项平甫（毓恩）、九珠子梦虹（傅常）、我邑徐署芸、邹湛如诸人，相与访圣恩寺住持松樵。松樵能诗，省庵方外交也。因停山中数日。松樵开香积厨，张饮還元阁，并抱图卷乞题咏。夜分下山，灯火隐映，林薄间栖禽闻人语，皆磔磔起，惜无人画《春山夜游图》也。越日，省庵命船娘治具，更招松樵。时舟泊涧上，黄昏，松樵张灯

来。酒酣联句，平甫、梦虹度曲为乐。二鼓乃罢，亦山中一重公案也。别后，松樵寄诗云："崦西着得几闲人，煮酒来招方外身。一醉归来万花暝，袈裟沾雨浥轻尘。"松樵名圆通。

吴中潘氏，巨族也。省安为文恭公后，以副贡供职农部，回翔郎署甚久。鼎革后，弃官归，以诗酒自娱。省安有洁癖，精鉴赏，搜藏图书、骨董甚富。庚、辛以还，余岁必至吴门，至则省安未尝不具杯酌。其《寄怀》调寄《风入松》，下半阕云："麝台杨柳馥消魂，绮梦玉吹温。酒旗风飏莺啼处，卷珠帘、沈醉司勋。争奈枝头杜宇，催归陌上游人。"盖中有故实在也。省安诗，句斟字酌，意颇矜持，然亦有自然者，如《艺三邀游梅园，得四绝句》其一云："豆花水墨杏花绯，绿绽桑芽宿雨肥。廿里芳尘辗轻轂，落梅香送醉人归。"写梁溪风景如画。《游东大池序》云："池在梁溪之北，梅园之东。环池三面皆山，山之麓，方广数十亩，平围若甃石。山泉下泻，潄而为池。西复有一池，故别之为东池云。水清澄如鉴，天光云影，上下一碧。曲涧外流，泉声汨汨。缘路出，茅亭俯波，四无舍宇。去亭三五武，有白沙泉一泓，野老时汲以煮茗饷客。连朝淫雨，是日适晴，徘徊久之，觉地偏心远，为吟常建'潭影空人心'句，其移我情。"诗云："地僻境乃幽，山静趣以古。曲涧响流泉，清音石吞吐。缘涧路纡回，松篁答人语。四围峰列屏，峦翠落平楚。一鉴澄方塘，涵碧天影俯。微风皴鱼鳞，轻波掠燕羽。倒涵瀑布飞，石梁度林 鸟。细草輭铺茵，花影茅亭补。上有白沙泉，掬之不可煮。洗眼云水中，寒光沁肺腑。欲问桃源深，何处寻渔父。悠然定道心，邈矣远尘侣。"清音激越，不著些子尘氛。

吴氏科第极盛，状元及第者三。九珠曾祖廷琛会状连元，官云南按察使。九珠举光绪丁酉乡试，辟内阁中书舍人，以亲老不谒选。国变后，益肆力读书，才而弥竺。喜填词，于声律持之綦严，依声安句，无一字苟下。生平多姬妾之奉、良田美宅之娱。余至苏，两止其家，文酒之会，殆无虚日。刊有《己未觴咏集》。九珠年四十已抱孙，苏人咸以福人目之。晚年伤于酒，尝和船山《生老病死诗》，因取四字为联，自輓曰："生不求荣，死胡所恋；老之将至，病莫能兴。"疾革，命其子以巾服入殓。曰："葬我光福山中，植一碣，题曰：处士某某。于愿足矣。"卒年六十五。著有《井眉轩词》一卷。诗多不存稿，仅记其有"禅心悦我时随喜，酒味宜人且拾欢"、"处世愿捐夷惠蒂，逃名敢拟许巢伦"之句。

画家为画，写绚烂者易、枯淡者难；诗人为诗，状喧杂者易、幽阒者难。己未，余游岱宗，历十八盘上南天门。环道斗绝，輿夫或蚁缘、或郭索行。四无人声，万山辽寂。余默诵右丞"谷静惟松响，山深无鸟声"句，乃叹其语之工绝也。

泰山斗姆宫壁上有题一绝云："扰扰尘寰今古同，乾坤无始亦无终。众生迷梦何时觉，上刹依然撞晓钟。"下署"天台山人羽生张翅"。

太仓陆鞠裳学博炳章和余《南天门题壁诗》韵云："环道盘空绝，云开岱顶青。微哦

惊帝座，跬步碍天星。日月排双观，云亭觐万灵。琳琅壁上墨，字字喷人醒。"鞠裳诗，格老气苍，不肯苟作。时以执行律务寓苏州。余自庚申一晤后，而鞠裳以从西医割痔丧生，遂成永诀，年未五十也。

昆山诗人，首推胡石予（蕴）。石予笃至行，有老母年九十余，犹依依作孺子慕。善画梅。其诗朴而不华，时出新意。《客意》云："客意沈寥醉一觞，无端牵引苦吟肠。霜侵寒菊残英紫，风落秋山败叶黄。万事都如云渺渺，十年换得鬓苍苍。遣愁诗句仍萧淡，写寄江乡旧草堂。"他如"二亩荒园添客话，一灯高阁出棋声"、"莽莽奇怀降白酒，悠悠闲味属黄花"、"对榻客谈忘夜永，一声鸡唱破霜寒"，佳句甚伙，不能尽忆也。

尝见金剑花孝廉咏榴《蕉心馆诗存》，盖其少作也，篇什不甚富，然多有《香草斋集》风味。如《咏明妃》云："知己原来是画工，琵琶千载说和戎。若非颠倒妍媸笔，一样长门老汉宫。"《偶题》云："东风吹断雨丝丝，春雨撩人半醉时。何处飞来双蛱蝶，隔墙知有好花枝。"《病起》云："药炉茶灶结深情，红日当窗弄晓晴。强病起来无一事，倚阑细数早禽声。"《秣陵口号》云："匹马秋风过段家，河桥犹说旧繁华。六朝人物乌衣巷，一代江山《玉树花》。画桨波横桃渡静，红楼门傍柳堤斜。伤心最是遗宫址，衰草残阳噪暮鸦。"《客中有感》云："萧萧落木下亭皋，独上江楼醉浊醪。平野昏鸦千叶散，辽天秋雁一绳高。谁怜湖海倾怀抱，又见星霜点鬓毛。知否红闺刀尺里，预量寒意到征袍。"

壬戌之岁，陈子尧桢（重豪）从余学诗。余以《杜工部集》赠之，令熟读。间岁，尧桢出示新诗，其伤时念乱诸作，居然浣花翁家数。《乱怀大兄》云："世乱空相忆，风尘怅失群。秋怀沧海月，客思暮天云。盗贼如蜂起，乾坤惜鼎分。相逢多落寞，未得返榆枌。"《孤城》云："孤城斜照里，风物最关情。十室流亡尽，千家枳棘生。迟回怯寓目，转战未休兵。鼓角秋风夜，凄凉古月明。"他如《咏草》云："埋玉人何在，断肠君不知。"《新秋》云："江山无霸气，风雨有新诗。"《雨夜》云："檐溜滴残孤客梦，灯光澹尽壮年心。"落落大方，与庭间回骤者有别。尧桢少孤，奉其祖母甚孝。家贫，然笃于师友之义。

阮亭看诗之法，只是翻卷看题目，谓某丈、某表兄等连篇累什，则其诗必不高妙。余生平看人诗，只是看古体。盖近体有平仄、对偶之拘，循声按律为之，犹或近似。至古体，则音响、节奏无可口授，非平日熟读古人诗，便一语不能似也。余弟子中工为此体者绝鲜，而尧桢所作，自无不合。《春日同超伦从沈师瘦东游近郊，归共饮，即事赋呈》云："二月不寒天气融，日炙杏压酣妖红。吾师襟怀颇旷荡，相与步寻春风。双双燕子窥帘户，黄蜂紫蝶花前舞。提壶唤我最多情，催我街头沽酒去。街头春酒泼瓮香，鱼肥笋美夸江乡。君方自喜舞瞿 鴒，吾亦不愁典肃霜。唾壶击缺歌愁绝，独抱孤怀向明月。眼前天骥困奇材，安得关河纵超越。明朝更棹木兰船，回首春城夕照边。"又《五陵少年行》下半云："自谓意气骄，旁人亦倾倒。

调笑陌上女，挥手千金宝。高堂白发亲，日夜忧心捣。深闺扫眉人，坐叹红颜老。"一结令人笃劬劳之念，增伉俪之情。

律诗贵对仗工整，固也，然亦须流动变化方佳。王氏《柳南随笔》谓："读了上句，使人猜不出下句。"余谓此秘惟杜老得之，如"春水船如天上坐，老年花似雾中看"、"竹叶于人既无分，菊花从此不须开"等联是也。若笨伯为之，便多笑柄。宋陈敏正《T斋闲览》云："李廷彦献百韵诗于某达官，其间有句云：'舍弟江南歿，家兄塞北亡。'达官恻然伤之，曰：'不意君家凶祸重并如此。'廷彦遽起，自解曰：'实无此事，但图属对清切耳。'一坐轩渠。"

钱牧斋《跋龚孝升诗册》有云："至若取次应酬，牵率属和，撑肠少字，须乏苗，不免差排成联、寻摭作对。'子路乘肥马，尧舜骑病猪。'此十字，《金针诗格》为家宝。但是扇头屏上，利市十倍，不敢云'舍弟江南，家兄塞北'也。金陵士友为之哄堂。"此虽牧翁自为解嘲，实则痛骂时辈。

二十年来，四方投赠之什甚多，或奖借过情、或期许太甚，皆愧不敢承。余最爱常熟汪新民（明德）、上海郑质庵（永诒）两律。汪有《三春坡々，意兴疏懒，忽忆去年沈瘦东先生书未复，因以长句四韵报之》，云："荒村怅卧侣樵渔，避世门无长者车。愁重难消千日醉，病多迟报隔年书。吟成月落春窗曙，棋罢灯昏小阁虚。知己何来沈夫子，江湖憔悴独怜渠。"郑云："不话襟期话劫灰，相逢乍喜阵云开。十年慰我倾葵想，二妙输君作草才。诗垒近闻摩范陆，朋簪久稔契宗雷。斜阳闲杀黄花影，苦盼泉明载酒回。"结语俱一往情深。质庵诗作于齐卢战后，故有"话劫灰"语。时二君年才二十余，皆英少也。

●初编·卷六

诗以言志，酒以合欢，为用殊而贵在妙解一也。诗以工著，酒以德称，其传不传，不系乎多寡也。不然，张率日课一诗，年十六已积稿至二千余篇，何以未闻有人以诗人目之乎？单于粹强亲朋以巨杯，多致狼狈，至有"单家酒筵为'觥筹狱'"之语，何以未闻有人以酒人目之乎？是以彭泽之琴，不设弦徽，已能得趣；华林之园，虽非濠濮，亦且会心。夫子亦有"虽多奚为"之语，圣人只是教人在领会，乃能通其变而致其用耳。

柯山与秦晁齐名，在宋诗中亦独树一帜。其佳句，五言如"残暑扇中尽，新凉枕上归"、"青山今古事，芳草去来人"；七言如"一峰支水孤剑立，古庙开帘双脸红"、"残雪暗随冰筍滴，新春偷向柳梢归"、"溪声夜涨寒通枕，山色朝晴翠染衣"、"蝶衣晒粉花枝午，蛛网牵丝屋角晴"、"青引嫩苔留鸟篆，绿垂残叶带虫书"、"饮残桑落溪云暮，卧冷桃笙楚雨秋"、"啼鸟似逢人劝酒，好山如为我开眉"、"回首事如前日梦，出门心似下山僧"、"人似垂杨随日老，事如流水几时休"。亦有不加点检者，如《岁暮书事》五首云："醉眠多似陶彭泽。"又云："渊明柳老秋多雨。"又云："田为岁荒陶令秫。"五首之中三用渊明事，今人则无之矣。

柯山诗之有语病者，如《初凉》云："寂历年华晚优游，永日长永与长有。"何异耶！《寓陈》云："天高易明晦，顷刻俄屡变。""顷刻"、"俄屡"连用，亦不解。又《大雨十日不止》云："深蛙鸣远池。""蛙"何可"深"耶？殆言"远蛙鸣深池"耳。《吕郡君挽词》云："龙去孤神剑。"此用雌雄剑事，吕为钱穆父之妻，然妇人而云"龙去"，亦未之前闻。又曰："与君骑竹即同游。"言骑竹马也，然则卧牛衣可以言"卧牛"乎？黄山谷诗："鸦舅颇强聒，仆姑常勃溪。"《石遗室诗话》疑"鸦舅"为"乌臼"之转音，以为非鸦也。按张文潜《咏乌臼》云："乌臼强知晓，晓晓鸣暗天。"乃知"鸦舅"即"乌臼"，盖一鸟也，自与树木乌柏无涉。刘子仪诗亦云："五更鸦舅最先啼。"

山谷诗："终日忧兄行不得，鹧鸪当是鼻亭公。"然象以杀舜为事，山谷宁不知之，而云"忧兄行不得"乎？又曰："马啮枯萁喧午枕，梦成风雨浪翻江。""马嚼枯萁"至以翻江风浪为喻，亦太粗悍。

胸中有千卷书，须如将领士卒、主蓄僮奴，调遣安排，悉随我意，斯为典为我用。若徒矜淹博，凑事堆垛，如博士之书驴券，不辨命意之所在，岂非我为主者而反为奴所使乎？古人善使典者莫如东坡，如"不意青州六从事，化为乌有一先生"、"太守未曾留五马，故人先已扬双鳧"、"三过门中老病死，一弹指顷去来今"，真有流水行云之妙。

使事着斧凿痕便非能手。放翁诗运典，初视之，能使人不觉。如云："复起卿当用卿法，长闲吾亦爱吾庐"、"不如意事常八九，可与人言无二三"、"天上但闻星主酒，人

间宁有地埋忧", 诸如此类, 不胜枚举。胸中经史多, 驱使无不如意也, 故属对精切如此。杜子美云:"读书破万卷, 下笔如有神。"信然。

放翁古诗虽不及苏黄之开合动宕, 然其律句法纪谨严, 如千兵万马, 步伐整肃, 两宋诗人罕有及者。可取其律句, 抽去中、腹二联, 或截去首、尾两韵, 改为绝句, 都成佳调。余尝以此试之, 百不失一。诚斋《跋剑南集》云:"雕得心肝百杂碎, 依然涂辙九盘纡。"放翁之学问境遇, 二语足以赅之。

名山翁尝语余云:"杜老才虽高, 诗迄未成熟。直到放翁, 始为成熟之杜少陵。"其论颇创。

沧浪教人学诗"以识为主, 入门须正, 立志须高", 自是颠扑不破之论。余最厌近人诗, 偶一翻阅, 套语满纸。此等人, 路头已差, 犹之适燕者而南其辙, 愈走愈远。晦庵亦云:"要使方寸之中无一字世俗言语意思, 则其诗不期于高远而自高远。"兴化李审言先生详尝以余诗为渔洋、竹垞之正声, 归愚、述庵之嫡派。云此"不废江河万古流"也, 劝勿改治他集, 堕入魔道。因忆钱牧斋有古风一首赠王新城云:"古学丧根, 流俗沸螭蝮。伪体不别裁, 何以亲《风骚》。"又曰:"瓦釜正雷鸣, 君其信所操。勿以独角麟, 媲彼万牛毛。"然《有学集》中生子祝嘏、世俗酬应之作十居五六, 明知之而故犯之。"张茂先诚我所不解"矣。近时云间诗多喜宋派, 而张伯贤孝廉孔瑛独好唐音。云间诗多清微凄苦之词, 而伯贤独务高远激越之调, 此其不同者也。伯贤壮游大梁, 晚年经乱, 锻羽而归。民国初, 为淞沪护军使署记室, 无何, 抑郁以卒。兹录其《书怀》, 云:"落落夷门道, 侯生久索居。怀人感风雨, 误我在诗书。事业悲屠狗, 功名付牧猪。对天一问讯, 吾道竟何如。""纵是烟云态, 人心不可知。举棋犹未定, 击楫与谁期。海阔鲸游壮, 天高雁落迟。太行孟盟险, 努力且驱驰。""大海澜方倒, 谁为手挽人。檄书空谕蜀, 法网卒亡秦。兵甲连云起, 戈鋌耀日新。即今筹饷械, 岁费万千缗。"第二联与余《辛亥清秋》云"汉使驰文空谕蜀, 楚人验讖竟亡秦"同意, 皆言川楚事起, 端方衔命往抚而被杀。党禁虽严, 而清社卒屋也。"中原余患气, 空穴入风微。蛩触争犹烈, 牛羊牧不肥。《治安》陈贾谊, 《孤愤》著韩非。漫怪悲秋客, 惊看木叶飞。"《秋感》云:"中岁难为客, 劳人易感秋。已无鸿鹄志, 况有稻粱谋。潘岳将华鬓, 苏秦尚敝裘。只余豪气在, 倚醉看吴钩。""西风起天末, 客子感怀多。冷落吴江叶, 凄凉楚泽波。书迟鱼腹寄, 心逐雁群过。无限悲酸意, 登楼一放歌。"诗似皆为宦游中州时作。又"清极诗应瘦, 愁多酒不温"十字亦佳。

伯贤四六亦典赡。在护军使署时, 与余论诗书甚多, 姑录其一, 以概其余:"昔者剑| 隐处, 孝绪结为神交; 任昉闲居, 佐公称其知己。心迹相契, 形骸弗拘, 不谓古今乃同轨辙。"又云:"士衡文富, 君苗之笔砚欲焚; 少陵词高, 文昌之膏蜜以副。仆尝谓作诗之道, 首在读书。酝酿久则气味深, 见闻宏则体势峻。溯三唐而逮两宋, 各有专长; 执西崑而薄西江, 宁为定论? 盖必导源志海, 探本情田, 落笔乃为有

神。操觚非可率尔！乃旷观当世，大雅陵夷。侏离之语纷陈，禁未之声竞集。近藤评本，腾播于中原；海角报章，侈谈夫新体。文章视为刍狗，古道等于饥羊。遐想寂寥，以为太息。"又见其赠金山高吹万（燮）古风一首，甚朴茂，容再续录。

丁卯之变，各地耆宿平昔与乡里异趣者，乱民无不目为土豪劣绅，加以戳辱。嘉定陈巽倩太史丹之为地愿张某枪杀，其一也。先是，国民军甫底定江浙，张某即夤缘为嘉定公安局长。以与巽老有宿仇，令其弟率党羽潜入巽老家，时巽老居南翔，深夜挟之去。翌晨载出嘉定东门，巽老北向四拜，遂遇害，年已七十二矣。此丁卯春初事也。是岁，湘省宿儒之罹于祸者有叶氏焕彬（德辉）、彭氏鲁青（述）、萧氏漱筠（荣爵），均年登大耄。叶壬辰进士；彭丙戌傅胪，前湖北主考；萧乙未傅胪，前广西主考。巽老既被害，其子某痛其父冤，屡讼于官，不得直。逾年，张被屏，愤而自戕。未几，其弟亦以穷饿死。

姚东木观察钞示其輓巽老诗四绝，兹录其二首，云："木天清望古稀年，翥凤才名四远传。牛嚼牡丹同百草，奇闻一世尽哗然。"第三句自注："用瓠北句也。"然贼民之酷虐、士类之摧残，七字尽之矣。"特科旷代最难逢，桃李阴成春正浓。环堵萧然还似昔，传闻就义极从容。"起二句自注："与巽倩为特科同年。"又云："时生徒极盛，余晤南翔人，云先生被难时，神色自若，身洞六枪而殒。"观察之诗皆实录也。

丁未大成节，余遇巽老于曲阜，始相识。巽老天才纵逸，蚤年好驰马使剑，其于诗、于书、于饮酒，无不自负。自言少时无日无诗，积稿至千百首。年二十六，学诗于沈百琴先生维裕，先生戒多读少作，乃钞鲍明远、李、杜诸家诗，熟读之，始悟乡者途径之非，因尽焚其稿。又言："余性不能饮，曩在京师，一日赴某公宴，时宾客满堂，适有谗余者主觴政，故黜之，盖意存窘辱也。余愤甚，乃引巨觥百，连饮而尽。因大言曰：'有能饮如数者，余敌也。'众皆愕眙，不敢前。自是皆叹服。余亦不复饮涓滴，已数十年于兹矣。"巽老书品未必如其所论之高，然癸亥余至槎溪过之，见其方伏案临《圣教序》，曰："余虽老，曾无间也。"其耄勤亦自不可及。

凤翥楼在陆华浦畔，巽老诸生时所筑。楼有左、右厢，似翼，故名。巽老论诗，先局度而后词藻，唐以下诗不屑观也。印有《凤翥楼诗》一卷，仅百余首，甚工。经乱散失，弗能得，仅于篋中搜得其《七十述怀》四律，非其也。然其注多有可备掌故者，亟为录存之。"天锡光阴七十春，已经过事似前身。楼台杨柳邀真赏，庭院梧桐荷特甄。仗剑遂为超迈客，试锋端是不详人。京华多少知名士，诗社文坛每轶伦。"自注："同治甲戌，州试《春阴》诗，有'杨柳楼台烟漠漠'句，主司评诗有画意，置前列。院试《秋信》诗，以'庭院梧桐叶有声'句，取古学入庠。辛巳北上，癸未游皖南，北历两周再赴京师，遂为久客。初入京时，每作诗文辄冠，曹偶群以腾达相期，争相结纳。迨乎久困场屋，于是皆目为不详之人。"其二："刑书户籍案如山，笔吏经生两习娴。甘稔浮沈依日下，一枝栖息借云间。功名何补生涯拙，文字

艰回国步艰。少贱吾犹能执御，鞭声笠影到乡关。"自注："从师学刑名，又尝为户部书吏，钩稽钱谷，作客春明二十年。时寓云间乡馆，第庶常留馆，贫窘甚于诸生。迨清室将亡，先燬金马、玉堂之署，寻裁翰詹词官。庚子之乱，余敝车羸马，由陆程十八站，不假仆夫，执轡南下。"其三："凤翥楼头一倚栏，纵观世事倒狂澜。未宁桑梓先婴谤，才靖萑苻已夺官。迂拙只知遵圣轨，清贫不悔误儒冠。而今书味成鸡肋，自古科名等鼠肝。"自注："平生嫉恶如仇，尤以桑梓为念。而不谅者累次连名，控余助长匪焰。光绪壬寅，余以本乡团练枪械往海门协差捕盗。渠魁俞怀郎、陆八斤等闻风窜入崇境，扰害三星、三光两镇。崇董举办团练，先后擒获诸盗，解省正法，余讼乃得直。然谏员贪墨，诬余擅运军火，竟详奏，余遂落京职。溯自志学以来，一遵宣圣忠恕轨法，尝著《道一集》，力辟三教同源谬说。"其四："挂壁焦桐已失亡，满畦老菊复荒凉。画无剩稿思真诀，笔到生花觉妙香。我爱古人忘寂寞，天怜穷士报康强。昨朝佳节逢修禊，合有新诗祓不祥。"自注："常奏《平沙》、《秋鸿》诸操，家藏蒋又石古琴，曰'归云'，以兵乱失之。喜艺菊，多籽种。嗜画，游沈师百琴门，颇得花卉真诀，顾所授诸稿，亦经乱散佚。于书喜晋唐笔法，暇辄临摹。性不喜徵逐酬应，每自编摹斗室，尚友古人。"结谓生辰在上巳后一日也。巽老兼能度曲，金剑花先生云。

古今咏雪诗盈千累万，自非出奇，无由制胜。陈明卿云："填平世上崎 路，冷到人间富贵家。"明郭都贤云："四望郊寒连岛瘦，一天白起奈萧何。"可谓别调矣。郭诗用南唐酒令"雪下纷纷，便如白起。明朝日出，将奈萧何"故实。然名山云："天花零落犹如此，何况人间有莫春。"则并不矜奇而自觉婉而有味，由其立意高也。余评为古今咏雪绝唱。

郭都贤有女曰纯贞，幼字沐氏。后沐氏失踪，女守贞不嫁，削发为尼，年八十余卒。有"驿梅惊别意，堤柳暗伤情"之句。按都贤，湖南益阳人，隐居桃花江东林寺，皈依佛法，诗酒自娱。尝放顺天主考，识拔二人，一为史可法，一为洪承畴。后郭氏以诋毁清朝下狱，洪氏为之营救，意欲以此示惠。因说："老师双目失明，不能为朝廷做事。"郭氏知之，答曰："我的眼睛是你中举那年瞎了的。"后卒因诗肇祸，死于江陵承天寺中。

诗文最忌作习见语。韩退之务去陈言。薛能自夸专于诗律，不爱随人搜难抉新，誓脱常态，其《杨柳枝》词序以"条似舞腰，叶如眉翠"为陈熟。和靖、青邱皆以善咏梅著称，然亦未必能脱尽渣滓。曲园《咏梅》云："颇参迂《史》三分洁，也学郊诗一味寒。"斯为新异矣。

桐城张药斋宗伯云："五车书足艳归装。"趣矣；而石予云："得书似妾傍人艳。"更趣。常州赵某句云："久病都疑犬亦仙。"贫矣；而葆荪云："久无肉食思烹狗。"更贫。宋人云："啼月子规喉舌冷。"奇矣；而遇春云："鸦衔缺月立檐端。"更奇。梅村云："碎石随足动，危径不容步。"险矣；而任之云："脚无插处身嫌赘，首一回时骨亦惊

。"更险。

诗人体物，有为高明之家所不知者。刘晦庵云："檐以低常暖，裘因敝转轻。"胡石予云："絺绤旧衣薄，蒲葵陈扇凉。"余篋中亦有旧句云："病撷花英为酒剂，贫搜药裹当诗笺。"又"翻卷偏逢书压底，界栏终苦字斜行"，亦非懒散及短视人不知。

山中路多曲折，每见一村落若近在咫尺，趋就之，往往一二里不止。戊辰，余游孝丰时得一联云："山空应碓响，路曲引村深。"以为工矣。近读元杨孟载《眉庵诗》，有"孤村近却遥"五字，状难写之景，却以平淡出之，殊不费力，乃叹古人为不可及也。偶阅《随园诗话》，见纪松江某士《咏飞白竹》五排数十韵，尽隶事徵典之能，然终觉无味。因忆余少时一联云："品洁伴惟宜月影，节高生已带霜姿。"似少许胜人多许。

我邑俞稷卿先生诗，有经曲园先生改窜者，此见曲园与金友筠先生论诗札。曲园爱其"人孤灯影瘦，春足月光肥"十字，采入《春在堂随笔》。其乐府诸篇，绝去摹拟，自高出《犹存草堂诗》之上。曲园亦云："稷卿乐府可歌可泣。"稷卿名廷扬，有《紫花菰馆诗》一卷。

岁壬申，晤上海孙玉声先生于鸣社。先生有《七十述怀诗》。记有一联云："国多变乱无生气，民为灾荒起盗心。"诵之慨然。先生颀躯修髯，好稗官家言，刊行者三十余种。又有《上海沿革考》，可资掌故，惜未出板，未之见也。所居曰退桓醒庐。

张静莲表伯善小儿医。工谈谑，坐无车公，令人不乐。惜有子弗克负荷。晚境坎坷，时借杯中物浇其磊块。年六十八，从郡城匆遽归，卒于其婿宋氏家。其病也，余往探之，已危笃矣。有口占绝命诗两首，云；"已决归来正首邱，经旬辟谷学留侯。精神自觉犹粗振，形似无毛一废裘。""天不容为安乐人，无形忧患困终身。囊空只剩丛残稿，死后甘教化作尘。"越宿而逝。

分金贷粟，自古为难，不然陶公乞食之诗、鲁公乞米之帖不太多事乎？余尝有句云："漫言说士甘于肉，终觉看人冷似冰。""修到好花偏薄命，此生不愿识东风"，常熟顾瘦农《咏秋海棠》句也。而瘦农竟以一丞坎坷以终，"言为心声"，信然。瘦农名邦瑞，著有《听秋阁诗》，句如"秋随虫语老，夜入雁声长"、"秋花带病留孤树，落叶如愁积满阶"，皆可诵。

近人诗，工于发端者殊不多，而工于结穴者尤少见。弟子胡超伦（超）有《青龙古迹》两律，结云："莺花三月春风路，分上村娃满髻香。"又云："斜阳芳草呼愁起，且共渔翁倒酒瓢。"《初夏新晴》一结云："最是耐人寻旧味，青梅酸尽却回甘。"皆韵隽。

●初编·卷七

诗有看而喻者，命意之深浅、结构之疏密是也；有读而喻者，音响节奏之抑扬抗坠是也，然读之功尤倍于看。或问："如何能祛哑弱棘涩之病？"曰："把杜工部排律诗，如《谒玄元皇帝庙》等篇熟读之，令如瓶泻水，下笔自然高浑，不作细响。"

晚唐惟小杜诗纵横排宕，得大家体势。其诗大抵取材汉赋，而极于《骚》，遣词用字绝不沿袭六朝人语，所谓"高摘屈宋艳，浓熏班马香"者，可以知其祈向矣。独是才多为患，其性又能刚而不能柔，遂未能一洗浚杂粗悍之病。如《杜秋》诗不过咏一欢场失意之儿女子，以自寄慨而已。诗中杂引多少妇人，已是费事，乃复援用李斯、魏齐、范雎、周勃之徒，甚云："射钩后呼父，钓翁王者师。无国要孟子，有人毁仲尼。"尤觉不伦不类。此种诗使乐天为之，必无此失。

东坡"微风万顷縠纹细，断霞半空鱼尾赤"一联，可谓奇伟矣。然小杜云："断霓天帔垂，狂烧汉旗怒。"觉坡诗笔力减却一半。小杜奇丽处时效韩孟联句，如"杉树碧为幢，花红骈作堵"、"取螯弧登垒，以骈邻翼车"等，句法多为山谷、后山所祖。

宋人说诗，往往嗜好与人殊。司马温公尝称丁谓善为诗，《在崖州》云："草解忘忧忧底事，花如含笑笑何人？"以为警句。按谓与王钦若、夏竦，世并指为奸邪。真宗时，海内乂安，乃谓与钦若等建议封禅，摹写天书。欺罔之罪，谓为之尤。贬崖州时为书，阳自刻责，叙国厚恩，戒家人毋辄怨望，并为诗号《知命集》，此正弄技儿智巧，欺人耳目而已。所谓警句云云，正其怨望语也，且词亦浅俗。温公学问君子，不应不辨淄澠乃尔。

鍾馗啖鬼之妄，前人多辩之矣。《丹铅录》云，唐人戏作《鍾馗传》，虚构其事。又俗有"鍾馗嫁妹"之说，升庵谓宋宗憲妹名鍾葵，后世画工傳会，作《鍾馗嫁妹图》。甲戌之岁，社中以是命题，事既荒唐，而作者泥于"嫁"字，尽情刻画。如云："合欢酒进孟婆汤，香輿分付夜叉抬。"甚有言其结鬼胎、开汤饼会者，支离牵率，抑何可笑。余谓仙灵鬼怪之说，古人集中亦或不免。如杜甫之咏牵牛织女，然不过云："亭亭新妆立，龙驾具层空。"又云："虽无舅姑事，敢昧织作功。"使涉及会合之情、别离之苦，岂非便成俗手。余当时亦戏作数首，集中不存，姑录其二，云："蓝袍破帽酒颜春，翠袖华桂粉靥新。啖鬼粗豪归妹韵，老馗端是不凡人。""须眉如墨鬓如云，一幅妍媸画里分。笑我惜芳心未死，花神甘拜石榴裙。"诗虽不佳，尚喜不脱不黏，如题而止，第二首谓等是不经，奉鍾馗妹为五月花神，不犹愈于俗之奉鍾馗乎？

是课佳卷绝无，断章取义，则吴县张植甫（荣培）云："河神娶妇本荒唐，龙女求夫亦渺茫。"引用此种作陪最合。周乃章云："鍾馗本作终葵误，嫁妹须知假魅差。"从考据入，亦见腹笥。吴竞存云："佳婿风流说杜平。"自注："见唐宫稗史。"邵佛㮮云

：“传闻下嫁襄阳杜，野史流传亦渺茫。”较羌无故实，而强为牵合者自佳。至奉贤朱庸孝廉云：“自由婚嫁披猖甚，让尔锤家礼法多。”则借题发挥，又别开生面矣，然用典可谓得天衣无缝之妙。

宋人诗：“马行灯火记当年。”又“梳行浚杂马行残。”按蔡条《铁围山丛谈》：“马行街者，都城之夜市，酒楼极繁盛处也。上元五夜，马行南北几十里，声妓非常，烧灯尤壮，故诗人有‘马行灯火’之句。”是“马行”为宋时汴京街名，且“行”应读户杭切。戊午上元，社中咏走马灯，有援引“马行灯火”者，误也。范石湖《上元纪吴中节物诗》有云：“影转骑纵横。”自注：“马骑灯。”此殆今之走马灯矣。

乐天诗：“黄金不惜买蛾眉，拣得如花三两枝。歌舞教成心力尽，一朝身去不相随。”盖讽盼盼不以身殉也。盼盼得诗，旬日不食而卒。陈彦叔《题燕子楼》诗云：“乐天才思如春雨，断送残红一夕休。”正咏此事。

苏东坡云：“笙歌丛里抽身出，云水光中洗眼来。”陆放翁云：“抽身黄尘乌帽底，得意翠木清泉间。”皆本香山“金章紫绶辞腰去，白石清泉就眼来”意。二公皆好白傅诗，故不觉语之吻合。

《春在堂诗集》二十四卷，德清俞曲园太史樾著。太史自言：“诗不求好，随手而书。”又言：“余生平最喜香山诗，所为诗亦自谓近之。”余谓曲园诗格虽不峻，然而咏儿、赠妇、忆旧、怀人，与夫人生盛衰离合之间，性情竺至，非人所得伪为。忆张石洲序何蛩叟诗文，谓其无他高妙，只是本色而已。本色者何？真而已矣；真者何？自写其性情而已。太史之诗亦犹是也。至其喜用俗语，如“窗下喃喃猫吟佛，床头唧唧鼠求签”、“盘中燕笋条条嫩，筐内鸦梨颗颗圆”等句，虽本诸“家家养乌鬼，顿顿食黄鱼”，子美所谓“俳体”也，然终非大雅所宜。

兴化李审言先生，博闻强识，于学无所不窥，享海内重名数十载。晚号<齿军>叟。其诗大抵源于《骚》、《选》，而汪洋肆衍于杜。《雨后访杨甘伯》（《棠》）云：“积雨淹日夕，流潦盈街衢。呼车渡我前，乃叩杨子庐。丛草缀新绿，幽花映墙隅。小别未逾旬，俨若人事疏。脱作千里游，相思当何如。所喜抱孤怀，久郁得暂摅。君岂子桑病，我真苏端徒。梅雨正及时，寄情惟古初。老去逢艰难，守道宁吾躯。流行坎止占，未知今有无。贫富俱可怜，是非齐贤愚。尚论千载人，即此为欢娱。礼乐兴百年，愿言追鲁儒。蕴素获一展，聊且陈区区。”先生自云：“我之诗，自成为李审言之诗，不欲依草附木，使人云：‘此学某家某家。’捧心之颦、龇齿之笑，皆世所矜道者，我则羞之。”其自道如此。先生出明中极殿大学士李公春芳后。光绪之季，端午桥、张安圃督两江，重其才，先后聘为江楚编译官书局帮总纂、江南通志局分纂。宣统初，任皖省存古学堂史学教授。国变后，居里门，潜心著述。先生虽穷老一经生，而当代名公钜儒如陈庸庵、冯蒿叟、赵尧生、郑海藏、李梅庵、陈石遗、古公愚辈，无不与之接席。民国辛未，年七十三卒。先生长于考据，喜“四

刘"之学，谓《汉志》、《世说》、《文心雕龙》、《史通》也，尤邃于《选》。长沙王湘绮赴江督端陶斋召也，先生宴湘绮于上海之愚园，一时在坐者皆名士。论及《文选》，湘绮云："明远、元晖已开唐初律体。"先生举"朔风吹飞雨，萧条江上来"句为应，湘绮喜，即书小轴赠之。嘉兴沈乙 方伯（曾植）尝曰："此江淮《选》学大师也。"著有《选学拾渾》、《愧生丛录》、《拭觚脞语》、《世说小笺》、《文心雕龙黄注补正》、《颜氏家训补注》、《陶斋藏石记释文》、《南朝寺考》等十余种。

先生论诗，于唐喜少陵、昌黎、玉溪，于宋喜东坡、半山。余以文字获交先生在丙寅之岁，时先生已六十有八矣。自是邮筒往还无虚岁，至谓得仆书如亲戚之警效其侧，殆昌黎所谓昌歎之耆，"未识气先感"耶？其论拙诗，以为雅正典实，无近世焦杀枯寂之病，此渔洋、竹垞之正声也。又评仆为读书人之诗，如从树上看花，撷其英实；不是从花担上看花，便谓为写生妙技也。其论诗书多刻入拙集，今再录其未刻者。如曰："青浦述庵侍郎，承沈文憲派，上宗渔洋，足下固渔洋宗门之的系也。渔洋妙法，其七绝第三句能撑得开，首句如城上抛砖，第四句复勒得住。能窥此秘，宜石遗赏之。石遗之学余于诗，有子部杂家之学，方能写金银铜同冶之诗。目前诗人胸无书卷，以兴象为主，揉以佛家似解未解之言，便自鸣高，妄据坛坫，转蜣螂丸，而视为苏合香。庄生所谓'往而不反'，悲夫，正为此也！"又曰："今之为诗者，貌为清奇崛强，而枵中羸体。求申于鼯鼠之角，以为康庄大道，又复驰骋于乾嘉以后诗人之议论，堕入五里雾中，群不自觉。不以读书师古为准，而以寻声逐景为能。声调之不讲也，隶事之不精也，其所云云，皆乡原'非之无举，刺之无刺'，痿痺不仁之诗，又皆家人筐篋中物。一言以蔽之，曰：不读书而已矣，不师古而已矣。"又曰："介甫、后山自是恶派。散原、苏戡几经淘汰，乃屹立一家。不善学之，适为麒麟楮耳。"

余以审言先生之介，得交闽侯陈石遗先生衍。先生诗文，名震中外，推为坛坫宗盟。有《近代诗钞》、《石遗室诗话》等百数十卷，嘉道以后诗人，大略尽之矣。壬申之春，余谒先生于苏州之邸第，先生谓："海内以诗取正者，堆若山阜，无暇为答。爱君诗，君之书未尝不答也。"先生选诗不取《选》，故《诗话》独屏余五古，而多钞律、绝及七古，以为可步趋北宋。〈齿军〉叟书言石遗教人学诗，以归愚《唐诗别裁》及《古诗源》为帜志，典雅丽则，纬以性情，清而不污，腴不露骨。惟先生否其说，谓："审言言鄙人专主唐音，殊不然。或以为专主宋诗，更误。以音节论，不但唐为贵，汉魏六朝亦孰不为贵者？以辞意论，则各人有各人之辞意，不但不专主宋、主唐，凡汉魏六朝皆不可主矣。"此与名山老人论"诗须先有我"之说正同，所谓"我"者，即各人之辞意也。

鼎革后，仕途益冗杂，官吏之读书者几百不获一。甲子以还，县官下车多蒙过存，文字之交自以宜昌吴惕庵大令耀楠为最。惕庵好吟咏，尤善隶事，《寿林治伯观察》（《树藩》）云："寇恂望重仍留郡，李牧才长足备边。依人无复怜王粲，作客谁

能识马周。"《寄怀瘦东》云："再任难追何逊迹，逢人便说项斯贤。"上句似用何逊再至江州故事。又《宜春台谒韩文公祠》云："大江东去浑无尽，吾道南来自不穷。"对仗天成。《吊昭君》云："出塞忍为胡虏妇，归魂犹是汉家人。"尽人意中所有，却无人说出。惕庵以诸生历宰湖北蕲春、江西宜春、铅山诸县。甲子齐卢战时，任为苏军行营执法官。是年九月，移宰青浦。明年春去职，筑宁远楼于金陵居之。惕庵爱余甚，因共订金兰之契。别后书述米盐琐事，絮絮如家人，往往穷数纸不尽。怜余贫，岁暮必馈以兼金，在叔季尤难得也。

惕庵《泊苏州》云："姑苏城外晚潮平，移泊阊门感慨生。夜静频闻刁斗警，时危早罢管弦声。寒山寺古钟初动，茂苑秋高雁独征。明日扁舟寻胜迹，放怀不必问军情。"颌联的是金阊乱后景象。此与余《乙丑姑苏杂咏》"旧时门巷愁回首，此地琵琶饭甑多"语相反而意同。君莅青时，只空衙一所，仆役数人，"荒城风散劫余烟"七字，亦写得凄黯。

汉阳赵种青大令润，晚号半跛，尝宦游浙中。其为人落拓，不视家生产，历司樞政多年而一贫如故。画法青藤、雪个，因颜其居曰藤雪楼。著有《藤雪楼诗》四卷。《画牡丹》云："卅载江南客当家，残毫破砚冷生涯。老来一肚牢骚气，乱写人间富贵花。"《题秋燕》云："到老漂零计总非，几丝疏柳尚依依。年来弄影秋江上，不傍人家门户飞。"飘零底事滞天涯，记得来时柳未花。老我江南还羡汝，一年一度一归家。"曾农髯（熙）谓其画草虫花卉，韵逸骨清，自抒胸臆。余谓其诗亦何独不然？大令与我邑钱静方明经学坤友善，有《画蟹寄静方馈蟹》诗，存集中。

半跛有《江南春》一首云："天下春，江南早。望江南，余怀渺。哀江南，爱心捣。昔年春，烟景好。去年春，风光少。今年春，人懊恼。胡马肥，嘶芳[A061]。晓角哀，惊啼鸟。"又云："春山高，劫火烧。春水遥，估船逃。桃花红，战血融。梨花白，枯骨积。江南春，春无边。江南春，春可怜。可怜春，可怜人。人怜春，容易老。春怜人，不逢辰。吁嗟夫，不逢辰。"此诗纪甲子兵灾也。"胡马"云云，盖指奉军而言。三言音节逋峭，源于《诗》之《有骝》，又《郊祀歌》之《练时日》等篇。

川沙黄任之先生炎培，项城任总统时，曾有教育部部长之命而不就，时人高其志。庚午秋，余识先生于海上，须眉伟然，言谈锋发，世界大势了若掌纹。别后见赠，云："刻意诗为命，放怀天与游。沈郎故消瘦，乱世况幽忧。苦觅青毡老，生怜翠袖秋。江山莽无际，和泪一囊收。"是日携素羽同往，先生欲介入无锡蚕桑学堂，然卒未果。余和韵答之，云："危苦新亭泣，淹留裨海游。渐看霜点鬓，那得地埋忧。岱岳浮云暗，湘江浊浪秋。吾怀二三杰，残局若为收。"盖是岁六月，鲁省被阎锡山兵祸，又□□党陷长沙，烧杀无算，故下半云云也。

辛未秋， 昆山方惟一先生还来，相与为文酒之聚。席间自诵其警句云"山深疑有虎

，溪静不逢渔"、"孤城落日亲朋远，满地秋风鬓发疏"。先生能饮，议论风生。余赠诗有"奚止言谈是林藪，即看餽啜亦风流"之句，别后寓书金剑花先生，谓此行有三乐：与朋旧欢，一乐也；青浦山水清淑，二乐也；得读瘦东诗，三乐也。先生以书名海内，邑人士索联语者，皆书余集中语报之。

表弟俞慧殊（祖望），故居在东门外之少年泾，与余居南村相隔不二里。总角时，往还亲昵如手足。慧殊性明寤，好为绝句，多凄馨幽艳之语。如《旅夜》云："睡起无聊检梦痕，残香小院欲黄昏。无情只有江干月，夜合花前照断魂。"《东城杂咏》云："日暮楼台处处愁，荷香吹雨满园幽。鸡头菱角无边绿，酿作城东一段秋。"小廊回合曲栏斜，秋雨沈沈只隔纱。一种清奇自幽赏，更无人处看苔花。"慧殊与山阴任劲叔（堇）交好，尝问诗于劲叔，劲叔讽令诵玉溪生律诗，而慧殊未遑也。余谓唐之丁卯、宋之和靖，只存律句，不杂他体，人各有所好耳。然余尝集其"客况似秋愁似水，江城如画月如弓"二语诵于人，曰："此非慧殊之佳联乎？"

蕲山何氏，代有名医。乾隆间，铁山先生王模兼以能诗著称。顷读其所著《萍香诗钞》，有以诗答我八世祖石庵公其仁问疾之作，云："作客天涯久，还家二竖侵。可堪人卧病，偏使友关心。樱笋虚相约，云山阻共寻。安排惟药裹，消瘦感弥深。"料得休文胜，郊居景物清。竹阴三径碧，花韵一窗晴。诗卷闲中味，耕犁野外情。南村徒怅望，云树夕阳明。"自注："石庵住南村。"我家与何氏世有姻连，读此诗，可想见两家情好之笃。而太平气象、隐士高怀，均跃然纸上。

铁山先生孙古心先生，晚号藏翁，每元旦必有七律诗一首。其实如屠苏、爆竹、青柳、红梅等类语，虽吉祥止止，然岁岁如此，有何趣味？余少时《咏元旦》有一联云："有数亲朋半衰白，无知儿女又青红。"盖取半山"岁换儿童喜，还伤老大心"意也。

文衡山《甫田集》中除夕诗最多，如云："千门万户易桃符，东舍西邻送历书。二十五年如水去，人生消得几番除。"余曩有《除夕》一绝云："憧憧人影往来忙，一岁谁嫌此夜长。人世债多天不管，打门声里尽抽光。"此意却《甫田集》中所无。

●初编·卷八

宛陵诗，少年华大谢，中岁学东野，晚岁效香山。其平生工力，得力于东野最多，盖年方盛壮，精气足也。故云："郊死不为岛，圣俞发其藏。"又《寄永叔》云："窃比于老郊，深愧言过实。"此言欧公亦尝以东野为比。

圣俞五言律龔ū绝高，脱去宋人面目。"晚雨竹间霁，春禽花上飞"，似右丞；"清江飞晚雨，斜日半沧洲"，似随州；"山长羸马困，月黑怪禽啼"，似贾岛；"海近云多润，山高日少晴"，似许浑。其他清新者，则有"好峰随处改，幽径独行迷"、"幽禽晝清晓，宿雨度余寒"、"竹阴过晚雨，林表见残虹"、"风扫天如鉴，云开日似萍"、"缺月如羞出，荒云不肯归"、"庭花昏自敛，野蝶昼还来"、"荷锄山月上，寻径野烟微"、"风送寒潮急，云藏晚日低"；奇伟者，则有"驼鸣沙水冻，雕击雪云低"、"海月开金鉴，河冰卧玉虬"、"河气知寒早，岚烟觉暮昏"、"露气林间落，河声地底回"；幽野者，则有"叶枯虫自裹，窗响蜜寻归"、"悬虫低复上，斗雀堕还飞"、"鸟呼知木暖，云湿觉山昏"、"阴壑泉初动，春岩气自浮"、"江帆风势美，竹屋雨声连"、"野香生草木，云润浥衣裳"；刻琢者，则有"对山怜去鸟，隔树识游人"、"晚云谈次改，高鸟坐中还"、"渐近鹭犹立，已遥村觉横"、"燕湿飞犹快，花寒色更深"、"乱风灯不定，暝色树相连"；自然者，则有"花发日初暖，鸟啼春欲深"、"野云将拂幔，水鸟不惊船"、"江潮自迎客，山月亦随舟"，皆唐人佳句也。

宛陵《咏安石榴》云："安榴若拳石，中蕴丹砂粒。剖之珠落盘，不待鲛人泣。"体物绝工。宛陵五言古喜用窄韵，尤喜用"物"、"曷"、"洽"、"叶"等入声韵，集中无虑数十篇，此特偶举其一耳。其为人之褊僻，于此可见。

宛陵《陪谢紫薇秋泛》诗："菰蒲敛铍鍔，莲芡熟囊韬。"曩尝不解，及读《周礼》，其"植物宜膏物"，郑注云："膏当为囊字之误，莲芡之属有囊韬。"乃叹古人虽偶写风光，亦多有所出。我辈宜从经传植根柢，不当徒矜浮艳，以为诗人能事止此已也。

宛陵咏物诗，有颇与后人经注暗合者。如云："王瓜未赤方牵蔓。"（下句："李子才青已近尊。"）而方氏《礼记集解》云："王瓜，南方之果，色赤，感火之色而生。"朱子亦从其说。按郑注："王瓜谓之葭挈。"又引《本草》作"拔葵"，又引今《月令》、《夏小正》作"王萑"。而《吕氏春秋》又作"王善"。谓之"瓜"者，以其根之似也。诸说纷纭，不能确知其为何物。或云即土瓜，《尔雅》所谓"𦵏寅菟瓜"是也。今园圃中夏间开黄花作蔬食者，乃黄瓜，《本草纲目》谓之"胡瓜"，与王瓜不相混。

宛陵俗字亦有所本。如云："敦鸡肥美聊供饌。"（下句："菖酒甘浓可荐杯。"）此出臞仙《肘后经》"骗马、宦牛、羯羊、阉猪、镬鸡、善狗、净猫"之说。"镬"即"敦"字，去畜势也。畜去势则肥。今人但云"敦"，或云"骗"，他无其语矣。

后山句法多似鲁直，故鲁直独喜之。其造语务求晦涩，昔人谓："读后山诗，非一过可了。"想见其辟灌之艰。然其绝句云："此生精力尽于诗，末岁心存力已疲。不共卢王争出手，却思陶谢与同时。"其实陶谢壶奥，后山何尝梦见。

后山《暑雨》云："呵手不成温。"暑雨纵为积阴所侵，何至呵手？《挽司马温公》云："心知死诸葛，终不羡曹蜍。"然堂堂丞相，何至与曹、李辈挈短长乎？殊失立言之体。

后山颇欲嘉肴自将，不吮余隼，然语多无理。如《九日不出》云："面壁称诗笑语香。"此"香"字无根，不若秦少游之"花气侵人语笑香"较有来脉也。其他如《江河》曰："河江波涛曰涛波"之类，尤为魔派。余有绝句题其集云："觅句怜渠苦闭门，清词奥语至今存。已祧子固为宗子，更附庐陵作嫡孙。"盖讥之也。

"忍着主衣裳，为人作春妍"，后山《妾薄命篇》中语，盖哀曾南丰作。史言苏轼欲参之门弟子间，而师道赋诗云："向来一办香，敬为曾南丰。"阮亭评后山诗，谓其不脱钝根。然其忠爱之念，固可令人端拜。他云："有声当彻天，有泪当彻泉。死者恐无知，妾身长自怜。"诸造语刻挚处，亦何减东野。

荆公诗："哭死非为生，我心良不欺。"论者以为古人所无。然视后山之"死者恐无知，妾身长自怜"何如耶？

闻子规而思归，恒情也，人人能道之，而宋人诗云："应是子规啼不到，故乡虽好不思归。"此善用翻笔者也；秋风之扫落叶，恒理也，亦人人能道之，而柯山诗云："岁晚苍藤甘老大，尽将黄叶付秋风。"此善用逆笔者也。可见作诗贵能用笔，能用笔则俯仰天地，光景常新矣。

近人往往取古人诗一句，如"满城风雨近重阳"作第一首起句，以次递下，演为律诗五首。谓之"辘轳体"者，误也。尝以是问名山翁，翁以无锡朱梦华（烈）书为覆。朱君书引《绡素杂记》曰："凡诗用韵有数格：一曰'葫芦'，一曰'辘轳'，一曰'进退'。'葫芦韵'者，先二后四；'辘轳韵'者，双出双入；'进退韵'者，一进一退。失此则谬。"并云："三格用韵，均有范围。要取相通之韵，调合无间，如'东'、'冬'、'支'、'微'、'佳'、'麻'、'寒'、'删'等韵方可。"因引杨诚斋诗为例："杨诗《明发道经生米市，随喜西林寺留题》云：'贪睡能无起，挑灯强未残。春声忙野店，月色淡柴门。又踏黄尘路，前追红叶村。秋衣那敢薄，病骨自难温。'是诗起仅'寒'韵一韵，余皆'十三元'，此'葫芦格'也。（名山云：先二后四，'四'恐为'三'之误。）所谓'先二'指起句，亦用韵而言。《嘲淮风》云：'絮帽貂裘莫出船，北窗最紧且深关。颠风无赖知何故，做雪不成空自寒。不去扫清天北雾，只来卷起浪头山。便能吹倒僧伽塔，未直先生一笑看。'此则一'删'一'寒'迭押，所谓'进退格'也。起句出韵不在此例。'进退格'亦称'单辘轳格'。诚斋诗中'辘轳格'实即'进退格'，两者无别，不过异其名耳"云云。按

《湘素杂》记之所谓"双出双入"，即先两韵出，后两韵入也，而朱君并未引及。余按《柯山集》有《晚发寿春浮桥阳楼怀古诗》，前二"豪"韵，后二"萧"韵，此即"双出双入"矣。其《病中得晁应之秋怀诗》亦然。

戊午秋，游天平、支硎，访楞伽僧舍。僧人绪诚，修髯瘦骨，延余坐看云起小轩。轩据寒泉之上，左阳山，右天平，风景至佳。绪诚曰："此小华山也，为晋支公结茆处。"归检《苏府志》，不得。后读《石湖集》，有《华山道中》一绝，云："过午层云未肯开，暖云村店竹菑灰。萧萧林响棠梨战，晚恐阳山有雨来。"乃知绪诚之语非诬。古今地名相同，颇多不考，游者踪迹，往往多误。邑志艺文收放翁《赵屯》诗，其实放翁何尝至青浦，此乃皖口之赵屯耳，见《入蜀记》。

含山张砚铭（星枢），民国初幕游我邑，文酒之欢，无间旬日。未几去职，历游吴江、常熟、无锡等县。尝寄余诗，有"九峰螺髻还依旧，应笑劳人换鬓丝"之句。砚铭能饮，举止娴雅，卒以贫以佣书终。诵王梦楼"文人失职多依幕，倦客伤春怕听箫"之句，为之一叹。

苏浙连界之处，有二诗人焉：一吴江许半龙，一嘉善周芷畦。半龙诗清丽，学樊榭。《湖上遇雨》云："山翠昏阴崖，云岚冷兰隰。暮雨寒欲沈，杳霭孤塔立。轻轺移远林，溪回苹藻袭。沿缘溪上村，微辨钟鱼湿。褰帷眇修渚，蓊然众绿入。眷兹岩下晖，翠羽每双集。"佳句如"梅子黄添湖外雨，荔枝红入岭南天"、"栋子花时春欲尽，壶卢提罢鸟无言"。芷畦《由宁海至宁波归舟即景》云："云净蛇山秋过雨，月明象浦夜平潮。海阔帆随残月落，天晴山拨晓云开。作雨春寒仍故故，斗茶余韵亦轩轩。"皆似《灵芬馆集》中语。半龙名观，芷畦名斌。

嘉定章篆生先生圭瑑《航海》句云："天低帆影外，地转浪花中。"此与郑海藏"中流分列郡，小立过千山"十字同一工俚。盖下一"转"字、"过"字而轮船瞬息千里之情景自出。先生民国初宦游山左、浙右，顾朴讷无华，家居黄渡，解组归，以著述自娱。齐卢之战，黄渡被兵尤烈。先生言其宅舍弄中，军士遗矢盈尺，文书簿籍，杂糅其中，故尝有句云："八年两次遭兵苦，一日三秋望治穷。"语虽质直，其流离之苦可想。著有《勤生堂诗文稿》。余最爱其"名心退似迎风鹞，诗思清于吸露蝉"十四字。

光绪丙午，篆生先生由进士馆派往日本留学。宝山钱印霞（淦）、施琴南（赞唐）与之同行。琴南著有《聊复轩诗存》。《初夏》云："草脚守瓜初抱子，树头布谷正催忙。"其和余《柳絮诗》云："放颠欲出鸿毛上，失意还随马首低。"

《横云山馆诗存》一卷，松江王文甫（毅存）著。文甫诗清醇雅则，近时云间诗人之佼佼者。第以中岁客游宣南，又不欲以诗自炫，故余至茸城辄问文甫其人，多或知或不知者。然观其自序，谓自少喜诵李、杜、苏、陆诸家之作，则所谓能自得师

，而其诗功之深可见矣。今录其清雄者，《泰山》云："大河东渡势绵延，涌石穿云落眼前。七十二家今不在，一千余里独巍然。天门_ì失荡干霄上，地脉奔腾跨海连。便拟凌虚登日观，手摩碧落问飞仙。"《沂州道中》云："夹道浓青黍叶平，凉风十里笋舆轻。人逢沙路先谋睡，马啮山泉不肯行。槐市松蹊新泰驿，草烟沙雨古蒙城。夕阳深峡旌旗动，画角声声过博羸。"又《行次平原》云："茶铛折脚樽木瘦，破屋打头见星影。马啮残刍风雨急，天昏月黑眠初醒。平明上马人不知，乌帽出没摇鞭丝。轮蹄坐叹知何用，袖手却赋山行诗。"风格绝似大苏。《野外即》景云："临水人家半掩扉，绕堤杨柳自依依。雨惊菱叶水禽起，风乱麦苗山雉飞。"亦似剑南小品。其他"山行杂句惊沙冲，短笠野瀑乱疏钟"、"人稀知市远，犬吠识村来"、"戍旗屯废堡，荒冢卧残碑"诸联，能写北地荒寒景象。文甫尝辑其上世孝简先生以下三十人遗诗为《云间王氏诗钞》，凡二卷，金山高吹万为之序。

松江费龙丁（砚）有洁癖，襟怀洒然。工金石文，篆刻丹青，尤自矜重。尝手书赠余诗云："握手清谈趣，琅玕系臂新。放怀余麴蘖，匿影绝风尘。腰瘦诗同岛，潭深情比伦。峰颠猿鹤啸，声响得天真。"其夫人亦工书画。丁丑春，余以与于《松江志》役之招至茸城，往访龙丁，见夫人方临《黄庭经》，殷殷以经中古韵为问。龙丁家甚贫，而夫人处之恬然，真佳偶也。

龙丁尝赠余上海李安于女士《犹得住楼遗稿》一册，云平书先生同族也。安于名是，号吏香，为丙辰进士松林之女，适桐城方氏。方不惠，不辨菽麦，女士郁郁投水死，年二十五。其《归宁道中》云："堤上桥头迹尚疏，人离野店旭升初。远山一色新妆好，只有侬家髻未梳。"又云："入世本无天补恨，斯乡应有地埋忧。"又"梅瘦如扶病一分"七字亦佳。

近世闺阁中风气亦已大变。嗇老书言女子为诗，其性情多近和平温厚，恐未必然。盖近世女子远游四方，不无国家盛衰之念，其发于诗歌，亦随而悲凉慷慨。如旌德女士邑碧城《琼楼》云："琼楼秋思入高寒，看尽苍云意已阑。棋罢忘言凭胜负，梦余无迹认悲欢。金轮转劫知难尽，碧海量愁未觉宽。欲拟《骚》词赋《天问》，万灵凄恻绕吟坛。"《邓尉探梅》云："玉龙喷雪破苍烟，蹑屐人来雨后天。不惜风霜劳远道，佩环同礼九疑仙。""征衫单薄冷于秋，徙倚疏芳且暂留。后夜相思应更远，一襟烟雨梦苏州。"女士留学海外，其所著曰《信芳集》。樊山、实甫等多为题句。集中有《出居庸关登长城》诗。五言云："秋老风雷厉，山空木石尊"、"鸟从空翠落，人负夕阳来"；七言云："风送茶香来别院，雨催诗梦入残荷。"均非儿女子口吻。

余在蚤岁授徒家中，邑中闺秀先后从余游者数十人，然能诗者不过三四人而已。朱氏女长纤珠、次韵芝，皆娴静好学，余尝采其诗入《寒冰集》。近发篋复得数篇。纤珠《咏桂》云："秋风吹满桂花丛，处处芬芳满院中。仙骨分来应月府，灵根托处合琼宫。珠英露滴香逾烈，金粟烟迷影欲空。花好不教辜负汝，移尊相对意无穷。"

《春雨》云："雨滴蕉窗静更凄，落花深处杜鹃啼。韶光九十催将尽，怕看嫣红践作泥。"《冬日闲咏》云："窗前瘦竹影离离，料峭寒风欲砭肌。商略小园好晴日，梅花树下读书宜。"韵芝《春日杂咏》云："双双紫燕拂帘钩，晴日当窗倦倚楼。春树春花弄颜色，海棠带笑柳含愁。"小园殢地柳丝垂，着雨柔条更弄姿。春色三分中最好，千红万紫半开时。"今姊妹俱已适人，移其心思于盘概散之间，不然，其所造宁可量耶！

吴女雪琴《春雨》云："黄昏静听雨潇潇，楼上羁人正寂寥。推枕几回愁不寐，杜鹃花落恨春宵。"

女弟子陈颖言《咏裁罗衫》云："一幅轻罗千万丝，翦裁争欲入时宜。不知多少司机女，辛苦经年却为谁。"颇得香山乐府大意。颖言从未学诗，此则偶一为之。余因谓诗固以性灵为主，有性灵而益之以学力，诗之体用尽矣。性灵，天工也；学力，人事也。《毛诗》三百篇，《国风》重性灵，《雅》、《颂》重学力。学力须下刻苦功夫才到，至性灵，则会心不远，妙手偶得。故虽劳人思妇，亦多有可传之作也。

有咏白荷花押"红"字者曰："鸥鹭依来浑若素，蜻蜓飞上偶然红。"有咏苏州山塘者曰："卖花山叟如相识，剖蚌渔娃不解羞。"下句一巧一趣，而"剖蚌"句尤令人绝倒。

《随园诗话》："湖南张璨，字岂石。有《戏题》云：'书画琴棋诗酒花，当年件件不离他。而今七字都更变，柴米油盐酱醋茶。'殊解颐也"云云。按是诗已载《莲坡诗话》。打油诗易为流俗所传，本不足录，随园津津乐道乃尔，可见其诗话之滥。

又载："江宁涂爽亭者，能诗，有句云：'造物与闲还与健，乡人知老不知年。'按此乃陆放翁《闲居》诗也，只"还"与"仍"一字不同。

陈锡璐《黄妳余话》载一贫士口占云："柴米油盐酱醋茶，七般都在别人家。我也一些忧不得，且锄明月种梅花。"我邑何藏翁，某岁除夕改其句云："门前讨债立如麻，柴米油盐酱醋茶。我也管他娘不得，后门逃出看梅花。"较原诗尤趣。

世俗谚语，其来已久。"天下无难事，独怕有心人"，此语宋时已然，陈师道诗："人畏有心事无难。"此语虽鄙，理则然。"高不来，低不就"，此本于乐府曲"高来不可，低来不可"二语。白话诗，古人亦有之。乐府："江陵去扬州，三千三百里。已行一千三，所有二千在。"此为最古。近代赵瓠北《咏椎背儿女》云："一个西瓜分八片，阿翁大费为酬劳。"袁子才云："山妻含怒夺灯去，问郎知是几更天。"皆令人失笑。

●初编·卷九

山谷最讲句法，尝云："字中有笔，犹禅家句中有眼。"当时西江社中人，皆祖其说。陈后山云："句里宗风却饱参"即谓此也。如"小邦王事略，虫鸟声无人"、"王甥解鞍马，夜雨鸡唤晨"、"司马寒如灰，礼乐卯金刀"、"何为陈师道，白发三径草"，此皆山谷句法也。亦有不可解者，如云："朱家坝簾好兄弟，陋巷六经葵苳秋。""陋巷"与"六经"尚可通，"六经"与"葵苳秋"则难通矣。又有如改前人句以矫异者，如云："鸬鹚西照处，相并晒渔蓑。"此偷老杜"鸬鹚西日照，晒翅满渔梁"语也。然老杜句颇自然，一经山谷改窜，便扭捏。

山谷诗，好处在读者正昏昏欲睡，忽一二秀语如奇花照映，令人心开目明，欲弃而不得也。如云："艰难喜归来，如晴月生岭"（《次韵子由绩溪病起》）、"梦不到汉东，茗碗乃为崇"（《次韵答邢惇夫》）、"西风挽不来，残暑推不去"（《和孙莘老病起》）、"陶公白头卧，宇宙一北窗"（《卧陶轩》）、"莲花生汙泥，可见嗔喜性。小立近幽香，心与晚色静"（《次韵答斌老病起》）、"西风麤残暑，如用霍去病"（又和）、"西风将小雨，凉入居士径"（《又答斌老病愈遣闷》）、"风生高竹凉，雨送新荷气"（同上）、"句如秋雨晴，远峰抹修眉"（此忘其题）。

老杜《玉华宫》诗凄凉秣至，张文潜称为风雅鼓吹，诵之不绝口。集中《离黄州》一首，虽极力摹写，亦不过清旷，而乏雄深气味。圣俞未尝不效之，《谒昭亭庙》云："连峰到溪止，澄溜向潭泻。庙道走山腰，雀雏鸣屋瓦。古壁画云雷，空庭俨舆马。"仅一起稍似。

杨诚斋诗："柳梢一壳兹缁滓，屋角双斑谷古孤。""兹缁滓"，蝉也；"谷古孤"，鸛鵒也，皆拟其声。又柯山诗谓蝉曰"朝嘒"，谓鸟曰"夜鸣"，谓竹曰"老翠"，谓笋曰"新青"，直似哑谜矣，岂不可笑？

杨诚斋《宿潮州海洋馆》诗："腊前蚊子已能歌，挥去挥来奈尔何。一只搅人终夕睡，此声原是不须多。"赵瓯北句云："一蚊已足扰清梦，宵小由来不在多。"全剥取诚斋语，而拈出"宵小"，便落纤巧，不及古人之蕴藉。

梅宛陵云："南岭禽过北岭叫，高田水入低田流。"王荆公云："北涧欲通南涧水，南山正绕北山云。"其句法皆根乐天"东涧水流西涧水，南山云起北山云"二句。

人忌俗，诗尤忌俗。东坡云："人瘦尚可肥，士俗不可医。"此指人而言也；朱子言："落笔先须洗涤肠胃间荤膩。"杜牧亦有"笔头尘土"之语，此指诗而言也。余少时《咏白荷花》云："我欲题诗终不敢，一尘生恐在毫端。"亦即此意。

《许彦周诗话》："世间花卉无脸莲花者，盖诸花皆藉暄风暖日，独莲花得意于水月

。其香清凉，虽荷叶亦自香也。"余有"荷香不在花"句，石遗老人以为比金冬心"荷叶绕门香胜花"尤不费力。老人所论只在语言之工拙，至于意则人人共有。按《随园诗话》论佳句无心相同者，历引张宝巨"荷叶露香偏胜花"、厉樊树"荷叶绕门香胜花"、（其出句云："竹阴入寺绿无暑。"）梁守存"未到花时叶早香"等句，则此非金冬心句，老人误记耳。

诗用常言俗语却拙朴有致者，如老杜《病后过王倚饮》云："头白眼暗坐有胝，肉黄皮皱命如线"、"遣人向市赊香粳，唤妇出房亲自饌"、"但使残年饱吃饭，只愿无事长相见"等句是也。昌黎"玉川先生洛城里"一首，悉本于此。此种诗至不易为，须神化乃有此境。

《眉庵诗稿》，明杨孟载先生基手写影印本。先生为明初四杰之一，其诗别立畛畦。五言如"雨苔行处湿，风叶坐来深"、"江影摇春树，潮痕摺晚沙"、"窗鸣风减睡，爨断雨添贫"、"晚帘风掠燕，春水絮吹鱼"、"鹭睡愁融雪，莺流欲堕金"；七言如"秧苗尚短仍含谷，荷叶才高已上花"、"柳色嫩于鹅破壳，藓痕斑似鹿辞胎"，皆《青邱集》中所无。其句法多似半山，古风则颇有近坡公者。

沈石田诗天真烂漫，不假追琢。如"不忧天下无今日，但愿朝廷用好人"、"静时觉得忙时错，一日还如两日长"，语虽浅近，然皆有至理。他如"竹榻理诗春草乱，糟床听雨夜泉流"、"秋月微阳相假借，断云疏雨更商量"，则又何尝非雅调也。惜其诗名为画所掩，故世人鲜能道之。有《石田先生诗文集》十卷。

颂其诗，尤当知其人，若仅于文字迹象间求之，则失之矣。放翁诗，今人往往比之香山。即王世贞论诗，亦以乐天、放翁为广大教主，盖以其图状山川、影写云物，巨细毕备也。其实二人诗旨迥乎不侔。香山晚年栖心禅悦，世间荣辱得丧，一切俱空，故集中多悟道之言；而放翁则痛心两京沦陷，每以上马杀贼为怀，其平居留连景光，徘徊风月，皆藉以摅其无聊之慨，非素志也。故尝有句云："不须强觅前人比，道似香山实不同。"

诗之奇伟者，则有"乱峰出没争初日，残雪高低带数州"、"一道玉虹蟠夜色，千寻银阙卷涛声"、"两岸楚山临岸起，一江初日抱楼生"；俊爽者，则有"天际云涛秋益壮、楼头风雨昼初凉"、"登临始觉清秋入，怀抱端须浊酒开"、"钟阜云开分晚照，吴江枫落入新亭"、"花气连云收暮雨，涛声催昼送轻雷"、"抱城岚翠浮初日，侵岸湖光上早春"；悲慨者，则有"一年又觉凉风起，万里空怜楚水流"、"往事梦空春去后，高楼天远恨来时"、"浮云北极天难变，落日中原事可忧"；沈郁者，则有"茶能破睡人终倦，诗与排愁事已微"、"休官竟以诗人老，祈死应知国事非"、"忧天已分身将压，感逝还祈骨易灰"、"归死未甘同泯泯，言愁始欲对茫茫"；清旷者，则有"春山渐绿荒烟外，野水遍明落照前"、"客里春光生怅望，鸥边山色易黄昏"；闲适者，则有"饭后常教移竹榻，秋来最好住江乡"、"墙阴活计添新竹，篱角幽情带好山"，皆郑苏戡先生孝胥

《海藏楼》中句也。先生生逢易代之际，俯仰身世，徘徊景光，自不能无忧伤憔悴之辞。同时与之齐名者，为义宁陈散原老人。然苏戡胸中先有意，以意赴诗，故不求工而自工；散原胸中先有诗，以诗就意，故刻意求工而或有不工，此二人诗派之不同者也。余于壬戌之岁与先生互通一书，无何，先生北游，音问遂绝。

苏戡叙《散原精舍诗》有曰："余虽喜为诗，顾不能为伯严之诗。以为如伯严者，当于古人中求之。"又曰："往有钜公与余谈诗，务以清切为主。于当世诗流每有张茂先我所不解之喻，其说甚正"云云，颇有弦外之音。"钜公"殆谓张文襄也。然散原之诗，刻意学后山。余观其古诗多似退之，其气味绝不是江西也。

娄县朱进士似石（运新），宣统末署杭州知府，已有命矣，以革命军起，未之官。国变后，蓄发潜伏里门，自号顽斋。所为诗，但书甲子。忆其佳句云："苦茗耐人醒酒力，好花引我悦诗魂"、"淡泊只 奄诸葛菜，乱离谁问故侯瓜"。先生善辞令，庄谐杂出，殊有使人忘疲之概。篋中又有《螟虫叹》一首甚佳，以语触忌讳，不录。

上海严载如（昌育）有《和似石先生重游泮水》，句云："贞元朝士在，忍诵《黍离》篇。"又云："石林同把臂，舜水郁初心。"可谓深得先生心事。"石林"句谓同游叶理文孝廉也。

金坛于秋穆（定），岁庚午来宰县事。逾年，设县志局，延余任纂修。秋穆好宾客，其署中有庖工，扬州人，善为滋味，时招邀宴饮。余戏为联云："懒翻韩贽瓜齏谱，欲乞虞惊饮食方。"时人以为工雅。秋穆为文襄公敏中后，文颇朴雅，顾不善韵语。盖少陵不能文、子固不能诗、柯山不能曲，性近不近故也。

《天梅遗集》诗十卷、词六卷，金山高天梅（旭）著。诗起戊戌，讫己未，都凡千余首，槩本绝精。天梅卒年四十有九，卒时语其从兄君定曰："臣精消亡，向所为诗，后亦不复能加矣。"今录其雅饬者，如《将抵金陵》云："霞光照眼夕阳殷，横绝孤城苍翠间。八代兴亡都阅尽，太无聊赖是锺山。"《题范茂芝寻诗读画图》云："黄叶萧萧下，湖上秋风晚。欲唤画中人，诗心天际远。"天梅诗有自然者，如云："邀将明月来窗外，听到秋声在树间"、"二月繁花供病眼，一春苦雨怕开门"、"往事真成一弹指，此生禁得几销魂"；有支对极工者，如云："堪笑一心惟咒竹，却怜两鬓渐成丝"、"诗情艳似柳如是，剑胆强于石敢当"、"碑板间摹《张黑女》，交游半属鲁朱家"。信乎，文人之笔无不可也。天梅孝于亲，笃于气谊。易实甫（顺鼎）赠云："扶持忠孝须情种，歌哭乾坤要酒人。"柳亚子（弃疾）赠云："白衣骂坐三升酒，红烛谈兵万树花。"可粗得其梗概。

《浩歌堂集》十卷，松陵陈佩忍（去病）著。佩忍字巢南。余最爱其一联云："水阁凉生人影瘦，关山月上酒杯圆。"又《金陵杂诗》一绝云："桃叶人家水没扉，秦淮阁子映斜晖。半晴半雨太无赖，六月金陵穿袷衣。"

常熟庞栋材（树），别字独笑。庚午，金坛于秋穆氏来宰青浦，独笑随来为记室，与余一见如故。其为人通脱，醇酒妇人，无所不好，诗则多酣剑戟动之语。辛未冬，快快去职，时东乱方殷，别后寄余诗云："兵里还乡真失喜，眼前生计未全疏。"又云："江湖意绪原关命，墙壁公卿未可居。"

庞氏，故海虞右族。独笑伯父劬庵先生鸿书，清季开府黔中，亦工诗。忆其《咏柳眼》云："三眠初起态婆娑，影蹙星眸晕淡螺。倦处低迷疑宿雾，醒来轻倩蘸微波。楼中少妇愁相对，陌上行人阅已多。含睇欲将春绾住，一双燕翦乍经过。"

嘉定潘仰尧卹寄其近稿一册。《青岛海滨》云："无恙胶东霸气销，英雄淘尽浪滔滔。天留如画青山在，长与诗人伴寂寥。"《季秋游沪西农场》云："秋心争比白云闲，一片寒林绿未删。淡日疏烟都有意，几椽小屋枕溪湾。"沪上甚嚣尘上，读此令人作世外桃源之想。他有清丽似宋人者，如"冷云归远岫，春水涨新痕"、"云去山移影，风来树弄琴"、"名心淡似云归岫，诗思浓于绿到门"、"残雪未消烟恋树，寒云初散日衔山"，皆佳。

上海孙琼华女士，明慧工诗，适邑人盛祖江，妆阁间时闻诗声琅琅。能画山水，花鸟尤工。惜不永年而卒。南通张啬庵先生尝题其画册云："昔年走马海王村，犹见江香百本存。试与较量花叶处，黄金愁断美人魂。（《牡丹》。十三年前于京都厂肆见马江香牡丹册，须四百金。力薄不能得，今不知流落何处。）"苦学瓠香着意摹，妍脂妙墨会婀娜。生愁楚舞东风里，一曲虞兮奈若何。（《虞美人》）""畦田种芍傍西山，花为妨根岁岁删。何似铅华寄缣素，晴窗一对一开颜。（《芍药》）""一坪秋色艳青蓝，风露华滋晓正酣。愁绝有时逢七夕，天孙不见渡河骖。（《牵牛》。濠南秋色坪有七色牵牛。）"越溪浣纱女去，汉皋解佩人归。遗影殢情处处，霞裳翠佩云衣。（《荷花》）""园菊但供朝市，不若在野延龄。江上风波头白，渔父须鬓余青。（《芦花、野菊》）""陶家未荒三径，彭泽何有一官。莲社归来大醉，先生颜如渥丹。（《红菊》）""庭院早秋天，翩仙来凤子。可怜小儿女，学染拈针指。（《凤仙》）""毒物来无已，人间作米囊。五陵轻薄子，多少魏收狂。（《莺粟蝶》）""最爱闲庭院，红妆晓露时。不随梅并嫁，那识断肠词。（《秋海棠》）""翦尽秋罗薄，轻盈作舞衣。爱亲君子淡，弥称硕人頔。（《翦秋罗淡竹叶》）""直以水为命，相看人欲仙。晨娇花拭爪，夕惰月凭肩。（《水仙》）"

诗多而徒为无病呻吟，退之所谓"黄金掷虚牝"也。丙子之夏，朱君馨谷以其里人王步香明经主动诗十余册属为去取。翻阅之，则"怡荆体"十居八七，欲弃去之，则又念王兰泉先生言其人性情所托、嗜好所寄，化为冷烟蔓草，无以少见于后世，亦自可悲。因不厌梳爬，录其雅正者入《后续诗传》。其他单词剩语之佳者，则采入《摘句图》。如"试墨春云活，怀人夜月明"、"暖回东郭先生柳，香动西园处士梅"、"生香花胜鸟 姬养，得意诗同稚子看"、"穷不祭诗惭岛佛，闲能守岁学坡仙"、"诗有会心能起我，酒先上面不瞒人"、"盆花艳如画著色，风竹响若琴调弦"、"燕子风前香

剥笋，鼠姑花下冷飏书”。又“坐雨人如佛”、“雪后梅胎瘦几分”、“诗心得酒春云活”，皆堪讽玩。步香居观音堂之北杨庄，其地相传为铁崖别业，因自号守铁山人。所为诗几近万首，此特其残稿耳，尚存一千八百余首之多。生平于书最工，能为人书榜额楹帖。余撰县志人物传略而未之及也，为补志于此。

荆公云：“年少未应轻感慨，文章尤忌数悲哀。”余幼时习闻老辈教子弟，为诗文切忌衰飒语。吴莲如（昌颐）有《次渔洋秋柳韵咏冬柳》，一结云：“且喜穷愁只三月，春风又在小桥边。”为徐宗石先生昌镐所赏。莲如和余《柳絮》诗，纪其一联云：“无可奈何才堕落，大非容易是倡狂。”

送春诗之工者，忆弟子张畏生（泽坚）云：“依依别绪萦残绿，草草归装带落红。”下句刻画“送”字，尤见工巧。

●初编·卷十

牧斋论诗，多有可取者。如云："古之和诗，莫善于江淹。江之言曰：'蛾眉诘同貌，而俱动于魄；芳草宁共气，而皆悦于魂。'论诗而至于动魄悦魂，精矣，微矣。"（《宋之建唱和集序。》）"唐之李杜，光芒万丈，放而为昌黎，达而为乐天，丽而为义山，谲而为长吉，穷而为照谏，诡诼莽兀而为卢仝、刘叉，莫不有物焉。槎牙于肺府，击撞于胸臆，故其言之也，流传至于历劫而不朽。"（《周元亮赖古堂合刻序》）。"诗之道，有不学而能者，有学而不能者，有可学而能者，有可学而不可能者，有学而愈能者，有愈学而愈不能者，有天工焉，有人事焉。知其所以然，而诗可以几而学也。"（《梅村诗集序》）

牧斋亦复工为伤心语，如云："高人有福先归地，野老无谋但诅天"、"老有心情依佛火，穷无涕泪洒神州。"又云："苦恨孤臣一死迟。"《启祯见闻录》载豫王引骑五百，自洪武门入，先生向阙四拜，下泪曰："太祖高皇帝三百年王业，一旦废坠，能无痛心？"及北兵劫弘光至南京，司礼监韩爌周令诸臣上谒。先生见故主伏地，痛哭不能起。近见张鸿叙常熟金叔远所撰《牧斋年谱》，辞多回护。如云："甲申之变，先生已六十三岁。逾年正月，为清廷礼部侍郎。至五月，引疾归。仅五月耳。如果输心新朝，当如洪承畴握大权、踞高位，何至默默自甘为二十年白发老书生乎？"又云："置红豆山庄，托迹啸咏，令人不措意。实则密使往来，招募志士。集中时有流露。否则吕用晦、黄太冲、归玄恭辈志节贞介，若稍异趣，必至割席，何肯往来亲昵如家人兄弟然乎？"

牧斋诗之清丽典雅者，如云："春日田园新甲子，岁寒灯火旧庚申"、"夹岸麴尘三月柳，疏窗金粉六朝人"、"万事总随青鬓改，此身留得翠微间"、"修竹便娟调鹤地，春风蕴藉养花天"、"五湖鲑菜春来好，三月莺花乱后稀"、"一生花月张三影，两鬓沧桑郭四朝"、"西陵故驿连残烧，南渡行宫入乱云"、"苔边鹤迹寻孤衲，花底莺歌拉小伶"，以上诸联皆有牧之、冬郎风格。统观全集，觉此老只是书卷太多，心灵反致窒塞，乃词人而非诗人之诗也。以语名山翁，翁云："牧斋小诗尚可，余则多不足取，以句法多不圆稳。意其胸中常取古人诗之有疵颣者为藉口，故有此失。"此真得其结症处。

作诗调贵响而语贵圆，元相赠退之诗所谓"玉磬声声响，金铃颗颗圆"也。宛陵《和晏相公》诗云："因吟适性情，稍欲到平淡。苦辞未圆熟，刺刺剧菱芡。"此亦取圆熟而不取棘口之证也。翁书又云："即以杜诗论，宋人一代诗皆为所误。以后人不见杜诗好处，而专学其涩滞无理之作，其诗遂远不如唐。韩退之、白乐天未尝不尊杜，而乐天自出机杼，遂成一代大家；退之生硬，而句法圆满，真能得杜之精华而弃其糟粕者。"

香山诗喜参禅，只说禅理，故读之了然；牧斋诗多用释典，勃率其辞，读未终篇，

辄令人昏昏欲睡。此便见二人才力高下处。

随园云："读史诗无新义，便成廿一史弹词；虽着议论，无隽永之味，又似史赞一派。俱非诗也。"诚知言哉。余谓咏史犹史论也，固当以识见为主。如"玉玺无缘归日角，锦帆应是到天涯"及杜工部《咏怀古迹》等作，上也；但以支对工巧见长，如"于今腐草无萤火，终古垂杨有暮鸦"、"此日六军同驻马，当时七夕笑牵牛"，抑其次也；仅搬演传中故事，牵凑成篇，斯为下矣。因忆桐乡陆敬安（以卜）《冷庐杂志》载南康谢蕴山（启昆）《咏史诗》，如《张衡》云："十载覃思《二京赋》，千秋绝唱《四愁》篇。"《王浚》云："益州刺史三刀梦，建业将军百丈船。"以谓琢链名贵，属对自然，所见不太隘乎？谢诗工者不在此也，为略举余所爱者如下。《咏始皇》一起云："函谷关开瞰六王，天留一局待更张。罪名莫漫归秦始，良法安能泥古皇。"《李斯》云："篆法千秋留妙笔，纬书一炬是功臣。"创论无人敢发。《蒙恬》云："将帅穷兵多覆族，弟兄治狱自亡家。"持论平允。《虞姬》云："八千子弟失江东，只有虞兮效始终。死共乌骓埋骏骨，生怜红粉属英雄。花间名字留芳艳，帐下悲歌泣晓风。若使当年成帝业，宁同吕雉祸深宫。"此与"若教 姐逢君子，都是《周南·传》里人"都为亡国妇女翻案。其他警策者，如《王莽》云："宫中汉腊更新腊，殿上黄貂换黑貂。"《董卓》云："掷戟有人书吕字，横刀无计杀袁公。"《东昏侯》云："塞上无人思北顾，宫中有鬼诵《西京》。"《任虬》云："生前十斛桃花米，身后诸郎白练裙。"《后主》云："长江谁唱《公无渡》，群鸟争呼帝奈何。"诸联皆在陆氏所举之上。谢官至巡抚，其《咏史》始始皇，讫元顺壶，共五百二十六首，题曰《树经堂咏史诗》，刊于乾隆乙卯，首有吴锡麒、阮元等序。

咏张曲江事者，王摅云："只道主由金镜致，岂知兵为玉环来。"袁枚云："金鉴若教言在耳，玉环何致泪沾衣。"徐志岩云："金鉴果能陈黼座，玉环何事系罗衣。""金鉴"、"玉环"当时的对，故三人用意不谋而合。若徒以"金"、"玉"等字面为工，其能免至宝丹之诮乎？又宋陈豸《范增墓》云："忿失壮图撞玉斗，岂知天意与金刀。"

《晚甘棠集》一卷，娄县朱甘澍先生载耕著。先生客清江浦垂二十年，武进李兆洛太史呼为畏友。其诗经南汇张嘯山先生文虎点定。好句如"病里思家头易白，愁边听雨夜偏长"、"小人有母频看竹，高士无妻合种梅"、"草深人与蛙争路，风起花随蝶过墙"、"异书直可论车借，名酒何当折券赊"、"篆古便同金石寿，诗传犹胜子孙贤"。又有《咏余山王氏知止山庄歌》，以篇长不录。

辛未春，过上海郑质庵（永诒）寓舍。质庵语余："萧山王袖沧明经仁溥见足下诗，倾倒备至。"未几，袖沧果有《寄怀》诗来。中一联云："八口何堪逢世乱，一生大抵为诗忙。"余谓下句说余不甚切合。盖嘲弄风月，须坐享清福者能之。余年来封书乞米，终岁营营，图一饱且不得，更安暇于诗？恒欲取东坡"自笑生平为口忙"七字，镌一小印。

袖沧，宣统己酉优贡，庚戌廷试高第，授江西知县，未行，遭鼎革归里。著有《葭园吟草》一卷。其诗清醇典雅，如"席闲人怕逢刘四，膝下天教靳袞师"、"甯逢孝穆长藏拙，不倩元章代辩颠"、"文章自号《讠令痴集》，卜筑应居定错城"（自注：定错城见《越绝书》。）王氏居萧山西河，故右族。乾嘉时，有号谷塍者高隐不仕，筑十万卷楼，藏书之富，甲于东南。谷塍名宗炎，乾隆进士，世号晚闻先生。

袖沧诗，有似《随园诗话》中语者。如云："纸帐梦回残漏尽，药炉火烬断烟微"、"年已就衰慵作客，事无可说懒修书"。《咏塌地菰》云："嚼根休厌淡，托体不嫌卑"。又《斗蟋蟀》云："两军始相见，背城各借一。剑戟森高牙，旌旗张两翼。始垂澠池翅，示弱以诱敌。终作州绰鸣，似报甘泉捷。"

松江沈思斋先生惟贤，诗不多见。近钞示其五古一首，其于逊清朝政之失、党锢之祸，言之綦切，可作诗史观也，兹录于下。《芜湖中江校舍新建怀爽楼以怀袁忠节公，追念师门名德之盛，旧游无恙，哲人遽萎，辄为长歌以寄感喟，并谄校友》云："国家当末造，覆车每同科。衅机激钩党，乱政启妖讹。非无忠谏士，奈此昏何。惟辟恣威福，弈世贻讥诃。往者寓京邸，太息思卧薶。公负时望重，已落清流涡。忽覩闾阖雾，奋起挽天河。淋漓斩佞疏，剑气森荡磨。匪躬不遑恤，国本伤实多。未几鼎社革，神州厌干戈。皖南敷政久，岂弟流滂沱。民方买丝绣，士竞侧弁峨。岂意青门祖，遂踵《易水歌》。节麾去不返，英灵倘来过。颍川怀六一，圣湖祀东坡。文章与经济，颀颀两不颇。矧兼龙比姿，直声振隕波。何以舒仰止，岳樊义娥。何以状去思，长江接岷峨。缅维作人化，百家俱网罗。儒门开体用，折衷于丘轲。兹楼式遗象，非以供婆娑。谓当发挥此，庶几古菁莪。得时慎匡国，瞑眩薪可瘥。方州牧民者，取则在伐柯。我欲乘长风，展拜鸠兹阿。"丁丑春，松江修县志，思老任总纂，余以松人士商榷志事之招往访之。时年已七十余矣，耳虽重听，而言谈颇健，深许我邑新志体例之善，以为比之陆耳山先生《娄县志》殊无愧色。又言私家著述，生今反古，尚不免文字之祸，方志刊行，须公之当世，尤宜审慎。唐人修《晋书》，但讳"渊"、"民"等字，而司马氏家讳则直书之。是书叙洪杨只加一"乱"字，绝无"匪"、"逆"等谩骂之辞，于"逊清谕旨"等字样，删除净尽，自是民国志书正轨云云。

黄任之先生诗，瑰伟纵宕，有《辽东[A061]》一卷，经乱散亡。丁丑春，复寄示《浙赣游草》，录之以为尝鼎之一脔。《青云谱》云："南昌城南水一涯，青青被野肥禾麻。我来清明日未斜，青云草阁烹新茶。主人徵诗迎客车，蛎墙曾不禁涂鸦。林塘一径纡修蛇，入门众妙搜丹砂。小园水木何清华，一亭当午白日遮。油菜初莧紫荆花，黄冠坐弈檐之牙。如云士女乐谊哗，此邦土风清且嘉。庭阴延伫惊槎牙，老桂独干五桠杈。中华五族今一家，山人复生无咨嗟。（自注：明末，八大山人宗室朱良材隐此，手植双桂，一干五枝。）"近十余年，□匪陆梁，湘、鄂、闽、赣，被祸尤烈。先生游赣，正值兵燹之余，其纪匪祸十之八九。如《南城宁都间》云："小别南城景物非，渐芟荆棘长芳菲。终怜白骨春闺梦，坐废青苗绣壤肥。惨淡土花

郊拾镞，荒凉灯蕊巷鸣机。盱江何处迎帆影，草长王孙归未归。"自注："南城以上，壮丁大半死亡。致多嫠妇、多荒地。宁都一带土产夏布，匪乱前年，额百余万元。今仅四万余。"他云"浮梁三月茶边客，破钵千家屋外山"、"一车山下雨初足，二月田间人未忙"，皆清妙。

昆山徐燕谋（承谟）有《纪湘行》长古一首，约一百八十韵，盖效杜之《北征》也。写入湘道经浙赣而南丰，至宁都、吉安间兵乱后饥荒景象，足与任老诗相印证。如云："我观车所经，百里莽块圯。十里断炊烟，荆棘未翦伐。宁都西郊外，冈峦列[QSDO]々。逶迤不可尽，东南界闽粤。艰难抵庐陵，囊空已如括。街头吃薯芋，饿极胜崖蜜。"燕谋善状事物，如云："上坡蜗缘墙，下坡鹿惊"。又云："篙师蛙曝肚，尺寸嗟力竭。牵者虫爬沙，首俯仅见肱。"写山行、江行艰困之状，画所不到。燕谋，光华大学毕业生，为我邑戴禹修先生婿，尝学诗于无锡钱基博先生。

侯官林霜杰（黻桢）诗，如峡猿夜啼，风叶自警，近代诗人学双井者，当推独步。光绪戊申，榷税吴中，题咏颇偿。《渔矶夜坐》云："顾影真成一尺浑，弥在秋感坐孤墩。四更落月回光赭，横野来风积气温。挂眼渐怜鱼具好，屏居微觉道人尊。明朝更向松陵去，唤起姜夔与细论。"佳句如《虚室》云："残秋雨挟新寒至，遥夜心如落叶枯。"《市桥晚步》云："桥影淡随双桨去，湖光闲与一人期。"《夜奔达旦戏赠邹生》云："坐觉乾坤惟数子，起看河汉入孤杯。"《雪中登罗星洲小楼》云："恨人到处常孤立，野鸟离群独自来。"又"老女伤春偏自讳，才人向佛总难灰"，亦未经人道过。霜杰娶金匱邹氏，字燕生。燕生没，霜杰作《悼亡》诗十首，诗多，不备录，录其一云："佳人或再得，智妇不可求。胜人常在深，制外利用柔。屡空能起予，相对忘百忧。遂令龙性驯，未觉鸡口羞。南中二三载，转徙无时休。巧炊既不易，困学何所谋。（自注：燕生夙岁肄业务本女塾。）吁嗟尽瘁身，一瞑当自由。"断肠凄惋之语，不减苏戡哭兄妹诸诗，闽人多涕泪，天性然耶。

"语不惊人死不休"，老杜句也。而石遗老人云："诗有惊人语，难；又能妥帖无病，更难。"下一转语，愈觉精到。昌谷"羲和敲日玻璃声"等句，古人往往訾议，以为但求其语之惊人，而不顾其辞之背于理也。老人又云："鄙人论诗，先求不习见，又须不落纤小。"

老人来书，动以"诗人"见称。余谓"诗人"二字，在我国至不易得，必其人超轶尘表，而其风流文采又足渐被后人，乃得列之为"诗人"，如渊明、浩然、子美、香山一流人是也。近代东、西洋，凡小说家、歌曲家，无不可以"诗人"称之者，则固不足为贵矣。借从前说，余非其人；从后说，余亦不愿承也。不知老人之意何居？

"老色上面，欢惊去心"，乐天语也；"赏心乐事须年少，老去应无日再中"，荆公句也，皆古人伤老之辞。丙子夏，晤江问渔先生恒源，读其乙亥暮春留别其里中故人云："雄辩高谈动四筵，酒酣豪气欲摩天。惊人白发关何事，今日能狂便少年。"为老

年人张目不少。不过狂亦不易言，非伧夫使酒坐一般行径。问渔，灌云人。其诗妙处在能翻腾，能翻腾便无疲弱之病。

与 昆山胡石予（蕴）辛酉一别已十余年矣，顷得其近诗，读之则老境颓唐，非复如昔日之精妙，殆邱公才退矣乎。兹录其佳者，五言句云："雨声有凉意，灯景已秋宵"、"沼绿方开酒，星疏初下棋"、"病躯犹可酒，暑夜不宜灯"、"瓶水宜晨漱，盘蔬适晚餐"；七言句云："风掠树梢声似雨，月当墙角影疑灯"、"兰拆花房红吐舌，藕生莲子绿钩心"。石予朴质谨愿，严冬不御裘，善画红梅。其诗多写乡村风景，喜道田父野叟语，频年有作，必寄余。惜随手散藏，不能一一录存，异时或当发篋得之。

阮亭尝举明诗人之早慧而年不得四十者薛君采、王舜耕、孙太初、宗子相辈，以为可惜。余与武进谢玉岑（觐虞）交至深，玉岑为名山老人女婿，温文尔雅，能写吉金乐石文。其没也，余有诗哭之。玉岑文字，留存余处者多长短句，而诗则甚少。仅忆其《溪桥消夏》一绝云："竹床石几静无哗，长日惟消一饼茶。招徕轻云无雨意，残波开瘦水荭花。"

松江沈瘦狂（文浩），不修仪检，雅好鬻弄。其诗有"西风十里松江路，不为鲈鱼不肯归"之句，为时称诵，余援"鲍孤雁"、"梅河豚"之例，戏以"沈鲈鱼"呼之。

古人《岭峤》诗："地暖常无雪，花开不待春。"余常以为异。丙子岁首，索居濠上，风雪互寒，忽潮州惠来林寿荃大令鹤年以其诗卷抵余。翻阅之，多纪游之什。因答以诗，曰："南船北马穷山海，大句豪吟骇 噩蛟。意气感君相暖热，不愁飞雪满堂坳。"隔数日，得寿荃和云："放浪嗤余如退鹬，豪吟羡子正腾蛟。春风盥诵琳琅句，小倚窗前月半坳。"自注："元旦天颇晴暖"云。

吾乡余山，林篁幽邃，风景为九峰之冠。自法兰西人建筑天主堂、天文台，青山面目顿改旧观。忆独笑有《游余山》诗云："黄金铸蠡付烟芜，丝绣平原未易摹。今日西来作翻案，一亭一阁一耶稣。""被发为戎下大荒，名山输故事堪伤。此行不尽中原感，乱石无言送夕阳。"语殊感慨。

"行吟才过板桥西，人困残春醉眼迷。绿树如烟花似雨，隔村啼出午时鸡。"曹生叙彝（修伦）《过泖口》诗也。"春云霭霭日荒荒，豆满新畦麦满塘。残雪未消梅欲绽，眼前风景似家乡。"孙生再壬幕游淮安时，《曹甸道中》诗也，皆有渔洋风味。再壬好学，敦气谊，时有饷遗。惜余不能为邴曼容师，为慊然耳。

女弟子张翰明，酷好旧文学，腹笥颇不俭，诗有新意。《濠上访瘦师》云："十笏清斋嵇阮隐，一溪流水惠庄情。"《苦寒行》云："冷棋数子冰雹碎，浊醪一盏梨云飞。"《溪边垂钓》云："苔发黏矶如坐毯，桃英点水恰成螺。"

"惜花心性老何堪，日对梨涡怅澹庵。谁道名山垂死日，碧兰诗句满江南。"此名山先生为女伶江菊兰而作也。乙亥春，以其所著《名山七集》贶余，曰："新诗学义山，殊与鄙人年龄不合，定笑破先生口矣。"其风怀亦自不可及。余谓好色本之天性，虽古贤人不讳。欧阳公、范文正辈尤多侧丽之词，王梦楼太史所谓"声妓何曾关气节"也。惟先生生当易代，一腔热泪无从沾洒，因借兰以自伤，亦美人香草之意耳。其《咏兰》一绝云："并无红豆种山庄，白发乌肌亦自伤。同是姓钱行径异，不须家有柳枝娘。"

女子大抵安富乐而不耐贫苦。陶西圃《纳妾》诗云："当他意处无多少，未老年华欲仕身。"自是骄人语。沈姬来，余与之诗云："相对不禁愁杀汝，生涯如水鬓如星。"自是丧气语。盖姬年二十一，余年已四十七矣，老而贫，而姬勿怨也。故余谓糟糠妻难，糟糠妾尤难。

瓶粟斋诗话续编

●续编·卷一

作诗话有数难：夫古今文人，篇什鳞萃，然玄珠在握，动嗟赤水之遗；碧树周阿，或漏海人之网，此一难也。甄录人物，互有主张，是以韦穀选才，不钞老杜；房祺編集，独阙遗山。于是目论致疑，耳食见责，又一难也。"谟定命"，辞固温雅；吉甫作颂，语亦清新。嗜好有偏，甄综无定，此又一难也。季绪诤诮，士多谤伤；敬之称扬，人怀喜悦。嗜谏恶讦，自古而然，此又一难也。操千曲而后晓声，观千剑而后识器，自非然者，孰能平理若衡，照辞如镜？是以坡公误徐凝为恶诗，鍾嵘列陶济于中品，是非颠倒。物论贝嗤，此又一难也。

金元两代诗人，当推遗山为大家。遗山生长并州，登宣宗兴定五年进士。贞佑初始南渡河，嗣是周流齐、鲁、燕、赵、晋、魏间几十年，历官镇平、南阳令，至尚书省左司员外郎。金亡，北归不仕。其交游见于集中者，如杨云翼、赵秉文，则金之钜卿也，朝士如雷渊、麻九畴、王渥、李汾、李氏四桂，耆宿如赵江汉、王溥南、辛敬之、冯叔献，后生如郝伯常，诗友如秦简夫、靖南湖，酒友如刘紫薇、陈秀玉等，皆一时豪俊，遗山无不与之款接。遗山生逢易代，至性天成，每云："家贫亲已老，形瘵心欲死。"又云："我行颍川道，永念负甘旨。"《金亡后即事》云："西风一掬孤臣泪，叫断苍梧日暮云。"《女几山怀溪南辛老》云："欲就溪南问遗事，不禁衰涕落烟霞。"君亲朋旧之怀，往往见诸歌咏。至其为学，则云："先儒骨已朽，百骂不汝讎。胡为文字间，刮垢生癰疣。"其泯绝门户攻讦之私，尤为后人所不及。尝志欲修金史而未果，乃筑野史亭，成《中州》一集，凡百余年来南北钜儒节士，网罗散失，记载靡遗，自云："此书成，虽溘死道傍无憾。"又诗云："湿薪烟满眼，破砚冰生髭。造物留此笔，我贫复何辞。"惓惓故国，可谓至矣。钱名山尝言："遗山之后，未有遗山。"殆不仅以其文字言乎？

遗山七言古歌行，开阖动宕，驰骤奔放，盖所谓"挟幽并之气"，此为第一。如《虞坂行》、《南溪》、《赤壁图》、《秦川图》、《寄溪南诗老辛敬之》、《萧仲直长史斋》、《荆棘中杏花》、《赠别孙德谦》、《赠张彦远》、《此日不足惜》、《送希颜赴西台兼寄李汾长源》、《涌金亭示同游诸君》、《泛舟大明湖》、《游泰山》、《西楼曲》、《隋古宫行》、《天门引》、《蛟龙引》、《解剑行》等可二十篇，读之神为之王。且篇中往往杂糅唐宋人句，如"黄鹤一去不复返"、"白鸥万里谁能驯"、"事殊兴极幽思集"、"天淡云闲今古同"、"管城初无食肉相"、"黄帽非供折腰具"，恰如自出机轴，无襞积痕，此其独长也。其次为七言律，又其次为五言古，亦浏亮闲婉。至五言绝，多率易，不足观。七言绝，题画诗十居五六，亦无甚佳思矣。

遗山七律，篇篇钩勒，字字辟灌，而尤工于隶事。如云："只知河朔归铜马，又说台城堕纸鸢。"此咏白撒得河北降将，及哀宗突围北走，命白撒攻新卫取粮，为元将史天泽所败事也。"石苞本不容孙楚，黄祖安能贷祢衡。"此咏李汾被武仙胁迫，绝命

而死事也。"壮志相如头碎柱，赤心嵇绍血沾衣。"此咏王渥赴宋议约，及忠忽烈援汴，兵败，渥死难事也。其他写情写景者，云："华表鹤归应有泪，铜盘人去亦无心"、"伤时贾谊频流涕，卧病王章自激昂"、"华胥梦破青山在，《梁父》吟成白发催"、"黄花自与西风约，白发先从远客生"、"淹留岁月无余物，料理尘埃有此杯"、"黄菊有情留小饮，青灯无语伴微吟。"、"春寒春暖花如故，年去年来老渐催"、"春风碧水双鸥静，落日青山万马来"、"荡荡青天非向日，萧萧春色是他乡"，诸联感时触事，凄人心脾。《瓠北诗话》讥其"书卷不多，不如苏陆之博大"。余曰正惟其不多，故能精切如此。譬之用兵，苻坚百万之师，不敌谢公八千之众，在精而不在多也。纪律不谙，形势不审，虽蜂屯蚁聚，又安用哉？

昔人评遗山诗："不使奇字，新之又新；不用晦字，深之又深。"遗山亦自言："功夫到方圆，言语通眷属。"见《与张仲杰论文诗》。又《自题》云："共笑诗人太瘦生，谁从惨淡得经营。千秋万古回文锦，只许苏娘读得成。"又《后论诗》云："不信骊珠不难得，试看金翅擘沧溟。鸳鸯绣了从教看，莫把金针度与人。"皆自道其功力，并喜独得诗中奥旨也。

遗山诗全得力于杜。如云："长鲸驾空海波立，老鹤叫月苍烟愁。"此效"豫章翻风白日动，鲸鱼跋浪沧溟开"句法也；《赠常山侄》云："黑鹰破壳自神骏，黄犊放脚须跳梁。"此效"骅骝作驹已汗血，鸂鸟举翮连青云"句法也。其《论诗绝句三十首》，于山谷、后山颇多不满，故云："论诗宁下涪翁拜，未作江西社里人。"《题中州集》云："北人不拾江西唾，未要曾郎借齿牙。"指曾改作造选宋诗也。然亦有摹杜太似之病，如《纪子正杏园宴集》云："未开何所似，乳儿粉妆深"、"绛唇半开何所似，里中处女东家邻"、"就中烂漫尤更好，五家合队虢与秦"数语，全效《丽人行》。

遗山诗复句最多，《瓠北诗话》已备举之。余观其古风，结处格调相同者亦不少，如《赵和卿醉归图》云："好著蹇驴驮我去，与君同醉杏园春。"《崔梦臣北上》云："他日南归吾未孝，与君同醉晋溪春。"《送诗人秦简夫归苏坟别业》云："蹇驴驮入醉乡去，袖中知有眉山春。"《赠答赵仁甫》云："都门回首一大笑，袖中知有江南春。"《南冠行》云："安得酒船三万斛，与君轰饮太湖秋。"

《滹南遗老集》五十六卷，元初金遗民王若虚（从之）著。集有诗话三卷、杂文及诗一卷。诗古今体只二十四篇而已，余皆为辩论群经子史之可议者，如论《春秋》"宋灾伯姬卒"及《檀弓》"子上不丧出母"，阐发权变之宜，足破古人解经之陋，尤为有功世道。诗话所尊者惟杜，杜之后惟乐天，于山谷、后山多所讥评。评山谷者，凡二十余见，如云："荆公'两山排闥送青来'，读之不觉其诡异。山谷云：'青州从事斩关来。'又云：'残暑已促装。'此与'排闥'等耳，便令人骇愕。"又云："诗人之语，诡谲寄意，固无可。然至于太过，亦其病也。山谷《题惠崇画图》云：'欲放扁舟归去，主人云是丹青。'使主人不告，当遂不知乎？"俱言之成理，学诗者当深长思也。诗中有《题渊明归去来图》云："抛却微官百自由，应无一事挂心头。消忧更藉

琴书力，借问先生有底忧。""名利醉心浓似酒，贪夫衮衮死红尘。折腰不乐翻然去，此老犹为千载人。"可知其好议论矣。遗山有《别王使君丈从之》诗云："谢公每见皆名语，白传相看只故情。"盖为汴京破后，潯南微服北归而作。

《道园学古录》五十卷，元奎章阁学士虞集著。首《在朝稿》二十卷，则为开国时王公碑铭、哀诔之文；次《应制录》六卷，则为册文、制诰、碑铭、题铭、题跋之类，有诗十余篇；次《归田录》十八卷，则为侨寓临川时诗文、杂著；次《方外稿》六卷，则大率禅院、道观之文也。史言元初大典册皆出集手。览观其制，道园固为一代作家，元初制度，亦颇可观。道园尝为史官，熟于金、元掌故，所为碑版文字，足为史家一讨之助。兹标举其二三："女真分族砮居，各为部落，故其为氏或以名、或以爵、或以官、或以里。"（《高鲁公神道碑》文。）"凡禁近之臣分，服御、弓矢、食饮、文史、车马、庐帐、府库、医药、卜祝之事，皆世守之。官虽盛贵，然一日归至内廷，则执其事如故，至于子孙无改。"（《宣徽院使贾公神道碑》。）"国初建大都，分侍卫、亲军为列卫，布诸畿内。卫必有营，而特立孔子之庙，儒学在焉。卫之官，有都指挥使以至将帅偏裨，而特设儒学教授。卫官皆三岁一更，独教授常在治所。"（《武卫新建先圣庙堂碑》。）又《元史杨朵儿只传》、《阿剌罕传》皆取《杨襄愍公神道碑》、《曹南王勋德碑》文为蓝本。又《阿剌罕传》"祖拨撒事太祖为火而赤，又为博而赤"，史不申叙其名称，而《曹南王碑》云："火而赤司服御弓矢者；博而赤司烹飪者也。"《通鉴纂要》至元十七年："以阿剌罕为右丞相，率师十万击日本。"而《阿剌罕传》云"十八年"、云"左丞相"、云"军马四十余万"，皆据《曹南王碑》言之也。道园文典重肃穆者，如《翰林学士承旨刘公神道碑》、《江西行省平章政事伯撒里惠政碑》、《贺丞相墓志铭》、《中书平章政事蔡国张公墓志铭》，皆煌煌钜制也。其诗只清婉而已。惟与范德机善，见于其诗颇多。《题范德机诗集》云："抱膝长吟老范兄，寒岩古柏两同清。"《舟过清江忆范德机》云："千载清风东汉士，百年高兴盛唐诗。"《赋范德机诗后》云："玉堂妙笔交游尽，投老江南隔死生。最忆崖州相值处，华星孤月海波清。"则其人文采风流可想。范名梈，字亨父，《元史》附《虞集传》。范亨父《德机集》凡七卷，五言古体二卷、五言律绝合一卷、七言古体二卷、七言绝句一卷、七言律句一卷，为临川葛仲穆（雍）所编次。亨父诗，五言古句法典重，而时失于涩滞，其源出于颜光禄，如《袁州谒袁祠》云："乘月泛修渚，凌晨访崇台。曾藿匝地起，叠观凌云开。"一起尤似。七言歌行，集中最擅胜场，如《题李白郎官湖》、《王氏能远楼》等篇，皆有谪仙风调。五言律句，多善状难写之景，如云："江翻垂木动，风过杂花回。"言树木之影倒垂江中，因波翻而影动；杂花之香故已远去，因风过而复回。妙在不说出"影"字、"香"字。又云："浴凫浮断梗，过雁折危楼。"此言断梗因凫群之浴而动荡，雁以危楼高耸故折改其方向也。"浮"字、"折"字皆见其锤链之苦。

集中有《掘冢歌》一首，最警策。诗云："昨日旧冢掘，今朝新冢成，冢前两翁仲，送旧还迎新。旧魂未出新魂入，旧魂还对新魂泣。旧魂丁宁语新魂，好地不用多子孙。子孙绵绵如不绝，曾孙不掘玄孙掘。我今掘矣良可悲，不知君掘复何

时。"世之溺风水而好为千年调者，读此可猛省。

《香苏山馆诗集》，古诗十七卷、近体十九卷，江西东乡吴兰雪（嵩梁）著，首有王昶、法式善、姚莹、曾燠等序。兰雪，嘉庆庚申举人，道光初，出刺黔西州。翁覃溪、王述庵、王梦楼、袁随园辈盛称其诗，其名与黄仲则相埒，朝鲜、琉球至有供其画像者。然余观兰雪古诗，笔虽纵恣，每多题外铺叙，颇嫌词费。近体则试帖气未尽，未能臻开阖驾构之妙。至其为朋旧题图卷之作，十居七八，尤令人厌倦，虽曰 敢名者多，亦笑其乐此不为疲也。集中如"衣上白云晴更湿，笠边红日午尤凉"、"花如新病扶初起，苔似闲愁扫又生"，此等好句，时一遇之，未能多得也。他若"无官便作神仙想，不朽原非将相名"、"平心自觉能容物，习静惟应卧拥书"、"无才岂敢谈经世，有福方能坐读书"，虽言有趣理，然终是学人之诗。

兰雪诗，病在下字太重。如"开瓮酒香浓透屋，压床书卷乱围山"，"浓"字、"透"字、"压"字、"乱"字，皆有握拳透爪之迹。余谓上句不及余之"酒熟开尊香满屋"，下句不及湛如之"小床书似乱山叠"语较自然，然此可为知者道矣。

律诗对仗，不必妃青俪白以为工也，须观其一联中下字虚实能否铢两悉称，而一句中上半句与下半句如何堆垛。上下联能两两相对乃佳，而兰雪句法多有可议。如云："有花开日频浇酒，无事经年懒入城。""无事"二字可省，"有花"二字割去，便不成句矣。且"懒"与"频"亦对不过。又云："青山荷锸能狂醉，红袖扶筇亦俊游。""红袖"能"扶筇"，"青山"安能"荷锸"？又如"行装书爱携千卷，广厦阴当庇万家"、"金铸居然推贾岛，办香难得配东坡"，皆有语病。

诗中用经语，大谢及老杜最多，然不善为之，便易尘腐。而兰雪寄其妾云："自悔劳人常草草，可怜杨柳太依依。"又黄左田云："浓阴园有桃千树，清澈扬之水一条。"俱有风致，左田名钺，当涂人，乾隆进士，有《壹斋诗集》。

遂宁张船山先生，诗学太白、东坡，而不袭其面目，于袁、蒋、赵三家外，能拔戟自成一队，洵豪杰之士也。诗凡二十卷，皆手自删定。篇首自记只寥寥百余字，且并不乞序于人。（见《日知录》十九卷有《书不当两序》一则，乃知先生有见地。）余每见各家集中，例有怀人诗，多扯名公巨卿以装门面，此格防于杜之《八哀》，然数见不鲜，亦殊可厌。而船山《庚戌除夕怀人》八首，皆老兵、倡妓、舆台之属，其避俗若浼、玩世不恭，可以想见。

船山贫而兀傲，其诗遂多牢骚抑郁之语。如云："亲旧更谁容我傲，穷愁真耻受人怜"、"难测天心姑任运，既来人世可无情"、"交疏偏有知名客，儿好强于负郭田"、"书残尽费闲心补，画好时防俗手题"。又"佛空未易忘衣食，兵在何从计死生"，此于饥荒兵乱之世，人人有此想，却不曾有人说。又"一蝶驮花冒雨飞"七字甚香艳，可入《瓠香室画谱》。

牧斋《高会堂》一集皆纪漫游云间事，其序云："不到云间十有六载矣。水天闲话，久落人间；花月新闻，已成故事。""顷者菰芦故国，兵火残生，衰晚重游，人民非昔。""是行也，馆于武静之高会堂，遂以名其诗。""时丙申阳月十有一日，书于青浦舟中"云云。考其时，则为顺治十三年也。集中有《徐武静生日》诗，以是知为徐氏。一时相与周旋者，如张洮侯、董得仲、宋子建、陆子玄、沈麟诸人，府志当有可考。其《高会堂》诗句云："鹤唳秋风新谷水，雉媒春草昔茸城。"余每欲取老杜咏滕王阁法，为去"新"、"昔"而易"犹"、"自"二字，以为较苍浑，虽牧翁复生，当亦首肯。其《赠妓彩生》云："老眼看花不耐春，裁红缀绿若为真。他时引镜临秋水，霜后芙蓉忆美人。"又《赠别彩生》云："红颜白发偏相滞，都是昆明劫后人。"此老人品固无足重，然自是深于情者，绿之以为乡邦佳话。

朱竹垞《鸳湖棹歌》有云："留客最怜乡味好，屠坟秋鸟马嗥鱼。"注："闽人卓成大，元末侨居甌川马嗥城，殆即《水经注》所云'马 城也，鱼可为腊'云云。今人写作'马交'，或写'马胶'，皆以未知'马嗥'出处而误。"按《棹歌》百首，泛记禾中风土，并非止咏南湖。诗中注地名、物产甚多，如"鸭馄饨"、"清若空"之类，皆绝好诗料也。

船山先生《出守莱州》诗云："塞上承天语，民刁默化难。"按《管子七法》："禁雕俗。"注："雕俗谓浮伪之俗。""刁"应书作"雕"，此必钞胥从俗之讹。

扬子《方言》："飴谓之𪔐 唐飴，徒郎切，音唐。"知今之糖，即古之飴也。我国制糖之法由来已久，《说文》："飴，熬稻为之。"此糖之以米为者；《楚辞》："而鼈炮羔，有蔗浆些。"《齐民要术》云："甘蔗榨取，汁似饴飴。"此糖之以蔗为者。唐诗："箫声吹暖卖飴天。"据郑康成"箫管备举"诗注云："箫，编小竹管，如今卖飴者所吹。"则唐诗自是"飴"字，非"𪔐 易"也。世俗于"飴"、"𪔐 易"二字不分，且但知"飴"之音情，不知糖之为"飴"矣。飴𪔐 长，𪔐 皇也。即今之糖饼耳。昔刘梦得谓诗中用字宜有来历，尝以六经无"糕"字，不敢用。然白香山有《寒食过枣 团店》诗，"团"亦非古字也。

《庄子·齐物论》："狙公赋 𪔐 音序，即栎实也，而今人往往误为"芋"。又杜诗："锦里先生乌角巾，园收 栗未全贫。"此正用《徐无鬼》篇"先生居山林，食栗"故实。" 栗"，小栗也，而刻本多作"芋"，应改正。

壬子、癸丑之间，邑中谈艺之士张静莲（世昌）、徐伯匡（公辅）、慎侯（公修）、邹葆荪（尊德）、杨石年（轺）、徐仪九（来）、叶行百（春）等结为诗社，月必数集，其主人轮流为之。先期约定地址，或假公园，（旧灵图亦名曲水园）或假余家半野亭或酒楼，以为欢聚之所。席间由主人命题，隔二三日，各出其所作，互为评品，以取笑乐。厥俊稍改前例，人酒一壶、肴一碗，共赴预定之家，名曰"胡蝶会"，"胡蝶"、"壶碟"，盖谐声也。开门扫径者为东道主，亦轮流为之。丁巳以还，

又有消寒之会，则又益孙丈作黼、方君仁俊二人。壬戌，邹湛如（尊莹）倡璧庐诗社，咏而不觴。凡社友及他县人士课作，多乞各地名宿评阅，第其甲乙。乃曾不数年，兵乱相寻，旧游零落，风雅遂歇。

甲寅之夏，社中咏曲水园白荷，限用"尖"、"叉"韵。时外埠亦有和作，忆山阳朱亦奇孝廉邦伟两律云："云影波纹漾碧纤，如来宝相自庄严。接天烂漫花成海，映日晶莹粉似盐。爽挹凉痕依水槛，静参香气立风檐。隔溪菱实欣堪采，绿婉红娇角露尖。" "溪边游女鬓堆鸦，水阁风凉好驻车。腕雪玲珑争似藕，脸霞潋滟欲羞花。闲看鹭浴波如镜，愿结鸥盟艇作家。一曲《恼依》归去路，盈盈新月照鱼叉。"此外钱静方（学坤）、邹葆荪等，佳句甚多，惜不能得其稿。惟忆葆荪押"《昔昔盐》"，以"田田曲"为对者。余诗不入集中，姑补录于此，云："万斛红尘不染纤，色香世界似华严。池塘戏叶鱼吹沫，水国寻芳蝶舞盐。得雨新声如泻玉，未秋凉意已侵檐。谢家诗格端堪比，艳发丰姿逗笔尖。""闹红一舸听呕鸦，别样风华映日车。名士连斟竹叶，美人打桨泛菱花。云扶玉立仙成队，鸥抱香眠水作家。依是青溪莲社客，新诗斗险愧温叉。"

咏雪诗之别调者，余前《诗话》已标举一二。顷又见徐渭诗云："骑都烂漫麋羊胃，庖坦横纵解犊比。尽领熊罢归拂扫，别从雉兔较罟{弟}。"诗凡八十韵，虽极诙怪之能，然终嫌嚼蜡。咏物诗，总以有寄托为主。王荆公云："势合便疑包地尽，功成终欲放春回。"何等气象，而荆公一生抱负亦见于此。

篋中检得余小颇《寓庸室诗钞》四五叶，余与小颇未尝通尺素，不知何自来也。然爱其诗功甚深，其《登快阁吊陆放翁》两律，悲凉感喟，尤得放翁心事，为录于下："散关清渭罢从军，投老东归卧白云。半壁山川余涕泪，两河消息断知闻。楼船铁马惊秋梦，樵径渔舟怅夕曛。应羨杜陵遭际好，乱离犹见中兴君。""长留诗卷恨缠绵，展向危楼一泫然。苦忆中原垂死日，伤心遗命《示儿》篇。庙堂残局支和议，志士长纓负壮年。千载魂归莫凭眺，冬青零落鉴湖边。"小颇名坤，诸暨人。

"八月之官十月归，九旬作吏竟何施。种粳种秫都休问，不是人间播种时"，此名山先生《题陶集》句也。余爱之，讽咏不去口。顷阅宋罗端良（愿）《渊明祠堂记》云："迹其求邑，虽指公田为酒之利，然来去以秋仲冬月，非播种之时。"然后知先生之所本。然罗记只是实写，而名山又别有感慨矣。名山喜读人间罕见书，其咏史诗，腹俭者往往多不得其出处。

惕庵籍宜昌，迁金陵后，筑宁远楼居之。迨国府南都，辟中山马路，惕庵之居当其冲，被拆其半。因更筑瞻美楼，读书赋诗其中。记其句云："宿雨新从玄武霁，暮烟喜自紫金浮"、"携酒闲吟鸡埭月，弄舟时趁燕矶风"，皆自写其闲居之趣。惕庵诗，务以清真雅正为主。尝私淑其乡先生东湖王定安孝廉，云："湘乡曾氏《十八家诗钞》，实王氏主其选政。"因以其所著《塞垣集》为赠。己巳，惕庵《五十自述》云：

"碧柳垂门同处士，青苗治国让时贤。"风流蕴藉，是真得王氏法乳者。

余外祖母出嘉定夏氏。夏氏居黄渡，余幼时恒随母往来戚里，因得尽识蕉饮（曰戈）、仲逵（曰璐）、勺宾（曰琦）等诸表。母舅仲逵先生，壮游燕、齐、豫、越，晚岁退休，喜为诗，遇余辄出示其稿，并命为删拾。己巳，年七十，忆其《自述》有句云："万里秋山行欲遍，五更霜角梦将阑。"

华亭张敬垣（葆培），日本留学生，今之律博士也。精治庖饌，珍腴名酒，恒蓄于家，客至，咄嗟便办。尝见其《咏黄耳 冢》一联云："洛下飞鸿才一瞥，云间走狗亦千秋。"语虽近谑，然属对自工。

曩于友人处假《灵芬馆集》读之，爱其名贵句甚多。今隔二十余年，不能尽忆，惟三数联尚往来胸臆间，如云："三月落花如梦短，一湖春水比愁多"、"狂因醉后轻言事，穷为愁多废著书"、"忧果能埋何必地，人犹难问况于天"。

松江于仲迟先生允鼎，奉其老母甚孝，豪饮工书，语妙天下。尝携其女游西湖，遇风覆舟。余以诗谑之云："湖山信美供汤沐，儿女相随话拍浮。洗耳归来都刮目，路人指点说清流。"此仿随园《调程鱼门水经注疏河渠考》"此后输君阅历多"意也。文人剽窃，虽古人不能免。"惠崇河分冈，势春入烧痕"一联，千古以为谈柄。人讥欧阳公好偷韩文，刘贡父解之曰："永叔虽偷，却不伤事主。"

●续编·卷二

明启祯间，锺伯敬、谭友夏二人诗名满海内。其诗以意兴为归，凡声调、格律、神韵、辞藻，一切摆落，世所谓"竟陵体"也。伯敬，万历进士，官至福建提学金事；友夏，为天启末解元，名位、辈行俱后于锺。然二人持论拗僻，不苟同于俗。伯敬尤自崖异，其所评《唐诗归》、《古诗归》；友夏与于其选，故诗家以锺谭并称。其实，二人龃龉绝不相同：伯敬理胜于辞，故工于造意；友夏辞胜于理，故工于造句。伯敬诗境夷而坦；友夏诗境隘而险。故其至也，伯敬尚能上攀北宋诸贤；友夏则降而置于四灵，几不可得。然弘治间，空同、大复诸子宪章少陵，究声律为骨干，藉辞藻为孚尹。至其末流寻声逐响之徒，仅存空架。自锺谭出，始一扫其弊。譬之长鱼大，久啖生厌，而忽得螺蚌小鲜，口味为之一变，岂不大快！而归愚《明诗别裁》屏二人诗不录，以为自郅无讥，此则未免一偏之见。余谓二人自开户牖，不可谓非豪杰之士，第尊之则奉若斗山，鄙之至弃如粪土，皆可不必。顾氏《日知录》于伯敬诋其甚力，何为也哉！

伯敬诗功甚深。其早年，五言尚未洗尽齐梁气味，中年以后，乃始一空摹拟，自辟町畦。

伯敬诗，于虚实处能错综变换。如《题秋江卷子》云："望远写秋江，秋意无起止。何曾见寸波，竟纸皆秋水。"写画中之水，真若烟波渺瀰。下云："烟中过寒山，江净翻如纸。空色有无间，身在秋江里。"写江中之水，居然幛湿淋漓。

伯敬《夜阅杜诗》有"双眸灯烛下，炯炯向我瞩"，而友夏《诗归序》云："夫真有性灵之言，常浮出纸上，决不与众言伍。而自出眼光之人，专其思、壹其力，以达于古人，觉古人亦有炯炯双眸，从纸上还瞩人。"此一段文字，全取伯敬意而畅言之。又伯敬云："浅深随所会，新旧各有触。"是真善读杜诗者也。

伯敬诗集曰《隐秀轩》，摘其佳者以为尝鼎之一脔。《春日课童编篱》云："事到山中减，春偏雨后浓。缚柴成虎落，浇竹汰龙鍾。新旭山山意，遥烟岸岸容。植援功不浅，减米饷诸佣。"《三月三日雨中登雨花台》云："去年当上巳，记集寇家亭。今昔分阴霁，悲欢异醉醒。可怜三月草，未了六朝青。花作残春雨，春归不肯停。"《乌龙潭吴太学林亭》云："城午亭先晚，园春水欲秋。蜂狂花约束，莺过柳遮留。云气能香石，湖阴半压舟。良辰多下钥，闲杀此林丘。"《集净业寺水次舟过十方庵看荷花》云："每忆经行处，重游胜昔游。往来能渐熟，耳目自多幽。水气穷昏旦，林声阅夏秋。晚花不无意，客散独相留。"《北固夜归》云："游迟畏晚天，晚际反凄妍。好月下山路，顺风归浦船。云涛孤棹外，市坞半灯边。回首苍苍处，金焦在乱烟。"《夜坐》云："愁里不知秋浅深，高城几处密清砧。悲愉未敢开乡信，摇落徒能感客心。永夜钟声非远寺，空天霜气况衰林。砌蛩篱竹皆情性，咽露摇风各自吟。"以上诸诗，志和节雅，裁对工整，绝似半山。

《出郊》云："芳草如欲暮，桃花忽以晨。""暮"、"晨"二字从"柳暗花明"意蜕出，然语特新奇。

刘彦和论诗，谓"发端必遒"。如伯敬《暂霁》云："重阳无不雨，况作蜀山行。"《巴县傅仲纶招饮江楼》云："纵无楼可上，此地已高寒"等句是也。又其工于体物者，《微雨》云："虽疏终助冷，非久亦生愁。"《寒月》云："入霜惟觉淡，过雨自生寒。"《舟月》云："入舟如好友，在水更宜人"等句是也。其他可入摘句图者，如"寒松通石魄，幽竹覆泉声"、"沙星疏欲活，霜火湿争残"、"客在梅前到，春当雪后看"、"无人山路远，不夜水亭阴"、"行经绝涧数花落，坐见半山孤鸟翻"、"夕吹声中残叶怯，山寒来处客衣知"、"微凉不待晚先至，积雨能令秋易深"、"风露半更天尽月，楼台三伏夜为秋"、"草际萤光如晓露，叶边虫响作秋山"、"隔烟柳色先秋事，待雨荷香欲暮天"、"竹半夕阳随客上，岩前积气待人消"、"子侄渐亲知老至，江山无故觉情生"。

亦有通体清空如白话者，集中甚多，此伯敬本家体也。姑举其一，《赠陈荆生》云："吾子自称诗，人皆曰画师。此中深有寄，其意莫能知。笔墨非徒尔，亲朋由所之。古来负绝技，隐德类如斯。"他云："凡三年不老，每一见相思"、"树无黄一叶，云有白孤村"，则不啻宋人魔派矣。

友夏诗曰《岳归堂新诗》，凡五卷。《秋夕集周安期、陶公亮、陈则梁、赵彦琢、胡用涉、金正希、柏鸾堂看月》云："虽云常谢客，太寂亦思人。月性闲阶满，秋声半夜真。歌连乡梦了，坐历酒寒频。如此森森柏，微喧恕好宾。"《将往玉泉清溪，别胡汝济明府》云："白云君部内，敢不告山行。画入宗生路，琴分子贱声。淙淙春谷大，艳艳夜花明。去与樵人揖，闲谈尹素清。"他如"榻多僧出乞，砚在客来书"（《广慧庵雨宿》）、"粉霜开晚笋，香雨浥新蕖"（忘其题）、"抱病生闲想，逢僧长慧心"（《寻菩提场》）、"涧水荷香新雨后，寺门松影细风时"（《游灵谷寺》）、"小儿开花闲日伴，高楼落木暮天情"（《怀鍾伯敬》）、"野香吹岸茶初湿，林月凉滩钓未收"（《移航至河》），皆幽深峭刻。退之"骨冷神清"四字，足以尽之。

友夏好为镂肾扞胷胃之言，故往往伤于斤斧。然如"港气知花正，雷声入水圆"、"凉萤光草色，微磬立泉声"、"阁竹摇眠鹭，庵钟定薄霜"、"过塘灵雨胎佳月，出坞轻风翼敝庐"诸联，下字虽极险而稳，虽极奇而正。

《兜率庵阁上听泉对天柱峰》云："险径下晴绿，峰近庵亦尊。春笋青在中，古泉流到根。天柱洗沈晦，闲云孤出门。与我听泉心，相合如一魂。"《竹谷中答袁未央》云："幽谷绿娟娟，芳草竹中显。寂坐成萧疏，能使聪明浅。徐步受音影，俱至荒亭返。久对君兄弟，自然尊酒晚。荣华隐高言，一叹怀已遣。空林人散后，新月竹香远。"友夏五古无瑕颡者绝鲜，此在其集中最为精警者。

友夏评东野诗"貌险而神坦，志栗而气泽"，其平生祈向，亦惟东野。故其《寄池直夫》云："畸人住闽海，日月出其门。"《赠杨弱水》云："大道万物母，实心真宰血。"皆极意摹拟。然如《怀马仲良》云："不甚急君晤，良由平素深。"又云："故人急须眉，故心急高森。"此不过写爱其古貌古心耳，乃几全不成文理，令人喷饭。

《诗归序》云："夫人有孤怀，有孤诣，其名必孤行于古今之间，不肯遍满寥廓。而世有一二赏心之人，独为之咨嗟旁皇者，此诗品也。譬如狼烟之上虚空，裊裊然一线耳，风摇之，时散、时聚、时断、时续。而风定烟接之时，卒以之乱星月而吹四远。彼号为大家者，终其身无异辞，终其古无异辞，而反以失独坐静观者之心。则其所失岂但倍也哉"云云。然余谓李、杜、韩、苏之作，终古如景星庆云，烂然在目；竟陵之诗，乃自比于狼烟，则终于为狼烟而已矣。至论大家所失一段，所见尤觉狭隘。唐宋大家之诗，譬如食蜜，中边皆甜；竟陵诗，虽千百年后有一二人赏识，不似东坡所云"待得微甘回齿颊，已输崖蜜十分甜"乎？友夏文曰《鹄湾文草》，凡九卷。

樊山云："余论诗，专取清新。以为古作者虽多，于诗道固未尽也。"故其诗曰："略取蜀姜生辣意，定须越纸熟槌功。"余谓"生辣"者，乃避熟之谓。如云："江莲摇白羽，天棘蔓青丝。"西江诗派多祖之。清初，渔洋标"神韵"为帜志，而其所短者，"生辣"也。"熟槌"者，谓一字一层、一层一意，如云："水流心不竞，云在意俱迟。"此种句法，自老杜后罕有继者。乾隆间，随园揭"性灵"为表帜，而其所短者，"熟槌"也。樊山喜用僻典，白云："诗家百宝流苏帐，常恐人间索解难。"此则类乎狐穴诗人矣。岂即所谓"生辣"耶？樊山诗隶事徵典，不过尽其对偶工巧之能耳，岂即所谓"熟槌"耶？

石遗评樊山诗，谓为欢娱之工，不为愁苦之易好，然也。而樊山亦自负其艳体，谓可方驾冬郎。余谓樊山《无题》、《闺情》等什，止宜于镜奁脂盥间诵之；若其《铙歌》、《边塞》之词，则终乏铁马金戈气象，譬之女优学参军苍鹘，虽力鼓咙胡，总恨其声雌耳。

樊山诗酌奇玩华，世莫不惊其取材之鸿富，而终不逮温李者，何也？流丽而欠端庄、婀娜而乏刚健故也。刘彦和亦云："繁华损枝，膏腴伤骨。"

读樊山诗钞竟，摘录数十联，樊山诗之体象备矣。清绮者云："井桃淡白清明雨，水柳微黄上巳天"、"二风轻寒犹有雪，一溪新绿已平桥"、"两三小鸭眠花熟，一一流萤点竹轻"、"绿槐高处寻知了，红藕香中听活东"；典雅者云："冠样 崎方子夏，瓯香黯淡泻翁春"、"桃叶生男工写榜，梅花有婿不能棋"、"睡棠赭似杨妃面，带草长于谢客须"、"刘蛻十文十如意，王筠一集一迁官"、"游扬修竹为君子，拾举梅花作相公"；新颖者云："松煤 久除胶性，丸药藏多损蜡衣"、"卯时酒晕花雕盏，午日衣香艾虎纱"、"缥色自循茶盏釉，朱斗添拌印池泥"、"生菜入汤供晶饭，野梅和雪点茸裘"

、“杨花白后成春服，豆子红来作念珠”、“两弓苕帚庵中地，一个蓑衣社里人”、“期会不愆惟海燕，风情略少是山茶”；工巧者云：“桑叶油油分雨色，榴花醋醋弄晴晖”、“幕职汝胜酸枣尉，劳生我似苦瓜僧”、“寒生九月初三夜，泪尽双文第二书”；其干支对之工者云：“但得闭门从子柳，不须赛社扰庚桑”、“酒尽丁娘惆怅夜，诗吟壬子乱离年”、“云笈蠹穿倭子本，雨墙蜗篆腊丁文”；俳体云：“凉瓶怕饮荷兰水，京讯常封茉莉茶”、“跳舞会宜夔一足，测量学要羽重瞳”；至其使用冷僻之书，如“丹穴乳泉皆异境，黄甘陆吉是幽人”、“御陶瓷病无茅篴，正透犀纹有豆椒”等，集中甚多。故其句云：“古书静坐常思误，僻典酬劳孰劝斟。”上用《北齐书·邢邵传》语，下句自注：“赵瓠北晚年每就洪北江，质一事则劳酒一壶”云云。余戏效其体，题其集云：“吴女簪花意太娇（时人评其诗如是），风流不数玉山樵。胸中文史马三代，眼底沧桑郭四朝。颇有闲情评手柳，（樊山官渭南颇久，有《渭南感柳诗》。）好于险韵斗腰桥。放翁出处新安惜，迹近才高不自聊。”樊山绝句，余最爱其《邯郸》一首，云：“仙家顿悟由来少，朝贵忧劳自昔然。我怪卢生太侥幸，睡为卿相醒神仙。”

“勾当”二字，见《归田录》。凡言“句当”、“排当”，皆读去声。然樊山《赠妇》云：“只候茶汤常夜半，句当花事每春前。”“当”读平声。余曩有句云：“昼永句当终日睡，雨多媒蘖一春愁。”亦作平读。

祢衡，“祢”字读上声。而郑虎文诗云：“呵壁问天怀屈子，挥毫对客忆祢生。”作平声读。虎文字炳也，嘉兴人，朝隆进士，著有《吞松阁诗文集》。其诗，乐府追汉魏、七言入韩苏堂奥、近体亦不落大历以后，雍容雅正，固是盛世元音。

余自癸丑至丁丑，此三十年间，凡三谒林和靖墓，而庚午携蒋姬、丁丑携沈姬，故尝有诗云：“一诗魂万古春，苔花糝径净无尘。携将茜袖香裙侣，来拜妻梅子鹤人。”近见金味根一绝，云：“锄梅饲鹤隐孤山，和靖高风未易攀。湖上春来花似雪，犹留仙眷白云间。”爱其辞意安雅而不涉于佻，余颇悔曩言之失。味根字颂唐，诸生。

“翩然有客到松江，共对闲鸥酌一觞。此去青溪须记取，柳阴深处沈东阳。”此甲子年杨了公赠金山张云林诗也，并旁注云：“瘦东先生，不可不去一访。”云林喜持其诗过存，时正上巳，故余有“东风燕麦春光晚，上日莺花禊集宜”之句。屈指至今，几将二十年矣。惟余故居故无柳，迨移居濠上，环溪植柳六七株，今已繁阴匝地，而了公已前卒，云林亦无音耗，每诵其句，辄为惘然。了公之没也，余有诗輓之，云：“说鬼谈狐荆一欢，襟怀湖海不如宽。市门无不知梅福，女子多思嫁伯鸾。自向千秋争位业，肯缘五斗恋粗官。云间终古骚魂在，应发春来九畹兰。”民国初，了公尝一出，权奉贤县事，数月而去，故第六句云云也。

贵阳陈筱石尚书（夔龙）清季罢直隶总督，后即侨居沪上，所居曰花近楼，取杜诗“花近高楼”意也。诗酒自娱，不问世事。近得海上友人书，谓尚书年已八十有六，耳

目聪强，尚能作蝇头校一。岁辛巳，尚书八十五寿辰，赋"佳"、"江"、"肴"、"咸"险韵诗四律，录其第二、第三首，云："楼榜新题健笔扛，（自注：花近楼，筑已三十年。近始乞瓶斋题扁额，老懒可笑。）溯洄往事剔银缸。两科孝秀踏陈迹，五省疆圻忝大邦。仲举高名何敢望，元龙豪气尚难降。抚时易洒新亭泪，日夜东流九派江。""斗室堪容一把茅，食单野蔌杂山肴。笠蓑伴我供垂钓，瓶钵如僧惯打包。天语敢承南极重，（自注：往岁，赐御书"冠冕南极"四字。）朋交深谢《北山》嘲。庭前榴火当门柳，时有薰风拂树梢。"余题其后云："历尽沧桑两鬓斑，觚梭长绕梦魂间。松期自得天倪厚，褒鄂难回国步艰。百代光阴诗卷在，九边勋业酒尊闲。暮年萧瑟端无那，愁杀哀时庾子山。"是诗拟兼以奉怀，不知尚书见之，以为何如也？

丁丑之难，士大夫率移家海上，为爱居之避，此大类刘曜陷洛阳，衣冠士族之入东也。久不得名山翁讯，庚辰春，翁从海上以书抵余，述劫后行止，云："弟无状，藏书已烬，臣精消亡，不能复读书，以此事让之足下。佣书三载，右手往往不举，故辄用左书，以均劳逸。率因此不能多书，天实为之矣。并媵交钞十圆，为助刊书之资。"噫，翁穷士也，乃分其砚田余润，远饷穷交，其事甚难，而其情弥可感矣！余报以诗，曰："颇忆阳湖钱进士，别来眉宇罕相亲。管宁阜帽能逃世，白也黄金只济贫。期我读书那有福，除君知己复何人。穷鳞沫能相恤，愈觉江湖气味真。"交钞，金纸币名也。金时有交钞库，见《金史》。

常州邓春澍，工丹青，好为山水游。丙寅春，余驱车过其四韵草堂，时新雨乍霁，水深没踝，春澍出佳酝相饷。见其《题四韵草堂》一律云："杜门镇日坐虚堂，满架图书兴味长。镌印闲摹钟鼎篆，敲诗静爇瓦炉香。画临石谷调新绿，帖写《兰亭》展硬黄。差喜砚田无恶岁，不知世界有沧桑。"其自为楹帖云："游观山水八千里，挥写烟云四十年。"又云："万卷撑肠无补世，一杯在手算开怀。"春澍故居燬于丁丑之难，因侨居沪渎，粥画为生。

汪子剑风近从沪上寄示其《雨霁凌云阁遇叶君茗话》云："清晓雨初霁，驱车登小楼。疏桐滴残溜，幽鸟熟清讴。茶韵娇於酒，帘波凉似秋。与君成解后，一席话绸缪。"红尘万斛中，却写得清恬乃尔，使人忘乱离羁旅之苦。

我邑诗社，极盛於民国之初。二十年来，旧时吟侣，疾病乱离，凋零殆尽，里中谈诗者绝鲜。今春，剑风自沪归，杯酒过从，顿破寥寂。盖剑风年较少，最晚出，而诗最雅健，且深知甘苦者也。录其《壬午八月十一日瘦东见过因却过濠上饮》，云："浮生我自闲，姑乐宰予寝。一觉蘧蘧然，养性无上品。忽来不速客，曹腾遂推枕。为问客是谁，瘦东尽阳沈。亦不道寒暄，亦不为敛衽。经旬不相见，但道相思甚。君编《续诗话》，佳句纷似锦。矜痴曰有待，过我谋镌镌。镌镌亦菱菱，山门且买饮。"其二云："买饮往何许，纡回造濠上。何必辨主宾，翻劳以酒饷。瓶酒满眼沽，兴必使之畅。明朝瓮盎空，臣朔饥不妨。垂垂忘形骸，议论更觉壮。斯时斗室中，并世两大将。亦有偏裨卒，红妆侍虎帐。谓其姬人斗闻铁笛声，再见道无恙。"

剑风为人兀傲，诗亦如之，是诗则寒芒四射矣。余亟起和之，云："我诗宦窳材，岂敢睨华寝。亦犹螺蚌味，未合列珍品。汪子磊落士，秀语满诗枕。荆楚雄一邦，气压江黄沈。昨者示新作，光彩照几衽。虽非堂堂师，势焰实张甚。世人工染夏，未解珍古锦。我方习矜痴，琐琐规镂镘。吁嗟身后名，相对一痛饮。"君年四十八，志奋青霞上。家有宁馨儿，得宝天所饷。（君次子南琛甚慧）五年苦兵革，郁郁意不畅。乾坤惟醉乡，举足了无妨。嗟余生坎坷，一贫百不壮。君来慰孤吟，桴鼓起孱将。后夜团团月，随君入我帐。但令兴不浅，莫问岁无恙。"

表兄邹湛如《咏落叶》云："高聳诗肩识夜寒，频教乡思起眉端。消愁酒向林间暖，作客书从枕上看。野店飞来鸦形乱，荒村踏去马蹄乾。萧条身世休伤感，容膝园居亦可安。"此借落叶写兵难时流离景象，亦犹夫诗人"苕黄"、"卉腓"之旨耳。时湛如寓上海郁氏山庄，故句云尔。

钱塘萧君伯逢（鸣骐），历佐闽楚戎幕，近虽息影闾閻，不废啸歌。尝钞示其《萝月盒诗草》数叶，清光满纸，自是雅才。《春兴》云："十年心事残灯裹，二月春光曲水滨。"《春游》云："山凝远黛浮晴色，花落残红衬夕阳。"伯逢书来，颇详述其身世，知为抑塞磊落之士，故其《秋感》云："聪明已觉杨修误，落拓终输阮籍狂。"

久不见畏生诗，而剑风亟称其绝句，以为清词逸韵，足追剑南、石湖。因诵其寻梅云："茫茫身世寄天涯，十日寻梅不忆家。梦与东风商略定，明朝吹放一枝花。"《喜秋莼至》云："几番秋雨沆寥天，独倚阑干思渺然。却喜今宵堪一醉，江头新到卖莼船。"《雪晴返棹》云："解缆方欣趁便风，天寒日淡雪初融。河冰忽地如潮至，疑是船行乱石中。"《闲行》云："闲行偶自到溪边，斜日依依晚景妍。一雨新添春涨绿，微风吹出竹梢烟。"《独饮》云："冉冉凉风起水涯，前林几处酒帘斜。晚来独饮烟江上，秋在一滩红蓼花。"

孙子再壬诗，已入前《诗话》。近数年来，知其颇致力於建安体，律诗不多觀也。昨出示其长句《三月十日与朱君念孝、陆君颀孙同饮邱君绍先寓斋》，云："客裏春光照眼明，况逢知己话平生。楼高不碍谭锋肆，情重翻嫌酒力轻。潭水一泓凉月印，乡山九点暮云横。六街渐觉行人少，踽踽归途夜色清。"此诗於朋旧之情、家山之念与夫风光境地，次第写来，毫不费力。香山集中，时有此境。

●续编·卷三

沧浪谓学诗如学禅，学禅惟在妙悟，自是不刊之论，凡门弟子来请益，辄以此语之。惟严氏以临济、曹洞及声闻辟支果等说为解，则悬拟玄空，故不免后人訾议。余谓读古人诗，当窥得古人神味意趣，虽相去千载，而读时觉古人所言如我所欲言，古人之心如我之心也。由此悟入，胸襟吐属，自然超妙。否则摇唇插齿，是读死书耳，终其身在外也。余又譬以学书，谓亦惟能悟，含毫时方得古人神态。若仅於间架形体间求之，正退之所谓"不得其心而逐其迹"也，象而已矣。

古风至不易为，余前《诗话》已论之矣。弟子问："如何能使音韵节族、抑扬抗坠无不谐合？"余应之曰："除读之烂熟，无他法。读时神欲王、兴欲仙，自按其声之疾徐高下而讽吟之，则得之矣。试辨汉魏乐府有汉魏乐府之音节，李杜与韩白不同，苏与黄不同，杨与范陆又不同。此中奥妙，但能心领神会，而不可以言传也。"

松江沈思齐先生惟贤长於词，然诗学亦深，於杜尤有心得。常教人读老杜《赠王郎司直短歌行》，以谓篇幅虽短，而移宫换征，变化已臻其极，熟读之，於古诗音节思过半矣。此孙子再壬得於思翁而以告我者。思翁以避兵寓於沪，与我邑人士时相遇，遇必谈诗。又论五言古不宜转韵。再壬云："惜思翁不久下世，曾未叩其所以然之故，以为憾。"

杜韩七言古平韵，其上句有不必要韵而用韵者，此以平接平，取其声之高亢，然大抵在同一韵内。惟《哀王孙》之"问之不肯道姓名"、"昨夜东风吹血腥"，通篇皆"虞"韵而忽插入"庚、青"；《赤藤杖》之"又云羲和操火鞭"，通篇皆"四支"而忽插入"一先"，尤不平凡。盖古体首重音节，所谓"商征响高，宫羽声下，廉肉相准，皎然可分"是也。又杜诗《曲江》三章及《短歌行赠王司直》等，皆用单句煞笔，此法惟杜有之。总之，音声之妙，变化无端，在读者自悟。否则樵吟牧唱，等之短笛无腔，其不为大雅所讪笑乎？

曩石遣老人与余论诗书云："诗有惊人语，难；又能妥帖无病，更难。"余谓总脱不出一个"稳"字。子美："新诗句句好，应任老夫传。""句句好"者，句句稳也，稳则传矣。又云："赋诗新句稳，不觉自长吟。"可见诗句能稳，大非易境。古人为诗，由不稳而渐渐至於至稳，今人好自矜奇，落笔便不求稳，又何能造乎稳之境哉！老人又云："鄙人论诗，先求不习见，又须不落纤小。"此亦学诗者所当知之者也。

曩时至沪辄为阅肆之游，曾得《元氏长庆集》，携归，阁度之几三十年。中间虽时一翻阅，然屡读屡废。至去岁，乃始卒業。为学之疏，一至於此。世所传元白诗名相埒，然乐府歌行等作，元不逮白远甚，惟近体格律略相似耳。大抵白条直，元奥涩；白剿净，元繁碎；白诗空灵，元诗平钝，天分不同也。书为万历间松江马氏所刻，凡为诗二十六卷、文三十四卷，全书墨笔评点，去取多不当，且句读多误，不

知出谁何手笔。

孟山人诗格则高矣，然其病使人不读书而空谈神韵。至义山则书卷纵横，组纂华缛，读之自然令人动勤学之念。

义山《无题》等作，必有所寄托而为，以不敢显指，故隐约其辞，大要不离屈宋"美人香草"之旨。其咏史亦然。读义山诗，正当以意逆志可也。如《富平侯》一首，不过写一当时勋贵骄淫之态，而注者必欲牵涉汉成故事，以为为唐敬宗而作，不太穿凿传会乎？

昔人以高青邱诗比之董香光书，谓其软熟而无骨也。余谓诗太熟则近於俗矣。

渊明诗："一欣侍温颜，再喜见友于。"晋熊远云："叔向不亏，法於孔怀。"退之云："岂谓貽厥无基址。""友于"、"孔怀"谓兄弟，"貽厥"谓子孙，皆歇后语也。至山谷则云："断送一生惟有，破除万事无过。"二句皆歇一"酒"字，虽巧而近於戏矣。

韩愈《雉朝飞操》："随飞随啄群雌粥。""粥"，俗皆作本字读，非也。《夏小正》："鸡孚粥。"注："粥音育，言鸡抱卵育子之时也。""群雌粥"，"粥"者，正状其但有抱卵育子之能耳。《礼记》："儒行粥粥，若无能也。"疏："粥粥，柔弱专愚之貌。羊六反，音育。"俗亦读为之六反，误。

"馨款"，"叹"字苦爱切，音慨。又去冀切，音器。而柯山诗押在"二十五宥"，读如寇音之转也。"蝗"字，平仄皆通。而苏子美云："蛮夷杀郡将，蝗蝻食民田。""蝻"亦仄读。

"诗福"二字，创见於谭友夏《南北游草·序》，前人未曾拈出，然有至理。其言曰："诗之成也，有诗才，有诗情，又有诗福。使非有诗福，则在人即为厌倦，而在天即为消沈。君苗之砚，以福少而焚；应刘之友，以福尽而亡。求才与情之无所不畅，亦不可得也。夫人世浮膏俗焰，亦必择一福人畀之，而况多取造化精华之气，又夺人士笔墨之权，宁渠无福乎？"后来随园亦谓"得好句须要福分"，与友夏意差近。

岭南金子才大令（保权），顷以王君巨川之介以书抵余，并邮寄其所著《周甲诗纪》、《七十自述诗》等来。盖仿岭南诗人张西山《周甲闲谈》之例，而谱为韵言。平生出处，大略见之。子才举光绪乙酉顺天乡试，清末民国初，历官江左、右州县凡十年。所交如刘润琴（霖春）、夏午诒（寿田）、商藻亭（衍鏊）等，皆逊清遣老。退休后，息影海滨，时与陈尚书庸叟唱和。其诗大抵以天趣为归，不立畦畛，如云："忧来难遣浑疑病，客久忘归便是家"、"闲坐闭门无个事，春寒静对水仙花"。又"一抹夕阳来汉口，半江春水接吴头"，与唐人"汉口夕阳，洞庭春水"一联同妙。

子才祖籍辽宁，时归省墓。迨东省沦陷，有诗云："百年桑梓几经过，一夕风云付逝波。渤海潮声榆塞雪，那堪回首旧山河。"麦秀黍离，不足喻其悲慨。

日本人多喜为诗。有水岛刚太郎者，愿列弟子行，抱其诗来质正。录其《杂句》，云："太湖水清吴山长，苏杭秋色总凄凉。江边雁落日将没，翘首碧云非故乡。"日向太平城畔游，秋风踏叶上高楼。长征既病川途远，拔剑四顾心悠悠。"二诗平仄虽不尽谐，然音节自古劲。日人诗大都类此。水岛字子云，自言生於舞鹤城山阴乡，别号橘香轩木奴，以其祖善种橘也。又言日本中学生鲜有不读唐诗者，惟大都歌以舞剑，故所读以乐府《出塞》等诗居多。因抽佩刀起舞，歌"黄河远上"一绝，蔚跂有容。日人每以武士道夸人，於此可见。

水岛君又录其国人藤井竹外《谒南朝皇陵》云："古陵松柏吠天飏，古寺探春春寂寥。眉雪老僧时止帚，落花风裏说南朝。"吠"字奇，惟日本诗人敢下此字。按元初，日本北条氏掌权。元末北条衰乱，国亦分南北，战争不息。厥后，南朝败亡。藤井，孝明时代人，在中国则为道咸间也。又广濑淡窗《桂林庄杂咏示诸生》云："休道他乡多苦辛，及门有友自相亲。柴扉出晓霜如雪，君汲川流我拾薪。"广濑，儒者也，亦百余年前人物。

昆山方惟一先生，於癸酉秋归道山。其诗，余前诗话已略载之。顷其门下士陆君安钦复钞示其遗诗数首。《癸亥端午寓瞻园即事》云："新篁已碍寻诗径，乱木纷披赌酒台。岁岁荒园当此日，何曾怀抱向天开。"晓雾冥冥欲化烟，何堪垂白对山川。独余花事浑如昔，不遣流光负一年。"二诗苍凉沈郁，所谓"对此茫茫，百端交集"矣。《乙丑长夏酒后录旧作书扇》云："神女由来天上多，惊鸿何处托微波。陈思空有千年梦，凄惻缠綿续《九歌》。"霜落秋空气不豪，四山月黑乱蛩号。深宵被酒中庭起，仰视星辰俯宝刀。"欲御瑶琴花下弹，积阴天未滞春寒。石崖齿齿泉流涩，空忆美人双玉盘。"此老平生倔强，读此可想见其愤时嫉俗之概。《寿沈爱苍》云："海上涛园系我思，华缨朱组少年时。身经忧患将成佛，老去功名剩有诗。孤抱入秋荡肝鬲，一尊相属皓须眉。河山未尽兵戈劫，欲共遗黎茹玉芝。"少日读公《小园赋》，明珠仙露自华清。一从长大游京洛，犹见风流属老成。北阙衣冠随物改，东皋杖履自春生。莫言庾信伤迟暮，三月江南正听莺。"应酬诗，不落套便是本领。次首一气卷舒，老杜往往有此格。

安钦居珠里之井亭，怀铅握槧数十年，殫精教育。有《玉树临风馆诗钞》。余最爱其《书感》一联，云："乾坤此日难为客，风雨明朝又送春。"以为读之令人惘惘也。又"潮音秋后小，山气晚来佳"，的是秋晚登潮音合风景。安钦名文明，昆山县学生。

练塘曹漱石先生家鼎旧元和诸生也，诗学随园。顷其哲嗣修伦寄示其《东庵遣稿》一小册，录其《静坐后作》，云："斜阳照山暝，飞鸟识巢归。寂寂云深处，幽人自

掩扉。"《书斋闲咏》云："客来每在斜阳裏，端的人间重晚晴。"《咏虞美人》云："至今秋雨怀西楚，犹为重瞳湿泪痕。"《白菊》云："倘教移向江边种，应有芦花拜下风。"又"山如旧雨曾相识，花值新晴倍可怜"、"狂似次公犹好饮，贤如原宪不妨贫"、"交从淡处寻知己，言到忠时怕忤人"，皆佳。

东庵没於辛巳，尝为《乱离吟》三十首，中云："大风忽起屋吹茅，入竹群童任笑嘲。略缓牵萝殊得计，卧看凉月下堂坳。"流离颠沛中整暇乃尔，真堪破涕为笑。

"畦菜瓢儿碧，篱花蟹爪黄"，练塘蒋信之句也。眼前景物，随手拈出，与唐人"尊菜银丝滑，鲈鱼雪片肥"同妙。

王子巨川出其新诗卅以示余，翻阅之，诗中奇句颇多，知其近日祈向长江也。余赏其"云阴行地疾，草势入园宽"十字，以为如"流星疏木，走月逆行云"则奇而失之险矣。巨川家居上海之引翔镇夏屋渠，渠花木掩映，事变后毁於兵火，因赁居租界。四五年来，租界屋食供具腾踊无已，"长安居，大不易"，诵其"琴书堆叠无多地，鱼肉零星不满厨"句，为之慨叹。

又《次韵书感示欣夫、蒙安》云："平生阅世剩柔肠，既爱无闻亦自强。勘字每凭毛斧季，征歌偶顾《杜韦娘》。风微鱼虎频窥沼，雨过蜗牛竞篆墙。拈得个儿梅子吃，却愁酸与病牙妨。"一结甚趣。巨川诗喜用子部杂家之语，此诗步韵至六七叠，运典多新颖。余技痒，因怀引翔旧游，次其韵为俳体却寄，云："廿年旧梦荡回肠，酒垒诗坛各逞强。影戏看绷《黑妈妈》，弹词听唱《白娘娘》。妖言忽报天鸣鼓，异事讹传鬼打墙。今日短歌歌倡仄，羝藩何处不相妨。"《黑妈妈》，宋时影戏名，见曲园诗注。

乱后生理愈艰，学殖益落，承故乡诸子时时投诗存问，弥足感也。邹君志孟（文輿）云："闻道江南独沈郎，（张南通有此语）骚坛树帜孰相当。家移濠上琴书润，案近花前笔砚香。百代文章宗永叔，一编《诗话》继渔洋。即今沧海横流日，风雅扶持赖不亡。"修伦云："记坐春风我最先，别来廿载亦华颠。支撑傲骨羞随俗，息宴虚斋学坐禅。海内传烽惊此日，花时撰杖话当年。拟探濠上春消息，为献新诗第一篇。"

汉邠原值黄巾之乱，当时与原游者，如陈留韩子助、汝南范孟博辈，多以米肉相送，可见衰世文士颠连靖贫之粮，虽古贤人不能却。余交游中如曹君安中、金君昌南等，咸扶危拯困，有古任侠风。而安中又有诗寄怀，云："歌喉一串价三千，乱世文章不值钱。终日嗟吁牛马走，任呼将伯有谁怜。"又云："西风怒吼炊烟散，正是诗人画饼时。"诵之为之下泪。曹君喜谈清代掌故人物，於《东华录》、《先正事略》等书，披览尤熟。

癸未春，畏生招其友松江朱雅田饮，因得於酒家相捻。朱君言谈锋发，评隋当代人物具有见地。别后奇示其诗，并辱以长歌为赠，学梅村体，以推崇过当，不敢率录。录其《秋末赋怀》一律，云："十载言归尚未归，剩将泪眼吊斜晖。天涯身世苍茫感，乱后家山梦寐非。北雁已随秋共老，西风那管客无衣。年来事事增惆怅，不独沧江负钓矶。"一结殊有味外味。

古人纪事、纪游之什，辄假风光物色点缀一二语，使读者知某诗为某时月所为。如子美《蜀相祠堂》则云"映阶碧草"、"隔叶黄鹂"。义山《过伊仆射旧宅》则云"残菊露"、"败荷风"。其他不胜枚举。顷见邱子绍先（家梁）《返乡》一律云："劫余庭院莽蒿莱，六载蓬飘此一回。风景不殊城郭异，霜华初肃管弦哀。喜从旧雨清尊聚，愁见高堂白发催。三户犹闻兴楚社，西风回首独登台。"诗中"霜"、"风"等字为余所改窜，原本诗固佳，余嫌其通首不见时令耳。绍先居县治西，韶年好学，能绘事，工书，后起之裴秀也。事变后，流寓沪滨。今冬旋里，执弟子礼，出其诗数十篇见示，皆斐然可观。《题南汇奚铁棠忆梅图》云："海国苍茫感岁残，故园花发雪漫漫。披图今日添惆怅，念破家山念别鸾。"金徽谱入悼亡词，雪虐风饕日暮时。和靖年来萧瑟甚，孤山愁绝对空枝。"自注："吴夫人名梅，时下世未久。"

●续编·卷四

诗，文人慧业也，非钝根人能了。或问："诗人如何？"曰："志欲壹而思欲深。又须置身如在魏晋以上，自然襟怀超妙，下笔与众人异。"徐天池先生云："淤泥填大千，荷叶自抽绿。"斯得之矣。否则字字尘臭，如村婆絮谈，涎沫飞洒，岂不令人憎厌？

杜少陵云："读书破万卷，下笔如有神。"可见能"破"能"神"是大不易事。今人短钉掇拾，学作一二火炉头语，便沾沾自喜，以诗人自居。使试平心静气，以思我平生读书几何、心得几何，则不待他人嗤点，自必爽然自失矣。杜又云："文章千古事，得失寸心知。"今人但自侈其得，不自见其失也，此亦由学力不到故。

古来文人之自负者，杜子美云："赋似相如。"又云："赋料扬雄敌，诗看子建亲。"白乐天云："生前富贵应无分，死后文章合有名。"皆以其诗赋言之也。至於文，则莫如范曄与其侄及甥一书云："我观史书，恒觉其不可解。及造《后汉》，转得统绪。详观古今著述及评论，殆少可意者。班氏最有高名，既任情无例，不可甲乙。博赡可不及之，整理未必愧也。我杂传论，皆有精意深旨。至於《循吏》以下及《六夷》诸绪论，笔势纵放，实天下之奇作。其中合者，往往不减《过秦》篇。尝比方班氏所作，非但不愧之而已。又欲因事发论，以正一代得失，意复未果。赞自是我文之杰思，殆无一字空设。此书行，故应有赏音者。纪传例为举其大略耳，诸细意甚多。自古体大而思精，未有此也。恐俗人不能尽之，多贵古贱今，聊以称情狂言耳。"书载《后汉书循吏传赞注》。然《容斋随笔》云（卷十五）："曄高自矜诩，以为过班固。固岂可过哉？曄所著序论，了无可取。列传如《邓禹》、《窦融》、《马援》、《班超》、《郭泰》诸篇，盖亦有数。人苦不自知，可发干载一笑。"

《夏小正》记人功物类之候，下字多隽异，若刺取一二诗，则譬若明珠，宝光照乘。如"鱼陟负冰"、"农纬耒"、"见韭"、"见杏"、"柳梯"、"羊腹"、"荣莖"、"燕睇"、"掇桑"、"委杨"、"拂桐芭"、"责梅"、"责桃"、"蓄兰"、"畜瓜"、"剥爪"、"剥枣"、"遄鸿雁"、"乌浴"、"陨麋角"诸语，其他如"莎随"为地毛、"长股"为黄鹏、"甯县"为麦札、"屈造"为虾蟆之类，见於经，见於注者尚多。古人诗往往喜用经中名物，宋人尤甚，"活束"、"春锄"已成习见，故《毛诗》、《尔雅》、《月令》等尤不可不读，所谓"多识於鸟兽草木之名"也。

"一夕轻雷落万丝，霁光浮瓦碧参差。有情芍药含春泪，无力蔷薇卧晓枝。"此宋秦观（少游）《春日》诗也。而遗山《论诗绝句》以其纤弱，讥为"女郎诗"。然其《秋日》绝句云："连卷雌霓挂西楼，逐雨追云意未休。安得万妆相向舞，酒酣聊把作缠头。"此何等语乎？遗山之论未必允也。少游词与山谷齐名，所谓"秦七黄九"。顾其诗格亦清绮，苏学士、张右史辈或不能及之，第时有率笔、俗笔耳。至如"山浮海上青螺远，天转江南碧玉宽"、"青山未落诗人手，白发谁知国士心"、"池光引月来檐"。

廩，竹影疎风到客衣"诸联，则皆哀家梨、齐山茶也。他云："扞虱幽花欹露叶，岸巾高柳转风条。"则几於荆公之"青山扞虱坐，黄鸟挟书眠"，谓非魔派不可得矣。观，扬州高邮人，所著《淮海诗文集》四十卷，后集六卷，《淮海长短句》三卷，有嘉靖己亥其郡人张诞序，云"校北监旧本，重刻於鄂中"者。

徐文长，在明代自是奇人。其诗奔放豪快，棱棱散散，直欲毁北地、信阳之垒。公安、竟陵，体貌虽似，气味实不相类也。如《理松棚》云："种松二万余，千五百株活。长养二十年，大者仅如栝。时移一丈板，独踞文竹兀。伸纸二丈余，举墨陡一泼。左盘持蛭螯，右垒把饕餮。挂衣松叶梢，雪阴洒曦发。"《刈圃》云："草蘖始一寸，及壮丈有余。岂直藪郎带，兼以馆蚊胥。呼童问腰镰，不用安所须。萝此忽如扫，一翊不得储。譬彼塞垣莽，往往伏戎胡。打冰烧其荒，窟穴空妖狐。莫谓野人贱，刈圃非雄图。"《大寒岭啖新胡桃频婆诸果》云："天险既已异，地产应亦殊。胡桃及平波，朱碧明椒隅。入夏而徂秋，叶翠尚不渝。但少鸟与雀，而多骡与驴。易水非不迤，滦河不为纡。但求一寸鳞，如海求猿狙。遥相燕太子，食客焉得鱼。以知荆高徒，日嚼羊与猪。猛风增食肉，嗔愤易睢盱。慷慨赴秦庭，不复顾其余。乃缘谋略短，岂真剑术疏。舞阳一竖耳，何乃为之俱。哀哉樊将军，空割一只颅。国有干乘大，能用王可图。乃用五寸铁，为计亦何愚。"诗不过写南北物产之异，以小小之题，乃发许大议论，虽云从"肉食者鄙"二语脱出，然他人总百思不到。先生尝云："口中百吞吐，莫道一俗字。"则其为人拗僻可想。集中诗题，亦往往从绝。

文长诗，初亦导源鲍谢，后乃汪洋变化於唐。其似太白者，《侠客》、《丽人》等篇是也；有似少陵者，《鹰画》、《白鹏》及纪游诸作是也；有似退之者，《郑本白兔》、《今日歌》等是也。然大体多效长吉，古今为长吉而似者，无过文长矣。律句亦有魄力，如《怀陈将军同甫》云："飞将远投戎，翩翩气自雄。椎牛千嶂外，骑象百蛮中。铜柱华封尽，昆池汉凿空。雁飞真不到，何处寄秋风。"他云："清光迷魍魎，冷晕呕虾蟆"（十六夜宿叶坊玩月）、"霞光翻鸟堕，江色上松寒"（饮云居松晚眺城南），皆幽异。七言律，奇丽者则云："千山见日天犹夜，万国福一水自平"（与客登招宝山观海）、"山瘴入云迷去骑，溪涛作雪泻行舟"（送通政胡君入闽）、"宝刀雪暗桃花血，铁镗风轻柳叶衣"（赠辽东李都司）；清新者则云："客裹经春花作伴，醉中连日雨留行"（送方阜民还歙）、"青箬旧封题谷雨，紫砂新罐买宜兴"；其体物之上者，《题梅》云："似月付将干片影，因风欲动一痕。"《月下梨花》云："摇寒隔院非关艳，映断长天别有芳。"又《咏菰薑醋》云："十昂九低头作鹭。"此言闻酸风而欲嚏不得也；《寿王生》云："诸朋作寿鹅蹠。"言贺者皆规行矩步也，无不形容绝倒。五绝八九为题画之作。余最爱其《画雪》之"万山无寸碧，何处认梅花"十字。七绝以写边塞为最奇，其余亦皆题画，虽多趣而不免於俗，不免於粗野。全集皆有袁中郎评语，所谓"帐中本"也。余嫌其评多鹄突，搔不着痒处。

明嘉隆以还，学者务为摹拟涂饰，高髻广眉，习为风会。公安袁宏道始标以"性灵"

，谓"诗文须从真源中出，文何必漠魏，诗何必三唐"。於是天下靡然从之。其诗大抵清新轻俊，力扫王李烟雾，世谓之"公安体"。所著有《敝篋》、《锦帆》、《瓶花》、《潇碧》、《破砚》等十种，总曰《袁中郎集》。诗凡一千七百余首，乐府得太白、香山法乳，最为擅场；七古时盗长爪郎囊中旧锦，间有效长庆体者，如《古荆篇》、《迎春篇》、《长安秋月夜》等作是也，殊无意义；近体韵致冷然，惜家数太小，如贫女簪花，摩弄姿态耳已。论者谓："学七子不过赝鼎，学公安乃至矜其小慧，破律而坏度。名为救弊，而弊尤甚焉。"信夫，其末流至於竟陵而不可反也。今录其一二，以见一斑。《舟居》云："丝烟丝雨润江湄，又到花娇鸟嫩时。杜宇一身皆口颊，垂杨通体是腰支。闲观水态思吴璧，暗记方言证《楚辞》。 濂太文壳太野，就中洁白是银莺。"《江上送别》诗："飒飒征鸿带雨飞，孤帆无计驻斜晖。西风兰杜香流水，落日云霞浣客衣。野店无人花自发，秋江有路梦先归。年来赠别伤同调，郢曲如君和者稀。"五言句云："山僧能咒树，童子解医鱼"（《刘常侍水轩》）、"山空狐女啸，树古鸟王朝"（《初入村居》）、"沙子晴献雪，树老夜屯风"（《江上》）、"好梦因凉得，闲愁到水忘"（《过藕花庄》）；七言句云："柳爱风流因病睡，鹊贪欢喜也嗔人"（《闲居杂题》）、"梦裹风听似语，山中烟树念如人"、"破懒始知经有味，送眠微觉酒多情"（《闲居》）、"官况易消如暴雨，痴儿难长似黄杨"（《和江进之杂咏》）、"柳态美如新沐发，山容亲似远归人"（《久雪忽晴，喜而有作》）、"桐阴恰好当覆，柳色终宜近水看"（《郊外水亭小集》）。

《读杜诗》云："纷纷学杜儿，伺响任鸣吠。入山不见瑶，何用拾琼块。"固痛快矣，但人之排击公安者，亦岂肯留余地乎？中郎以为，少陵后惟东坡差堪比拟，故云："仅仅苏和仲，异世可相配。"其五言颇好设譬，如云："西湖多奇山，其肤乃在水。杭人伴妇游，嗜肉不嗜髓。"《赠沈飞霞》云："黄金如仇人，抵死不相遇。"又云："归思如奔马，干夫不可控。"皆坡翁家数也。尝云："铸金哭东坡，百世想高致。"其折向可见。

中郎文不可不读，诗不必读，亦不能读。其近体，音声多不讲究，如"金日婵"，"禅"读仄。（《铜雀败瓦》诗："我是汉朝金日弹，粗毫安可试罗文。"）"饲"读平。（句云："施来白粲都饲鹤。"）其所居柳浪，"浪"字随平随仄。诸如此类，不胜枚举。泰兴朱一、冯二，非谓词家，争赏其瑜。中郎则自负其瑕。余曰：护短者自欺也，自欺鲜有不欺人者。集中次韵酬和之作甚多，令人厌恶。病在其稿及身梓行，而多不忍割。须沙汰乃出金也。

中郎论诗极精，如云："画有工似、有工意。工似者，亲而近俗；工意者，远而近雅。作诗亦然。何逊之题梅也，似而意者也；子美之'幸不折来'，意而意者也；至林处士之'霜禽粉蝶'，俗矣，'疏影横斜'、'水边篱落'，则为意中之似。"然余谓中郎亦止能言之，而不能为之。其《咏梅》云："苍云白石长相对，明月寒塘自作家。"不过高出青邱之"雪满山中"、"月明林下"。若较山谷"冷淡自能知我意，幽闲原不为人芳"，则迥乎不侔矣。诚哉，意而意者，难工担。又云："撷去炉烟与尊酒，幅巾聊

试武夷茶。"此亦从和靖"幸有微吟相伴住，不须檀板与金尊"意脱出。夫试茶也，微吟也，俱非赏梅极致。巡檐一笑，相契无言，斯可矣。他云："剩有蜡梅为佞幸，可无修竹作同人。"上句太尖新。弟畜山矾，岂不高致，而乃尔唐突西施耶？当堕马腹。至其论雪诗谓："祇益丹心苦，能添白发明"，深沉古雅，非子美不能。玉溪之'欲舞定随曹植马'，岂可与工意者道哉！谓之似，亦未也。又如咏月云："暂将弓并曲，翻与扇俱圆。"此恶道语也，似而俗者也"云云，皆针针见血。

中郎早探梵荚，好胜游，所至交方外，挟妓饮酒。尝自咏云："醉来寻白足，定起唤青娥。"以万历壬辰进士，官吴县二年便解组归。於其故乡城南夹堤种柳万株，筑柳浪以自适。窥其志趣，颇欲慕效香山，惜其年位俱勿逮耳。清代袁简斋出处及论诗主张亦颇与相似，余因论二袁文章，以为随园之文不及中郎之廉悍，而诗之广大胜之。然中郎《咏雁字》云："体势已超鸾翥上，契书知在鸟官前。千行写尽黄姑练，一字题成《碧落碑》。回波影出双钩榻，暮雨催成《急就章》。莺簧借与填新曲，风史烦为纪往年。"此等咏物诗，乾嘉间瓠北、频罗诸贤不能出其窠臼，即随园心灵手敏，亦无以过之。随园尝自谓诗学诚斋，然舍近宗而祧别祖，何也？余曰此正其胜人处。

唐人喜为香艳词，且讥切本朝，亦无忌讳。元白集中尤多。即以少陵之圣，而《丽人行》一篇尽情摹画，极绮腻温摩之致。下之温、李、冬郎，更无论矣。王建诗："密奏君王知入月，唤人相伴洗裙裾。""入月"，女子月事也，乃至形之《宫词》，而当时亦未闻有罪之者。又许浑诗："舞衫未换红铅湿。""红铅"，亦指月水。此种笔墨，唐以后便不复见。

何敬祖云："暮春忽复来，和风与节俱。"陶渊明确云："微雨从东来，好风与之俱。"李太白云："田家有美酒，落日与之倾。"弟子乞余评三诗高下。余曰："何诗得诗趣，陶诗得化机，李诗得高致，无从强为轩轻也。"

诗有极力摹拟而终不能胜前人者，如李白《凤凰台》效崔颢《黄鹤楼》作，苦不似，至欲槌碎其楼是也。有增窜前人数字，转得取胜，且原句反为所掩者，如"水田飞白鹭，夏木啭黄鹂"，李嘉佑诗也，而句首之"漠漠"、"阴阴"，乃王维所加；"竹影横斜水清浅，桂香浮动月黄昏"，江为诗也，而曰"疏影"、"暗香"，乃林逋以咏梅所改；"只言花是雪，不悟有香来"，苏子卿句也，而"遥知不是雪，为有暗香来"，为王荆公窜取是也。亦有虽窜易而终不免生吞活剥者，如杜甫之"夜足沾沙雨，春多逆浪风"，而白居易云"巫山暮足沾花雨，陇水春多逆浪风"；裴说之"冻饥寒起粟，病眼馁生花"，而苏子瞻云"冻合玉楼寒起粟，光摇银海眩生花"是也。又有故避字面而调法不改者，如欧公"鸟声梅店雨，野色板桥春"之套温，袁中郎"柳因有絮丝还在，莲到无心苦始休"之套李是也，然都无意义。

古人文亦皆有所本。骆宾王《讨武氏檄》"杀姊"、"屠兄"数语，本王允《责董卓文》

，曰："卓，国之大贼，杀主残臣，天地所不容，人神所同疾。"王勃《滕王阁》"落霞"、"孤鹜"一联，本庾信《马射园赋》"落花与紫盖齐飞，杨柳共春旗一色"；"画栋"、"珠帘"一联，本羊球《登西楼赋》"画栋浮细细之轻云，珠帘涇蒙蒙之飞雨"句也。"千城绝，长城列，秦民竭，秦君减。"晋陆倕《长城赋》，见宋廖莹中《江行杂志》，为杜牧《阿房宫》一起所套；"见若咫尺，田千亩矣；见若环堵；城千难矣；见若杯水，池百里矣；见若蚁垤，台九层矣；蜂巢联联，起阿房矣；小星荧荧，焚咸阳矣。"唐杨敬之《华山赋》也，见《阙史》，为《阿房宫》"明星荧荧"一段所套。又文天祥《正气歌》"天地有正气"以下一段，全套宋石介《孔道辅击蛇笏铭》云："天地有纯正至刚之气，锺物与人，烈烈然亘百世而长在。在尧为指佞草，在鲁为孔子诛少正卯刀，在齐在晋为南董笔，在汉武朝为东方朔戟，在成帝朝为朱云剑，在东汉为张纲轮，在唐为朝愈《论佛骨表》、为《祭鳄鱼文》，为段太尉击朱笏。"文载宋无名氏《儒林公议》。他如魏王昶《戒子弟书》效马援《诫兄子》、韩愈《进学解》效班固《答宾戏》等，甚多，不可悉举。

洪北江《诗话》所载毕尚书沅《喜雨》诗："五更陡入清凉梦，万物平添欢喜称。"以为自然超脱。然余亦有"凉生一枕梦，喜入万农心"十字，意同而语简，自谓无减前贤。

无从叔祖锐卿公树铎，有至行，嗜读而家贫。母命习贾，然学诗勿辍，著有《佩萱室诗》一卷。记其句云："诗书有味因贫弃，廛市为缘与愿违"、"教虽肯受憎儿拙，贫尚能支幸妇贤"，语虽俚，却不失一"真"字。余因叹读书固须要福，第一须天资过人；其次要境地饶裕，力能聚书，能读能悟，而米盐琐碎、儿女叫呶不扰其心；其次生有济胜具，能登临名山水；其次结纳海内贤豪学者，资以切磋；而终之以得年寿，能尽其才。数者备，其艺乃可名家。否则如石蟹实鼠，用力勤而终不能出也。熊鞠荪太史序公诗，谓其"名不登仕籍，足不出闾巷，不能开拓心胸、增长学识。时为之，地为之"，诚哉其言！公与南汇张啸山先生文虎交好，有《送啸山先生赴安庆曾节相幕》一律，云："忆自识荆后，追随诗酒坛。枉将知己待，祇觉别离难。此地一分袂，何时再聚欢。愿君功早就，翘首碧云端。"先生答之云："清溪孕灵秀，瘦沈在诗坛。泛滥通诸艺，聪明匪一端。五年频会合，杯酒每言欢。小别相逢易，无歌《行路难》。"公绘有《自在图》长卷，题者甚多，倭难后不知流落何许。

甲申夏，余弃濠上居，别买屋城西小虹桥侧，屋狭甚，不啻岸上牵舟，无复有蔬坪花圃之乐矣。曾有诗志慨，知交颇有和之者。上海郑质庵云："几人诗卷得长留，渺渺吟身寄一沱。流水门前鸣远籁，停云天际豁寒眸。多君抱膝犹堪隐，老我佣书尚未休。回首沧江初把臂，鼓鼙声裹白苹秋。（齐卢之战，君避兵衣沪，始由神吏而成相识。"）情文并茂。吕觉非云："小虹罨画片廛留，剪取西溪水一沱。名士过门撩倦眼，晴漪映屋豁清眸。花无媚态寒无碍，语不惊人死不休借句。留与后人凭吊地，称仙称鬼足千秋。"真挚语，非浅人能道。或嫌"倦眼"、"清眸"犯复，余曰："扬帆挂席，康乐诗也；'吹帽整冠'，子美句也。古人不以并举为病。"或又嫌结语非吉

，余曰："歌斯哭斯'，此张老之所以为善颂也。仆何人斯，敢当斯语？且感愧称谢之不遑焉。"

潮音阁为泖上之胜，著名远近，其实已圯毁，不可登临矣。曩见古娄朱似石先生《题曹生彝三泖春泛图》云："中原群盗正如林，谷饮山栖恨不深。安得春秋好时节，潮音阁外听潮音。"末句与张丈静莲"潮音阁下上潮时"旧句韵味相似。先生哲嗣念孝（广慈）亦有《题云间山水画册》云："菰蒲满眼动幽思，网得鲈鱼正及时。一棹烟波容与处，无声爱写泖湖诗。"风流酝藉，不减乃翁。练塘邹君志孟，近有《题泖滨濯足图》四律，中有句云："醉裹扣舷歌《水调》，风前结袜话斜阳。"亦有昂头天外之致。

念孝避兵，居於沪。乙酉秋，寄示新诗数叶，皆渔洋神韵也。录其《题张子尘摹石涛画册孤亭》云："鸭头草色自浮青，难堞春芜入杳冥。泼眼兴衰耆旧感，白云吹过驿南亭。"《张琢成师自浙西溪归，画西溪长卷》云："十尺蛮笺作卧游，斜阳古渡晚风柔。游人争说西溪好，水照须眉柳拂头。"又"校书槐雨裹，涤砚藕花中"十字，意境亦超然。余於丁丑春谒其尊翁於云间寓所，遂相与登酒楼，念孝撰杖在侧，天伦之挚，粹然盎然。未几，堡难作，音问遂阻。越二载，忽得其奉讳之讯，为惻然者久之。丁丑之难，甚於五胡乱晋、安史祸唐，为明亡后一大浩劫。迨乙酉八月十日，倭庭降讯传出，中外欢欣，万民如释重负。戴果园先生克宽有《次杜工部收京韵纪事诗》三律，其第一首云："一夕金风起，揜枪尽扫除。乾坤重整顿，衽席庶安居。灯耀过宵火，邮飞万里书。新秋高兴发，况是雁来初。"上海自遭沦陷，凡人事日用所需一切，胥受倭人管制。至是渝沪通航，电炬弛宵禁。第三联实写沪市情景。一气卷舒，读之神王。果园鹤江故居毁於兵，至今犹旅食海上。

胡生超伦，事变前长淮安教育局，既而随国府从事内地工作。迨倭寇降，自重庆奇书存问，媵以新诗十数首，盖一别已十年矣。录其《岐山》云："几度扶风探窈娘，又随鞭影走岐阳。漫寻《石鼓》稽鱼柳，尚想邢郊集凤凰。秋夜渐增秦月媚，西风吹澈汉关凉。行人合有消魂意，折得杨枝满路旁。"《自粤入赣，题大庾寓楼壁》云："韶关过后又梅关，借得轻车度远山。一夜西风起林末，满园秋色已斓斑。"又《福州南台望月》云："月印江心凉似璧；山笼夜色淡如云。"亦殊清快。数诗皆供职川中教育部于役之作。丁丑国难，中原人士远走山陬海涯，甚有流亡至印度、南洋者。超伦遍历西南边徼，穷览山川，故余奇诗云："客中念旧伤羁旅，兵裹逃生得壮游。"

邱子绍先诗，倾然脱尽尘坌。我邑晚近为诗，当避此人出一头地。录其乙亥后任陈诚将军陆军整理处秘书时作，《城邻矶夜泊》云："碧云渺渺树萧萧，妙舞清歌忆昨宵。独对岳阳楼上月，愁心起似洞庭潮。"《夷陵晓发》云："夷陵西去势崔巍，万仞苍崖一线开。夜半涛声催梦醒，满身凉雾看山来。"

近报纸载滞留渝中人士诗。惺庵《九日作》云："已分衰年卧一邱，老参朝列滞渝州。颠盈白发宁云健，眼看黄花又送秋。折屐正闻淝水捷，举杯聊解杜陵忧。收京早晚军中报，准拟吟鞭聚石头。"曹缕蘅《留别叠惺庵韵》云："敢以东篱恋故邱，坡翁己卯亦儋州。两年惯听巴山雨，一叶初探洱海秋。剩有壮心驰九塞，欲凭铙吹压干忧。梅花转眼垂垂发，忆我昆仑最上头。"《九日登甲秀楼，慨然有感》云："时危真欲庆登临，纵有劳歌似越吟。飒沓鼓鼙知事亟，萧条栏槛识秋深。两京应忆题糕客，万里难销叱驭心。莫讶重岩生意少，新来种柳已成阴。"数诗皆悲凉慷慨，直逼少陵。惺庵，不知其姓氏，惟忆於《石遗室诗话》中亦见之，当为海内名流也。又松江姚 雏《歌乐山中央医院省叶楚伦、沈尹默疾》二首云："我暂停汤熨，君还苦砭鍼。幻身原不实，老境各相寻。更事销英气，随缘长道心。渝州春酒碧，病起试闲斟。""仲子新来瘦，遮眸一卷书。稍看春昼永，微觉故人疏。却曲宁伤我，碰踉亦任渠。渊明非老懒，遣兴有肩舆。"《七月二日夜坐》云："细葛轻衫称体柔，匡笛簟小窗幽。山衔初日林阴转，风送轻雷雨意收。瓶钵便如僧结夏，文书且与马笼头。近来幽兴无人会，渐厌吴吟爱蜀讴。"自注："山中薄暮，多秧歌。"鹧雏少年惊才绝艳，余於民国初因了公之介，曾一晤於云间会鹤楼。嗣后，知其应省中之聘，翩翩书记，声誉卓然。相隔数十年，不谓诗乃一变而入浣花翁萧淡颓散之境。"更事消英气"十字，可以想其近状。

上海王渭生先生维城与蔡紫猷、黄梦畹诸老齐声，为人落拓，不拘绳检，红裙昵醉，句栏中无不知其名。辛亥冬，先生五十，有诗，余次其韵寿之，云："闻道青楼醉卧频，剧怜小杜惯伤春。绿写韵搞斑管，（著有《绿聪绮语》）红袖锺情赠翠珉。偶典琴书贫亦得，爱调丝竹老逾亲。世闲几个如翁达，行乐公然竟及辰。"先生爱余诗，因折辈行与交，时余年二十余，正熟读随园诗也。此诗诗钞中已删去。

近数十年，诗家喜以新名词入诗。如樊山云："跳舞会宜夔一足，测量学要羽重瞳"、"古冢谁开追悼会，新苗早办速成科"，虽巧而终不免牵拉。余最爱曲园云："好景须将诗纪录，欢情也要酒维持。"近王巨川云："一雪完成冬使命，片云拥护日温暾。"亦佳，惜"温暾"乃旧谚，然终无以易之。

《微波词》一卷，大抵多效冬郎体，余以禅家以绮语为口业，故往往稿就不敢示人。此次兵灾，篋中残篇狼藉，振触前尘，不无怅惘。顾余老矣，已为垂死春蚕，成佛生天，固非所望，拾存一毳，证我心痕。《病态》云："帘底衣香百和薰，入时髻样叠春云。情丝拚引愁千丈，病态翻增艳一分。砚北来禽临秘帖，花南簇蝶试新裙。相看总是消魂地，半晌低回只为君。"《绝代》云："绝代丰神貌不真，晴烟微逗海棠春。任情谐谑赢浓笑，刻意矜怜耐薄嗔。商略醉花兼醉雪，较量佳茗似佳人。水沈香烬珠帘暝，愁对云英未嫁身。"《春心》云："百结春心万种思，绿花影日迟迟。消磨慧业书《唐韵》，斟酌芳名检《楚辞》。片语胜如谈竟夕，暂离浑似别经时。为君敢惜柔肠断，断尽柔肠恐不知。"《黯然》云："一度相逢一黯然，玉颜惟悴改华年。解抛脂粉身疑侠，善坐帘拢影亦仙。客裏緘愁裁蜀锦，花间传句劈蛮钱。"

。感甄惆怅陈思赋，空媵文鱼溯洛川。"《无题》云："记随扑蝶到阶庭，也爱书蕉近画屏。戏弄扮笺裁月子，好拈锦字配风丁。玉钗瑶札双文印，竹马青梅两小形。卿已抱冰吾饮水，转头华鬓各星星。"

余往读古人诗，择其所好，辄手钞之。於魏晋钞子建、渊明，於六朝钞三谢，於唐钞杜、韩、王、孟、义山、玉川，於北宋钞宛陵、荆公、山谷，南宋诚斋、石湖、放翁，宋以后则无所钞矣。盖余性钝，故困而学之也。钞时辄复效之，余诗体之驳而不纯，病正坐此。闽侯陈石遣、武进钱名山两丈评余诗近北宋而非唐，殆以其多数言之耳。然余生平自谓於襄阳用力最深，学之数十年，终不能追其音吐，诵放翁"诗虽苦思未名家"句，不禁深自愤叹。

●续编·卷五

余尝与弟子言诗学，主张读诗须分时代：年十三四时尚不甚了解古人奥窍，而记忆力甚强，宜读汉魏六朝诗，但求其能背诵，先厚其基；二十以后如草木方荣，便读李、杜、高、岑、韩、苏诗，以求其格律声调之备；中年哀乐多更，或病入於衰飒，宜读温李诗，以助其华；晚年芳华凋落，才力将穷，宜读陶、韦、白传诗，归於妙悟，如是乃无流弊。又谓迂谨人宜读风华诗，渔洋、竹垞乃其妙剂；腹俭及鄙俗人宜读典雅高华诗，北地、信阳皆良药也；窘边幅者宜读瓠北、随园，此亦譬之五行中有生之用。

作诗须讲句法，方免板滞之病。句法愈备，变化愈多。句法如文字中有句读，兹随举古人成句为例。如"人疑太古洪荒后，诗在林逋魏野间"，此上一字下六字为句；"俗美农夫知让步，化行蚕妇不争桑"，此上二字下五字为句；"白菡萏杏初过雨，红蜻蜓弱不禁风"，此上三字下四字为句；"沾衣欲涇杏花雨，吹面不寒杨柳风"，此上四字下三字为句；"永夜角声悲自语，中天月色好谁看"，此上五字下二字为句；"饭炊饱雨湖菱紫，簟络经霜野柿红"，此上六字下一字为句；"有时三点两点雨，到处十枝九枝花"，此七句字，全句不能开拆者也。五言字少，故句法亦较少。如"名岂文章著，官因老病休"，此一字四字也；"感时花溅泪，恨别鸟惊心"，此二字三字也；"八窗中远水，万柳外长堤"，此三字二字也；"江面瓶心月，山南岭北云"，此四字一字也；"古木无人径，深山何处钟"，此五字不能离拆者。通常诗句，七言大抵以二字五字、四字三字为句最多，五言以二字三字为句最多。宋人、明人诗或偶有别调，亦总不脱出句法耳。

《杜律选注》一书，明云间人范濂（叔子）撰。中分朝省、天文、地理、咏物、舟楫、游览、登眺、纪行、隐释、怀古、感旧、宗族、送赠、简寄、燕酬、闲适，都六卷，自为序，万历辛亥沈及之楷书刻本。此书流落淮安，民国癸丑，段蔗叟先生端朝录其目并序见示。翻府县志艺文，不见其书，而王兰泉先生《青浦诗传小传》言其"服山人服，隐余山，长贫善病，高视阔步，生平以作者自命"。《蒲褐山房诗话》云："叔子著《四书理解》及《云间据目钞》。"府志亦但云："著《空明子》、《据目钞》两书。"而不及其他，可见自古名贤著述遗佚之多也。兹录其自序，少留鸿爪："少陵全集，为千古诗史。先民自有定论，余亦何敢更赘一词。但五言律宗赵子常注，赵注虽无訾议，独佚其大半，未称完璧；七言律宗虞伯生注，虞虽全帙，而注多繁琐纰缪，稗说家以为非伯生的本。兹二者，令后学之士往往遗憾。余最喜读少陵集，亦窃有慨於此，以为赵可续、虞可正，何至为美玉之累也。惜余老矣，幸志尚未衰，乃广搜博采，白千家注而外，如单复《愚得》、周甸《会通》、张蜒《杜通》、徐常吉《注释》，合刘须溪批点，以及诸名贤诗评、诗话，细加检校，须合理趣方入，品隋且求不简不烦，有裨便览。於赵则补其全，於虞则汰其谬。中间分门别类，虽从虞赵旧例，而次序有方，一览可镜，皆余以臆见自为诠订者。盖不敢自谓老杜之高足，亦庶几虞赵之忠臣矣。稿成，书以示郡中诸贤，士大夫愈

曰：'可谓善本，宜广同志。'乃各捐貲付剞，厥氏遂有斯刻，亦一时盛举也。且余有子曰机，颇敏慧，能诗文，年逾颜氏十岁而卒。客有为余伤心者，余曰：'吾假老杜传，不假子传。'时万历辛亥上元日，七十二翁云间范濂撰。"书目已补入《青浦县续志》，盖根据庶叟之书。惟误"《杜律》"为"《杜诗》"，须校正。而蔗叟书云"范伯子"，亦误也。

元遣山诗：" 昆山有璞玉，外贸而内美。惟其不自炫，故与凡玉异。和也速於售，再献甘减趾。在玉庸何伤，惜君两足耳。"结语冷峭，奔竞躁进者读之，当可猛省。又《景船斋笔记》载陆平泉《题卞和泣玉图》云："三上而刖足，为之抱玉以泣，君子曰：'和非知玉者也。夫玉三上而不售，是遇玉者之不幸也。玉何损也？自刖以明玉之非石也，又何加於玉哉！且玉之贵於天下也，以知之者鲜也。天下之不知玉者众矣，欲一一以明之，足其可胜刖哉？'"文只八十九字，而较元诗尤曲折多姿。短文绝调，惟荆公《读孟尝君传》与此二篇而已。《景船斋笔记》，松江人章有谟著。

读《饮冰室诗雷庵行》，觉白传《池上篇》无此闲肆，退之《董生行》无此错落；读《太平洋歌》，觉玉川《月蚀诗》无此奇伟；《桂园曲》，咏明末台湾宁靖王朱术桂及诸妃殉难事也，觉卢升之《长安古意》篇减其哀艳；《秋风断藤曲》，咏朝鲜志士刺朝鲜德潜斋藤实事也，觉高达夫《大梁行》减其悲壮。任公以海涵地负之才，为摇岳凌沧之笔。其学则经也、史也、天竺梵英也、西儒哲理也，无所不包，故无所不备。其诗浸淫汉魏，出入杜韩，皮陆、江湖等之自合，近代当推大家。彼州绰自鸣，故当偃其旗鼓。录其《澳亚归舟杂兴》云："苦吟兀兀成何事，永夜迢迢无限情。万里鱼龙风在下，一天云锦月初生。人歌人哭兴亡感，潮长潮平日夜声。大愿未酬时已逝，抚膺危坐涕纵横。"《元日放晴，二日雨，三日阴霾》云："入春三日觉春深，隔日春如判古今。容我瞢腾行坐卧，从渠翻覆雨阴晴。拥炉永夕成微醉。袖手看云得短吟。落尽檐花无一语，百年谁识此时心。"《赠林幼春》云："南阮北阮多奇士，我识仲容殊绝伦。才气犹堪绝大漠，生涯谁遣卧漳滨。呕心词赋歌当哭，沈恨江山久更新。我本哀时最萧瑟。亦逢庾信一沾巾。"《将去澳州留别陈寿》云："天下苦秦谁逐鹿，宗邦微禹我其鱼。"《腊不尽二日遣怀》云："天远一身成老大，酒醒满目是山川。"《铁血》云："故人新鬼北邙北，万里一身南海南。"《自厉》云："立身岂患无余地，报国惟忧或后时。"集中《呈南海先生一百韵》，尤足追配杜陵。而《祭麦孺博》诗改祭文为长古，《寄赵尧生侍御》变笺启为韵言，亦创作也。《祭麦》诗起云："乙卯寅月下丁日，启超设位於北京。谨漱溪毛漉潢水、哭荐亡友麦君灵。"结云："呜呼哀哉魂来享，勿憚凄咽其垂听。"《奇赵》起云："山中赵那卿，起居复何似？"结云："岁乙卯人日，启超拜手启。"

《竹枝词》与《柳枝》皆道风土及男女相悦之情，辞虽俚而意取鲜新，调虽卑而韵取连。凄远娟媚，若不绝者，斯为上乘。其次须纤不伤佻，俗不伤雅。今人往往以打油或猥薄者为《竹枝》，乖古旨矣。按《竹枝》始於唐贞元间刘禹锡。禹锡在沅

湘间，以俚歌鄙陋，乃依《九歌》之旨作《竹枝》九章，教巴儿歌之，所谓"巴歙"也。其词曰："白帝城头春草生，白盐城下蜀江清。南人上来歌一曲，北人莫上动乡情。""山桃红花满上头，蜀江春水拍天流。花红易衰似郎意，水流无限似依愁。""杨柳青青江水平，闻郎江上踏歌声。东边日出西边雨，道是无晴还有晴。"同时惟白传擅此体，足与上下。近读饮冰室《台湾竹枝词》，其曰："晚凉步虚落，闻男女相从而歌。译其词，意惻惻然，若不胜《谷风》、《小弁》之怨者。乃掇拾其意，为遣黎写哀云尔。""韭菜花开心一枝，花正黄时叶正肥。愿郎摘花连叶摘，到死心头不肯离。""相思树底说相思，思郎恨郎郎不知。树头结得相思子，可是郎行思妾时。""绿阴阴处打槟榔，蘸得戎酱持劝郎。愿郎到口莫嫌涩，个中甘苦郎细尝。""蕉叶长大难遮阳，蔗花虽好不禁霜。蕉肥蔗老有人食，欲赠郎行愁路长。"自注："韭菜'、'蕉叶'，起二句皆原文也。"数诗觉宾客风情，去人未远。我乡金曼虹先生有《云间竹枝词》，云："兰笋山前莺乱飞，细林山下草初肥。春游怕买蘸香草，郎为离乡久未归。""长柳湖长圆柳圆，侬家生小住湖边。朝朝打桨过湖去，郎采莼丝侬采莲。""沟田沥漉水翻车，稻有红莲棉白花。休道村娃不解事，满塍种画眉瓜。"亦得古意。

我乡何藏翁先生，居北绣山，以诗鸣咸同间，著有《藏斋诗钞》。其五言学韦柳，七古学嘉州、随州，律句高者或攀王孟。然翁自言少好长江，喜为僻苦之词。句如"笛料须量竹，樽材早种匏"、"松高秋看雨，竹密夜窥星"、"诗寒收石气，云活养松年"、"客送梭毛笠，童持柏瘦杯"、"买书饶古锦，髻井得残碑"、"冻蝶无衣逢草住，乱鸦如叶脱枝飞"、"桃花水涨鱼红尾，幢树阴深鸟白头"、"责泉自点青花碗，得句闲书坏色笺"，真得浪仙神髓。晚年一归平淡，多似其曾祖《萍香馆集》中语。时城中有二熊先生，旗鼓相当。其余或限天资、或绌学力，瞠乎后矣。然藏翁尝与娄县姚春木先生游，又尝入都、入洛，揽太行、嵩高之胜，则其得江山人物之助者多，宜其诗之工乎？

《藏斋诗钞》中有《云间二逸诗》，其序云："岁在辛丑，天不慙遣，先后殂谢，日月不淹，风流斯在。著之篇章，庶后之传艺术者有征焉。""二逸"者，一为徐渔庄布衣，名年，精研金石，并工篆刻，卒年八十。诗曰："倾然野鹤伴云还，花落空阶昼掩关。好古直搜秦汉上，传名宜在籀斯间。卅年莲社晨星少，一别松风酒舫间。（张诗矜廉访，坐上时同谈讌。）叹息身非金石寿，哀吟长与吊青山。"一为祁虚白明经，名子瑞，晚号阶萁，善绘山水，画猫尤工，卒年七十九。诗曰："倚杖悠然鬓雪盈，幽人踪迹不离城。久虚花月樽前赏，闲放烟云笔底生。后世谁为耆旧传，当时徒有画师名。扁舟一昨乘潮至，愁听高秋唳鹤声。"诗中所谓"松风"即张温和公松风草堂也。民国初，耿伯齐农部创松风诗社於此。余家高祖淡人公蓄祁画甚多，丁丑之乱，散亡殆尽，今仅存大横幅山水一帧，为丁亥秋所画。题曰："高岭嵯峨曲涧幽，树中茅屋俯清流。琴待渡频回首，夕照林峦一段秋。"书作米体，款署阶萁。画纵二尺九寸，横三尺八寸。按丁亥为道光七年，距今已一百二十二年矣。

《还如合诗》二卷，何鸿肪先生遗著也。先生初有《瞻簪庐诗》数卷，毁於洪杨之

乱。此稿系乱平后二十年中所作，没后经其子振宇搜集而刻之者，则其散亡殆十之六七矣。先生才气在藏翁之上，读其《寄子骏》诗云："伯玉《感遇》篇，微茫接步兵。李杜相辈出，门径开恢宏。浅窥得面目，深诣摭性情。学海远难至，升岳呼皆应。取法贵乎上，毋自甘小乘。"又云："读书撷其腴，号珠探重渊。兴酣一落笔，众妙靡勿宜。学诗以诗入，安得诗真詮。人至天乃随，充满几自然。"《杂诗》云："昔人尚博学，所得皆瑾瑜。今人爱记丑，买椟还其珠。终日魂琐屑，积岁驰荒诬。於道无寸得，五车皆土苴。"自是绩学人见到语。尝与南汇张啸山先生书，啸山答之云："补之将大用力於诗、古文辞，此谁得而沮者？"补之，先生别字也。其诗得《诗品疏野》之趣，如"密林分野色，残石补云根"、"秃树鸦为叶，疏林霜作花"、"清绝半湖月，萧然独夜舟"、"凉风吹旷野，清露滴空房"、"情随孤月远，梦与白云深"、"饭罢自消长日课，睡余时听隔溪春"、"云山自写花前障，笋蕨常分竹外庖"、"柳条挂得春风住，二月春寒却似秋"。先生豪於饮，能画竹石，能度曲，顾皆为医名、书名所掩。

鸿舫先生《叶贞文》诗云："缥渺青山一雁飞，玉楼十二定相依。梅梢月上雪初白，拂拂清风摇竹扉。"此效渔洋《露筋祠》诗"行人系缆月初堕，门外野风开白莲"句法也。沈归愚云："贞烈诗易涉陈腐，故别创一格以矫之。"然渔洋亦但可偶一为之，效更无谓。

汪秋轩先生，性情闲雅，喜为诗。幼遭洪杨之难，年十三为所掳，历二年乃得脱。家贫，作邑之东郭姚氏。壮游京津，所交皆当世名公。费云舫宫詹、王可庄殿撰先后币聘课其子女，顾终不得志。戢翼南归，就佐理车坊厘捐局务职又数岁。姚氏家有田园之美，四围榆柳，十本梅花。晚因自号东郊居士，绘有《东郊草堂图》。光绪丁未年六十，为《白发美人诗》八章以自嘲，松府名流如南汇于香草、上海黄梦畹及我邑吴业韩、徐慎侯、蒋蕴深辈咸有和作，传诵一时。惜先生诗稿乱后散失，不能窥其全。仅就余可忆者录之，云："霜雪盈颠不入时，阿婆涂抹有谁知。惟余衾内温家镜，犹见当年委地丝。""广寒仙子鬓蓬松，二十年前一笑逢。归到兰房窥镜比，飞琼虽好不如依。""漫说星星渐上头，如今梳裹太风流。鸦头乌袜髻刘海，就令垂髻学也羞。""成雪青丝断复枯，麝煤兰泽两难涂。针神食谱闺中职，约略还堪教凤雏。"先生乐易近人，不以行辈自尊，与余时相过从。每听其曼声诵白传歌行，或悲壮背《项羽本纪》以为乐。尝扶杖入城，坐近水台茶寮为程课，因口占云："小店双弓米，平台一盏茶。"

我师叶袖东先生昌陞，少年磊落，其诗办香新会，多能回肠荡气，任公尝摘入《饮冰室诗话》。清季留学日本，既归国，历游燕蓟，出居庸，登长城，心伤国是，游於酒人，慷慨悲歌，舒其宛结。四十以后，芒角稍敛，语诗，辄喜放翁、石湖。佳句如"日色经秋澹，溪光得雨明"、"碧云何处雨，残日一帘秋"、"溪声趋断岸，花气出疏林"、"乱石破云龙欲下，长芦点水雁初南"、"僧舍一灯飘远影，江城万堞锁寒烟"、"挑菜妇锄青草满，过桥僧带白云来"。所刊印诗稿皆其手自删定。歿后，其弟子

上海郑永诣质庵又为刊遗诗一卷。

应酬之作，类於无病呻吟，是文人一大苦事。因忆嘉定章篆生（圭琢）进士言："余性情疏懒，不屑为裙钗粉黛之词与夫临别赠言之语。至於寿祝哀挽、酬酢恭维，心尤耻之。人固无以诗知我，我诗尤不欲为人所知。"袖东先生性高洁，孤芳自赏，稠人广坐，从未闻其谈诗。其稿绝无此种俗套文字搀入，殆皆酸咸与俗殊者乎？进士著有《勤生堂诗》七卷。记其句云："竹留千日醉，桃艳十分春"、"丁尾金根皆别字，峨冠革履尽奇装。"

许咏霓先生其荣，经生也。壮游日本，参加同盟会。辛亥革命起，以青浦地邻松沪，首举义旗，功成不居，隐於海上。歿后，其哲嗣玄谷出示遗稿一册。录其《旅夜不寐》，云："风急纸窗鸣，寒从客夜生。微吟搔短鬓，危坐对长檠。琴剑千秋志，乡关百里情。一声动晨铎，朴被又征程。"《采莲词》云："一湾烟水漾清波，柔桢无声款款过。十里寻芳缘曲岸，水心亭外芰荷多。"颇见风致。

丁亥六月，孙子再壬四两斋宴集。南通孙沧叟先生以齿德尊，裒然上坐，年已八十有一矣。先生谦光可挹，治《公羊》学，耽吟咏，善写贞卜文，蒙以手书集杜绝句素篷见贻。其诗直抒胸臆，不假藻绩。《上巳日聚星楔集》云："感时珍重三三节，抚已慚惶九九年。"此与赵瓯北之"花事巧分殷七七，风情亦狎董三三"、袁香亭之"献技惜无殷七七，寻花恰遇董三三"异曲同工。然彼裁熔费力，此则自然会妙。"董三三"，宋时营妓也。东坡《赠李方叔》云："须烦李居士，重说董三三。"见瓯北诗自注。先生名徽，字敬丞，光绪癸卯举人，曾官四川青神县知县。

是日，於座上得识江阴陈季鸣（名珂），言谈渊永，神理洒然。别后，寄示其《文无馆诗钞》一册。翻阅之，名章迴句，时时间起。录其乐府一二，以为尝鼎之街。《日出东南隅》云："日出东南隅，照见相思树。山下行人去，山上靡芜路。靡芜路，软如绵，东风燕子尾涎涎。马蹄踏芳草绿，山花照梦飞春烟。墙外车声塘外雷，安得良人中夜归。"《白紵曲》云："主人归，愁白紵。结幽兰，重延伫。落红满地春无语，薄暮东风草树深，斜阳照见愁来处。愁来处，春无侣，绿苔经雨生庭础。燕子归时人未归，凄迷新绿沉烟渚。主人归，愁白紵。"逊清光宣间，其乡先辈曹拙巢（家达）孝廉提倡汉魏六朝诗，沾丐后进，文无为其私淑弟子，宜得其膏馥多矣。诗中"东风燕子"句似失检。《汉书外戚赵皇后传》："燕燕，尾涎涎，张公子，时相见。""涎"从水，从廷。师古曰："光泽貌，音徒见切。"与"见"字为韵。今书作"涎"，押入"先"韵，误也。然余谓文无诗佳处正不在摹古，如《游无锡荣氏梅园》云："此地梅花五百株，春寒花气向模糊。人间无复林和靖，斜日衔云下太湖。"《咏落花》云："东风楼阁初长夜，芳草池塘已暮春。"《秋日杂感》云："寒生窗竹三更雨，秋抱庭梧一叶风。"《和人秋感》云："书生结习锥无命，壮士悲歌剑有芒。"皆有三河少年风流自赏之概。

四两斋之宴，余首唱长古纪事，与宴者多有和诗。而闽侯陈慕伦（亦斋）熔经铸史，尤为稚饬，云："群经扫地今何年，沈翁抗手最儒先。元音岂易谐里耳，自赏时复鸣朱弦。东南坛坫翁可主，健笔突兀超松圆。我如曹合谁肯齿，地小未足容回旋。枢衣来谒沧海边，巍巍硕望推卢前。语言玄妙推理窟，石门文字通真禅。纳凉会合句与联，林风萧飒吹吟笺。主人置驿好宾客，意气激越凌山川。衔杯往往中圣贤，四两题榜人争传。乱时扞膝耻出仕，修罗历劫余霜颠。本州陈事击肺石，民间疾苦君能宣。但期耕烟就下泖，安用看日伤虞渊。芙蕖出水红欲然，买夏且醉江湖天。田居蚕室乐无尽，世难未已车当悬。"惟一起推挹处殊令人惶愧。再壬时任县参议会会长，故有"本州从事"之句。慕伦诗，不肯轻易下笔。著有《陶彩诗稿》。

久不读松江王文甫先生诗，近以诗一小册寄示，皆乱离中作也。录其《雷君彦归自沪上，别后寄赠》，云："闲话沧桑百感并，羡君豪气尚纵横。石填东海知何补，尘障西风意未平。潘岳闲居惟养志，鲁连排难不求名。黄花劫后犹堪赏，晚节归来一笑迎。"通体志和节雅，断非初调吭舌者所能办此。又《北王浜》诗："村荒水与围。"的是邑西水乡光景。押"围"字最难出色，吴梅村《和人西田杂兴》连押八"围"字，多不见佳，惟"水亭桥没芰荷围"七字差为奇丽耳。又"寒菜近霜肥"句，妙在不费力。

丁亥八月，姚子鹓雏偕雪泥、白蕉、念孝、十发等自松江鼓轮，访余於吴家湾汇花小学。余与 雏盖一别已三十余年矣。是晚，随轮同过珠里慧殊家夜宿，酒阑灯炮，对榻论诗。鹓雏句云："论诗水乳意相欢，剪烛烧灯语夜阑。"即指是也。鹓雏极推尊宛陵，以谓能扫空芜秽，在欧、梅、苏、黄之外别标古澹，自是有宋一人。道咸诗人颇推 叔，余尝评 叔诗源出次山，其质俚处颇似寒山偈语。 雏亦为首肯，并云近代惟湘绮、苏戡足称大家。别后寄示近稿数十纸，其高逸者，余已略载之矣，兹录其萧然意远之作。《车过苏州》云："烟凝远岫雨涵空，风物江南自不同。万顷湖光鸥灭没，何人吹笛遇垂虹。"《杂诗》云："日暖庭闲树影重，明窗微度栋花风。先生诗思来何处，强半深居宴坐中。"《小园》云："小园晴日柳初芽，闻说江梅亦已花。一暖一寒春未半，不须婉晚惜芳华。"《吴家湾》云："吴家湾边老树合，大盈浦上午风寒。桔槔长闲阡陌静，老牛将犊行归栏。"皆有半山神味。律句云："昨看微雨能苏柳，却忆余寒近冻桐。"绝似樊山；"万族秋虫喧短夜，一江斜日近危栏"，则颇似苏戡语矣。蜀中三月骤寒，谓之"桐花冻"，见鹓雏自注。

白蕉避倭乱，客居沪滨，以粥书画为生。所为诗与书，颇高自位置。尝云："诗已清腴书瘦硬。"又云："水熟漫看鱼蟹眼，诗成或在宋元时。"其风概可想，殆古之狂者乎？录其绝句云："我与清波意共闲，茸城西去饱看山。洞桥处处俱堪画，值杖何人水一湾。"盖亦过吴家湾时作也。末句耐人寻味。白蕉於丁丑夏访余於濠上居，风姿潇洒，不啻思曼当年。乃别未几，而胡马饮江、乾坤腥垢，今亦短鬓能搔矣，忧患之磨人如此。

金泽陆氏，吴江名族也，世诵清芬，刊有《陆氏丛书》行世。干甫（廷楨）大令，以光绪壬辰进士历宰河南荣泽、仪封等县，著有《思嗜斋诗文稿》。其哲嗣曰颀孙、顽孙。颀孙为余门下士，温缛有思致，尤长篆刻，诗亦清婉如其人。《次韵和上海郑质庵》云："花竹森森漏日光，书斋清绝拟山庄。秋闲佳趣聊相共，世乱初心未肯忘。歇浦潮回鲸喷雪，吴江枫落鸟啼霜。嗟余客裏萧寥甚，镇日临池墨数行。"盖丁丑避难沪江时作也。三四语尤真挚有味。

倪君静岑（镇），绩学工文，尤长骈俪。顷以其诗稿见示，多凄馨怅惘之词。《题蒋稚观吴门造象》云："盾鼻弓衣有重名，吴王台畔碧云横。而今赢得愁滋味，红豆离离白发生。"《中秋望月明日堪儿周啐》云："今夜 州定未眠，可怜千里共婵娟。极知乐事年年减，办得明朝买面钱。"静岑，盐城人，上有双亲，一家十余口。倭乱之后，继以匪祸，田园尽废，遂乃橐笔游四方。此为近在我邑任县府秘书时作。

●续编·卷六

陈卧子先生墓在广富林。嘉庆乙丑，我邑王兰泉司寇、奉贤陈桂堂太守纠合一郡士绅，就墓傍建祠，并祀夏瑗公父子，而以死难诸人柑享，（陈、夏皆几社创始人也。）名曰陈夏二公祠。并酌定仪制，春秋致祭。厥后寝就衰歇，乃移祀於松江直指庵，见藏斋诗注。考其时，为道光十九年也。光绪初，知县汪祖绶有《祭双忠祠》诗，则知复祀广富林矣。汪诗云："毅魄沉沦二百年，馨香俎豆慰重泉。秦弓长剑迎神曲，《寒食·清明》绝命篇。碧血迷离乾净土，青山黯淡夕阳天。墓前漫说南朝事，恐有灵鸦叫树颠。"自注："《忠裕公年谱》云：'绝笔於《寒食》、《清明》二赋。'祠有祭田十余亩，光绪中叶后，由陈坊桥董事。陈氏执管春秋两祀，先期发柬，到者大都为松青两县人士。民国十年以后，阙而勿行焉。己未春，耿伯齐先生亦来与祭，有《追次汪诗元韵》云："祠堂起建几何年，矫矫双忠表九泉。怕话前朝兴废事，好披几社短长篇。春来扫墓重三日，风定迎神卅六天。气节而今尤足贵，无穷感慨集毫颠。"

佘山知止山庄，为明董文敏余峰别业。万历间，属太仆寺少卿王升，四传至其孙祖晋，改今名。祖晋子兴尧，字梅影，官至河东道，告养归，乃改名遂高园。祖晋没，园亦寻废。至咸丰时，仅存鹤闲堂、寿仁堂数椽而已。友人式坤，其后人也，今尚居此。当时所谓"一捻红"者，为十二女伶之一。近见娄县朱甘澍先生《晚甘棠集》中有《知止山庄歌》，极华屋山邱之慨，诗长不录。按一捻红，别字露香女史，能诗善画，色艺冠时，即《晚甘》诗中所谓"露香小字法倪黄"也。尝见其《题陈东桥画兰册》回文体一律云："风光展处妙神传，绿叶舒花露鲜。空谷暖滋香馥馥，小园晴弄影娟娟。丛生玉蕊含心素，墨试金壶蘸笔妍。红雨乱时题句丽，重帘卷月映前。"上海黄云楼《题露香女史泐画册》云："掌书侍史是仙才，红靺春生一捻来。占尽云间好风景，山庄小住即天台。"泼来焦墨尽烟云，泐镜峰屏翠扫群。却羡纤纤能搦管，管夫人后又逢君。"并云："女史姓朱，字轻云，常州人，一捻红其小字也。"是又多一谈助矣。云楼字步瀛，住闵行，有《竹冈诗钞》。

王清霞（湘波）者，梅隐后人，如金观察之女。适郡人顾荃士太史夔，即香远先生莲之母也。湘波女士娴吟咏，有《小螭撰室诗余》一卷。曩纂方志，於《列女传》竟失其人，《艺文》亦不列其著作，特补志於此。

道光中长洲江弢叔（湜）以诗鸣我邑，熊苏林先生其光与之敌。然苏林评弢叔诗，以为"此笔幽霾七百年"，至欲灰己诗，以传其诗。尝语强叔曰："我平生读书，一过成诵，两过不忘。爱君诗，欲不忘，故读两过。"试之，果如瓶倾水。集中《咏马祖避山鬼事》及《兰隐图》、《临清关》等作，皆效"伏堂体"也。而弢叔篋中，亦常携苏林诗卷。苏林早列清班，天资学力，一时无两。《北上留别江南诸子》云："欲报清时惟学问，便魁天下岂功名。"《咏菊》云："霜先退避奚须傲，风不吹嘘自有香。"此为何等抱负！惜造物忌才，卒年曾不得四十也。诗宗杜韩，雄奇排募。《盘

古沟》云："一坏不仗平成力，万古常涵浑沌流。"《登君山》云："山浮凉翠围江郭，潮送秋声出海门。"《九日登文殊台，次庄侠君韵》云："最愁归梦千山阻，怕说登高九日来。"

嘉道间，随园诗派盛行，而苏林先生论及，每力斥之。随园之享盛名，在清代除阮亭之外，可说无与比并。然谢世未久，如吴嵩梁辈颇多指摘，且有议欲毁其板者，盖在当时已如此。实则古人之诗，如老杜多晦涩、退之多粗豪、元白多俚俗、温李多佚荡，不善学之，皆有流弊，奚独一随园哉？云间陈卧子诗可谓大雅正宗矣，而王西亭云："谁与乡邦别诗派，等闲陈李杂俳优。"周彝亦议其"语尽而意无余"。盖文人相倾之习，自古已然，为之一概。

"《国风》好色而不淫，《小雅》怨诽而不乱"，"不淫"，温柔也；"不乱"，敦厚也。二语足包括《诗经》全旨。舍温柔则乏风情，失敦厚则欠含蕴。诗而说理易染头巾气，盖诗与道学自是两途。我邑熊纯叔先生《含斋诗》非不佳也，然云："但使天心存剥复，不妨吾道易饥寒"、"诗足名家惟长傲，道存居室最难言"、"事业眼前无不足，清风穆穆白云闲"，此但可置之《濂洛风雅》，而非《才调集》中语也。先生经济文章，人伦景仰。光绪初，以振饥卒於河南。例官民遣榱不得入城，先生援忠勤死事例，得入城治丧，世哀荣之。先生名其英，国史有传。

随园以武臣能诗为太平盛事。余谓非笃论也。古之劳人、思妇皆能言诗，奚但文、武？亦何预盛衰？归安赵竹君骑尉玉德，光绪时两任我邑白鹤江把总，在汛二十余年，威惠并著。赵尉步马娴习，能开八力强弓，顾风流淹雅，工吟咏，淞南、汇北，翰墨流传殆遍。遗有《鹤川醉尉诗存》一卷，其名章隼句，虽并世高手，莫能尚也。录其《论诗》云："诗境从何辟，心虚天籁存。大哉圣人意，不学无以言。忆昔唐虞盛，赓歌庶事蕃。《风骚》变正《雅》，奇慨托荃荪。汉魏逮六朝，杰构萧《选》论。至唐称极轨，坛坫无比伦。由宋迄元明，自合安足论。规模日益仄，心灵日益昏。嗟嗟后世士，风雅多沈沦。安得盘古氏，为造诗乾坤。挥斤运八极，炬火烧旁门。蔽之思无邪，返璞垂归真。金丹砭俗骨，吸露餐云根。"得理之自然，清流而洁源。"诗乾坤"，创语也。《奇在赣防，辞伍归途复登水湖庙》云："推窗惟见白云浮，回首离乡已十秋。路折羊肠天亦小，矶逢虎脑水都愁。重经十八滩头客，似释三千里外囚。四顾青山最奇绝，风光浑不似杭州。"《俗务奔驰，不堪惫闷，诗以自解》云："驰逐天涯两鬓蓬，那堪礼数困英雄。论人每叹官箴滥，到我方知仕路穷。五夜邻鸡惊旅梦，十年戎马老秋风。何当耕凿青山下，长啸一声天地空。《暮春邻翁偕游张堰》云："张泾桃李笑华颠，麦浪浮城翠拂天。沙暖野凫眠小渚，泥融新燕掠平阡。同舟共话人三两，入市先沽酒十千。廿里官塘归棹缓，查山南去月娟娟。"《过泖湖澄照寺，登长水塔》云："鼓棹来寻寺，偷闲笑我忙。云开峰四面，人到水中央。法界金山小，斋厨玉粒香。晚风回别浦，孤塔倚斜阳。"自注："董文敏有《题小金山额七实道中》云：'疏叶寒林集暮雅，冻云酿雪压行车。一官仆仆风尘裹，短策孤灯问酒家。'"其他五言律句，《过崇福庵》云："落日收花影，微风动竹

阴。"《怀鹤川诸友》云："官因微罪去，髭爱苦吟留。"《吕巷防廨题壁》云："吟余花自落，梦觉鸟先知。"七言律句，《招厚孙饮菊用元韵》云："乌桕临江霞散绮，白苹依岸水生香。"《由禾泛舟至杭》云："鸬鹚船过水痕动，踯躅花开山色明。"《游迎江寺，次韵陈祝三上贪》云："画稿平铺天堑外，铃声细语月明中。"《清明前二日，偕岩立堂乡丈赴马家坟祭俞作宾墓》云："郭外风和晴放鹞，池中水涨暖鸣蛙。"《次韵姚蓉甫雨偶成》云："满砌苔痕蜗结篆，一帘花气蝶销魂。"《己酉六十初度》云："家风琴鹤仍如故，政绩牛刀恐未然。"言情体物，何减放翁？至如"草檄犹横三尺剑，夺标仍诩一张弓"、"柳营枪尾秋排豹，花舫帘须暮卷虾"，尤见儒将风流气慨。赵尉遣诗，先经徐慎侯孝廉选为一卷，名曰《鹤川醉尉诗存》，约二三百篇；后经上海高太痴（翀）选孝廉所选，另又为一卷，曰鹤川醉尉诗选，则只八十余首矣。余所录者，高氏选本也。醉尉诗篇甚富，曩见余家翼之公诗稿中相与唱和颇多，今皆无有。翼之诗剩，经乱散失，而余独於醉尉诗以不得窥其全豹为可憾耳！

随园又谓闺阁诗易於流传。亦或未必。女子与士大夫交际或酬唱绝少，其不得名公巨卿之题拂而自能传世者，千百年来能有几人？我邑留美学士盛祖江妻孙琼华女士，余前《诗话》已略言之。女士父字藹人，诸暨人，前清孝廉也。家於沪。女士工绘事，为毗陵冯超然弟子，年四十二卒，著有《习静闲居诗草》一卷。录其《雨霁》，云："连朝细雨冷如秋，勾起骚人万斛愁。向晚云收天放霁，斜阳一抹下西楼。"《忆妹琼英、琼芝》云："天际浮云愁裹看，江南细雨梦中归。"《寄外》云："离人远道三秋隔，好梦中宵两地知。"皆清婉可味。樊山老人曾题其照片，云："似曾何处见冰姿，缥缈惊鸿到眼疑。除却谢家林下女，红闺得似此才稀。""江南人物玉同清，女秀才中识盛名。烟水气兼书卷气，美人标格要天生。""山眉水眼婉清扬，时世都输雅淡妆。玉井不波照斜领，莲花顶著琴姜。""论画评诗几辈堪，色声香味识真难。亭亭玉立天人样，只许樊山老眼看。"自署："八十翁增祥题，时为乙丑年也。"

旌德吕氏姊妹四人，俱娴翰墨，有声於时。长蕙如，工倚声；次美荪，居青岛时自署齐州女布衣，遗著有《勉丽园诗集》；三碧城；又字圣因，著有《信芳集》、《晓珠词》；四贤美，字坤秀，遗著有《撒珥集》。余前《诗话》已采碧城诗，而惜其他皆未之见。吕女父名凤岐，字瑞田，同治庚午举人，光绪丁丑进士，散馆授编修国史馆协修，壬午简放山西学政。家有长恩精舍，藏书数万卷，有《静然斋诗集》。

族妹乃芬，字淑英，一字诵清，性明寤，荣华曜葬，慧舌粲花。喜吟咏，年十七八从余受香山乐府，皆能背诵。妹为苏州蚕桑女校毕业生，民十执教於浙江奉化某小学，常以所作小诗邮示。忆其《咏秋月》云："莫讶秋将尽，秋光月倍明。倚栏闲眺望，花影满空庭。"《秋花》云："幽赏未云寂，群芳处处栽。海棠如欲语，秋日满阶开。"诗为初学，甚浅俚，然有会心，使得专心从事於斯，所得当不止是。故余寄诗云："吾家进士乃不桢，也向天涯漫浪游。无限人间好儿女，羨渠衣食住红楼。"

盖惜之也。适皖籍德国柏林大学博士周嵩禄。丁丑事变，随其夫之重庆。二十八年，敌机炸渝，与同县胡瘦娟女士同殉焉。闻妹丧归只得一踝骨耳，殊可惨已。瘦娟，余诗弟子超伦女弟也。

我邑徐慎侯孝廉公修，夙工帖括，与金剑花、张雄伯两孝廉、陈挹霏贡士俱蜚声场屋，互争雄长。平生诗名颇高，然性卞急，不耐深思。鼎革以后，牵於四方社课酬应，邮筒唱和，几於无日无诗，并其游览登临之作，遂逾万首。稿可隐人，夸多斩靡，识者病焉。然邑中自咸同间吟花诗社后风雅消歇，孝廉创苔岑社为号召，远近闻风附和。时则如徐伯匡、张静莲、邹葆荪、项涵公、钱静方、杨石年、叶行百及不佞凡七八辈，文酒之欢，月必数举，拈题分韵，相与评赏，以为笑乐，亦一时之盛也。孝廉没於倭难后二年，其遗稿中雅饬有法度者，则选入《青浦续诗传》。自余佳句亦多，如"文可送穷元有例，诗将成癖不能医"、"盛衰静悟花开谢，清浊闲评酒圣贤"、"偶发大言惊俗耳，忽思小饮润枯肠"、"寒花兀似鹭鸶立，落叶翩如胡蝶飞"、"天似棋枰星布子，河如钓渚月张钩"、"梧叶井栏添画稿、藕花池馆动吟觞"、"燕初试剪知将去，蚕未成丝不解眠"、"落花似梦随风散，芳草和愁带雨生"、"长松挟雨添涛响，瘦竹筛风落黛痕"、"阅世渐当垂暮日，怀人正值岁寒时"、"萍根黏斲知潮落，稻积堆场验岁丰。"

吴子亮言《莫愁湖登胜棋楼有感》云："繁华勋迹两悠悠，玳瑁梁空玉局收。胜算由来争一着，艳名亦自有千秋。半湖秋水残荷占，十里危旌雁愁。劫后江山谁是主，惊涛不语自东流。"通首响亮，吊古登临之作故应尔尔。《客中中秋》云："晴碧如张盖，疎星缀太空。光来千嶂外，白满一江中。客梦年年异，乡心处处同。夜深眠不稳，欹枕听秋虫。"《香港即事》云："石蜡艳分机上锦，荔支红上海南天。"皆佳。亮言为医家莲如子，弱冠从余为诗，倜傥慧辩似乃翁。"元亮少无适俗韵，侯喜新有能诗声"，余曾书联以张之。

谢客永嘉诗大率清丽芊，至老杜秦中诸什，乃始雄奇瑰伟，别开境界，气象不同故也。然只是域中山水，未睹海外云峦。近读上海郑散木《游台诗帅》，叹其登临之胜，觉东坡自夸"兹游奇绝冠平生"者，犹有东山、太山之别。然非近代机械神通，无由探其秘奥；非得排募雄伟之笔，亦无以尽其状也。录其《阿里山歌》并节钞其序云："阿里山高拔海六千四百尺，位於嘉义市东北，为原始森林区，实台省富源之一。由嘉义车站别辟支线，以机车推送，高达山巅，计程七十一公里，费时七小时。全线凡经十九站，穴山架水，以通车道，计历隧五十七、木桥三十六，自平遮那站至阿里山站间，山势陡削，车不能上，则敷轨作之字形，先驱下坂，转折进退者五，始达山巅云。"诗曰："危途盘郁纡，远涉倚车辙。登车各危坐，仰首望轂桦。绝壁摩千寻，上欲与天接。不知此奇境，何时五丁辟。机车吼怒声，进作万钧力。驱车上峻坂，蠢若爬沙鳖。一山忽迎人，悍然当面立。凿隧支穹门，黝深不可测。噎噎张巨吻，贻碍吞车入，大声起隆隆，倏忽天地黑。客心杂惊詫，语咽不敢出。进如箭脱弦，出似蛇窜穴。豁然白日开，相顾面有色。折旋道愈艰，石乱山益碧。

倚窗瞰群山，罗列绕吾膝。山云流莽荡，一白涌淳濡。如海翻波涛，螺顶时出没。云开众绿呈，杂以绚紫饰。亦复见庐舍，散若残棋列。左顾逼岩，探首疑磨鼻。循岩延透透，路仄不容尺。有时度源谷，架木跨空窄。弯环无栏楯，俯瞰增危兀。寻过独立山，轨迹更盘折。辗转东西徂，未许寻丈直。车如蚁旋磨，轨同绳绞结。车行苦朱朱，蒸飮添喘息。行行日亭午，气势转通豁。花木遥扶疏，人烟渐稠密。群山若堂防，小市间成集。竹叶翠欲流，蕉实黄堪撷。往来杂男妇，赤足围绣贴。指点客何人，语声鸟啁哲。岬狭旋左右，林木森蓊郁。桧梅松柏杉，经画如屏立。蟠株或耸干，谲幻形非一。亦有斤斧余，残根兹缺靥。云是原始林，千载兀风雪。钻隙穿逡巡，林深天半幂。崦嵫屯宿阴，转背路疑竭。下坂复上坂，倒曳轨势逆。窘行比缘幢，进退交震怛。回车指别径，暮烟起山缺。机声未全弛，乍为人语夺。车劳人亦疲，且止两苏息。扶携督行字，肢体罢欲裂。侧身试四睨，倏已在山脊。惊定重回首，性命真一发。历桥三十六，穿隧五十七。是何偷天工，竟夺造化谲。人言栈道险，方此宁百一。"诗凡五十一韵，虽有复，然古人无忌。

《黄水洋放歌》云："白头老子穷不死，挂席南来狎龙子。放心散漫事远遨，言放蓬莱寻赤水。飏轮击汰风浩浩，倒海翻云疾千里。天长水阔亦何有，惟见洪涛百丈相舂撞，进作峻峭插天起。"一起殊得势。《三代树歌》云："君不见杜老堂前倚江树，颠掷坐攖风雨怒。又不见山前山后声丁丁，残枝断干横当路。明朝酌酒为汝贺，撑眸坐看乾坤破。"得此一结，通体方镇得住。散木七律亦豪宕可喜。《谒郑延平祠》云："虎掷龙腾起异人，寸天尺地亦长城。孤忠合拟田横岛，远纛曾收赤嵌兵。海外衣冠存正朔，蛮荒草木识威名。一宠香火寒梅发，应念虫沙劫屡更。"《泛舟日月潭》云："一片晴湖好放篙，碧波如镜不通潮。天围雾障鱼龙静，地隔尘寰日月骄。草木山深忘四季，峒黎发白记三朝。余生倘许移家住，便向烟萝挂酒瓢。"

许君玄谷，雅怀高致，少年游衍丹青，兼工篆刻。抗战军兴，避兵重庆，卜宅山水胜处，绘有《独树山房图》，题者多知名之士。沈尹默云："月静风幽石径斜，当门老树影交加。此间终竟无尘事，把卷高吟意自赊。"陈树人云："诗人入蜀兴无涯，老树沧波趣益加。浦上诛茅能得此，却疑当日杜陵家。"姚鹓雏云："古木丛篁自宛然，眼前旧事已云烟。试寻石鼎煎茶处，记数风帆下水船。酒谱经纶真大敌，印人意趣有余妍。山中诸老闻都健，想见吟怀胜昨年。"他如叶楚傖、汪旭初、乔大壮等，诗不尽录。玄谷文亦隽洁，观其所为《独树山房记》可见。记云："丁丑冬，倭寇内侵，邑随沦陷。予携家入川，初寓渝城。阅三月，迁北碚。又阅一年，则得隙地若干弓於北碚天生桥间。无崇山峻岭之险，有茂林修竹之娱，因谋於主人。架屋三楹，聊以安流离、蔽风雨。是屋也，近市而不喧，阻山而不鄙。登高以望，则远合沓，出没轻烟。薄雾中，杳冥变化，目不暇给。其下则梯田纵横，茅舍错落。阶前黄桷一章，大可数人抱，古干参天，浓阴匝地，盖数十百年物也。修竹二三竿，摇曳左右，益增清旷。每当花晨月夜，窗明几净，或展卷、或挥毫、或晶茗小酌、或焚香默坐，婆娑其间，万虑尽涤。偶听鸟语猿啼、樵歌牧唱，则不禁悠然神往，兴古人避世之思。而东望鸡公，西眺缙云，朝夕相亲，如在几案，正不知我为青山？

青山为我？形骸两忘，怡然自得，亦足以少纾故国河山之感。昔桃源中人不知汉魏，良有以也。己卯端午，屋成，武进李涤翁策杖来访，顾门前黄桷而乐之，口诵杜工部'独树老夫家'句，欲名余斋，予因掇其意，名之曰独树山房，并为图以纪其胜云。"

余半生潦倒，宜为海内通人摒弃久矣，乃多有葑菲不遗，缟紵相赠。衰庸如余，益滋惭恧。近来交游中得工为古诗者，一云间姚鹬雏，一湖南瞿兑之（宣颖），是亦晚年一快事也。鹬雏赠诗云："夷字不疗饥，坐令人瘦。观君论诗作，所积良已厚。功深极炉锤，味永如醇酎。森霏四十字，酝酿湖山秀。波光与岚翠，往往绕怀袖。闻声固相思，发缄抵良觐。更念望江楼，当年成解后。"兑之赠诗云："谢客永嘉作，杜陵秦州诗。近游倦历览，念乱常苦饥。正声嗟久沦，抗心千载期。朱霞互天半，修然海鹤姿。顾余溷燕尘，必跋衣化缁。吴霜点秋鬓，始有江湖思。泖人文藪，吐纳多灵奇。怀哉春融老，从君求本师。"姚作近山谷，瞿作近小谢，皆佳构也。兑之为善化相国之季子，为人温雅，淹贯中西。相国薨於民国七年，逊帝赐谥"文慎"，遗著有《超览楼诗集》六卷。

光绪戊戌、己亥，相国两督江苏学政。岁戊子，海上诸寓公因为受知师结一怀超社，以为纪念。自是觴咏无虚月，而我邑戴果园先生克宽《四月八日同人在玉皂山道院作怀超社第三集》律句最为惊策，云："卅年文圯灵光殿，一集人尊超览楼。南国冠裳余涕泪，西湖风雨壮松楸。（文慎师葬西湖）斜川公子多青眼，汐社门生半白头。嘉会於今已三举，聊凭觴咏祓清愁。"

友人有为余诵近人名句者，钱塘陈小翠女士云："一虫已觉秋声苦，万影都随月色来。"余姚施叔范《九日》云："登高望远秋无际，命酒为欢地不多。"《谒岳墓》云："为客俄惊秋已老，对公长叹国无人。"小翠为栩园女公子，海上诗家也。叔范自称髯翁，豪於饮，诗有奇气，著有《艺楼醉墨》。二人皆浙人，余皆知其名，而未得一觐面，又未得尽读其诗，以为憾。

戊子初冬，散木、雪泥、白蕉过青，孙子再壬觴之谈圃。席间，散木话游台湾时所历山川风土，并谓古人有"海上仙山"之说，而台湾不见於史，疑台湾或即"岱舆"之音讹。余按元史云："流求在南海之东，漳、泉、兴、福四州界内，澎湖诸岛与流求相对，天气清明时，望之隐约，如烟如雾。"知元以前犹误以台湾为流求也。余即席赠散木云："一蹶仙山眼界空，岱舆诗卷足豪雄。黄金堆斗知何物，试与尊前叩粪翁。"此点化《殷浩传》中语，以散木自署粪翁，故云。

雪泥来，与姬人偕。蒙以诗卷见示，雪泥尤工画梅，故诗皆题画咏梅之作，是又和靖后一知己矣。《玄墓探梅》云："铜坑道上枝犹密，香雪亭前影不多。只恐游人清兴减，数枝老干卧烟莎。""飘零邓尉一山春，古树年年砍作薪。横断疏篱才几本，今朝犹有拗花人。"余十年前邓尉之游，已见多有砍梅种桑者，读此诗，益叹山民生

计之蹙。《寻梅》云："东风莫笑我来迟，犹有残香恋晚枝。老干槎櫟花数点，恰如昼稿未完时。"《盆梅》云："眯人尘土久深居，心在山林意自舒。开得盆梅才数朵，小微雨夜观书。"他如"红白梅开四五树，古今书聚两三间"、"等闲岁月头将白，容易秋风菊又黄"，皆清韵泠泠，不落凡响。

瓶粟斋诗话三编

瓶粟斋诗话

●三编·卷一

李之歌吟，杜之排律，元白之讽谕，温李之香奁，皆为唐人绝调。至若昌黎尊儒，异乎濂洛风雅；太祝杂兴，别於范陆田园。江湖讴唱，孰与王孟之山林；坡颖赓酬，何似韩孟之联句。安在唐宋诗无界域哉！

自《瓶粟斋诗话初编》、《续编》出，同其说者首有善化瞿君兑之（宣颖）。兑之之书曰："执事为诗虽不主一端，而示人轨则大抵导源三唐，纯乎正轨。《诗话》中举杜老《玄元皇帝庙》等诗，以为宜熟读，尤与鄙人平昔之见若合符契。盖古人之熨贴处，非於此等诗求之，不易领会。尊论拈出'稳'字，亦是此意，杜诗有极拙处，然无不稳处。"又曰："东坡是不负责人，只当人间游戏。荆公则气象法度，刚正精严，确是子产、孔明一流。光宣之间流行宋诗，亦不得谓非一进境，然矫枉过正，不无流弊。尝谓欲救其失，莫若转而求之元诗之华重、明诗之冷峭。唐以上不可几，则取法元明，尚不失为一种方便接引。公亦深许袁谭，彼此所见大都不谋而合"云云。公安、竟陵为世诟病。即荆公诗，随园亦讥为门外。得蛻园为之张目，余窃喜持论之不孤矣。

随园评东坡诗"大踏步便出"。余谓坡诗多开门见山，惟"梦裹似曾迁海外，醉中不觉过江南"一联最深婉，为集中律句之隽。

坡诗在宋时惟两本：一分类本，创始於东莱吕氏，而集成於梅溪王氏；一编年本，则吴兴施德初及其子武子编纂成之。然《文献通考艺文》仅及施氏本。施本世不多见，而梅溪本颇多舛误。康熙初，云间杨瑄之甥朱翠庭得宋刻施本，参互攷订而折衷之，一仍梅溪分类之旧，世号善本。然梅溪搜采诸家之注，多繁简失当、割裂不善之病，可见注书之难。集凡三十二卷，余弱冠时会点勘一过，旋搁置。今偶复温之，觉近三四年间所为律句颇有近苏者，岂少时沾句，去数十年犹有余馥耶？余家旧有查注苏诗残本，乱后亡失，至为惋惜。

东坡七古，如《石鼓》、《聚星堂雪》、《游博罗香积寺》、《同正辅游白水山》等作，皆以排偶行之，纵横开阖，意到笔随，杜韩而后一人也。五古最忌平铺，老杜《北征》有许多在內。坡公《甘露寺》诗三十二韵，如坡又曼衍，了无奇境，幸中间插"花落有余想"二句作一束，结处"方其盛壮时"一段重复展开，遂如神龙掉尾，全局皆振。此法不可不知。

东坡写景物，喜用侧笔取致。如云："路人皆言君未远，骑马少年清且婉。"又云："江边父老能说子，白须红颊如君长。"此"骑马少年"、"白须红颊"者，却借旁人口中说出，自己不肯正说。又《答郡中同僚贺雨》云："潇潇止还作，坐听及三鼓。天明将吏集，泥土满靴屨。"若俗手为之，必直下言"滂沱而倾盆"矣。此云"泥土满靴"，则天明之大雨可知。

坡诗每喜添设一"老"字以足句者，如云："便腹从今笑老韶"（《次韵刘贡父幡胜》）、"纸帐心期老孟光"（《和参寥》）、"华发萧萧老遂良"（《次韵狄大夫见赠》）、"犹似浮江老阿童"（《忘其题》）、"观鱼并记老庄周"（《寿州李定出钱》），他如谓玄奘曰"老奘"（《和合浦愈上人》）、冯衍曰"老衍"（《题冯通直明月湖诗》）、"老优孟"（《见次韵王定国谢韩子华过饮诗》）、"老方朔"（《见欧阳季默以大鱼为馈求诗诗》）之类尤多。然有富有不富，不必援以为例。

东坡和陶，殊无意义。陶公天怀澹定，躁释矜平；坡则处处运巧使才，机锋横出，盖仍是吾家体，不过用其韵耳。如云："卯酒晕玉颊，红绡卷生衣。宁当娣黄菊，未肯似戎葵。"此咏长春也，语太琢太纤。《和饮酒》云："三杯洗战国，一斗浇强秦。"太火。惟《和西田获稻》云："昼功不自觉，夜气乃潜还。"十字差近。余尝谓东坡刚激，偏欲和陶；梅溪柔缓，偏欲和韩，皆古人不自藏拙处。

宋《梅溪诗文集》五十卷，乐清王十朋著，朱子为之序。先生愤靖康之难，时存复仇之志，读其奏议及《观国朝故事》等诗，无不以用人为先、备寇为急，迥异当与始要持国者流。诗则非其长也，集中多用经语，如云："澹台至室必公事，平仲与人能久交"、"君子於言端欲讷，贤人终日只如愚"，皆头巾气太重。顾氏《日知录》所谓"以理为宗，不得诗文之趣"也。然平生於诗服膺杜韩，故古风较胜。

七古用韵以平接平及插韵之法，余前《诗话》已略言之。顷检篋，又得名山翁一说，云："七古首句不入韵极难，东坡'我家江水初发源，宦游直送江入海'，天造地设，不可多得。遗山'黄花水帘天下绝，我初闻之雪溪翁'，老横无敌，然此犹一平一仄也。退之《石鼓歌》用两平，殊不见好。"

宋义士林景曦《霁山集》，出《永嘉诗人祠堂丛刊》，为如皋孝廉冒鹤亭（广生）校刊。名山极赏之，尝以贻余，且曰："南宋江西诗派盛行，大率粗恶不惬人意，惟霁山幽秀工稳，取法唐贤，放翁以后，未有能诗如霁山者。尝欲合陶渊明、司空表圣、林霁山、倪云林刊为《四遗民诗》而未果。"

六言诗，或以韵胜，或以典胜。其体防於唐而盛於宋，苏、黄、范、陆诸大家集中时有之。东坡常讥半山此体为"野狐禅"，然如"柳叶鸣蜩绿暗，荷花落日红酣。三十六陂春水，白头相见江南"，风调亦何必减人？清乾嘉诗人颇亦优为，郭频伽云："春人最怜春尽，花落只在花前。今雨不来旧雨，柳棉飞尽桐棉。""蚕老三眠三起，桑绿畦东畦西。梦醒不醒雨响，天明未明鸦啼。""天远水远人远，多感多病多愁。伤别伤春伤逝，杭州苏州越州。"此又别成一格。近见蛺园《蔬酌吟》云："醋防损齿郑国，蜜能解毒仲殊。嗜好敢云绝俗，瓶索空厨。""无负公子不至，负腹将军说降。垂脚莫轻侯景，断头几见王双。""贾中书说鲑鮓，邺下讖传鱼羊。幸不槟榔餽客，偶然芡栗煎汤。""雅训宜寻幽菽，至言如味戎盐。句丑须君红勒，睡酣容我黑甜。"诗极典赡，余腹俭，苦难下注。东坡云："贫家见珠贝，眩晃目难审。"正可为

喻。

渊明不肯为五斗米折腰见督邮，赋《归去来辞》以去，古今高其节。然汉冯良年二十为尉，捧檄迎督邮，即路慨然，耻在厮役，至杀马裂冠，遁至犍为。妻子求索，从迹断绝，见草中败车死马，衣裳朽腐，以为为虎狼所害，为持丧，逾十年而返。事载《后汉周燮传》。此在陶公前，其志行之坚苦尤远过之，而人皆不知，言之不可以已也如是。然"言之无文，行而不远"，东坡吊李台卿云："所恨言无文，至老幽不显。"慨乎哉！

卢仝居洛阳时，郑余庆为留守，李素为尹，仝皆不见，殆段干木、田子方之流，而新、旧《唐书》无传，《新唐书》於《韩愈传刘义附传》中惟一及其名。使无愈《奇玉川子》一诗，则仝之为人几不见。愈之诗曰："辛勤奉养十余人，上有慈亲下妻子。先生结发憎俗徒，闭门不出动一纪。"又曰："《春秋》三传东高阁，独抱遗经究终始。"仝学行操守盖如此。终云："先生固是余所畏，度量不敢窥涯埃。先生有意倘降临，更遣长须致双鲤。"时愈为洛阳令也，其爱敬仝可谓至矣。然仝文字荒怪，《昌黎集》中有《效玉川子月蚀》一诗，乃爱其文奇，取仝稿而为之删润存之，故语气一仍仝旧，非愈作也。然愈不敢矜己能，又不忍掠其美，故言"效"，亦大费斟酌矣。

西岑倪芸庄先生倬《我我书屋诗稿》八卷，旧藏汪洋蒋氏。戊午春，蕴深吏部寿祺之孙举以贻余，稿字楷法工整，不知出谁何手笔。先生领嘉庆五年乡荐，官长洲教谕。诗约六七百篇，虽不规规於古人法度，而其人襟怀潇洒与夫承平时淳风美俗，故可於楮墨间得之。录其《丙午新年杂忆》，云："无事春前日已长，欢场追逐费思量。鸡豚隔夜招邻社，村里浑家在醉乡。我亦老农忘姓氏，人从淳古话羲皇。桃符爱乞先生笔，落墨居然草圣狂。""客来不速惯忘形，奋袖掀髯眼倍青。课字笔晨楚楚，摊书灯火夜星星。征歌东陌还西陌，哄坐棋经杂酒经。独有彦伦庄雅甚，谈言微中最堪听。""淀湖南畔柳湖西，访戴舟沿罨画溪。屋角趁晴犍犊出，陌头占雨鹁鸪啼。戏场小市春三月，渔莰凉波柳一堤。相识逢迎随处有，柴门已杀丈人鸡。""范袍管席镇相怜，忆着前尘倍惘然。逝者已随流水去，怀人刚在白云边。能供季伟烹鸡喂，已买渊明种秫田。寄语故乡诸旧侣，吴淞合有弄潮船。"第二首自注云："韵园工书，实堂善围棋，泉南好征典故，芥山、竹溪爱诵余小诗，酒则诸君共之，不饮者泉南一人耳。春秋佳日，过从流连，薄醉兴酣，谈谐间发，度阡越陌，群从和之，可谓极一时聚首之乐矣。"注中所举诸人，韵园为赵斐友、泉南为周郁滨、芥山为黄如玉，皆诸生；实堂为蔡氏、竹溪为陶氏，名则不可考。他如"容易成仙书裹蠹，不知许事水边鸥"、"干家屋矮晴缣茧，十里湖平晚打鱼"，及柳湖棹歌三十首皆佳。棹歌效竹垞体，多记故乡风土，辞多不录。按熊志列先生於《儒术》而不入《文苑传》中，仅言其工古文，亦不及其他，殊以为异。先生有《嘉庆庚辰二月十日病中口占》云："千年丹药求安在，万丈灵山上未能。昨夜玉清宣召急，狐轮飞过海西陵。"庚辰为嘉庆二十五年，度其时先生年近六旬矣。此诗乃其绝笔。我家与倪氏

旧有连，故九世祖春华公有题先生《为恻集》诗。《为恻集》，先生哀其犹子之作也。

篝山何氏，世善医，又多能诗。顷果园觅得藏翁题陆守廉诗册遗墨见示，规绳极严，诵之非但足觐其诣力，并见老辈谅直不苟，阿谀为近。录於下云："统观全卷，笔致清丽，不乏佳句。而通体间有不合处，不能以为非也，然究不能以为是。不明诗体，将排律诗放开，信笔做去，往往如此。"又云："既称为诗，雅俗必有辨矣。因字成句，因句成篇，性情随其人，而体格不能变也。必观全篇而后可以论工拙，不拘拘於字句间也。"又云："胸次超旷，落笔自然高速，不可以名利累其心。"又云："於唐人中择其性所近者，专主一家。俟能立脚，然后参观各家，由唐入宋，则无弊也。"又云："先古后近，先五言而后七言。"又云："俗字俗典，在所必去。寿挽题图及友朋赠答之作，苟无深意，皆可不作。"又曰："才地薄，书卷少，无江山之助、师友之资，静居一室，即景言情，满纸风云月露之词，有作不如无作。"陆名时英，住陆家圩，工隶书，有《亦圃吟稿》。

另一札寄守廉兄吟如云："令弟以诗垂问，帖蛰不敢当，谨以奉缴。张水部实出昌黎之门，仅称为友。余於姚子寿先生质问二十年，并未报蛰，友而兼师。古人风义如此，不拘拘形迹间也。为学须以古人为准，毋就凡近"云云。观此书，知守廉实请业藏翁之门。然此书却辞旨婉逊，尾尾动人。师弟同在朋友之伦，（《论语》师称弟子曰"小于"，或曰"二三子"，或径呼名；弟子於师多称"夫子"，亦有称师之字者。）自孟子严为分别，后世师於弟子遂皆呼友。刘屏山集有《病中赏梅赠元晦老友》题，《蔡元定传》，朱子有"季通我老友"之语，朱子为屏山弟子，蔡又朱子弟子也。因忆余尝以"老友"称行百，吴门潘舍人轶仲颇非之，第念舍人於"道长"、"道兄"、"学长"、"师兄"等称谓不肯苟且，意其必有说也，不敢辩。后读屏山集，乃悔失言。今人好为人师，於其有闻者辄诵於口，曰"某我弟子也"；而在弟子，则往往讳其师，以学於人为耻，皆可鄙也。

吴江金君松岑，晚好《易》，年五十，从吴门曹叔彦先生元弼游。其仪适，具受业弟子红帖，修摯之日，行跪拜礼，师中坐，受之不辞。时松岑诗名已满江浙，而师之年仅长五龄。嗣是每岁首必叩贺无间，吴人以为美谈。余曰："有曹氏之学，宜松岑为之弟子；有松岑之才，宜曹氏为之师，两无愧也。"曹氏，光绪甲午进士，赏翰林院编修，以治《易礼》著称，著有《礼经校释》、《周易郑氏义笺释》、《周易集解补正》等十余种行世。年八十余，今犹存，而松岑则已物故。

考据家以考据为诗，古无有也。老杜《八分小篆歌》只及李蔡碑文，东坡《石鼓》亦只言"上窥羲颉，下揖冰斯"，征引并不繁富。有清乾嘉间考据之学大盛时，则如翁阮诸公，广搜金石拓本，引经证史，群骋淹博，一时成为风会。而江左孙渊如（星衍）《习鼎歌》、《熹乎石经拓本》诸诗，视仪征之《晋砖》、大兴之《五凤五年砖》、《汉石经残字歌》等作，殊无多让。诗则聱牙诘屈，往往累数十百言不尽

。近人如陈石遣衍、李墨巢（宣龚）诸老，犹喜沿其体，然非诗书膏吻，纠蜺（入声）蟠胸，不易为也。石鼓，孙氏坚信为宇文周时物。（见"穆书失政和，猎鼓疑宇文"诗句注。）殆好奇之过。按石鼓在唐以前世罕知之，至韦应物、韩愈为诗歌咏，遂为攷古家珍视。惟韦以为文王之鼓，而宣王时刻其诗；韩则直谓宣王之鼓。而欧阳氏《集古录》则疑之，以为不知韦韩之诗何所据也，然亦不敢下断语。余前《诗话》论退之《石鼓歌》一则，窃疑为成王时物，此与宋程大昌《雍录》所载，见解恰同。

邑人张颉链孝廉仁寿《味莼移笔记》云："我邑於乾嘉间以汉学名者，首推王兰泉侍郎。至咸丰间，而熊苏林户部其光实能继武户部，博通经训，兼精弧三角术。（见嘉善诸可宝氏《三续畴人传》。）惜生值粤乱，转徙兵间，没年仅四十余，著述悉付劫灰。没后，其弟纯叔（其英）重加点检，只得诗百余首，今所刻《苏林诗剩》是也。其平生论及学问之作，颇与洪北江《卷施阁》相近。"光绪末，其子鞠孙太史祖诣复於他处搜得文一篇，系辨正阮氏《丰字瓦考》者，洋洋数千言，考证极为精核，附刻诗集后。昔阮氏学海堂辑《皇清续解》独缺此门，此外亦无人为辑单行。断幅残缣，恐不再传而散佚，深可惜也。

常熟俞君运之（鸿筹）、衡阳李君佩秋（沫）各以书来，言与余神交几将二十年，因盛道相思，欲谋一面。岂不嫌俗物败人意耶？二君皆笃志好古，收拾放纷，阐发潜翳，见闻多而考证确，诵其诗知其学矣。录运之《题铁琴铜剑楼校书图，为瞿甥凤起作》云："古人校书如扫尘，心严自冷消埃氛。日思误字亦一适，剖析疑义传其真。君家清芬食旧德，五世遗编抱江式。至乐何如几案间，灯地篝香勤拂拭。点勘鱼虎施丹铅，密行细字相委填。不容删衍康成传，抱蜀谪讹《管子》篇。春明坊外停车间，墨客争邻宋宣猷。古书有约许流通，善本传钞迹寒唆。乐易居难迴不侔，雌黄苦为后人谋。晁陈绝学犹能继，文献中原此仅留。嗟哉百六丁浩劫，武康山中鬼昼泣。高楼琴剑已飘零，更见探丸肤宾篋。归来有愿几时偿，画裹分明云水乡。悴掌只余沾句意，待嘘嘉种发寒香。"《题松禅老人临董文敏山水卷》云："二禅画意差堪并，垂老江湖放逐时。易代可怜同一瞬，南朝何事易名迟。（文敏，崇祯时不应温体仁寿文，谢病放归。卒后，至弘光时始补谥，其际遇优於文恭，而略相似。）"雨淋皴法谁能识，蝟臂枯枝老更灵。尚有秋园遣佩在，蛮笺十样仿华亭。（文敏创雨淋墙头皴法，文恭有仿制华亭。）"一卷家山流转频，斗诗人去墨犹新。沈园长物凋零尽，玉茗花枝斫作薪。（卷为沈石友舅氏旧藏，舅与养浩叔绘《门诗图》。令书斋有玉茗一株，为明初物，浩叔题诗及之，今摧伐久矣。）《闻铁琴铜剑楼藏书易输，追赋作此，寄慰楼主》云："澜语当年尽子虚，笈斋记事复粗疏。（张幼樵润于日记：癸巳六月常熟翟氏藏书有出售说。）登瀛枉下宣和韶，未献王家镇库书。（清末端甸斋以献书许酬京卿，楼主先人婉之。"宁登瀛不为卿"宋人语也。）"青箱长物日摩挲，输限应知感慨多。谁分南唐李后主，凄凉挥泪别宫娥。

（用牧斋《宋本漠书跋》语意。）秘笈空怜饭一炊，区区聚散又何奇。郑堂易米还留记，绝胜庚寅一炬时。"《忤生从兄旧藏逸林道人诗稿四卷，不著姓名。松禅老人

题诗，以卷中"河南为氏膺为名"句为孤证，并攷褚氏乃釜山族望。余循此恬，果从陈见复昭文志获悉，道人确姓褚氏，名道潜，字休庵，原名膺。江西按察副使圻之后。尝谒史阁部於军前，甚见宾礼。寻归隐。吴二饶为作传。此稿埋名将三百年，一旦竟发潜翳，为之欣喜累日。赋此以志墨缘》云："氏补瞿劬传，碑留孙叔名。残编孤证在，坠绪一朝明。见复搜求广，瓶庐考覈精。怀哉二饶传，奇士概生平。身世谢皋羽，故人唐鲁公。《北征》蕲复汉，（诗分《北征》、《梦》曙等四卷。）南渡愤从戎。砥柱摧江左，云岚哭梦中。同时何次德，沟水判西东。（阁部答多尔衮书出幕友桐城何亮工手。何顺治丁酉即举孝廉。）"张氏《味莼彩笔记》云："多尔衮致史阁部书，相传出华亭李舒章雯手笔。舒章与陈子龙齐名，后仕清室，掌制诰。今内阁中书舍人题名舒章，哀然居首，实为降王长矣。"余喜其与此注有连系，故并识之，亦以供治先代国闻者一掌故也。

佩秋久寓海上，颇谙云间故事，以爱峰泖山水，颇有坡翁阳羨买田之念。《题青浦县续志见寄》云："宋志云间三卷文，我曾掇拾助方闻。（余旧撰《绍熙云间志考》证一书，於原误刊误多所堤正。）却从析置披群牒，（《青浦志》，余藏有乾隆、光绪二本。嘉靖王元翰八卷则未见。）史见縑摩袭古芬。（全剑老、戴果老、沈瓶翁所纂《续志》，堪与绍熙末、胡、林三子媲美。熙《志》纂修者：朱端常，官兵部尚书；林至，为考亭高弟，著书甚多，官秘书郎；胡林卿，官建康府教授，皆华亭追士。贵郡《正德》、《嘉庆志》皆不详，此余所考得者。）五亩待营崧子宅，一怀新傍道婆坟。（余藁葬亡室太原君於寅春庙，距黄道婆坟仅数里。寅春庙在吴家行左近。）他年峰泖夸流寓，片席渔樵或许分。"题余《青浦后续诗传》小印本，仍用前韵，云："几家撰集陆乡文，继轨惟君晚有闻。苦向丛残搜逸韵，略从刊播诵遗芬。谷音嘹唳华亭鹤，鬼唱凄清鲍氏坟。剩想穷年勤研削，然脂细写坐宵分。"余亦报以诗曰："君家柱史善征文，海曲潜身拾旧闻。石鼎吟成松斗韵，牙签书就叶飘芬。歌鱼肯鼓冯罐铎，下马能言董相坟。（君辨崧宅以袁山松将军得名，今作崧泽非是。）他日云间流寓传，名山一席定谁分。"

松江张琢成先生，去岁在北京，见《云间邦彦图》有松禅老人题诗云："之子金闺彦，勤勤意有余。能修状人记，肯奇绝交书。尺素常思问，扁舟会访予。吴淞衣带水，且为致尊鲈。"并有跋云："《云间邦彦图》，门人顾香远所刻。光绪壬寅初春寄示，时适拜蒋忠烈象，因思我乡先贤及旧家所藏画像，亦当摹绘成幅，奉诸祠宇。憾吾老不能从事也。正月二十九日翁同龢识。"香远名莲。琢老次其韵云："国运颠连日，阿衡放逐余。正当思过日，忽得及门书。跼济方祠蒋，商量或起予。德衰嗟老凤，结念只莼鲈。"通体义正辞严，一结尤不宽假，盖《春秋》"责贤者备"之义也。因忆葆荪有句云："东曹幸是知机早，不为莼鲈或不归。"思尊鲈一也，而诗人之褒贬异词焉。立身处世之难如此。琢老云："图为枫泾李海霞所得。李不自秘，以贻余，今藏松江图书馆。"琢老关心文献，近有纂辑《云间诗存》之举。余与琢老别已逾十年，不知此盛业得告成未也。戊子秋，余为慧珠为诗，祝其七十寿云："此木轩中足啸歌，（柴间名）幽居谷水濯清波。（谷水居，浴室也。）达人随处堪容膝，

此是先生安乐窝。""风雅云间息息传，张皂幽眇笔如椽。先生自有千秋业，三绝宁惟老郑虔。"

武进吴樵长先生山秀，好音韵之学，玄瓠稿 敖，辨之甚审。泛览之余，多所摘录，津津有味。顷介其南菁旧同学果园老人钞其所得寄余，如云："《孟子》'摩顶放踵'，'摩'、'放'为唇音，'顶'、'踵'为舌音；'流连荒亡'，'流连'为双声，'荒亡'为叠韵。《兰亭序》'悟言一室'，上双声，下叠韵；'放浪形骸'，上叠韵，下双声。"诸如此类颇多。又尽搜杜诗中用唇音为对者，如"露从今夜白，月是故乡明"、"才大今诗伯，家贫苦宦卑"、"越裳翡翠无消息，南海明珠久寂寥"、"江山故宅空文藻，云雨荒台岂梦思"，亦复多至六七十联。又云："杜集中双声叠韵尤多，因引钱竹汀言'自宋以来，注杜者无虑千百家，於训诂事实，讨索靡遗，至以双声叠韵求杜诗，则自周君松霭始'。周君著述世不传，然心向往之"云云。余谓自刘勰创一避、二省、三权、四调之说，沈约创诗人八病之论，於是牵掣滞碍，词章家益以为苦。然杜老不过曰："晚节渐於诗律细。"又曰："老去诗篇浑漫与。""律细"云者，岂指"永明体"而言乎？若然，则又何以云"漫与"也？读古人书，不必於此等处深求，深求则恐泥。

声韵之学始於六朝。《南史陆厥传》："汝南周 ，善识声韵。"又谢庄知双声叠韵。近代邓筠（廷桢）《双砚斋笔记》於双声叠韵言之甚详。《曝书亭集》竹垞《致查德尹编修》一书云：蒙昔闻吾友富平李天生之论矣，少陵自许"晚节渐於诗律细"，曷言乎"细"？凡五、七言近体，唐贤落韵於一纽者不连用，夫人而然。至於一、三、五、七句用仄字，上、去、入三声，少陵必隔别用之，莫有叠者，他人不尔也。余闻是言而未深信，退与李十九（武曾）共宿京师逆旅，挑灯拥被，共诵少陵七律，中惟八首与天生所言不符：其一《郑驸马宅宴洞中》石："春酒杯浓琥珀薄"、"误疑茅堂过江麓""自是秦楼压郑谷"，叠用三入声字；其一《江村》云："老妻画纸为棋局"、"多病所须惟药物"，叠二入声字；其一《秋兴》云："织女机丝虚夜月"、"波漂菰米沈云黑"，叠二入声字；其一《江上值水》云："为人性僻耽佳句"、"老去诗篇浑漫兴"、"新添水槛供垂钓"，叠三去声字；其一《题郑县亭子》云："云路岳莲临大路"、"巢边野雀群欺燕"，叠二去声字；其一《至日遣兴》云："欲知趋走伤心地"、"无路从容陪语笑"，叠二去声字；其一《卜居》云："已知出郭少人事"、"无数蜻蜓齐上下"、"东行万里堪乘兴"，叠三去声字；其一《秋尽》云："篱边老却陶潜菊"、"雪岭独看西日落"、"不辞万里长为客"，叠三入声字。既而观宋元旧雕本及《文苑英华》，证之，则"过江麓"作"出江底"，"多病"句则曰"赖有故人分禄米"，"夜月"作"月夜"，"漫兴"作"漫与"，"大路"作"大道"，"语笑"作"笑语"，"上下"作"下上"，"西日落"作"西日下"，合之天生所言，无一犯者。张颉钟《笔札》载此书，并云："足见杜诗声律之严，而读杜者心思之捆。自北大诸君新体之诗行，而村伧街之语、娼女狂且昵枕之言，皆谓之诗，并韵无之，曾童谣之不若。朱氏之说，虽於杜陵为末节，於诗家亦为捆流，然再阅数年，恐此种议论亦成绝学。"张氏此论，实获我心。乃叹樵翁孤诣，与古为徒，空谷足音，能不闻而喜耶？

樵长生平，喜读老杜、遣山诗。其论遗山，谓其"工於说穷说苦，如'客裹盐怜节物，乱来鼓吹失欢声'、'老来行路先愁远，贫裹辞家更觉难'、'歉岁村墟更荒恶，穷冬人影亦伶俜'等十数联。"又谓："瓶翁言老杜喜用'一'字，而遗山亦有之，如'鸡栖渔梁一村落'、'六合空明一莲叶'等句是也。"皆足补余《诗话》所未及。樵长任常州中学教师三十余年，今已七十矣。尝自释其字曰："许氏训'樵'曰：'散木。"樵长'云者，犹言不材之木之尤者耳。"故和余韵云："散材自畏搜林斧，大海应多漏网瑚。"有德之言，温恭乃尔。晚遭丧乱，修羊益瘦。然笃於风义，虽从井救人不悔，盖今之熟腹人也。

邑人张雄伯孝廉家镇，在南菁书院时与上海赵韵丞（世修）最莫逆。所为诗亦相似，俱以豪放见称。遗稿不甚富，余最爱其"曲中幽怨青山在，河上离怀落日凉"一联，然上句从"曲终人不见，江上数峰青"，下句从"携手上河梁，游子暮何之"脱化，此诗家"夺胎法"也。他如"夜冷生梅雨，秋凉感麦天"、"客裹论文岂常局，夜深说剑有寒错"，皆非庸流吐属。

韵丞天分绝高，而诗功未极洗炼，然一种抑塞磊落之气，自不可掩。录其《月夜独坐有怀》，云："端居苦无侣，骚然意不适。娟娟对初月，素心耿遥夕。美人阻江波，良晤焉可得。相去无百里，便似天涯隔。感此重沈吟，欲言谁可说。墙阴老虫语，助我声啾唧。停琴不能弹，音声自怜惜。怜惜岂无人，相思暮天碧。"《冬夜遣闷》云："游鳞潜渊源，飞羽倚丛薄。凡族各有依，吾躬靡所托。书剑江湖心，十年已萧索。陈经召生徒，讲学颇不乐。救时术迂疏，昆俗迹飘泊。居贫安足羞，干仕是我错。江乡十亩田，不殖久荒落。乱世逐浮名，何如返耕作。安得绝尘虑，携家遁林壑。"律句如"断烟横岸直，圆月出云迟"、"草地烟痕薄，梅天暑气微"，皆清隽。韵丞上世有名文哲字璞函者，为"吴中七子"之一。乾隆时进剿金川，文哲随尚书温福，我邑王昶随大学士阿桂。未几，温军溃於木果木，文哲殉难，得荫恤。韵丞为世家子，少跖弛不羁，尝云："爱酒刘伶那惜命，寻花杜牧不知贫。老去寻春花兴减，愁边结客酒徒多。"可想见其风概。后没於京师，旅櫟萧条，知交嗟叹。有遣诗一卷，雄老为鹄贻刊行之。

●三编·卷二

钱塘吴锡麒（谷人）《有正味斋集》，诗十六卷、骈文二十四卷、词八卷，《外集》五卷，嘉庆中吴氏手订自刻。其诗与香苏山馆相似，大都为当时风尚所囿，不能尽脱试帖气味。惟五言清越，似办香樊榭者。律句如"白苹何处风正急，黄鸟不知春欲归"、"到门春水绿平岸，夹岸野花红过桥"，此类正不多也。余如"月在诸外，僧归一磐边"、"水明双鹭外，秋冷一星初"、"客路长亭外，江流短梦边"、"诗清流水外，僧老闭门中"诸联，盖摹拟"远磬秋山裹，清猿古木中"、"树色秋帆外，滩声夜枕前"句法，然在唐人亦不为名句也。《外集》皆五言八韵，视《唐人试帖》一书中所录，瞠乎远矣，然可想见承平时馆阁之闲暇。

《芳茂山人诗录》，阳湖孙星衍著，光绪初《平津馆丛刊》本。其诗，五言古大率规摹二谢，参以韩孟，幽秀刻削，自成一家。如《上大茅》云："泪流衣边云，足滑崖上翠。陷知仙踪深，断若鬼斧利。"憩郁冈云："山栖寡俗驾，客至道人喜。开门响丛筠，系马落松子。檐涩挂薜萝，阶荒合榛杞。蕉心冷逾碧，茗味苦还美。念沈钟声前，影闭竹花裹。"七古多效长吉。五律"虚堂零竹雨，孤屋幕茶烟"、"露肘天风冷，钩衣竹翠深"、"树浓知鹊在，烟动识人行"、"独树度云影，一星争月光"、"堤树留残蒂，湖波定晓云"、"暂游知客乐，独往得愁佳"诸联，信堪上蹑郊岛，下铄四灵。诗凡八卷，首《澄清堂稿》二卷，皆古风，为其手定本，自为圈点，极严；次冶城絮养集二卷，亦山人手订；其余《澄清堂续稿》、《冶城絮养续稿》、《济上停雪集》、《租船咏史诗》等各一卷，则山人没后，其兄南麓星衍搜辑而补编者。

郑国人物，备草创、讨论、修饰、润色之才，故在春秋时，辞命最善。盖文章结撰，原如筑屋：草创，架构也；讨论，选材也；修饰，补罅漏也；润色，加藻也。任是何种文字，须顺序循此四个途径做去。

诗家锻字法，有意境平常而全在下一字见工者，如"绿树村边合，青山郭外斜"之"合"字、"斜"字是也。倘易"绕"字、"多"字，便为初学语矣。所谓"失之毫厘，谬以千里"也。又如"大漠孤烟直，长河落日圆"，奇在一"直"字、"圆"字。或曰："烟自直，日自圆，何奇之有？"曰：大漠、长河之地，大都莽莽苍苍，四无隐蔽，所以见其直、见其圆。设云孤烟白、落日红，则便为村落墟里间光景，曷以尽广莫无垠之奇乎？学者神而明之，举一反三可矣。

名山老人言诗要有理。余曰：东坡云："清风偶与山阿曲，明月聊随屋角方。"试思风如何能曲，月如何能方，其中自有一个理在。郑板桥云："担酒人来风亦醉，卖花人过路犹香。"亦同。后人不善理会，往往效顰貽笑。如某云："船移春水人皆绿，楼傍斜阳梦亦红。"又某云："人来竹院须皆绿，楼近桃花梦亦红。"夫梦无迹象，谁见其红？且移船看竹，韵事也，设有客焉，须绿人绿，岂非如夜叉鬼卒，可怖人耶？上句理虽通，风景杀矣。此袁中郎所谓"恶道语"也。曩俞樾卿先生廷扬句云："人

孤灯影瘦，春足月光肥。"为曲园老人所赏。若诸亩香联之"愁多嫌梦重，诗瘦觉身轻"，则理又难通矣。余最爱倪芸庄"花多便觉春山艳，雨遇微闻绿水香"十四字，以为自然工妙。

东坡云："欲令诗语妙，无厌空且静。静故了群动，空故纳万景。"郭频伽诗："芭蕉不作寻常响，一阵花奴羯鼓催。"此的是蕉雨；又云："梧桐叶上无多雨，一滴听他又几时。"此的是梧桐雨。练溪曹东厂云："一叶扁舟回首望，白云无尽野塘前。"又云："白云惹衣袖，不觉入山深。"以"无尽"状水云，以"惹"字状山云，情景逼真，此都在空静中体会出。又东厂《饭圩寺题壁》云："月随潮至花阴湿，浪打门来暑气微。""湿"字、"微"字，亦复诗心静细。

灵芬馆《得闲集病起怀人》诗注："蒋伯生少府言：余生平於诗服膺三人。（谓黄仲则、王船山及余耳。）或问三子诗学，余曰：仲则之诗，可学而能；船山、频伽之诗，不可学而能也。问何故，曰：严沧浪不云乎？'诗有别才，非关学也；诗有别趣，非关理也。'无他，诗以道性情，性情之至者，极於能感人而止耳。"

石遣老人，曩在张文襄节署。一日，文襄宴客，老人席上赋诗，有"作健逢辰领元老，夕阳城郭万鸦沈"之句，文襄於"领"字颇致不满，老人讥为不知诗。余曰：诗从东坡《陪欧阳公宴西湖》诗"城上乌栖暮霭生"意蜕出，而"领"字则本韩愈"夜领张彻投卢仝"句也。诗自佳，然退之名位高於彻，言"领"宜也。老人幕宾也，以之施文襄，岂挟其齿德之尊乎？然朝廷尚爵，幸文襄之不为严武耳。

范文正咏蚊云："饱似樱桃重，饥如柳絮轻。"又宋人咏蟹云："水清难免双螯黑，秋老难逃一背红。"皆有所刺。或曰蟹诗刺朱匡也。咏物诗固当语有所寄，然宋人尖纤，不如唐人之深婉。深婉犹近风人美刺，尖纤则几於诅矣。盖温柔敦厚之旨，愈降而愈无存也。然若唐李群玉之"芍药花开菩萨面，棕榈叶散夜叉头"，语弃鄙而言中无物，味同嚼蜡矣。

友朋赓和之诗，始於元白、皮陆，而极盛於宋。按和诗之体不一：意如答问而不同韵者，谓之"和诗"；同其韵而不同其字者，谓之"同韵"；用其韵而次第不同者，谓之"用韵"；依其次第者，谓之"步韵"，亦曰"次韵"。次韵最困人，如相殴而自繫手足也。盖心思为韵所束，於命意布局最难照顾。近代丁仲祐先生福保辑《清诗话》，言之颇详。我社中工为此体者，首推果园先生。余丁亥春重游曹家庙看牡丹，有诗，果老次韵云："谷雨逢时天转晴，诗人重作看花行。碧纱应有前题在，金粉空怜夕照明。倩影如披没骨画，旧游只剩瘦腰生。与君同赏知何日，况更头颅白几茎。"题云：《读瓶翁曹家庙题壁诗，知二十八年同游旧侣，只存一人。余戊寅春避难野母泾，曾往看花一次。忽忽十年，根触前尘，百感交集矣》。余爱其工稳而又典切，为击节朗诵久之。其与人唱和之作多类是。曹庙牡丹，为清初所植，名"玉楼春"，花最盛时，开至四五百朵，惜以地僻，游者绝鲜。近年裙屐渐多，已成邑中游赏之一。余诗

云："难得残春日日晴，江村能作踏莎行。青衫翻酒不嫌污，老眼看花犹自明。细数移舟空旧侣，重来题壁似前生。（自庚寅至今凡两游，存者仅余一人矣。）明年此会知谁健，珍重天香折一茎。"

娄县章璧庵（士铨）藏神龙本《兰亭》一百二十余种，为桂未谷所手集。章珍如拱璧，不轻示人。章官京师时，尝约期与上海朱锡百（寿朋）、我邑张颉镑仁寿、徐企商彭龄诸曹京同观，未及期而章病卒。章本豪於饮，病前一夕，颉公宴之酒家，征歌侑觞，章醉倾仆，遂病不起。锡百挽以联曰："何处玉山颓，秋冷黄垆，剩有悲歌翻菊部；频年金石癖，香销墨海，更无欢会兰亭。"可谓工雅绝伦。

嘉定近百年来学者，当推表母舅夏蕉饮先生曰残。先生著《字系》一书，以许书本字与经典通用字参互考订，以类相从，由篆而隶而楷，孳乳蜕变而下，诚为后学识字阶梯。先生以拔萃官浙江淳安知县，清末任上海震旦学院监院。光绪丙午，余肄业震旦时一谒之。翌年，先生养痾归里，闭户著书。丁巳春捐馆舍，余有诗挽之曰："豫章生山中，盘踞颇得地。材大世莫用，轮囷自枯萎。夏公瑰伟士，才行世无比。退之擅雄文，子云识奇字。秦碑与汉碣，一一窥其秘。缣楮日填委，挥毫兴所至。紧昔莅琴堂，恁幅似汉吏。寢息虞芮争，规摹龚黄治。雉山古僻壤，盐车厄骐驎。解组赋《归来》，邱园寄高致。世局屡反覆，纷纷市朝事。韦叟遣一经，嗟哉就沦弃。谒公沧海上，十载如梦寐。然瘦鹤姿，一别犹堪记。凋零慨耆旧，槎水空寒翠。他日西州门，一洒羊昙泪。"

张铸江先生心境，父子祖孙三世工诗善饮，邑中播为美谈，而皆居官廉正，尤为清议所归。先生以光绪壬辰进士历宰甘肃皋兰、张掖、正宁、河州、阶州等州县，有古循吏风。民国初，卒於兰州省寓。诗宗唐音，惜多散佚，存者仅三、四十篇耳。兹录其《州道中》二律，云："西去河梁万里长，束瞻潼华莽斜阳。眼前云树分关陇，望裹河山控益梁。疆索犹存秦郡县，长官可有汉循良。散山自古称天府，沟壑於今半死伤。""不堪举目望凄迷，清渭东边浊泾西。是处田园冒荆棘，几家门巷没蒿藜。风云盘礴卢三辅，景物荒凉汉五溪。最是伤心万家邑，五更寥落不闻鸡。"庚子、辛丑，秦晋大无，饿殍载道，此为赴正宁任目击惨状而作，不啻一幅《流民图》矣。著有《陇西朴札》一卷。令嗣颉熔先生仁寿，壬寅举人，官内阁侍读兼制诰局副科长。鼎革后，改蒙藏院贪事，任封科副科长。先生致力经史考据之学，雅不欲以诗自鸣，故流传绝，仅见其《赠徐伯匡公辅广文》云："京国联裾赋壮游，而今非复帝王州。与君同有沧桑感，愧我微官尚滞留。君年逾冠我垂髫，荣几芸窗共寂寥。往事如尘朝市变，联又听雨潇潇。（余今春归葬先大父，寓君书斋。）"又《咏枫叶》云："平铺丽锦鸳鸯渚，碎剪明霞玳瑁天。"《芦花》云："杨花轻薄羞同舞，旅鬓萧疏易倦游。"管中窥豹，时见一斑。尤工四六。戊申冬，逊清孝钦后、景帝相继崩殂，嗣皇登极，凡诸诏策，多出其手。性耿介，在蒙藏院时，外藩世爵，私争荫袭，暮夜苞苴，恬不为耻，先生泊然不为动。满蒙王公，咸敬惮之。亲友知其嗜酒，时为鸡黍之局。先生造饮，无不报。人怜其贫，至有不忍招之者。著有《味纯

笔记》两卷，於经义、史学、训诂、金石等类多所阐发，旁及朝章国故、山川人物、诗文流派，该洽博辨，近人笔记罕能夺席。《笔札》一卷，为捃摭各家论著与耳目闻见、游戏小品，论断亦颇精覈。

颉链先生嗣君聊止（厚载），庚寅春，余访之於海上，以其《养拙轩诗稿》委为点定。聊止诗如虢国朝天，蛾眉淡扫，转益风华，殆沧浪所谓“诗有别才”者也。录其《庚辰七月一日城南诗社聚饮致美轩，时租界解严，社友皆得会合，章一山枝李择庵金藻二老亦戾焉，即以城南重聚命题》云：“难得诗坛二老偕，诸公着意与安排。不分畛域终当合，略共杯盘已自佳。四坐春风传好句，一天新雨洗长街。津门耆旧今余几，莫负清尊且放怀。”《赠歌伶李香匀》云：“玉貌犹能照绮筵，画楼旧侣渺如烟。（谓冯武越、王小隐辈。）十年往事何从说，相对尊前各惘然。”《冬夜骑自由车返寓》云：“屠鲸射虎已衰迟，心事如潮若个知。尚有年时飞动意，寒宵铁马绝尘驰。”其他律句，如《甲申元旦》云：“从无大药能医老，尚有闲情得赏春。”《将归感赋》云：“忧来转觉孤楼适，归去惟余两鬓苍。”《书感》云：“但得诗工穷亦愿，能尝酒美命当拚。”《美睡》云：“暂安心魄宁非福，便掷乾坤合与休。”《咏菊》云：“纵使后时还独秀，更於遣世见孤标。”《孤怀抑郁，作此自遣》云：“大千世界终嫌窄，十月衣裳已觉单。”《人前》云：“痛饮岂能千日醉，索居只与一灯亲。”《哀吟》云：“志士空忧千岁事，故人忽尽百年程。”皆佳。又“愁深坐待骨成灰，老无余念但多情”，读之令人惘惘。有赠余句云：“功名梦入江湖冷，文字缘同骨肉深。”嗟夫，非聊止孰能为此言乎！余亦题其集云：“意气径倾游侠传，聪明都写性灵诗。”聊止久寓京津，民国中，供职直省，署秘书厅、交通银行等处，并历任京津各报编辑。倭难作，展转川滇间。为人重气谊，跌宕豪迈。粉墨登场，红裙泥饮，习为故常。夙与梅兰芳交好，梅名未盛时，多作歌诗，登津报揄扬之，时谓其有捧梅之癖。近在沪养病，才华稍稍敛抑矣。

义宁陈师曾，画为近代第一，诗学亦深造。曩读乃翁《散原精舍诗》，苦其奥涩。而师曾诗则简斋，而不为后山，工者虽其妇翁范肯堂亦不能遇，然往往为画名所掩。年未登中寿卒。身后友人辑其遣诗为一册，不免杂以少作，流传者又绝。其旅京时，寓南新华街张棣生宅，有槐一株，因以槐堂自号，纪以诗曰：“老槐相对净秋光，坐叹张侯用意长。着我斯堂元不负，因人成事竟何妨。栖迟孤枕三年梦，萧瑟西风八月凉。有客打门来问讯，余畦赢得种花忙。”后移居裤子胡同，复有四诗，云：“小成结构辟双扉，西极西城过客稀。静院但闻禽语细，终朝不见马尘飞。借他园绿遮窗幌，移我庭芳护石衣。随意摊书新睡足，晚凉吹雨对霏微。”“门前几树绿成阴，比似槐堂孰浅深。晚雨送凉初泻玉，午云穿日乱筛金。安排几席惟高枕，检点尊彝入醉吟。托足京华何所得，了然无碍是闲心。”“老槐伴我泣鲛鱼，今见携雌复引雏。别去得无三宿恋，竭来回顾七年居。狂花落叶犹堪赋，拓本陈编载满车。窃比东坡山谷例，此堂称号合归余。”“避人避地两无聊，昼寝南窗朽不雕。自笑禅中能处虱，心悬枝上独承蜩。纷纭世局风云幻，喜惧亲年定省遥。岂为丹砂句漏令，巢林聊可托焦鹩。”后有续《藤阴杂记》者，不可不摭入也。师曾没前三年，一夕与友

人论及吴缶老年七十有九，长於师曾四十二岁，师曾若逮其年，则画当何若云云。是夕，遂梦自检其年谱，至七十二岁，上书"天池物化"四字。次日检书，则青藤果以七十三岁卒，遂作诗云："书画诗文自等差，奇情信道即天池。我今游艺将何次，七十三年或可知。"七十三岁亦自喜，墨池游戏即天池。君之第四吾第一，博得头衔老画师。"是想是因，可谓奇绝，岂其不寿，固已自疑之乎？

文人夙慧，往往多不寿。余夙闻汪洋王大觉（德锺）名，惜其已为劝学死，不获缔交。大觉早游南社，与吴江陈巢南、叶楚伦、柳亚子等以文字相切磋，声华藉甚。以大觉之才，天假之年，加以熔裁淬砺之力，不难上追"三十六体"，即下之，如清代孙春雨、陈团扇辈，亦足方驾齐驱。著有《风雨闭门庐诗文稿》数卷，今汰其繁芜，录其清绮。《小住退园，下榻冬心精舍，略具泉石，花木敷荣，旅兴洒然可咏》云："旅怀厌喧嚣，宾馆稍离俗。空窗受雨声，凉飍上疏木。客携茶具来，汲泉漱甘馥。匡坐散余醒，清事亦云足。断云敛晚霁，林花媚幽独。空潭酿夕寒，冉冉生虚绿。脱巾闲小立，负手吟水竹。"又云："清宵耽苦吟，月上知深坐。人语始寂寥，深帘映茶火。泠泠丛筱响，阴阴蕉叶弹。雾气隔林飘，瞥见流萤堕。凉风起清吹，池荷披几朵。抚兹夕景佳，境静神亦妥。适意辄忘眠，遣兴恣慵惰。逍遥物外情，诗心比谏果。"又云："客舍敦古欢，挂眼绝尘务。逢迎江海英，登高俱能赋。矫矫姚秘书，（谓鹅雏）抗志在缙素。黄初旧典型，裁章见风度。日哺笔札闲，论文过从屡。叔季薄斯文，绝学久衰敦。嗟哉壶飧儒，俯出恶少胯。愿策轩辕车，载驰康庄路。一洗瓦釜鸣，元音振《韶薰》。此志勿浪传，投珠恐逢怒。"《秋日斋居，怀湖南钝安》云："空堂下明月，静夜有微霜。之子音书断，天涯道路长。偶然吟水竹，忽复忆潇湘。万里飘征雁，鸣琴思未央。"《遇仇氏赘园》云："位置三弓地，纡回耐客寻。苔阶闲鹤步，风柳散蝉吟。轩静花光入，潭空水气沈。主人高卧早，应惜把茅心。"《雨花台骋望》云："形璘当年百战曾，酒醒高唱一攀登。齐梁文物归西邸，淮泗风涛下秣陵。人去霸图空指顾，云开山势自崢嶸。华林旧苑都消歇，太傅遗墩也葛藤。"《秦淮画舫》云："酒醒今宵荡绮愁，据邀笛一句留。泠泠弦索潇潇雨，恰似吴娘水阁头。"其他，工雅则云："故将山南呼李广，小儿许下问杨修"、"家祭犹能遵汉腊，市谣已信死苍天"；丰缛则云："珠帘夜月调金缕，宝镜春云贴翠钿"、"天涯芳草裙腰绿，水上芙蓉镜面红"；恹恹则云："漠漠冷云依古木，摇摇秋思落银苕"、"薄病已怜杨柳倦，晓妆不妒海棠妍"；清新则云："风初劈柳寒犹在，水欲平桥雨乍收"、"过雪园林明夕照，入春帘幙放初晴"，皆见才调。

南汇召楼，奚氏旧家也。铁棠伯父子欣，工笔，兼擅丹青，与赵搗叔（之谦）、吴缶老（昌硕）交善。其弟雁宾，举於乡，负文望。家世孝悌敦朴，铁棠勤学养亲。其母湘波老人（润音）钱氏，年已七十九，主女受母教，皆能诗。顷以其母手编一家韵语见示。《春日》云："迟迟春日送和风，燕子呢喃翠幕中。昼静绿聪帘卷处，海棠低挂一枝红。"低挂二字，能传海棠之神。《秋日》云："题糕佳节满城风，适兴来游校ù中。菊傲新霜开更艳，淡黄浅碧更深红。"耕烟散人《东竺图》无此绚烂。《庚申旧作》云："三餐有愧安闲饭，一醉能消磊珂尘。"忧世伤时之语见於言外。

，盖老人尝捐金钏振水灾也。他如《钱武肃王祠》云："山外山庄湖外湖，大王名号任人呼。锦衣堂邃红尘隔，犹有丰碑任拓摹。"《题扇》云："忽忽秋风至，罗衫已觉寒。从今暂捐弃，莫作负恩看。"皆可入《名媛诗归》。铁棠《游莫愁湖》云："策蹇城西兴不孤，郁金堂畔旧庭芜。六朝风月摇青柳，十里荷蕖映碧湖。打桨人来寻艳迹，下棋客去吊残图。桑田几度成沧海，欲遣闲愁问酒墟。"《寿燕子叔祖》云："江边授策沧波远，海曲寻诗夕照斜。"皆洒脱不凡。

悼亡诗，不过追写燕婉之情，极於悲抑幽咽而止，能情文并茂固佳，否则宁朴毋华，过华则失其真也。元相悼亡，亦只二结语最凄楚。昔见黄莘田《香草斋集》有悼亡诗二十首甚佳，如云："马鞍山下奠壶浆，麦饭多应减旧香。为叩墓门申一恸，今年不是妇亲将。""凄凉旧事散如云，感逝伤离到十分。屈指连年知己尽，闺门何可再无君。"近吴江郭君南周（琮）出示悼亡旧作多首，录四首，云："廿二年来印素心，俭勤规我感良箴。欲将往事从头诉，语未终时泪满襟。""弱质心知蕙早摧，敛裳已自手亲裁。而今客裹仓皂甚，那有衣衫称体来。"（朱夫人歿於病院。）"荧荧只影客心惊，星夜遄归不计程。扶汝出门扶棹返，一回头已判幽明。""忆昔归宁作暂离，丁宁切莫误归期。当时小别犹难别，何况今朝永别时。"酸鼻语，与黄作同工。至联语之工者，丹徒吴眉老云："不过是贫贱夫妻，有子有孙，总算到头收晚福；际此饥寒年月，无斋无奠，可怜埋骨在他乡。"

"正喜清晨鹊噪声，西南又报失名城。老僧从此无闻见，不管门前雨与晴。"此名山先生《甲申鹊噪》诗也。是年八月，先生归道山，明年倭降不及见。先生与余往还诗札，此为最后。有《名山诗文集》九集。其平日钞奇残章零句，如"学弈未成抛子易，读书太广论人难"、"链句自能忘世虑，读书原为送天年"、"空将白日埋青简，难得黄金副赤心"、"莫嫌岁莫冰霜酷，从古春寒会杀人"，或皆集中无之。晚岁昵一女伶江兰，录为假女，有诗云："木兰荀灌本奇才，一夕趋庭绕膝来。如此年光如此酒，阿爷何事不心开。"

名山翁爱才如命，说士自甘。凡获一俊，必为之狂喜，驰书相告。如云："温州夏承焘，少年好学，最近《西湖》词有云：'湖山信美。莫告诉梅花，人间何世。'以为竟似宋人语。"又云："有许遂白石者，自京都来函。蒙赠诗，自云诗学山谷、后村，语气极老苍，而年只十七，殆今世之异才也。"又翁於投诗者，必欲详知其人履历，此与随园见陶篁村诗，至欲江湖沿路以访，同一用心。

邹子志孟《咏石崇》云："十斛明珠无限恨，误君还误坠楼人。"《谒岳王墓》云："黄龙未捣身先死，不恨金人恨铁人。"咏史诗须如此乃为名隽。《暮春晚眺》云："春欲归时客未归，子规声裏落花飞。柳塘烟水苍茫际，负手闲吟送夕晖。"《西湖》云："载酒听鹏过画桥，柳丝无力系轻桡。不知苏小家何在，闲弄东风十万条。"清扬宛妙，含毫邈然。律句清新者，如《金陵杂咏》云："六代有山皆壮丽，千秋无水不温柔。"《龙华春游》云："羲之便拟修佳楔，杜老还应赋《丽人》。"《偶兴》云

：“书因堆案多磨角，笔不眠易退尖。”余与志孟别已二十年。己丑、庚寅，余赴练溪，志孟辄具美饌相款，谦居弟子之列。为人沈静敦敏，年五十，向平之愿已了，真福人也。倭乱后，究心内典。练塘有净业社，君为护法。著有《峰泖山庄吟草》，余为之点定。

曹生树衣（修伦），朴诚坦直，诗亦清真静正。有《归迟书屋诗稿》四卷。录其佳句，五言云：“日斜村市散，风急客帆多”、“腊残初试暖，春到喜开晴”、“窗嵌残月小，帘卷晚风清”、“月明涵水净，灯炮结花妍”、“客陪归燕话，酒祓落花愁”、“菜圃余香湿，云峰落照明”；七言云：“吟成小律浑忘苦，沽得新醕便解忧”、“一年何月无明月，十日离家便忆家”、“鸟归浑似人投宿，犬吠方知客到门”、“三尺短篷渔唱晚，一钩凉月客游稀”、“漫奇人篱佳节到，有怀亲舍白云遮”。又《年假回里》云：“入门赢得双亲笑，远远闻声唤阿球。”《病中口占》云：“醒来翻觉身轻健，叉手闲看指甲长。”二诗尝自嫌其俗，欲削去。余曰：“此真情实境，的好诗也。”亟为拾存之。树衣留心故乡文献，辑有《练溪文拾》、《泖塔汇志》、《练溪祠庙》、《寺观》、《桥梁志》、《练溪兵事记》等书，其《练溪诗拾》已印行。余辑《青浦后续诗传》及杂著数十卷，皆君一手钞录。余戏之曰：“昔泛稚春不蓄门人，如足下者，我正恨蓄之不多也。”

余寓郭氏小灵芬馆，树衣辄来同宿，余必有诗。《庚寅春》云：“曹生朴勤士，所苦未尝辞。送酒一身雨，（君在大雨中，沽酒饷余。）钞书双鬓丝。老吟夸兴健，夜话爱眠迟。此会知非易，兵戈惜此时。”重九和其《对榻》韵云：“对榻情如昨，依於几砚闲。清谈寻苦茗，病骨写秋山。（君时方病胃，甚瘦。）梦醒孤蛩语，诗成一雁还。白头相与慰，欢意两无慳。”君志行高洁，聚徒为生。果老尝语余云：“优哉游哉，聊以卒岁，跛仙一人而已。”盖幸其不离世网也。跛仙，君自号。

自政体改革，社会趋重劳农，风气为之丕变。诗人亦往往喜为秧歌，写乡村现代生活，不嫌其俚，盖亦古《竹枝》之遗也。超伦云：“舍南舍北隔长川，树影离披日影圆。饭罢场头开晚会，秧歌最软算金娟。”“夜色沉沉四野虚，小彪警夜吠茅庐。前村篝火明还灭，明日侬家吃鳊鱼。”写鱼稻乡风景逼真。雪泥云：“黄梅雨过插新秧，少妇分工脚手忙。道是绿氍毹上舞，不知人在水中央。”“前园蔬果后园瓜，陇亩青苗屋角麻。不用丰收问那种，够他生产是农家。”“红颗番茄绿辣椒，露华香扑小团焦。摘来款客多余卖，清晓肩头一担挑。”东乡及泖之四郊多种地，盖农而兼圃，亦描写如画。又《夏令学习会听讲》云：“许我参加夏令班，白头听讲不偷闲。归来戏答孙儿问，乃祖今朝上学还。”末句令人绝倒。

桐乡吴镜芙（斯美），尝以探亲来青，袖诗枉顾，曰：“君非丙午震旦旧同学耶？”因道英、法、德穆护及同班生姓名。相与熟视，久之，皆恍如隔世，盖一别四十余年矣。镜芙言曾供职外交部甚久，一任苏门答腊领事。为人真诚通脱，喜饮酒。录其《耕牛叹》云：“六畜有专职，各自效其能。惟犬知守夜，惟鸡知司更。我牛不如

骏，笨拙只任耕。自我到农家，倏忽及壮龄。辛勤陇亩间，寒暑脚不停。竭我汗血力，佐助岁功成。但冀仓满粟，敢辞疮生腰。微劳异羊豕，所望免鼎烹。不谓时势变，贱犊贵甲兵。主人顾我厚，抚爱同孩婴。岂肯遽见弃，无奈急官征。孟秋七月初，新谷犹未登。诛求已到骨，身重物命轻。屠剥违夙愿，忍痛驱我行。行行辄反顾，恋恋有余情。似闻秉国者，志在苏疲氓。疲氓正饮泣，且听牟牟声。"颇近香山讽谕。《打包》云："足茧千山敢自憎，头颅如许百无能。打包明日知何处，惭愧人间粥饭僧。"行役之劳，概可想见。

章君赋浏句云："中原膏血资豺虎，太史文章走马牛。"盖军阀时作，危词苦语，足陨贾生之涕。徐君衡原句云："天历严寒才见霁，邦由多难转能兴。"在解放后作，处穷顺变，能舒杞人之忧。时代不同，观感随异，所谓"各言其志"耳。

●三编·卷三

武进黄仲则（景仁）诗，於汉魏六朝、唐太白、昌谷诸家颇致工力，乾嘉诸老毕秋帆、王兰泉等盛称之。集中如《涂山禹庙》、《平金川》、《饶歌》等作，尤为卖力。律句如“江城雁带边声苦，泽国秋蒸海气腥”、“花月即今犹似梦，江山从古不宜秋”、“江汉欲浮天地外，山川浑老战争余”，苍凉悲壮，何减《秋笳》。有《除夕》诗，落句云：“独立市桥人不识，一星如月看多时。”尤为时人脍炙。仲则壮游京师，中揽匡庐、彭蠡之胜，终游秦晋，没於蒲州，年未四十也。按黄氏《两当轩集》，最初为嘉庆初长宁赵氏刻，凡十四卷，而《蒲褐山房诗话》谓：“其生平所作，未有成编。余遣人赴蒲录其集以归，最为完善。世虽有爱而梓之者，然去取失宜。今详加抉择，存全本於书塾中，以待后之笃嗜者之论定”云云。道光初，海盐吴修又补刻为十六卷。咸丰、光绪时，其孙志述、孙妇吴氏又刻之，即今所行本也。然皆非王氏书塾旧本矣。集附诗余三卷，遣文一卷。而《武进县志》则载：“诗集二十卷、《竹眠词》四卷。”《湖海诗传》但云有《两当轩》、《蔗梢》诸集而已。

《灵芬馆集》六十五卷，吴江郭频伽《麀》著，初集四卷、二集十卷、三集四卷、四集十二卷、杂著二卷、续集九卷、词六卷、诗话十二卷、续六卷，皆嘉道间刊佳槧也。频伽诗，不拘流派，盖熔冶唐宋香山、诚斋诸家诗而自成一体，能曲折道人胸臆间意，使人动魄悦魂，咏叹之，不能自己。如《后移居》云：“移家在何许，乃在东门东。门前一溪水，中有塔影红。三间为草堂，两架为前荣。有楼峙堂后，侧塔影中。有屋倚堂左，水流与前通。屋傍何所有，有地可十弓。上墙缭绕之，计种韭与菘。家具已少见，盍簪亦足容。顾此岂夏屋，於我良已丰。祭灶烦灶妾，请邻来邻翁。一翁扶杖叹，敬告主人公。当时造此屋，曾见板筑功。其余不复论，请君视垣墉。成此不卅载，后嗣如飘蓬。君今入此屋，畜眼岂意逢。我间未及答，书以示阿桐。”其二云：“屋傍有古冢，其来不知年。面势若避之，想在置屋先，丛棘蔓其穴，跛群登其颠。有樵纵野火，无复挂纸钱。我来为太息，酌酒赠之言。人处争夺内，事事求安全。筑室虑不广，筑墙虑不坚。何曾计此日，寂寞委荒阡。想当处屋时，闻此定不然。今我见培塿，为戒俨目前。为君饬家人，缚竹为其藩。为君戒儿童，勿惊君长眠。匹如比邻住，岂论德与怨。呜呼冥漠君，听此雍门弹。”律句如“一梦只随春短短，十年何止瘦情倍”、“途穷牢落千秋想，气短低回一饭心”、“满眼青山秋上老，打头黄叶酒人来”、“狂来藉草当风坐，醉后摇船载月回”、“偶逢旧雨能无酒，暂放新晴定为花”、“酒人已散心知老，书贾犹来想未贫”、“小病似因连日醉，偶闲便觉别人忙”、“残叶无风犹恋树，活云如水欲浮山”、“溪涨碧於新柳眼，山墙短及野梅肩”、“春流得雨柔双橹，芳草如烟绿一城”、“雨活苔痕都似水，池摇树影不惊鱼”、“柳意困如人乍起，梅痕淡似酒全消”、“水际野梅如晋士，病中老衲作卢装”、“水喜摇人常不定，云难待族忽孤飞”、“楼心人去孤明月，宫体诗成送杏花”，诸如此类佳联，无虑百什。

《灵芬馆集》中，用典多有疏脱处。如《小游仙诗》云：“当时只有狂徐福，曾隔文

熄觀阿环。"余据李义山诗，乃东方朔非徐福，已於前《诗话》辩之。《燕巢》诗误"涎涎"为"涎涎"，（据《汉书梁皇后传》。）《渡曹娥江》诗误"娑娑"为神名，（据邯郸淳《曹娥碑》"娑娑乐神"）《题孙古芸上冢图》诗误司马德操为徐元直。（据《襄阳》记）然縹发之伤，少陵、东坡亦皆不免。

歙县黄宾虹翁，年近九十矣，寓居武林栖霞岭下，犹日孳孳於金石书画。昨岁游灵峰寺，归写梅竹二帧，分赠友人高葩叟、瞿蜕园二君，并题一诗云："泻玉水淙淙，云深矗一峰。寒梅齐吐馥，修竹自成丛。来问田家径，归鸣山寺钟。还期三友并，它日访长松。"宾翁久擅画名，海内外交相推重，致诗名为所掩。此诗古泽元音，置之唐贤集，可乱楮叶。

庚寅三月，海上诸知好邀为修楔之会。余自倭难后，不赴沪者十二年矣。遂下榻果园寓斋，果老极尽东道之谊。而陈君季鸣、王君蕙川、蔡君庸言、庸言弟其智、韵芝夫妇亦各治丰喂，相招文字之饮，以王君莺弦室一集为盛。是夕到者：吴眉孙（庠）、汪旭初（东）、瞿兑之（宣颖）、王欣夫（大隆）、蔡正华、戴果园及余，宾主八人。酒罢，以"对酒当歌，人生几何"拈韵赋诗。眉老云："闻声久相思，会面苦不易。跼然空谷音，忽报诗人至。仿佛平生欢，重逢急把臂。语笑犹未终，新篇案头置。"末云："春秋多佳日，雕龙纵谈艺。吴淞好烟波，扁舟可时系。乘兴访戴来，谓果园先期尺书递。叩门呼王郎，（谓蕙川）迎客同倒屣。"情真意厚。欣夫云："瓶翁青溪秀，幽居与时背。老学忘调饥，耽吟阐三昧。平生干首诗，珍若珠百琲。沧浪羚羊喻，后学得津逮。吁嗟诗教衰，鸡鸣风雨晦。一编力起废，征题到芜秽。世局日翻新，腐儒贫合耐。聚散类萍蓬，气自谐沆瀣。翁如千丈松，森森峙泰岱。我貌愧嫫母，丑陋难施黛。交勉葆天和，毋使焚其内。著书遣有涯，居贞定无悔。"溢美语，殊慚感。欣夫美容止，善谈论，篆隶甚工。正华云："纷纷雨后花，依依风前柳。引领春骤来，沈冥一时剖。嘉约承故人，欣然接杯酒。五味相间行，盘飧颇不苟。兴来各话旧，岁月一何久。聚散自有时，荣悴盖亦偶。快意贵当前，无令此生负。临觴不为乐，复待来兹否。君倘恕醉人，何辞尽十斗。"正华少治六朝诗，宜其清婉似小谢。兑之云："漫与疏诗律，神交即故人。饱阅书值贱，愁共酒杯亲。永忆灯前雨，萧然物外春。输君在乡县，犹得饱湖莼。"

旭老著有《寄庵随笔》，曾采及拙作。故调寄《采桑子》云："一编曾诵龟堂句，极诉飘零，健笔纵横，信有文章老更成。想思已是三年旧，此夕班荆，执手堪惊，饭颗山前太瘦生。"余亦赠诗云："驱使才华五十秋，眼看沧海独凭楼。山中归久春云懒，林下行多野鹤遒。幸识鲁山真不耻，欲从彭泽与俱游。稻粱岁熟非难饱，应笑饥鸿拙自谋。"旭老年已古稀，温和醇粹，而风骨卓立。其《随笔》载及绩溪汪诗圃（渊）《麝尘莲寸集》一书，中间有一段史实，以无底稿，询之已不能道其详，惟云汪辟疆、黄季刚（侃）盛誉此书。其序吴湖帆《联珠集》牵连及之。湖帆搜觅，久之，仅得其一，欲再觅以饷余。越二年，始由潘景郑徇湖帆之请割爱见贻，盖潘亦吴人也。则《随笔》之外，又添一重公案矣。诗圃为皖中宿儒，工倚声，有《瑶

天竺鹤词》、《诗圃吟稿》行世，而旭老不知也。余与诗圃在民国初屡有诗翰往还。旭老疑年不相及，余曰："度其时，诗圃当在七旬外矣。"其所印诗词稿，余皆有之，经乱散失。

眉老原籍泰县，注丹徒学籍，襟韵洒落，言谈衮衮，铺啜风流，有诸葛公真名士之风。尝见其《咏角黍》云："满筐菰叶翠离披，奈是江城黍熟时。抉取一双穷鬼目，蒲觞聊与荐钟馗。"分甘莫漫馋涎滴，得食须凭射手精。弓箭安排呼九子，眼中头角尽峥嵘。"不须肉割花猪美，最爱红嵌豆子圆。小令《唐多》翻一曲，十分甜味澈中边。"心空能解通身缚，年老无须益智功。甘白两般俱可爱，只怜圭角未磨磬。"极文章游戏能事。又有《咏时世妆沁园春》十阙，觉金诃鞋杯，无此香艳。词多，不能录。眉老任交通银行秘书二十年，自言早岁游冶平康，中年好蒲博，晚乃藉读书为遣。果老尝语余云："君知是翁矍铄乎？年已七十矣，其姬侍犹在产子也。"余惊诧曰："真天下之健者已。"相与咀嚼。

江阴适园陈氏，故乔木世家。吾友季鸣之祖式金，书画负盛名，世所称"寄舫先生"者也；父燮卿观察，光绪丙戌进士，以考取出洋游历人员，尝周流英、法两国及属邑阿尔吉烈、五印度等处，山水宗法鹿；叔森卿先生，幼有疾，而画宗大痴，均有名於时。观察有四子：长伯圭，亦能以画世其家；次仲翔、次叔莹，均精校书，仲翔且以政事显；四即季鸣，工诗善书，尤精小篆。民十后，避兵蛰居海上。家学渊源，娱情清秘，神思散朗，然有晋人风。余今春赴沪，屡过其文无馆小饮，或季鸣携尊过果园寓斋，颂酒弦诗，此欢不朽。有《喜瓶翁至》一律云："更已三年别，常怀一字师。甌尘原不恨，瓶粟亦何辞。有酒直须醉，看花当及时。愿君分寸晷，重为定吾诗。"清真如话，却韵味无穷。

适园在江阴城南隅，寄舫先生游憩之所筑也。擅池亭丘壑之胜，中弃宋元以来书画碑板珍品数百余种，又模古贤名迹颇多，题曰《藏真集》，刻同光间。为滨江名胜之一。时江南、北书画家，以先生精鉴藏，争来乞定真贋。凡经过目，钤有印章者，声价顿增，其名重如此。著有《适园自娱草》二卷，诗致疏逸，似元人。如云："僻处江头寂寞滨，敢将疏懒说天真。饶云馆裏闲无事，日与烟云作比邻。"《题画》云："不喜南宗嗜北宗，皴痕爱学剑抽锋。若教健笔从纤细，闷倒人间磊落胸。"其画诣可见。有《论画绝句》二十六首，录其八云："《龙眠》图画《孝经》真，艺苑流传拱斗辰。镌石鸿堂称二妙，神超诣绝照千春。（《龙眠》、《孝经图》为吾家第一品，近已刻石，识者宝之。）"小李将军《揭钵图》，贺家旧宝比明珠。毫芒尽相穷工巧，直溯源头赵宋模。（宋人《揭钵图》，精品也。近亦镌石。甫及竣事，而江阴陷，惜哉。）"细入毫芒意欲翻，日中谛审笔如烟。徐将工整消浮躁，入妙何妨色太妍。（院昼未藤锦雉。）"纷披老笔叱拨驹，魄力真与扛鼎俱。后贤莫识气粗率，墨痕谁得粗中腴。"（沈石田。）"剑气珠光化浑融，北宗真派与南同。周圭折角锋棱洗，省识文人笔札工。"（唐六如）。"仇君腕底飒生风，刻翠雕琼未是工。生趣豪端真力满，要非幸列四家中。"（仇实父）。"云鹏法古笔开张，

浴郁峰峦万象藏。墨簇点匀空撒豆，房山一办蒸心香。"（丁云鹏）。"王孙神化笔通灵，历乱纵横具典型。写尽沧桑无限恨，悲歌慷慨不堪听。"（石涛和尚）。中岁以疲於四方酬应，悬格，凡索画者，须酬以诗。故《自题易画轩》有句云："一幅丹青诗一首，无声端藉有声来。"编有《易画轩诗帙》，皆名公胜流题赠之作，艺林传为佳话。园甫成，洪杨事起。劫后归来，粗事修葺，而先生遽以艾年不禄。嗣君燮卿观察奉母园居时，始完成先志。顾鼎革后，兵祸频仍，又就颓废。季鸣云："自己西迄今四十余年，不胜沧桑之感焉。"

江阴陶社创始於祝丹卿（廷华）、谢冶庵（鼎熔）二先生，先后印有陶《社甲·乙·丙集》。冶庵与季鸣俱喜刊印其乡先生遗著，故复绘有《陶社校书图》。冶老为诗坛耆宿，尝见其《赠沈锡君》云："秋风几度梦蓉湖，太息田园日就芜。不识杜鹃三百本，春来犹忆主人无？"《东湖酒楼咏絮，赠友人别》云："杨花如雪满汀洲，袅袅随人上酒楼。只恐春深化萍去，旧愁消尽长新愁。"皆频伽《宋元人绝句选》中佳调也。其他律句可入主客图者，如"名酒也如良友淡，好花不减美人狂"、"倚门老姬花簪鬓，入市村农帕裹头"晋江词、"案头鸟糞供香火，屋角蛛丝买夕阳"（《东阳许白云先生祠》）、"才名噪似查查浦，遗爱深於柳柳州"（《文无馆齐头舰中冷遗墨。泫然感赋》）、"未到麦秋晨气燥，已逢槐夏午风凉"（《生日口占》）、"诗未呕心何待祭，琴虽焦尾沮成灰"、"参苓有效难医俗，文字无灵枉送穷"（《庚寅除夕》）。余夙闻冶老名，冶老亦为余作《青浦后续诗传·序》。去年之沪相左，未获把臂，造物真巧弄人哉！

歌谣《竹枝词》虽浅俚，须音节古、韵味长，幽情怨思，读之凄然，乃合体制。冶庵《浔阳谣》云："浔阳江水日夜流，浔阳女儿荡扁舟。东流江水不复返，昨夜红颜今白头。"唐侣笙（鸣凤）《宜黄竹枝词》云："生来家住山中山，门外长溪弯复弯。日夜溪声流不住，妾心流不到人间。一茧丝干缕麻一缕，茧丝那有麻丝齐。愿作呕营溪畔女，不为濯锦江边妻。"侣笙亦江阴人也。两作工力悉敌。侣笙又有《过大庾牡丹亭》云："岭南山态入冬醒，都向临川梦裹青。官阁梅花开似雪，我来独吊牡丹亭。""十九寓言玉茗堂，荒台云雨刺昙阳。后人漫筑离魂冢，惹说西川杜丽娘。"《南城望麻姑山》云："麻姑山上洞云深，望望仙踪不可寻。箨竹未容如兔脱，稚松已肯学龙吟。""直从天姥传衣钵，为笑彭郎作藁砧。最爱盘空双髻拥，何时重到一登临。"风韵皆佳。侣笙，民初官江西推事。

梅圣俞咏河豚云："春洲生荻芽，春岸飞杨花。河豚当此时，贵不数鱼暇。"欧公《诗话》云："河豚出於春暮，食絮而肥，南人多以荻芽为羹。"东坡亦云："蒹蒿满地芦芽短，正是河豚欲上时。"而《石林诗话》云："浙人食河豚，始於上元前。柳絮时，人已不食，谓之斑子。"说与欧公异，殆地气不同耶？我乡三四月间，名小河豚曰"斑鱼"，盖即"斑子"矣。"斑"读开口音。又乡人有"要吃河豚，先掘芦根"之谚。芦笋如竹，萌生於根。或曰其性凉清血，能解河豚毒，理或然欤？河豚产江阴最有名，语曰："河豚不药江阴人。"本东坡"雪白河豚不药人"诗句，谓其善烹责也。曩有江

阴人庄某寓余家，询之，曰："河豚之毒在血，须涤净。子亦不可食。责时忌尘，须谨盖。其法尽矣。"曾以煮熟者一尾见饷，鲜腴异常鳞。余咍二十字云："河豚产江阴，鲂鲤贱不如。脂肪膏吻颊，非鱼亦非猪。"啖者以为工。

菰羹、菰菜见於《张翰传》，诗人多用之，而不知菰米为何物。按《周礼·天官·膳夫》："食用六谷。"《注》："六谷，徐、黍、稷、粱、麦、粱，雕胡也。"《地官·舍人》："掌粟米之出入。"《注》"九谷六米。"《疏》："六米者，九谷之中，黍、稷、稻、粱、粱、大豆有米。麻与小豆、小麦无米。故云九谷六米。""同"菰"，是菰米列九谷之中，米为谷实之总称，非专指稻也。《唐本草图经》："菰又谓之茭白，其台中黑者谓之茭郁，至后结实乃雕胡米也。"近代植物学家亦谓菰生於陂泽，高五六尺，叶如蒲苇。春秋两季，中心生白台，状如藕而软，俗谓之"茭白"。秋间开花，成长穗，结实如米，谓之"菰米"，色白而滑腻，俭岁可为粮。杜诗："波飘菰米沈云黑。"盖太液池中多种之，正状其结实之多。影沈於水者黯淡如云，非谓米黑也。

"雨后山光映夕晖。楼台出树白云围。不知流水归何处。却有樵随流水归。"此雪泥题画诗也。雪泥谓不加思索，率尔而成。余谓雪泥诗往往失之太易，此则天机流畅，妙在率尔，所谓"文章本天成，妙手偶得之"。雪泥平生诗，当以此为第一。又曰："田家赛社验丰收，场角西风早报秋。霜叶满林翻鸭脚，黄泥护笋长猫头。"又曰："云山浮自叠。秋树净还明。何处无亭子，溪边缓步行。"皆宋元题画清品。

朱君馨谷（云樊），世居邑之观型堂。朱氏，清末以艺菊名。有园可六七亩，曰蔬园，板桥流水，结构疏野。馨谷年少朴诚，好篆刻，覃精六法，勤於缀辑，乡先生王步香、王韵存遣诗及步香《吴下谚联》等，皆为鸿贻印行。尝诵其尊甫引传《题方志壶自绘小象》一绝，石："先生结束似坡翁，巾履何求与俗同。风月襟怀消不得，等闲收拾画图中。"引传好学有文，早卒。

《长离阁集》，孙渊如妇王采薇字玉瑛著。诗只七十余首，句如"月满无人地，钟残有雁天"、"花逐调琴指，莺随入镜枝"、"碧苔琴影瘦，黄叶客衣单"、"帘斜生鸟影，屏小贴花魂"、"小树雨余蜂去静，乱花风压燕衔高"、"吹梦夜风先到树，弄愁寒雨不妨花"、"寒天细竹人孤倚，斜日空檐燕对飞"，皆幽寒孤洁，与其夫绝相似。故随园云："完山之鸟无异吭之鸣，云和之笙有双篴之奏。"然出之闺中人，古今亦罕。采薇年止二十四卒，盖鎚凿幽眇，宜其雹碎春红也。《吴会英才集》以孙氏夫妇诗殿之，兰泉先生以为非。近代崇明施淑仪女士选《清代闺秀诗存》，著论反之。其实时代不同，斯所见亦不同耳。

曩昔闺阁之有文者，署名多称"某某女史"；其后年老者，称"某某老人"。崇德老人，曾文正公季女也，名纪芬，适江苏巡抚衡阳聂仲芳（缉规），有自著年谱。民国中犹存，年踰九十矣。乾嘉时，甘茶老人鍾氏，名令嘉，字守箴，铅山蒋非磷室，心

余先生母也，著有《柴车倦游草》。洗蕉老人戴氏，同光时人，武进憚次山中丞室。尝见其有《落叶》七律四首，甚工，我邑汪秋轩先生有利作。

毕几庵（希卓）《芳菲室诗话》：“尝闻先伯祖乃秋公兆丰云：‘昔年於吾郡利津门外瓦窑地方开河，掘得古棺，前和刻有“大唐开元蒋夫人之墓”，无志铭可考，青浦许定生女史淑慧感而赋之，云：‘回首靡芜葬落花，伤心天宝旧繁华。曾无翠碣镌唐字，何处青溪问蒋家。胡蝶秋坟金谷聚，鸳鸯春陇玉钩斜。红肃吹冷胭脂劫，岂独隋宫有暮鸦。’”张氏《味莼菴笔记》载之，谓其“情文绝佳，有才如此，亦我邑闺秀之足纪者。余久离桑梓，固不知女史为何如人，而访之乡邦文士，知者亦。计其年代，去今不远，已有名氏翳如之慨，所为‘怅望千秋一洒泪’也”云云。

《笔记》又云：“癸卯在汴，吴江陆干甫年丈廷桢屡顾谈艺，偶言及其先世居青浦金泽镇，隐居不仕，日与镇中名流论诗斗酒。久之，至所佣成衣匠亦复能诗。其诗集，诸名流为刊行。丈尚记其一联云：‘自笑生平不安分，剪刀声裏尚裁诗。’颇工致可诵”云云。余颇疑之，盖金泽成衣匠有诗集，从未见先民纪载，惟《灵芬馆诗话》卷一云：“吾乡吴馄，号独游，业执针之事。操业往来余家，见架上诗册辄绌绎咿唔。今年回里，忽出数诗质余，不觉欢喜赞叹，以为古未尝有也。”又频伽集中与独游唱和颇多，当时独游名必盛。而陆氏先世与郭氏为同乡，所称成衣匠疑即吴馄也。云金泽者，殆传闻之误耳。又《诗话》载一缝人柏姓者能画。频伽云：“世人贵耳贱目，安知此中有人。”余因忆曩嘉善朱卣香（锡柜）语余，其乡有萝发匠某，能诗，有《咏鸦片》一联云：“黄金灰裹尽，白日梦中过。”余谓清季讼鸦片害者，上自朝廷章奏，下至里巷书报，莫不洋洋数千百言，然总不如此十字之惊惕。

郭君南周，频伽五世从孙也，商而儒行，笃实恳款。余与南周初以诗相投赠，遂成莫逆。嗣是，余游练溪，辄主其小灵芬馆，南周翦灯伴宿，弟昆不啻也。时值政体改革之初，食砚者生理几绝，南周月致釜钟为余举火，顾饮然无德色，此在古人已难，在斯世为尤难矣。有赠余诗曰：“平生思慕梦魂牵，名士何期对榻眠。知己交从花甲外，风光领龔尸尊前。精神金石同坚固，臭味芝兰有后先。（余生平知己者二人，一珠里吴元亨，乃总角交；一即瓶翁，可谓花甲文矣。）此后加餐各努力，犹堪谈笑遣华颠。”又和余“兄”字韵云：“年过六旬才把臂，生迟五月合呼兄。”盖君与余皆戊子生，惟君举以十月而余五月，君望而余朔也。语语从肺腑中出。余《庚寅赠别》云：“不爱壶觞尽意倾，暮春呼我练溪行。二年尔汝惟肝胆，四海交游几弟兄。剪烛话残前夜雨，倚槐听老故园莺。（君家后园有古槐榆各一，余与君徙倚其下。）新诗录别浑无那，愁杀盈盈水半程。”长乐画家黄葛农先生为绘《柳右听莺图》，取余诗意也。

嘉定章君赋浏（钦亮），居黄渡，著有《蓬累室诗存》。章君喜为雄伟之辞，然余爱其《腊八日斋头红梅盛开，同人有消寒之饮》，云：“纵酒漫云名士癖，坐花如接美人颜。”《盛子骏才索近作，书此奇之》云：“沧波长笛添诗兴，小阁临江聚故交

。"清丽闲妙，的为风人吐属。袁海叟（过黄渡）诗有"年年长笛送沧波"之句；又浦浪臣名鸥，住陶祁村，乾嘉时人，有临江小阁，皆本地风光也。见自注。

《吹万楼集》十八卷，金山高葩叟所著也。葩叟入南社最早，多与党人游，而终未隶党籍。性恬澹，好游风月，能谈山川，能说诗，清奇飘逸，兼而有之。如《焦山》云："佳处茅庵结，烟霞万古留。疏钟云外度，积翠雨初收。责茗江堪吸，擎杯玉不浮。坡仙去千载，怀想一登楼。"《五月八日清晨携幼孙游梵王渡兆丰公园》云："微风拂衣袂，初日照园林。为爱游人少，言穿茂树深。闲吟到池畔，高卧藉藤阴。怀古何年事，空王起梵音。"《经画眉三眺岭，溪山交映，阴翳可爱，为赋一诗》云："入林此处足幽栖，万壑丛篁俯碧溪。曲径阴深山木合，画眉岭上画眉啼。"《黄山归途》云："细雨淳安夜泊船，江光漠漠水如烟。霞源山瀑知何处，应在微茫百丈颠。""渐江水更接桐江，风利帆轻好送将。掠向鹧鸪滩外过，客星犹是作光芒。""江空夜冷月无光，乌石滩连七里拢。篷背雨声鸣不已，黎明知过钓台傍。"他如"一雨连朝天似醉，万花如海我能豪"（《十月初十叠菊为山，命酒有作》）、"歌讴激水生清响，草木逢秋有异香"（《鸚鵡湖夜泊》）、"天围万树圆如镜，云起诸峰翠上楼"（《惠山登云起楼》）、"频来但觉身如奇，小立焉知世已忘"（《独游兆丰公园》）、"花影上阶扶不起，万蛙鼓吹月明中"（《初夏月夜口占》），皆摘句图中佳句也。七古《题分湖旧隐图》、《忆霞曲》等篇，有梅村风味，篇长不录。葩叟世居张堰秦山，家饶於赀，其闲闲山庄有花木林泉之趣。尝搜集古今治《诗》家《诗》说至千余种之多，因自号葩叟。藏书三十万卷，倭难中略殆尽，因侨居沪滨。余与叟诗翰往还三十余年，顾至沪卒未一晤。君赠诗亦有"卅载神交怪识面"之句，乃知同此怅惘矣。

余与张君师白别二十年矣。民国初，师白供职太湖水利局，余赴苏时一晤之。后知其改入导淮委员会，倭难作，辗转川滇。师白风仪俊美，有冠玉之誉。胜利后入银行办事，归里相值，言论意气，一如曩时，然丰姿已少减，知其饱历风尘矣。生平於金石、书画、碑帖、古玩皆有夙嗜。近以其所著《指尺集》一册见示，书法娟妙如姬波，诗亦多可诵之作。《青青水中蒲三首效昌黎》云："青青水中蒲，下有一双鲤。剖腹空无书，吾心摧且毁。""青青水中蒲，长在水中央。可望不可即，惘然吾意伤。""青青水中蒲，取之以为楫。有楫而无舟，如何能谐合。"古调古心，得风人哀怨之旨。《拾石歌》云："拾石去河边，小雨湿襟背。石纹带水明，俯检心所爱。搜罗不厌多，一握又一袋。归来品甲乙，颇有得意态。或欠成绩佳，怏怏为不快。取盆供案头，朝朝与之对。眩暈还选新，拾取一而再。每天如程课，腰脚不言惫。米老无此狂，真欲屈膝拜。此风荆川长，执迷亦无害。消闲携侣偕，怡情兼习耐。不费一文钱，精神换宝贝。因之导淮人，群趋结成队。此中谁最优，黄叶温邵蔡。十周年纪念近，准备石子赛。（七月一日为导淮委员会成立十周纪年。）"押韵皆自然，"贝"韵为现代生存合理语，尤佳。《中秋杂感》云："吾家小院有高楼，月夜清谈景最幽。此日高楼谁作主，一年明月又当头。"盖伤故乡之沦於倭寇也，如三峡哀猿，闻者下泪。《和风墀》云："蜀道环山平地稀，麦蚊吸血绕飞。客居久断莼鲈味，

岂不怀乡倦欲归。"习见典，为本家人用便妙。自注："川中多黄桷树，生飞虫，体细几不能辨，刺肤作奇痛，甚至溃烂，名蚊丝蝇，又名麦蚊。"初，师白既悼亡，其中表亲郁芍村女士戏度其中指寸节修短卜休咎，遂谐琴瑟。惟婚前适遭寇乱，乃将悲欢离合之遇悉纪以诗，因以名集，亦韵事也。

王子蘖川，喜蓄书，其所居莺弦室翻帙插架，颇多佳槧。今夏游燕，以所著《骧首集》一卷奇示，雄奇之作颇似其师松岑。如《月夜越黄河铁桥》云："巨轮碾铁声仓琅，长虹弹压黄河黄。车箱高卧张眼望，明月照野生微凉。旅人夜话殊未央，追风北去偕云将。此景奇绝何可忘，令我肝胆森剑错。千军驰逐万马骧，号令传达严於霜。迅波劈箭势陆梁，愿东入海毋为斯民殃。远影推排，一瞥难禁，当空余历下，城头灯火光。"律句佳者，如《将作北游，赋诗留别送行诸君》云："小别仍烦诗鼓吹，长征端赖布行缠。"《车过徐州，揽形势甚壮》云："欲去钓鳌临大海，自来戏马出雄才。"《白河闲步》云："论史真堪生怒瘕，听潮还欲起哀音。"《游宁园》云："小艇画波分野色，迴廊接坐受花光。"有至居庸关句云："延昭画像高漫漶，胡元纪功碑尚存。"自注："石壁有末将杨五郎、六郎画像。"余按杨业六子：延朗、延浦、延训、延环、延贵、延彬。业战死，朝廷录其子供奉宫廷。朗为崇仪副使，守保州，御契丹有功；延朗后改名延昭，均见本传。则延昭明明为业长子，非六郎也。乃传中又云："延昭在边防二十年，契丹惮之，目为杨六郎。"同在一传，何以前后所载不同若此？蘖川云："玩文气，似前此曾有六郎其人，为契丹所敬惮，故以相拟，然乎？否耶？"王昶《台怀随笔》："乾隆五十七年三月十四日，圣驾过五郎村大营，完县所属村，以杨延昭名。杨氏父子兄弟宋初往来守戍於此，故以五郎、六郎名村寨者甚众"云云，亦不加深攷也。余谓小说家据奉传"六郎"一语，遂有"四郎"、"五郎"诸称，原无确证。保州，《宋史·地理志》属河北西路，本莫州；清苑县、完县旧属保定，皆在今河北地。顾亭林《昌平山水记》据宋王曾《行程录》，确信业战死古北口，以为《宋史》乃元脱脱所撰，去业已远，辟战死长城北口之非。古北口在密云县东，今亦属河北。大抵杨氏父子功在燕云，长城一带均震其威，刻石画像，在处有之。故张铸江先生《陇西朴札》亦云："萧关襟带，甘凉咽喉，灵武北岩壁上凿石为宠，供杨延昭像"云云。

《陇西朴札》云："甘肃滨河一带，上人以牛羊去毛及骨肉，全腔鼓之以气，藉以济渡、载运粮食，名曰'皮筏'。考渔洋山人《皇华纪闻》云：乐府有《浑脱舞》，《明皂杂录》、《历代名画记》皆云公孙大娘善舞西河剑器、浑脱，故杜诗云云。注家多不详浑脱之义。朱中丞《浣水续谈》云：唐长孙无忌以乌羊皮为浑脱毡帽，时号'趟公浑脱'。余于役三关，次太子滩。隔岸群夷来见，乱流而渡，见有骑一物浮水面者，问之，曰：浑脱也。盖取羊皮浑脱其骨肉而制之，故名。赵公之帽，义亦应尔。愚因忆南卓《羯鼓录》载杜鸿渐尝於嘉陵江楼月夜，以柘枝击羯鼓，见岸上群羊皆低昂盘旋，舞应节奏。则舞名浑脱，亦当以羊取义云云。又考山人《居易录》载李宗麓（开先）太仆《塞上曲》云：'黄河万里障边隅，黠虏年来谋计殊。不用轻帆与短棹，浑脱飞渡只须臾。'李自注：'脱音驼。'据此，皮筏即浑脱，'脱'作如字

读者，非但山人。但云用羊皮，不知又有用牛皮者。"西北边陲，历来纪载之书甚少，先生宦陇二十年，《朴札》一书於甘陇山川、谣俗、宗教、物产言之綦详，於国计民生颇有献替，惜无有力者为之印行。顷其文孙聊止卹以见示，并委为校仇，乃题一律於后，云："洮岷形胜接西遑，布菱恩威二十年。符竹郡分青海左，壶浆人谒白登前。车邻驷铁犹千载，方记图经此一编。我托先君亲炙后，遗书细与校乌焉。

（先生教授里中时，先子曾游其门。）"书中言"甘陇古为秦地，民俗强悍，乐於战斗"、"兰州，汉时为匈奴浑邪王地，后改张掖郡"、"酒泉宜酒，相传源通青海"云云。

。

●三编·卷四

钱湘灵间诗於顾仲恭，仲恭曰："诗从读经史中出者，上也；从读词赋中出者，次也；从读诗中出者，下矣。"余补充其说，曰：诗能引经不腐，引史有识，上也；从词赋中出，而无短钉掇拾之病，次也；从诗中出，而不登家数、不脱窠臼，下矣。

温庭筠《达摩支曲》恰如一篇《恨赋》。起首"捣麝成尘香不灭，拗莲作寸丝难绝"，盖翻义山"春蚕"、"蜡炬"一联意，白传所谓"此恨绵绵无尽期"也。温诗边幅少狭，芒眠绮密，而时失之纤，不如义山之高浑。

明初，高青邱与杨基、张羽、徐贲齐名，世以比唐初四杰。或遂以高诗为有明之冠，非确论也，然自是一代正宗。

青邱古诗，华不损枝，腴不伤骨，盖合汉魏、初、盛唐诗，去其腌而其醇，不为剑绝之言，而音自清越。王达《听雨楼记》谓其"语精而意圆，句稳而情畅"，斯得之矣。厥后，梅村颇沿其体，然多俗句、累句，殊不逮也。

明初，诗人林鸿、郑定、王褒等号为"闽中十子"，而鸿为之雄。其论诗，以为"汉魏骨力虽雄而菁华不足，齐梁以下但务春华，惟唐作者可谓大成"。闽人言诗者，率宗其说。鸿有《鸣盛集》。警句如"微雨古潭暝，礼星寒殿开"、"苦雾沈旗影，微霜涇鼓声"，时谓其"奇正而不诡於法"，实开闽派之先。有清之季，闽派诗又大盛，然一变而宗江西，号为"同光体"。林晚翠、黄驹庵为《宗派图》中嫡乳，惟海藏、石遣则犹存十子遣轨；墨巢宗黄，风格隽上；余知交中霜杰、慕伦亦能分坛树帜，所谓豪杰之士也。

长汀江翊云（庸），有《庚寅近诗》一小册。翻阅之，平和尔雅，无镂肾掐胃之苦，盖有林茂之趣味，闽诗人中自为风气者也。《后山生日，集硕果亭，分韵得办字》云："硕果亭峙吴淞滨，酿酒看花吾已惯。后山生日适见招，饼饵堆盘咄嗟办。公没年未及五十，偃蹇一官饱忧患。送行出境事亦微，觅句闭门语殊慢。宦途翻被孙刘扼，词笔能邀坡谷盼。吾诗粗率憚苦吟，可许心香分一办。"他如《赠冒鹤亭》云："买山资为推襟尽，充栋书难换酒尝。"《和程伯臧》云："笔底溪山浑老境，眼前风月是愁端。"自注："伯臧工山水。"感慨语亦以蕴藉出之。又有游佘山诗，多关涉乡邦纪载，录数首供他日方志之采。《泗泾舟中》云："埭口吹螺午放船，（七宝客航，昔日解缆以吹螺为号，名响螺船。）骄阳乍敛水含烟。秋来领略江南味，最是菱塘蟹断边。"《佘山半山楼》云："丛桂花时一款关，轩亭结构半峰间。江程卅里烟波路，此是淞滨最近山。"《望董香光餐霞馆》云："晓雨丝丝午乍晴，野花如雪蘸波明。松梢一角餐霞馆，似在香光画裹行。"《凤皇山下》云："移山不乏愚公辈，崖石新留斧凿痕。未卜他年重到日，九峰还有几峰存。"所著《佘山三日游记》谓"近沪无山，建筑石材皆取给於九峰。近日沪商更利用机械炸药，日夜开采，甚至一

山石已劈去遇半，恐不及百年，并此山而无之。九峰中独一余山赖异国宗教之力得以保存"云云。《青浦道中》云："苕港芦湾短棹过，鸥亮泛泛水微波。斜风细雨人归去，何日矶头着钓蓑。"

长乐黄翁藹农（葆戉），自署青山农，工金石书画。余以果园之介，尝一谒其寓庐，花磁茗碗，陈设精雅。蒙出近作见示，大抵谐婉骀宕，主於自然。尝曰："诗岂易为哉！我写吾诗，聊自怡悦耳。"有《己丑夏七十回忆诗》云："人老多咨嗟，我老独自喜。父兮生我时，雁行第十子。孙曾已满堂，晚出赘疣耳。少孤哀母劳，母恩报罔已。堕地到成丁，一生出九死。坎坷历艰危，贪谓无生理。不图过古稀，顽健轻步履。偶数旧世亲，存者更有几。每逢燕集中，居然尊我齿。当年父母心，始愿不及此。抱孙事等闲，世业任后起。独吟蔗香馆，泰来不忘否。往事耐寻思。来日谁能拟。镜中白须眉，留影示乡里。"诗殊烂漫，可拟随园《喜老篇》。藹翁少时秉母训，弃去场屋文，壮游名山，四十后奉母居海上，佣书粥画为养。显宦颇有招之者，谢不出。安吉吴昌硕、中山王病山、归安朱古微、侯官陈石遗诸名流咸与为交。顾诗不苟作，五十后始与李拔可、周梅泉诸公唱和，所作渐多，编存《蔗香馆集》、《复苏酬唱集》。性至孝，母年八十余没，犹孺慕不已，友朋酬酢，间或及之，未尝不泫然也。回忆诗和章颇多，余最爱果老云："七十青山农，稽古耽《滂喜》。置身斯邕间，碌碌藐余子。"单刀直入，翁之才艺，起便写尽。中云："幸坐春风中，僵柳为之起。"只十字，恬和温粹之态已是跃然。此写生手也。又云："人谓义献流，母宁曾闵拟。藹藹慈孝村，庶几小阙里。"以美其懿行作结，气足神完。慈孝村，翁所居也。

新建程窳堪先生学恂，字伯臧，年已望八，诗文书画无不工。民国初，奉省吏命视察江苏各县吏？台殿最，曾来我邑。近寓海上。读其《庚寅岁不尽二日，茅家酒店消寒第五集即事，得端字》云："海欲雪风号寒，挂钱拄杖行蹒跚。杜康为我祛忧端，市楼一角天地宽。有酒无肴君莫姗，鱼见越味初钉盘。更设饼夹与蒸馒，快啖已足惊穷酸。当筵酒政不置官，忘形谗浪无纠弹。同我气类臭如兰，有时清辩生微澜。文通健笔专诗坛，（江翌云）张口一吸西江乾。安道不出心自安，（戴果园）《石屏》一集何时刊。林家竹林乐且般，（林向欣及松峰）小阮后出神尤完。李侯丧匹居寡欢，（佩秋）无人笑说鲇上竿。长斋辛老还加餐，（心禅）昔与俱上惶恐滩。李髯垂老气桓桓，（蔬畦）猿臂事业余箭瘢。寄也不娶僧挂单，（宋小坡）广平铁石人所难。文无耽吟呕心肝，（陈季鸣）诗功九转终成丹。蛻园才过冬郎韩，（瞿兑之）胸中密记谳金銮。乍归陈子卸征鞍，（颂洛）袖中诗本珍琅玕。闽侯二陈吾服叹，（谓沧趣、石遗二老）赵亭秀句工雕剜。（陈慕伦）苏（渊雷）冒（叔予）年少丰羽翰，气力上欲云霄干。谈锋激射疑奔湍，坐中惜少河阳潘。（伯鹰）我方诸子岌与岷，思惭古井况已涸。酒户狭小热脱冠，把盏但敢壁上观。於菟绝绳去谁拦，吾属今合名虎残。日月易逝如走丸，火速写记庶可弹。酒家南董语非护，他年请作黄垆看。"篇中安插诸人，排募贴妥，真力弥满，万象在旁，知此老寝舱於诸名大家集者深矣。江西诗人，宋代最盛，庐陵、临川、豫章、吉水皆大家也。自吕

氏创《诗派图》，风气所播，驶鰻与少陵分坛坫。元代名家则有道园、曼硕。清则铅山蒋氏、南昌彭氏，高宗目为“江西二才子”。光宣间，散原老人又复遥承法嗣，祖陈祧黄，海内诗家尊为祭酒。然余谓古诗重在音节，故结调宜响。近人效江西诗者，好为生涩苦硬之句，实则双井诗如冰丝雪竹，格韵绝高，非哑调也。古诗音节如按曲然，虽一音之亢坠，不得差累黍。试读古人诗，无不谐律者。今人欠缺读功，故不领会耳。因心折程翁诗，遂不觉辞之赘如此。

瞿君兑之（宣颖），风流淹雅，倾倒一时，余每以不得尽读其诗为憾。庚寅春，海上莺弦室宴集时，袖出所著《补书堂诗稿》四厚册见示，并郑重委为去取。携归，乃畅读之。兑之骚国雄才，宗臣遣胄。湘绮、葵园二王氏为湘中耆宿，又皆师之。学有渊源，交多贤俊。其诗，五言古宗《选》；近体宗少陵、义山，沈雄博丽，一洗近代嚣凌纰鰻之习，信长沙嫡派也。录其《述祖》德，云：“明哲鉴今古，清浊定屈伸。神理蕴在己，宏济资及民。洋洋可乐饥，寂寂贵全真。遐览竦威凤，潜游隐文鳞。室有椎髻侣，阶长带草春。然重湖外，伫望鲸鳄驯。未免下士笑，惟圣为知津。悠悠二老风，旷世绝埃尘。（曾欠父手绘《自济图》，并为先曾大母绘《分灯课子图》。）”其二云：“伊昔阻昌期，昏雾荡寓县。潢池适反覆，海客多横煽。已嗟半壁沦，几睹尧城变。献赋厄修途，论兵骋英眇。既恋江湖楫，遂谢台省掾。贞明返楼居，江蓠遭眼患。横流寓孤愤，山樊假游衍。后来传经笈，亲见登云彦。贞元会有时，终然寰海晏。（先欠父官刑部主事，值咸丰庚申之变，悲愤失明，假归，遂不出。）”兑之作此诗，年十六也。《西直门外拜李文正公墓》云：“昔闻茶陵作相日，纪网清宁未全失。中钊伺主导佚游，威柄渐从幸门出。盈廷攘臂竞直声，不悦仁人胡甚疾。公之独留忧更深，大臣体国无名心。不嫌牛骥甘同皂，要使鹄臬怀好音。当时蚍蜉纷撼树，事过平心论相度。子规啼月潇湘深，风流文采还如故。城西赐第已丘墟，西涯髻鬟烟水余。梧门覃溪两好事，异代能寻庾信居。芳郊三月春如海，里人趋下荒祠拜。畏吾已不知名，惟有生金碑尚在。麓山南望足沾衣，辽鹤重来有是非。国花吹尽游人寂，空锁苔门黯夕晖。。按某氏《西湖尘谈》云：“西涯少入词林，在馆阁四十余年。正德中为相，有士人瞰亡，投一绝云：‘才名直与斗山齐，伴直中书日又西。回首湘江春草绿，鹧鸪啼罢子规啼。’盖讽其归也。”诗中正引此事。逊清光绪朝，西后庆邸专政，国是蜩螗。文慎公辛丑入直行在，寻扈从，还京三疏，特赦党魁，卒以忤旨放还。吴眉老谓拜茶陵墓乃有感於家国旧事而作，言在此，意在彼，当听其弦外之音。知言哉！《读王荆公传》云：“当时荐疏动公卿，谁料盈廷水火争。辽夏兵谋输敌国，李牛党论误书生。汉家制度元当改，南渡江山势早成。至竟孱王羞十世，裕陵泉下定吞声。”《读元遗山集》云：“入燕委曲宁初意，存赵艰难有至谋。”论史有识。兑之踪迹，北至幽燕，东抵遼沈，南浮百粤。集中七古，《谒明陵》发思古之幽情，《河梁行》摅怀旧之蓄念，皆长至二千余言，沫流手抵，不能尽钞也。余题其集云：“玉立高歌意态舒，清门文采接华裾。郝隆入幕通蛮语，庾信承家读赐书。剩借鹄夷终日饮，谁寻马粪旧时居。露盘滴尽铜仙泪，回首觚棱恨有余。”“圣手争推老拾遗，百年朝市一瓢诗。蛟螭蝼蚓才难尽，翡翠鲸鱼笔总宜。敬礼定文宁不忝，君苗焚砚已为迟。谈深不觉频前席，海噬莺花

烂漫时。"

上海女诗人周链霞，饮香名久矣。去岁莺弦室宴集，蕙川招之，有诺言矣，而终不见珠耕之莅。顷友人寄示其《题画梅》诗两绝，清词秀句，不近烟火，信乎毛嫱、西子，不必见面而始知其美也。"水墨疏香梦裹春，年年陋巷伴安贫。米盐不是琼瑶屑，莫怪梅花冷笑人。""瘦影横斜倚薄醺，晚来寒雨又纷纷。春愁如梦无寻处，只有香魂化冷云。"书法亦姿态横生。余效清初周荔生匿纤纤字簏中诗纸故事，珍而藏之。他日倘有好事如吴兰雪者为之记乎？

己丑、庚寅，余三游练溪。而庚寅之秋，则得果园为伴，新知旧好，鸡黍招要，备承款接，题襟录别，各有篇章，亦一时之盛也。兹录存如干首，以志鸿雪。曹子树衣《九月五日别瘦师》云："我师澹荡人，所游争倒屣。徘徊未浹旬，又动归心矣。青溪与练溪，仅隔衣带水。水程卅里遥，云树迷尺咫。吾侪生世间，行乐而已耳。乍聚便分襟，那不相思起。显晦随去来，得失无悲喜。惟有诗酒缘，乃能解我痞。"情真语挚。田君绍年云："排日清游扫客愁，踏歌忽漫送归舟。他时要访诗人宅，记取青溪古渡头。"庚寅，夏君希霖（同轨）《次志孟韵赠别》云："绿肥红瘦暮春时，一曲离歌动客思。愧我赠君无别物，压装几首送行诗。"二诗皆似《随园诗话》中风调。志孟《庚寅重九，喜果师瓶师至，即晚觴赋诗》后解云："诗宜入画留双绝，人怯登临感万方。白发门生能几个，一时谈笑满山庄。"《送瓶师返棹，仍叠前韵》后解云："近来坛坫无诸将，此别云天各一方。洄溯蒹葭秋水碧，扁舟应已过渔庄。"情文并茂。三泖渔庄，兰泉先生故居，在珠里。希霖《送果老归海上》云："别离逾十稔，小话沧桑。言践故人约，来寻旧草堂。诗吟秋月迥，酒拨瓮云香。后会期何日，毋忘曲水觴。"果园《次韵答树衣留别》结穴云："话长绛蜡短，曲罢青迥。陶径松犹存，吴江枫已冷。匆匆三日留，别思凄以耿。欲输冉子情，愧乏粟五秉。"果老与树衣先人东厂交好，练川为其旧游地，宜其遇故人子而感不绝怀也。是日，果老於南周席上唱昆曲，兴颇豪，故有"曲罢青"之句。《访平湖马剑虹不遇》云："款段优游乡里知，高风犹在系人思。如何松下空相访，惆怅支筇小立时。"其他佳联如姚润身云："解窥佳客堂前燕，偷试新声叶底莺。"顾守愚（伯坝）云："人间胜会留三日，天上文星聚一方。"果园云："家中活佛慈萱茂，案上神农本草香。"谓希霖以医养亲也。又树衣元唱有押"灾"字韵者，坐中步韵皆束手，惟南周"菊香诗有梦，秫熟酒无灾"十字最新异。果园云："应时逢蟹讯，传食比蝗灾。"纪眼前事，亦谐妙。余《次韵答志孟赠别，兼谢诸知好》云："升年前已识邹阳，投老埋名隐酒狂。（志孟别署醉侯。）秋末螯肥诗正健，霜前雁到梦初长。兴高地占登临胜，缘熟天留饮啄方。作谢诸君尽青眼，时清好与办渔庄。"宴集之地，多在郭氏小灵芬馆、夏氏一粟斋、邹氏峰泖山庄。同人汇其诗，成《泖滨小集》、《泖右听莺集》、《练溪就菊集》三帙。练塘在县之西，原为吴、江、青三县辖地，清末并隶青浦镇，东西长二里，水木清华，市廛殷盛，且历来罕经兵燹，故寺观桥梁犹存唐以来古迹。姚润身句云："练溪应是桃源地，赢得诗人结伴游。"

余作《诗话》，颇欲得人诋诃掎摭，以为知己。顷孙沧叟（懞）寄示其同年故人江西辛心禅（际周）一书，快如所愿。书云："承借《瓶粟斋诗话》，浏览一过，甄录谨严，评鹭公允，在近人诗话中，足称佳构。若更益以山川涉历之奇，助以豪俊交游之广，作者所诣当不止是。惟中有数条，为鄙意所未惬者，如《寓庸室诗钞》一则云云（续编卷一，）按小颇为诸暨余铁山（重耀）同年之祖，铁山官赣时，以原稿付影印，稿为上元梅伯言先生圈点加评，手迹宛然，与作者年代悬不相及。今云：'余与小颇未尝通尺素，不知何自来？'殆未捻小颇先生为何人耳。"又云："（续编卷五）'鹇雏极推尊宛陵，以为在欧梅苏黄之外，别标古淡。'梅'即宛陵，宜别举一家。又柯山诗语病云云（初编卷六），按'与君骑竹即同游'，盖以竹当马而骑之，名为骑马，实即骑竹，此与'卧牛衣'不同例。'又曰'云云二十五字可删。"辛老所举，益见余见闻之隘，为学之疏。惟欧梅乃欧苏之误，苏谓子美也。信笔书之，不自觉耳。辛老有《饭后独游襄阳小公园》云："愁多转觉了无愁，摩腹闲携一杖游。独坐藤阴贪纳爽，不知午日正当头。""小园胜处是藤廊，廊畔垂杨罩碧塘。静看喷泉飞细雨，冷然心境两清凉。""万紫千红照眼明，杂花绣径不知名。幽怀偏爱青林好，避影孤寻树底行。"贾岛云："独行潭底影，数息树边身。"诗境似之。

沧叟又录其旧好二人诗见示。一如皋潘安，年七十。《题南通费伯子以所藏乡先民书画赠南通师范学校》云："文物相承五百年，襟江带海话崇川。费君不惜倾囊买，师校从今借火传。尽发私藏归共赏，能教后学企前贤。三元桥畔重回首，宝气虹光欲烛天。"不加藻绩，老笔纷披。一崇明朱贯微（诵韩），年七十八，副举人，沧叟同年也。《春归》云："一年一度春归去，春去春来客感同。相送政逢社公雨，此行应趁石尤风。多情花鸟含愁裹，无际云山似梦中。更约玉壶明岁买，老夫能发醉颜红。"唐人云："年年岁岁花相似，岁岁年年人不同。"宋人云："老不甘心奈镜何。"皆作无可奈何语，读《春归》一结，觉此老豪怀不减。

扬州李审言先生详言："沈瘦东诗虽承吴下派，而读书尚有余於诗之外者，稍加酸辣味则不堕入甘酪，为北人所诮也。"此论登诸上海新闻报纸。当时朱邇庸先生见之，摘入其日记中，（戊辰四月十六日《逊庐日记》）因云："此种语气，自负博学，令人呕气。"余谓龠叟之不慊，避叟之不平，皆爱我者也。然解叟之论，几於严师矣。惜避叟不早言之，不然，困而学之二十年，或不致老死而卒堕於甘酪乎？

受，友之古文。《说文》二手相交，盖有互助之义。后世友道衰缓，急不可恃，於是贫士有将伯之呼。渊明《乞食》云："行行至斯里，叩门拙言辞。"一"拙"字，心中含有无限苦楚。继云："主人解我意，贻赠岂虚来。"此解意人殊难得，惜陶公不著其名。自鲁公作乞米之书，於是效者踵起，盖藉以遮啜嚅不前之态。至漫吟一诗而受意外之惠，则黄仲则都门秋思云："全家都在秋风裹，九月衣裳未剪裁。"毕尚书见之，立赠五百金，当时传为佳话。然黄诗多太寒乞，如云："吴市箫声燕市筑，一般凄断有谁怜。"洪北江《诗话》颇讥之。郭频伽《飞琼词》云："水心亭子压波平，昨夜朦胧月未明。约略垣娥微启事，有人下界太寒生。""不深庭院不多秋，宿粉

残妆一半留。聊与胆瓶添画本，秋葵花淡海棠愁。"考其时，为呈阮芸台相国而作，托词微婉，较黄诗蕴藉多矣。近人杨了公作《梅花百绝句》，中有一绝云："君是梅花吾是雪，寒光那得比春光。有时欲借春光暖，时与梅花略一商。"有知之者曰："为汪明甫作也。汪疏财仗义，了公时与通有无者。"可谓趣绝、韵绝。

居今日，与世俗谈礼法，无异语夏虫以冰然。张子仁友，孝谨驯良，恂恂雅饬，在乡里中，辈行虽晚而行谊绝高。仁友早年营生沪市，博菽水资奉母。母年今古稀矣。性好吟咏，因从果园老人游，颇得门径。倭乱时，稿皆散失。尝有句云："当餐每动思亲念，抚剑空怀报国心。"《四十述怀》云："白发无情慈母老，青闺有梦病妻牵。"家国之爱，惻惻动人。曾以《追哭家华周忌》诗二律见示："料峭春寒惨折兰，临风一恸泪丸澜。八年拊畜三生了。百里奔驰一面难。检篋空存旧摹字，迎门无复再牵栏。欲凭梦境追前绪，蜡炬成灰漏点残。""犹思堕地厥声遒，正是灵辰月一钩。鹤发提携情宛在，（儿四岁上学，祖母伴读甚久。）鳌头腾奋愿难酬。（儿颇勤举，尝言愿得首名。）"讳言往事防亲觉，怕睹遗容触我愁。此日哭儿行自哭，饥驱浪迹几时休。"痛入心脾，一读不堪再读矣。仁友每宁亲归，辄蒙载酒过存。今春，余赴其嘉招，赠以诗曰："负米不言悴，归来春梦重。家余亲健乐，酒为客贫供。阶蘚新滋雨，庭花老耐冬。（有枇杷一树，栽已久矣。）爱君地幽僻，复此一携筇。""君年今四十，所学自知归。崖蜜世多嗜，江瑶人或讥。仍应尊饭颗，略可法摩围。坐有汪居士，知音嗟已稀。"汪谓笈风也。

昆山徐燕谋（承谟），果老娇客也。为人辨，有口，诙谐滑稽，颇究心诗、古文辞。诗五言清真似陶，如《闲居写怀》云："我年未四十，白发已盈头。颇拙一生计，顾怀千岁忧。一生犹有极，千岁何时休。肮脏取违俗，与古仍不侔。孤悬悠悠闲，大海渺芥舟。嗟彼夸毗子，善柔逐波流。不义取富贵，冠带同沐猴。焉能如柳下，与偕而油油。宁失伯夷隘，道异绝相谋。幸早薄浮名。卷藏世不仇。幸有砚田耕，疏蛭何用愁。苦李不自苦，累累全道周。"君言此诗在倭寇陷沪后作。以明防前，以智虑后，陆平原云："志士多苦心。"信然夫。

常州邓春澍，以鬻画为生。近以境遇困苦，牢骚抑郁，托於阳狂，致以言获谴。腊月十九为东坡生日，吴樵翁有诗曰："臣朔侏儒各饱饥，少思多睡是吾师。天寒正好深藏手，（坡公句）更拟张颐说是非。""亦惧狂言醉后乖，半酣每自抑欢怀。纵然未解空杯趣，但摸棱亦大佳。"（坡诗："偶得酒中趣，空杯亦常持。"）"岁岁今朝不可忘，知公魂魄恋吾乡。明年纵健人应老，且学先生为口忙。"（坡诗："自笑生平为口忙。"又言："醉饱高眠真事业。"）诗盖有为而发。因忆金源诗人李汾句云："只因有口谈时事，几被无心触祸机。"余亦有句云："世事何非莫须有，古人可法磨兜坚。"

余先后姬侍四，而苏产者居其三。蒋氏素羽，小字凤秋，最明艳，解音律，能歌舞。嘉定陈巽倩太史楠和余《凤儿词》云："年十三余嫁沈郎，妾家小住馆娃乡。姑苏

台畔春蓝尾，曾记吹箫引凤皇。""风穷群女尽纤腰，最是含羞小凤娇。颀面有缘生百媚，人间咫尺即蓝桥。"（乙卯春邂逅於海上。）潘省安舍人集古人句，切其小字为联，作奩赠云："舞裙香暖泥金凤；悴袖凉生薛荔秋。"蒋氏相随八载，章台之柳，伤於攀折。四在芬沈氏，金山人也。归余时年才二十，今十八年矣。庚寅五月，登为继室，海上名流及故乡朋旧以诗词贺者不下二十余家，雅重者极於薰香摘艳，调谥者为之喷饭绝缨。然余爱蔡君庸言（其谨）一绝云："诗人心力半消磨，红袖青衫韵事多。佳话近传星替月，争如颀道有鸥波。"自注："钱塘诗人陈云伯嫡配龚夫人下世，姬人管筠字静初，持家有淑德，乃为之正位焉。云伯有《颀道堂诗文集》。管亦能诗，有《小鸥波馆诗钞》，人称'鸥波夫人'。"运用故实，自与泛泛者不同。按三国鍾会为其母传，称："夫人张氏，太传定陵成侯命妇也。"又曰："论者谓依《春秋》'成风定妣'之议，宜崇典礼，不得称妾名。"则斯礼由来已久，惟古者母以子贵，大抵死后追尊。至世俗，夫在为妾正位，谓之"扶正"，不知始於何时？

辛卯春，朱君积诚（声树）自沪携其先人游庸先生家驹遗稿枉顾，委为订定。朱氏故居奉贤泰日桥，自避叟高祖翼周公以下五世，以孝友著称。避叟父字史枚（士蟬），重游泮水；叔字甄卿（士璜），举咸丰己未；避叟举光绪己卯，重宴鹿鸣；兄云逵（家驛），孝廉方正，一门彬彬儒雅。叟工书，邃於经学，尊程朱，尝为肇文文游书院山长、卒卯江南乡试帘官、民国己未、庚申间江南通志局分纂。倭难作，避沪，终於寓次。余自丙辰以后，辱先生折辈行以文字相交几三十年，积函累寸。先生愤世嫉俗之概，一发於诗，今特录其清恬疏隽之什。《晚眺偶成》云："蔬圃斜阳立暮寒，梅花窈窕竹檀乐。波消冻后奩开镜，月近圆时影侧盘。草屈金勾青隐隐，菜敷玉甲碧团团。投林宿鸟如相就，信步追诗得静观。"《次韵桐城方佛生广文泽久金陵书馆见怀》云："一事凭君夸壮绝，长江万里抱书楼。酒怀相与清和浊，诗兴不穷春复秋。鸥鹭苍茫看泛泛，鱼龙起伏听悠悠。行年不觉七旬近，坐倚南窗熨古愁。"《即事》云："雨余日气逗花光，寒蝶翩翩到亦忙。生怪山妻风趣别，蜡梅刚趁鬓边香。"《咏燕》云："闭门不惯周旋熟，为汝开帘有送迎。"《白芍药》云："等闲不敢还呼婢，眼底分明是玉人。"《题袁、蒋、赵三家集》，袁云："元轻白俗肩随裹，宋矩唐规睥睨中。"《蒋》云："气概颇余燕赵烈，声情似进楚《骚》哀。"赵云："弄丸熟得宜僚意，飞剑灵通越女神。"皆搔著痒处。《调吹万留须》云："岂可诗人无绕涿，吟声起处捻茎时。头颅任秃三千丈，眉宇新添一倍姿。乍便游行来虱子，可嫌触拨到燕支。昂藏更作参军想，玉貌临风迟我思（往年见君照片。）"《咏向导社》云："鸳鸯到处团欢会，蚌蛤随时孕异胎。"尤令人忍俊不禁。句如"天涯风露催凉讯，屋角星河挂澹烟"、"灯边梦合情多少，月下吟迟影去来"、"脱絮尚防寒料峭，惜花无那落翩翩"、"砚冰渐释流香麝，窗纸轻敲活冻蝇"、"梦迟布被新翻絮，香过铜瓶乍插梅"、"庭阴剩绿横梢媚，缸水停淤澈底清"、"轻吹衣褶风频到，小坐轩楹月在前"、"塞上霜飞衰师白，营门日落大旗红"、"海上波涛连绝岛，天涯壁垒拥寒烟"、"千里江声杯底合，六朝山色杖头浓"、"大漠龙吟余慷慨，辽天鹤语觉荒寒"，清雄典则，兼有其才。稿自光绪乙酉迄壬午冬止，存诗一万三数千首，余为删存其十一。

粥叟字云逵，自号心岫词人，才情踈弛。少慕任侠，疏财好交。著有《天香移诗》二卷。《廉亭晚眺同昂若弟》："磧雨苦连朝，开晴喜薄暮。东皋携侣来，（时有张、卫二客）芳草随行步。林亭饶野景，笑语得天趣。客日盍归欤，柴门已微雾。"简静可乱《三昧集》。"芳草"五字，尤似六朝人语。《己酉冬月二十七日黄昏地震，众哗然，诗以释之》："至诚动则变，道本乎中庸。亦惟知者动，乐水理可通。地球一行星，日夜空气中。动静依轨序，大造运不穷。我国位亚东，万邦皆动容。旋转见大力，变化出宏功。一阳萌动时，春光何融融。语大莫能载，小言聊发蒙。"汉儒《春秋》灾异之说，一扫而空。《泖湖棹歌》："鲈鱼莼菜足江乡，菰米秋登作去声酒香。一夜醉眠舟不系，随风吹到秀州塘。""榜女盈盈十五年，轻摇柔橹晚风前。低头爱看湖心月，月与湖光一样圆。"律句"故人颜色秋同好，良夜壶觞月并来"、"春转鸟声如报我，寒消花态欲亲人"、"初夏风光宜白袷，故人书信抵黄金"，皆清妙。

律句有下三字各为一事物者，如东坡"三过门中老病死，一弹指顷去来今"，后人颇效之。有赠郑板桥者云："郑虔三绝诗书画，陶令一官归去来。"王仲则云："投诗美备色香味，去俗远於风马牛。"近人朱避庸云："傲寄一庐风雪月，寒消三友竹松梅。"谢冶庵云："一冬无赖风雨雪，三径未荒松竹梅。"我邑徐宗石先生昌谿句云："渺若浮云福祿寿，顺如流水子孙曾。"盖先生七十自寿作也。徐氏族多大年，先生寿至八十四。哲嗣慎侯孝廉公修寿七十五。余迁居西门，与先生居衡宇相对，故衡原（正权）次余"休"字韵赠云："宅近清溪朝便汲，楼听春雨夜迟休。芳邻永结从今始，若论亲情已百秋。"衡原，先生冢孙也，今亦六十四矣。诗朴诚如其人。

绍兴陈颂洛先生中岳，民国初历宰满城、肃宁、三河、玉田等县，有政声，颇宦囊如洗。在津门时，与张君聊止甚交好。所为诗，鲜明紧健，绝去凡俗。浙中自定盒、越鰻而后，斯为嗣音。《二月初九日华璧臣先生招饮城南，席散，同过杨子若书斋小坐》云："乱后重劳问起居，况当九死一生余。直从未坐狂塵酒，肯向侯门浪曳裾。文字只今真贾祸，湖山无处更逃虚。回车小憩差堪味，若薊新烹月亡初。"《除夕》云："到手年光擲已轻，男儿三十尚无成。昨宵一梦真愁绝，海水西流月倒行。""我诗不工常爱作，人唤诗人我亦应。此意微茫动歌泣，夜寒且自拥深灯。"《上海至宁波道中》云："一去飘然海上船，移情那复有成连。舵楼高处吾高卧，不管中流浪拍天。"五言佳者："依人同有喟，阅世总如伤"（《上海逢杜尔梅》）、"夜雪连归棹，春风绝敝庐"（《人日得赵幼梅诗却寄》）；七言："平生忧乐谁能会，我辈饥寒古所同"（《赠万公雨》）、"客程历久疏乡语，世味尝多澹宦情"（《叠前韵和友梅瑾存》）、"长年仕宦贫犹昔，衰世交游侠已稀"（《寝庵寄示近诗感赋奉答》）、"啼 催人花底老，疲驴驮我雨中寒"（《高碑店晓发》）、"荷叶落残中妇镜，芦花高过酒人船"（《中秋前五日严范孙丈招饮城南八里台》）、"一雨疑秋凉石径，万花堆水艳江园"（《管园赏荷得园字》）、"山尽浓皴添古色，水因急泻带商音"（《大水峪道中》）。著有《转蓬集》一卷，多在河北时作。集中咏史诗甚多，皆有见地，惜不能备录。近日息影沪滨，又得读其《题醉叶楼秋楔图》，云："老树不胜酒，满林红叶飞。谁同霞袂举，应是洛川妃。世有春非艳，诗随玉并霏。风流知好

在，回睇故依依。《已丑九日展庵吟集，酒后登豁蒙楼，分韵得海字》云："儒冠饿死殊不悔，我曹结习要非罪。今年可使无重九，主人既勇客岂怠。展匳百书散满架，如木轮囷石磊块。零篇掇拾亦奇宝，诗耆褊指靡一在。（辟疆出示所藏伎庵、散原、海藏、苍虬诸公诗翰。）极知身在道愈显，转叹才稀世又改。澹阳照产秋颇好，登高咫尺请自隗。南朝寺俯南朝水，国有兴亡视千载。江山意绪莽牵动，俊哲事功善期待。临分踟躅更何言，挥涕漫劳流入海。"此诗神味绝似坡翁。

鄞县周君岐隐，诗工於下字。其五言能状难写之景，龙游余越园深赏之。如"雨后天如豁，风中云有声"、"黄叶山中路，清秋雁背云"、"鸟语烟自流，叶落鱼争聚"、"地枯春不草，沙远海初桑"。《闻朱赞父自甬抵沪，驱车访之，话至宵深始别》云："欲慰难为语，三年事事乖。桑麻空世业，文物散高斋。万虑催华发，千辛铄老怀。不辞深坐久，门外即天涯。"语语肫挚。绝句亦清奇，如"风雨初阑朝旭弱，几分秋意著人寒"、"蓦觉树头秋意早，微风吹过小阑干"、"凉意乍生残暑退，片云擎雨过孤山"。君名利川，曾任浙江通志馆分纂。兼精医，遂以岐隐自号。著有《太白山房集》。

浙派诗如画，虽不如北地之雄峻，然往往争奇竞秀，读之爽神。如奉化孙翼父（诒）诗，胎息放翁，上窥陶杜，饶有清醇馨逸之致，殆考盘寤歌之硕人乎？《得漱琅诗函却寄》云："之子昔同学，他乡今别离。偶凭数行字，聊报寸心知。当路谁相念，吾侪岂入时。思君正愁绝，况读奇怀诗。"《秋怀》云："秋怀淡荡与云俱，庭院新飞一叶梧。闭户聊将书遣日，无田且免吏催租。贫犹作达耽诗句，壮不求官畏世途。饮水饭蔬吾亦足，儒生活计本区区。"《夏日书斋题壁》云："诗自推敲酒自倾，乡村事事足怡情。修篁弄影碧云湿，远岫罩烟残日明。地可钓游贫亦乐，门无车马梦还清。所思不见凉风起，坐倚帘拢待月生。"《别庐山》云："烟光如幕山俱暝，泉响惊雷壑自呼。此趣他年应不忘，满天风雨下匡庐。"《幽居》云："邻园草木长，我屋绿阴舒。一鸟窥檐立，主人方读书。"好句如"地涵江气花偏早，诗带离愁句不妍"、"重来巷陌更新户，相见风尘剩短衣"、"病身止酒犹多兴，余事为诗每见才"。著有《瓶梅斋诗录》四卷，方欲乞冒鹤亭先生点定授梓而遽病没，甫逾五十也，惜哉！

钱塘陈子彝，襟怀洒落，诗亦隽雅不群。如"艰难世路谁青眼，容易秋风到白头"、"四海风尘余涕泪，暮年身世入讴吟"、"老年书喜临端楷，小病诗还费苦吟"、"孤檠秋雨三更梦，寸草春晖万里心"，皆为时人传诵。有别业在西溪，日有竹居。作诗奇意云："有酒今朝醉与偕，自甘颓放畅情怀。何当归棹西溪去，活住青山死便埋。"间者轩渠。

姨表兄邹湛如，论诗至苛，己所为诗，亦绝不操觚率尔。惜其少习试律，命意遣辞，往往未尽超拔，然其佳者，故非凡手所能并也。如云："浊酒浇愁偏易醒，灯弄影不嫌痴"、"疏钟到枕起诗梦，残日堕帘生酒愁"、"树少虚廊延月早，雨余清簟觉秋深

"、"小书似乱山叠，老屋悔争仙骨跃"、"雨阑小院茶烟湿，花落虚酒梦轻"、"护花胜子勤寒暖，嗜酒如钱抢寡多"、"伎月催诗停枕上，乔风偷暖到尊前"。著有《璧庐吟稿》二卷，没后，嗣君循三委为删拾，因选存其百首归之。

《瓶粟齐诗话·初》、《续》两编，凡十六卷，印行於戈子之冬，《三编》四卷则於寅冬印之。凡不佞四十年占毕昕勤，与夫师友老辈、四方缟 投赠之好，大略尽其中矣。顾於是书则有不能已於言者，盖伤令弟子练溪曹子树衣，方为絮福，甫毕二卷，而街衣於是年除夕前速赴王楼，下观其成也。故不佞哭之，诗曰："匆匆残暇慨颓波，凄绝桓伊唱挽歌。蓄我好怀都扫地，哭君老泪忽倾河。苍茫孤馆秋云冷，生有'泖右秋云冷'句，人谓诗讖。寂寞遗篇落叶多。门外正留残雪影，撩人苦思奈桌何。"此编为诸友好督促，力为筹资印成，凡五越月而蔽事。此五越月中，死生契阔之怀、朋辈见爱之笃，庸詎无感乎？现有作潘，用缀数语於简末。辛卯皋月瓶翁识。

瓶粟斋诗话四编

●四编·上卷

浙中诗派，乾嘉时多取法樊榭，山水清音，斯为独绝。道咸以还，定盒、越鰻代兴，风气为之一变。定盒惊才绝艳，原本於经；越鰻佩实含华，泛滥於史。然二人负才而托则一也。近读越鰻《杏花春雨斋集》，不啻群玉之府、五部之市，爱而录如干联，以当鼎向。"萧萧落叶催人别，淡淡寒花写客愁"、"灯街画烛争花艳，坐簇春人比月圆"、"烛下绮摧都欲醉，夜深珠玉自生香"、"天涯诗思偏宜夜，故国秋声欲满山"、"近水花香通箸簞，钩帘山色趁罗衣"、"斜阳次第遥呈岭，暝色苍凉尽在花"、"小室瓮香干口酒，寒林灯影一房山"、"青山城郭寒烟路，绿树人家夕照村"、"穷途易切酬知感，老境难胜忆旧情"、"老去读书如过影，贫来节食是新方"、"诗心夜月比邻共，乡梦秋山隔水明"、"居邻京国无名寺，看遍南朝著色山"。越鰻尝语其师樊山云："今世作者虽多，要皆仅有其一体，倘杂试十题，鲜不噤口缩手者，至於精深华妙而为大家，则我与师不敢多让，"其言大而夸如此。越鰻，光绪庚辰进士，由广部郎中号取御史，年已六十外矣。余题其集云："一第春官白了头，征名散落满皇州，富贫常得朋簪乐，诗好多为佛寺游。脂盞粉额消磊落，花棚藤架愜句留。阿谁替觅麻姑爪，一读遣编便欲愁。"越鰻为徐亚陶绘《补石图》，并题有"我生己丑君丁丑"之句。"己丑"，道光九年也。越鰻堂诗刊至同治二年而止，是集皆其日记巾诗。日记为蔡鹤卿太史元培集费印行，日记中诗为常熟孙师郑太史雄钞录，印行者凡七百六十余首。

越鰻云："古人诗，凡连作绝句皆有一定章法，前后虚实不可移动，此法今人无知之者。"又云："近代选家於古人诗连数章者，往往摘录一二，致词旨断缺，固由不知此义，然问晚唐以后，作诗者亦本无章法也。"此论与余平日所论正同。越鰻有《八月朔日天宁寺饯邓献之还黄冈》以下五律四首，自谓"皆有文外独绝之致，近人鲜可语者"云云。此不过学老杜颓唐之作，所言未免欺人。惟咸同以降，诗格卑茶，故越鰻得目空一世耳。越鰻五言如"虚堂妆日暖，小室养花香"，固为人所不可及，然"阶间苔屐雨，门接药烟风"，堕入竟陵，此种句法正不可为训。

越鰻《书徐星伯唐登科记考》诗："日落泉镜集，鼎沈螭罔多。"或改"镜"作"獬"，非也。《史记·封禅书》："祠黄帝用一梟破镜。"《前汉·郊祀志·注》："《孟康》曰：梟，鸟名，食母。破镜，兽名，食父。"《晋书·苻登载记》："豺狼梟镜，举目而是。"亦作"镜"。

明末多诗妓，亦多诗僧，苍雪、雪嶠其尤著者。近读苍雪《南来堂集》，摘其名隽之句。"潮来天地润，浪打树根空"、"月随秋水上，人共夜潮归"、"花发千峰外，莺啼二月时"、"一蝉催晚照，片雨送秋寒"、"灯欲先人睡，寒愁入被生"、"呼灯照雨客仍至，叩产无声山更幽"、"诗在竹舆人背上，家浮烟艇钓丝间"、"千峰月色随人好，三月流光似水忙"、"春深湖水连天碧，人静寒山片石凉"、"薰风不见吹人醉，春雪无声到地消"，以上诸联，皆东坡所谓"无酸馅气"者。苍雪名读彻，南来其字也，滇南

呈贡赵氏子。童年剃染，未二十，东游吴越，参叩诸方，一时缙绅先生、灵人韵士如董香光、文湛持、王烟客、钱牧斋、吴梅村、徐波、陈继儒等，咸与结方外交。诗多家国沈痛之言，其《哭亲》云："思极还疑在，归迟已隔生。"《感怀》云："老来痛哭无多泪，春去伤怀只有眠。"顺治末，示寂支硎山中峰憺院。《吴县志》有传。雪嶠名圆性，号径山老人，见《明诗综》。

陈眉公谓其"诗如法酒，严劲有力。"梅村云："苍雪不惟其人僧中第一，诗亦第一。"牧斋至欲列於弟子。其见重如此。余谓其隽逸之句，实脱胎李供奉。其《采石矶谒太白祠》云："学士祠堂何处寻，峨眉亭上月沈沈。诗才鹏翼垂天大，酒量鲸鱼入海深。峭壁与人同卓立，流风到我又狂吟。可堪不尽宫袍色，化作秋山枫树林。""流风到我"，其办香可见。《送友》云："出门无一语，远送相牵衣。怅望秋色暮，寒空木叶飞。寺从京口别，帆自月中归。夜宿知何处，千峰隔翠微。"《戊寅除夕》云："到来三十夜，已是百年身。一日复一日，昔人非昔人。白云谷口寺，黄土梦中亲。拨尽寒炉火，山钟又报春。"皆有谪仙风味。集为苍雪法孙行敏、行坚所钞藏。康熙时，云间陆汾复搜辑之，有序详述其源委。此外，复有吴江顾茂伦（有孝）刊本、常熟瞿氏钞本。民国中，上海王培荪汇集各本，又搜遗访佚，加以考订。凡一题，其山川名迹、人物掌故与有关涉者，为之网罗群籍，详注题下。原集四卷，王氏乃辑《补编》四卷，又集原书序、跋及各家与苍雪酬唱之什为附编四卷。集中有《咏白燕诗》四律，乃用袁凯韵，王氏考证谓"次无锡高汇旃制中《感白燕巢於孝幕》诗韵而作"，非也。卷首附海宁陈乃乾《苍雪攷略》。庚辰，书成印行。二君可谓好古敏求者矣。培荪，南洋中学校长。

同光以还，通州诗人张季直（謇）、范肯堂（当世）、泰兴朱曼君（铭盘）名最著。三人皆游武昌张濂亭门。同时，其里人徐芙双先生联蓉骖靳其间。先生孙咏缙，表叙先德，访佚搜秘，不遗余力。近以其祖《分绿轩诗稿》见示，诗约一百三十余首，皆清新有雅致，与随园为近。《春日游鍾秀山》云："萧寺当年识志公，题诗可有碧纱笼。扁舟载得人三两，行入桃花双桨红。"《夏日书斋杂咏》云："小窗开处绝尘埃，半是蘼芜半是苔。分付园丁休扫去，留他分绿入帘来。""爽气朝来破睡乡，梦回一枕簟犹凉。绿荷深处风吹到，带得银塘晓露香。""兰池浴罢葛衣轻，手展琅函坐晚晴。一院斜阳蝉乱唱，分明和我读书声。""小窗"末二句为时传诵，因以"分绿轩"名其集。咏缙为补绘《分绿轩觅句图》，镇海金雪叟（贤窠）题句云："苔色照人衣，圣俞知静景。穆穆静照翁，幽趣独能领。（'无人知静景，苔色照人衣'，梅宛陵诗句也。陈鹤柴别署静照，盖取此。）徐公抱高怀，雅与梅陈并。小窗绝尘埃，清吟遣昼永。'分绿入帘来'，好句人争咏。摘隽名其轩，生意辟诗境。比之春在堂，龠叟语中肯。（李审言谓其诗近俞曲园。）传砚有文孙，新篇光颍颖。"余亦题其上，云："诗人爱长咏，百匝绕轩廊。秀句蘼芜绿，幽襟笛簟凉。天晴来海色，窗瘦纳山光。孝穆遣风在，斯图永不忘。"先生《悼亡》十六首，尤极哀感顽艳，如云："眉黛几时因我展，牙筹终日费卿谋"、"事到艰难方见汝，情关体贴更无人"、"今日新凉犹自健，前番好月竟难圆"，言情之妙，樊榭不能专美。徐氏名儒、名宦，

远有代序：大绅，明诸生，邃於《易》，著有《易旨玄珠》、《孝经正解》诸书；起霖，明副贡，清初积官至井陘道，先生八世、九世祖也；宗干，嘉庆庚辰进士，先生从曾祖，官至福建巡抚，谥"清惠"，著有《斯未信斋集》、《济州金石志》，传於世。先生登光绪己卯贤书，学行纯洁，乡谥"孝安"。其故宅曰虹玉楼，已三百年矣，擅园林之胜。二十年前，以族姓贫易主，咏徘徊然，形於书尺，乃绘《虹玉楼图》以存梗概云。

宗干字树人。其弟宗勉字仲修，又号霁吟，咸丰壬子进士，授安庆府知府，未之任卒。性孝友，供职禁近二十年，所交半天下。工分篆，精绘事。著有《霁吟漫稿》，里人王菽原方伯蕖已选入《崇川各家诗钞》。兹录其近体数首，《杨山》云："前宵冒雪出虞城，初到乡开第一程。茅屋低连寒水住，征鞍多带晓霜行。风来沛上声犹劲，山入江南势已平。古木荒郊谁是伴，数行归雁故人情。"《次韵答家兄书安平港口望海诗便面见寄》云："十月花开满竹城，（台地郡县多，以竹树为城。）受降城外似春程。门通鹿耳随潮渡，田绕鸡笼带雾耕。（台地四时有雾，以代灌溉，故田易熟。）晓日神山收蜃气，好风客路递鸿声。何时摇篷瀛台畔，同看芙蓉太液平。""茅屋""征鞍"、"鹿耳""鸡笼"二联，写风土如画。《题画》云："参差楼阁映苍松，风景依稀似岱。记得南天门下路，不闻人语但闻钟。"霁吟诗气息醇厚，步武唐贤，无近代噍杀粗厉之音。道咸之间，中原多故，兵革稍稍见矣，然闾阎风俗犹淳，文士语诗必宗李杜韩苏，言书必法颜柳欧褚，当时风尚如此，故所见艺苑流传，无一面规背矩者，於此可以觐世运之升降。

咏绯工书，得锺氏《玉真法帖》之妙，然不能诗。顷见其《题亡室钱今一女士凤遗影》一首，居然节短韵长，凄音满耳。殆以诗书气厚，平时耳濡目染，其吐属自与富儿大狙不同乎？人有贤父兄之乐如此，诗曰："乱离偕避地，久客恒思家。归耕有愿不可得，投老失偶尤可嗟。轻尘短梦廿余纪，愁对遗容长已矣。万古伤心此别离，凤兮凤兮安所归。"悼亡之作贵真，梅圣俞亦不过云："阅人间妇，无如美且贤。"真也。女士性柔善，工刺绣。倭难时，偕避乡村。既而咏绯业沪上，乃挈两儿渡江随之，小楼一角，安之若素，斯可谓"美且贤"矣。年四十八，以胃疾卒。咏绯笃於伉俪，为绘《忆凤楼图》，自为记，海上名流多为题咏。然长短句惟丹徒吴眉孙（庠）、万载辛心禅（际周）二阕最佳。眉孙调《高阳台》云："玉簫凉生，铜壶漏响，秋来百感无聊。圆月窥帘，可怜如此良宵。揉肠细谱《归云》曲，（唐写本《云谣集》有《凤归云》曲）更何心、吹入琼箫。枉思量、烂锦年华，翠暮红朝。闲开图史教儿读，正桐花满院，雏凤声娇。线帖镞箱，记同午夜灯挑。镜中小象眉双展，剩熏炉、沈水香烧。恨难平、呜咽心头，黄浦回潮。"心老调《凤皇台上忆吹箫》云："竹泪凝斑，梧云合碧，黄昏怯上空楼。怅巢痕依旧，凤去难留。浪拟它生重卜，早今生、缘分休休。伤心是，戏言身后，眼底都酬。楼头，记同誓祷，良夜指双星，密证绸缪。奈人间天上，一别悠悠。镜裏孤鸾慵舞，剩玲、吊影清秋。披图看，才勾旧愁，又惹新愁。"

如皋潘丹仲（恩元），光绪壬寅举人，游学束瀛，曾任金城银行秘书，廉介自守。有《答徐修五》诗云："人对南山麓，秋生北户风。得闲因病屡，相远喜诗同。夜雨连江润，孤城带甲雄。可怜无好菊，谁与起新丛。""拥户书连屋，观花杖引黎。避器憎俗客，随分得幽栖。眼见无余子，书来满旧题。拟将身比雁，不住向君啼。""得闲"、"拥户"二联，绝似半山。遗著有《继樵》、《白门》、《不残》、《朴斋》等集。

南通孙沧叟（懞）、如皋冒疚斋（广生）两先生，江左大耄也，尝先后为余序《瓶粟斋诗话》，余皆师事之，盖犹办香南丰之意。沧师诗略载前《诗话》。辛卯，疚师年七十九，余以诗奇之，云："多感逢人说项斯，《蒹葭》不尽溯洄思。青毡更乱寒无那，白首从游幸未迟。谬学真同扞烛叟，名师何取贩针儿。明年端正商颜寿，先叠吟笺和采芝。"先生尝以交子为饷，且语人云："瘦东贫，我辈不能坐视。"其视人之急，不啻如己。余感而谢以诗："漫言杖履侍东坡，先倒荷囊起卧蓐。知敝衣冠非我病，欲饶言说恐师诮。万千广厦心犹热，八百孤寒泪太多。如此遭逢贫亦得，一饥应不悔蹉跎。"先生诗词赡逸，著作夥颐，为海内厨顾领袖数十年。耄年所作，刊落肤荣，愈臻高淡。尝见其《题瞿蜕园补书堂诗录》云："寂寂与终古，翩翩孰抗行。骚魂追屈宋，宫体擅齐梁。石室书空补，沙堤宅已荒。无谁喻微旨，麟笔纪春王。"《寿陈季鸣六十》云："少时谁分老侵寻，一尔平头便到今。诗信坐穷缘宿好，酒能善忘日孤斟。佳儿传世识奇字，娇女审音知爨琴。寄语君山旧猿鹤，无田仍誓有归心。"

楼攻媿《雪巢诗》序："诗之众体，惟大篇为难。"余五十后便怕做古风诗，於七言古尤甚。以为古人月锻季鍊，又所谓"两句三年得，一吟双泪流"，皆指小诗而言；若古诗，须大气盘旋，魄力雄，精神王，又须意兴时地均佳，方能构成杰作。放翁诗至万首，然暮年亦但能为近体。近日以耄年而古风诗不见衰惫者，厥惟冒师疚斋。尝以《辛卯八月一日沪寓来罗浮胡蝶，越宿始去，赋长歌》见示，云："罗浮别我十五年，梦中明月梅花田。长风万里破海浪，吹此栩栩来我前。心知路远意良苦，初到蜷伏无盘旋。须臾喘定展双翅，其左微损右则全。腹中粒粒冻粟起，眉棱隐隐春山联。晕黄浅绛间黑白，似双绶带垂其肩。琼琚玉佩分上下，东西两贴金花钿。葛洪衣坏色未化，麻姑蓑绉痕犹仙。广为五寸修三寸，传闻大者车轮然。太常老仙久不见，衰年见此真奇缘。急呼道子（湖帆）同彩鸾（青霞），侔色揣称摊云笺。同来二客陈（季鸣）与郑（逸梅），欢喜赞叹忘蹄筌。楚雄秦雌定谁辨，《尔雅》未释《新语》传。记同汪叟斗小唱，（丙子春，在汪憬吾丈微尚斋曾见一蝶，各赋诗。）今夕拚损纸帐眠。诗成蝶去不复见，想归八百三十二峰颠。"又《后罗浮胡蝶歌》："罗浮凤子来我前，见者赞叹仙乎仙。共言休徵祝我寿，口虽唯唯心不然。兹山於我有夙缘，辈行永字今无先。（岁壬申，伍叔葆为酥醪观住持，浼余入道，号曰永思。今长春真人门下，永字在海南为最尊之辈行矣。）颇疑山灵使蝶至，新宫要我铭文镌。抱孙昨戏明监边，贴贴一跌同堕鸢。横腰苦甚靖节折，袒背痛若方平鞭。恍然失足遂千古，宁非羽化登於天。酥醪况复盛道侣，陈（子砺）张（汉三）

汪（憬吾）伍（叔葆）可拍肩。定持元碧（罗福ㄣ名）劝我醉，更呼妙舞来翩翩。锦围绣簇万花谷，乐不思蜀吾其禅。那知脱屣非易事，濒死不死神哀怜。故人诗画堆病榻，元婴无逸无加焉。蝶归若见葛稚川，我有一语烦蝶传。好官勾漏我不乞，愿就纸帐梅花眠。南屏太史过八十，道我问讯身安便。（永字辈道侣，粤中存者计惟南屏一人。）两作顾盼自雄，一鼓再鼓，不少衰竭，尤人所难。画师吴湖帆既为之图，复调屯田《玉胡蝶》词题之。先生继声云："绰约罗浮仙子，袜罗尘婉，裙带风褰。百岁翁翁，未见此多娟娟。赌新词、题残蜀茧，点妙笔、化作湘烟。惹肠牵。山楼梦觉，已十多年。（觉楼在浮山酥醪观，余前后两游，皆宿此。）相延。一杯浊酒，翁山《新语》，没个人笺。除却蒙庄，更无词赋六朝前。舞春驹、花间凌乱，倒么凤、叶底鲜妍。莫流连。东风正便，归去南天。 "又索余题，因亦和之，云："桑海几摩倦眼，小楼梦觉，一枕蘼蘼。应念词人，岑寂来伴幽居。乍消魂、衣兜廉幕，悄掠影、粉洗琴书。太飘如。罗浮缥缈，又觅归途。春驹。恋花何处，名园水绘，莽了寒芜。除却丹铅，若为仙迹与钩摹。损《滕王》、政须墨井，拟憚派、恰有清於。（武追吴青霞女士亦为之昼）寿髯苏。商量猫蝶，更写新图。 "

丁丑之春，松江诗友饮余於太白酒家。一西装者闯然入座，牛可三十余，群为余介，曰："此大漠诗人顾佛影也。"余闻佛影名久矣。时坐中皆谑浪哗笑，佛影独嘿然、退然。其诗曰《大漠诗人集》，郑海藏、朱温尹极称赏之。朱游叟题其集云："到我眼中惊绝色，出入意表写灵襟。似将玉露干锤饮，不着红尘半点侵。"可云倾倒备至。又和其《题画梅》云："梅花无俗韵，入画弥高静。不肯嫁逋仙，亭亭似佛影。"妙语双关，可见佛影风趣。又奇诗云："酒忆邨筒不用沽，美人家酿醉醍醐。定应下酒兼修脯，带得金华火腿无？"戏谓海门女弟子某饷以清酿也，诗亦趣绝。佛影，南汇人，居黑桥，时在商务印书馆任编辑。其集余未见之，当向知友索假。

近数十年，江浙间负师儒之望者，以余所知得二人：一阳湖钱振铎（名山），一镇海金士衍（允升）。钱先生光绪癸卯进士，官刑部主事；金先生以己卯举人官景实训导，皆於鼎革前弃官归里，杜门著书。生徒执经自远至者，各千百人，古之槐市、檀桥无此盛也。丙寅春，余访钱先生於常州之白家桥里第，先生提钱囊造酒炉与余饮，炉头饮者莫不避席。甲申，年七十卒。乡人思慕之，因改称白家桥为名山镇。所著《名山诗文十一集》，高可隐人。其诗略散见余《诗话》中。金先生为学不立汉宋门户，来学者各因其才智意志施之，一时无与抗行。国变事起，镇海人以县事推先生，先生匿走夫子庙庭，封识其祭器、乐器而归。乃改号磷叟，自为生圻，义宁陈三立为之志铭。辛未，年八十卒。著《澹静庐诗集》四卷，乱佚，仅得其《嵎县晓发》，云："落落晨星澹澹风，披衣人坐笋舆中。万岚翠征衫扑，千缕炊烟晓树笼。境僻有花尤雅艳，林深无雨亦溟蒙。行行行到最高处，一片朝霞映日红。"《过处州》云："括州山色郁苍苍，天造雄图镇一方。出峡水声逢石吼，横空山气扑衣凉。疏林绕郭秋容老，古堞依岩夕照黄。断碣残碑留意读，尚余秦汉好文章。"二诗苍深雅健，盖吉光之片羽、文豹之一斑矣。

磷叟嗣君雪塍（贤棠），一署仿髡，晚号雪叟，亦工诗，有《玄芽室稿》。诗宗北宋，妙悟如东坡，高朗似简斋，而无圣俞、后山之蹇吃。余於近人诗，往往厌苦其甜熟庸腐，罕能卒卷。读雪叟诗，无！竹风兰雪，洒然而来也。有《山居杂诗》六十首，为录其尤隽者。"月暗夜弥静，山亦蒙头卧。浓雾若披絮，风来软难破。浮光动微白，错讶浪花簸。一望尽迷蒙，老櫺兀如坐。山窗孤灯明，独照人一个。此时万籁寂，微闻霜叶堕。斗室足回旋，未觉乾坤大。夜气养吾心，善存幸毋挫。""明月不待邀，团团出东岭。慰我寂寞怀，照此婆娑影。屋矮人自高，泉喧夜逾静。凉风微袭襟，秋意我先领。忽闻长笛声，嘹晓亦清迥。不知吹者谁，赏之以苦茗。旷然如出尘，愁散俄顷。此景不可图，吟来味弥永。""静心领清妙，微风送树香。山地藏热，秋深叶不黄。斜阳穿林隙，照地人影长。举目偶高瞩，一鸟空中翔。炊烟八九起，家家为食忙。牧笛有和声，牯背信乐乡。立久口微乾，敲火理茶铛。解渴亦酿诗，抱膝倚吟。""西风起嫩寒，吹我门前树。疏枝脱黄叶，飘若胡蝶舞。幽人倚树根，夷犹正觅句。坠叶飞半空，诗心与之遇。随风共回旋，灵机如有悟。一瞥即过去，妙景苦难驻。忽闻邻钟声，为我开诗路。徐步宕微吟，野云逐芒屨。""雨余初放晴，远山笼薄雾。明妆被轻縠，眉黛更媚妩。小鸟当娇喉，蛩逗音吐。对我似有情，惜不解其语。料是索我诗，窗前久凝伫。诗思满秋空，笔底无一句。如抚无弦琴，玄妙静中悟。山亦会此意，悠然若笑许。""弱岁抱秋心，奉手多耆老。皤皤黄发问，羸此一年少。呼我为小友，对之若师保。磨之以道义，泽之以文藻。忽忽逾三纪，流光瞥飞鸟。先逝已拱木，后雕亦宿草。徒留不肖身，寤寐思窈窕。未忘平生言，讎敢丧吾宝。""十年读某谱，食古苦难化。袖手看人弈，一著未敢下。谁知投逾劣，百输不肯罢。坐令对局者，无敌妄称霸。旁观虽高识，冷眼觑成败。何必多是非，良筹岂轻借。小道且如此，行藏谨用舍。倘知落子难，推枰寓长谢。""秋宵长耿耿，一灯静相照。枕角集万愁，惟有诗可扫。拈韵自吟哦，清思发窈窕。琐碎都入篇，聊以抒羁抱。大事何敢言，不贤识其小。吟专百虑蠲，外物安能扰。有此片刻娱，得适似非少。蘧蘧徐入梦，觉来天已晓。""山居！城市，一走使数里。出亦何所诣，他乡少知己。来此忽经年，寒暑未离此。佐餐南畦蔬，煎茶西涧水。风来草树香，云起峦美。杜门谢俗尘，焚香绎玄理。守默亦守雌，更不烦口齿。俯仰自悠然，何必桃源裹。"诸诗皆避寇留渝，抒怀遣兴之作，其胸襟澹荡可想。余间论其诗，以为有时说得太尽，蹈议论伤格之病。雪叟颇膛余言。佳句如"客地养生惟健饭，危时守道胜坚城"、"吟诗妄觑千秋席，择友真如万选钱"、"孤筇自倚堂堂地，高咏能游浩浩天"、"难消白日惟寻句，恐误苍生不著书"。

常熟杨无恙，有《黄山杂诗》二十九首。其诗峭刻瑰伟，於谢客永嘉、杜陵秦州诗外又别辟一畦径，盖近於东野者。兹录十余首，石："歙黄三百里，停轮汤溪市。峰是云门峰，水是丰乐水。生计捉白云，开门饭云子。买云赠远人，开盒云未死。""黄山以画拟，刻画类北宗。天都独浑古，钩勒避浮松。壁穿漏高泉，石裂囚矮松。峰界各不犯，峰路各不通。若问桂林山，！曲而同工。（同游孙良翰久游粤西，谓黄山不减阳朔。）"黄山开画宗，皖派守刻苦。硬钩笔不衬，或间大劈斧。尺木与瞿山，削中规矩。渐江与石涛，法亦於焉取。我来参画禅，亦颇坚门户。（予向爱

新安派山水。)造化真本师，何必倪黄谱。""黟山卅六峰，大块结精英。胚胎鸿蒙前，轩皇加令名。无峰不骨立，无树不侧生。石不合事理，树不近人情。历数寰宇中，黄华差足评。(明朱白民有《黄华合评》。)"凿山开道路，一线鳌口通。(一线天、鳌鱼险仅通人。)设要当万夫，丸泥可以封。鳌背坐四顾，剑错森尖峰。山气服心兵，杳冥道所宗。蓄意养谷神，先拜丹坛松。""泰山严道貌，相形落凡庸。北黟创奇格，与世罕雷同。此山擅三绝，厥维松云峰。峰色太古火，石缝千年松。云来不得行，出首青芙蓉。""峰头快秋晴，下方若阴晦。云分两世界，上下颇隔碍。银涛无边际，日华耀云背。潏潜一万里，舒卷发光彩。云收海枯涸，云合山填海。但得葬云壑，扬州定后悔。""我登始信，始信黄山奇。仙桥不容发，迳度毋复疑。峰头拂石坐，千仞振我衣。搏扶发遐想，曳裾非所宜。""惴惴阎王壁，行李艰一价。挟翼百步梯，一丝蜘蛛挂。侧足蚕丛入，抬头井陉隘。奇文向天吐，笔讨生花债。(始信峰下有梦笔生花峰。)习劳蜡阮屐，病逸争切械。肺翼勤翕张，庶几已痼瘵。""夜宿白龙潭，天愁崩巨雷。行声万军马，出山争奔胚。积潭润鳞甲，建瓴难倒回。潭乾龙甲痒，一怒干山陨。""黄山多名松，落落亦可数。天矫尊扰龙，魁伟推黑虎。百年尚幼稚，千载未觉古。天质幸自保，徂徠不同谱。""峭壁落松子，千子成一松。云盖荫亢阳，不然死霜冬。三日或不雨，上帝斩黑龙。(壁多枯松)踏天奉龙子，未甘离故峰。母藉山下泥，凡木同培壅。(黄山松移根，百无一活。)"山外方夹衣，草露未零溥。山中变节序，步步入高寒。野鸟听水风，节音称乐官。迎送慰苦吟，丛灌翳羽翰。行乐劝来客，毋为雕肺肝。"

衡山李佩秋诗，已见前(诗话)。其姬人邬梦兰，奉化人，能诗。庚寅，以避寇歿於海上，葬沪西吴家行湖南公墓，其地旧隶青浦。佩秋为绘《虹桥断梦图》，亦他年方志中一段史话也。题咏者颇多，而其乡人廖药庵(绍基)一律最为凄艳："江南有客感飘蓬，惆怅清宵总帐空。锦瑟惊弦凄夜月，玉箫旧约付秋风。搔来白发愁应绝，写尽乌丝恨未穷。太息虹桥一杯土，芳兰从此闷幽宫。"药庵，逊清上海参戎廖楚材之孙，毕业约翰大学，工医。

自散原老人提倡江西诗派，海内宗之，而临川李梅庵(瑞清)独尚唐音。国亡后，梅庵遁迹黄冠，以卖文粥书自给，自号清道人。文章气节，当世高之。曾见衡山聂约庵徵君其昌《送李道人归豫章》云："黄冠一去石城空，北望觚棱恨未穷。公谕自昭青史上，壮怀消尽素书中。龙蛇奇字辉江表，桃李新阴遍海东。且喜故园松菊在，归帆好趁马当风。"五十六字足概道人身世，诗亦雅近杜陵，不作儒响。约庵字隼威，浙抚聂仲芳(缉规)子，诸生，早负诗名。其《赠南通孙沧叟》云："朵殿曾同策万言，海东携手更重论。艰贞有待明夷访，雅颂犹闻正始存。鹤寿千年松柏健，龙文百斛鼎彝尊。天留人瑞灵光在，好把遗山野史温。"沧叟和云："有千万语转无言，春梦痕消可更论。浊世何尝干劫脱，晨星细数几人存。只求短景身心泰，漫说空山道义尊。我辈能逢是缘法，何时相对一炉温。"盖约庵与沧叟光绪癸卯同举经济特科也。二诗如帝车斗杓，芒寒色正。身世之感，可於言外得之。

明靖万间，吴中袁氏有"六俊"之誉，与"三张"、"四皇甫"同以文学见称。汪尧有《六俊公传》。袁君安圃（樊），其后人也。才华英迈，年逾冠，以"芳草江南北，浮云客去来"十字见赏南通张啬庵先生，授以诗法，居弟子之列，因名其稿曰《芳草集》。顷辱邮以见示其诗，所诣绝高，大抵侧想冥搜，龘龘东野而参以姚贾，如云："洁身贱尺璧，唾面宽寸襟"、"辞仄语弃穷，愁充心源蔽"、"吟肩鹭鸶耸，冰眼鸛鹤睨"、"无花蠲结习，有酒贯清痴"、"雨脚穿瓦挟奔霆，漏痕盘蚓走坏壁"、"黑压佛头失青嶂，白翻莲背撕红衣"、"搔头脱疏秋叶，侧耳崩涛压水云"、"霜气谁禁花绕砌，天河渐下月当楼"。然亦有温润缜密，可置《叩弹集》者。《舟行晓入扬子江》："晨熹谖荡开，吟思系高桅。芳草江南北，浮云客去来。天张帆的的，沙拥浪皑皑。铁笛惊龙起，轰然水底雷。"《送王丈一亭夜渡宿芦泾港》："沧波天外暮云飞，木叶飘飘欲上衣。秋思百骸生旷廓，画簾一指阐精微。雁灯伴影黄花瘦，驿馆加餐白菜肥。问夜何其潮打枕，江南有客待船归。"古风亦饶格韵。《薄暮江上行》："莺飞直与吴天长，莺啼欲回游子肠。寻春江上往复返，驱车馭气不用缰。麦田雨多得晴喜，柳岸风疾飘絮狂。半天烧霞鱼尾赤，一团落日鸡子黄。日落未尽月已上，崦嵫光气连扶桑。纪月以望岁所本，历无新旧天有常。沧江一道二千里，上送日月随奔忙。朱颜绿鬓自爱惜，紫燕黄鹏犹护将。俯仰万物尽年少，眼中江北江南乡。""纪月"十四字足以息历家阴阳历哄辩之口。《吴船》云："吴船劈浪飙轮鼓，鱼龙潜没江豚舞。舵师言已过狼山，回眸鲸海吞还吐。落霞倒景浪驾天，十万飞光炫铜弩。畸愁有如江水东，我自西行指荆楚。"一起殊得势。《题吴湖帆万临大涤子烂石堆云图卷》："乱壑堆云石气蛮，行空天马匹荆关。淋漓大笔愁真宰，蓦见清湘躡邈山。""又有《舟行芦泾港即登狼山》一联云："榴红祓帽连花叶，天碧簪帆数往还。""祓帽"、"簪帆"甚新奇，实即言"拂冠"、"挂帆"而已耳，而下字颇呕心。又"归牧馭秋色"五字亦警。尝云："未容沆瀣为同气，可识薰犹只一香。"其不屑蹈袭如此。袁氏之先，有志山先生者，乃"六俊"之一，有手书诗稿一册，清初王西庄、钱竹汀皆有题跋，君为印行。君又为冯超然画弟子，得其神似。尝与邑人盛祖江妻孙琼华同门，孙氏《遗画集》中有《芸窗怀旧录》，即安圃所作也。

律诗隶事、结调以坚切响亮为主。昆山杨岱登（字高）云："蜀臣犹梦扶刘禅，汉使无才折赵佗。"谓北方清之遣老谋拥宣统，南方陈济棠等据粤，谈判决裂，而将用兵也；又云："马 私第多金窟，党尉家姬尽玉尊。"讥国民党诸要人也，皆典雅。岱登一字少芝，诸生，谦和温厚，与邑中叶氏有姻连，寓居甚久。视甚短，非人扶掖，几不能举步。

南通袁则先（承曾），年逾古稀矣。顷承以诗邮示，余最爱其（壬午挽泰县韩师紫石《国钧》）云："一别五年久，相悲各梦中。曾言诗境苦，（去岁赐书云云）深得我心同。短鬓新霜白，长天火火红。凄然隔江望，无复坐春风。"紫石晚号止叟，既谢事，专修香光之业。倭乱时伪府屡迫出山，不就。"短鬓"十字写暮年遭难，情况精警动人，而师友之谊溢於楮墨间，尤为真挚。

叔季之世，文士往往结社，以文章气节相砥砺，如宋元间之汐社、月泉社；明季江南北有羽朋社、匡社、南社，浙有闻社、读书社，江西有则社，而吴中几、复两社为最著；民国壬癸之际，海上有超社、希社、淞社，厥后，常州之苔岑、海虞之虞社继之，而沪之鸣社为最盛，历年亦最久。鸣社最初名求声，始於丙辰，主社事者郁餐霞、蚩迂父子及严君载如也。每假酒楼举行社集，四方胜士如云。余已巳客沪，遇饮宴辄携凤儿俱往。乙亥九月，社中假龙门精舍故址举行话旧集，蒙折简相招，余奇诗云："廿年文社此街杯，稠叠邮筒往复回。画卷且留尘外赏，黄花犹向余开。苍茫海国题襟集，萧瑟江关作赋才。自笑贫来诗债满，阮囊如意命车来。"此诗集中未存，补志於此。倭难作，社事寝歇。

载如喜表彰节烈孝义之事，残编落简，为之刊印；断碑古冢，往往徘徊不忍去，在近世可谓强立不返之君子。今夏以旧稿一束见示，《谢封耐公赠家刻诸书》云："早列清班喜有阶，如何遗集久沈埋。书名岂被诗名掩，晚出争传《一砚斋》。（沈文恪公《一砚斋集》。）"虎须一捋蹈身危，报国心期早入诗。不复华亭闻鹤唳，感深庚子日斜时。（袁忠节公诗集三种。）"穷老昆山托采薇，遗经独抱掩岩扉。礼堂写定觥觥在，世自沈沦道自肥。（张闻速徵君《茹茶轩文集》。）"绝学谁能张一军，云间晚有两徵君。遗书可待何时刻，愿得传钞也策勋。（张徵君《丧礼郑氏学》卷帙浩繁，十年前集费付刊，款罄中止。钱复初徵君《待烹生文集》亦未雕板，余与郁君元英各钞一本。）"数诗足供他年徵文考献之资。佳句如"昼永易教生午倦，雨谣犹是衍春余"、"尊前谐谑余深意，外沈吟有故人"、"发愤故知能结瘕，有生总觉似悬疣"、"入肆古欢撩眼乱，登楼秋感上心来。"稿中有祖《孙同命行》，为瞿景福入火救祖母同殉而作；《援溺行》，为江亚轮沈没，帆船主张翰庭奋救四百余人而作，司歌可泣，以篇长，不备录。

文人聚谈，於日常习用之字，往往音义多讹。如"调度"见《后汉鲁恭传》："大司农调度不足。"注："度，徒各切，官名。""度支"从此。"落魄"即落拓也，《广韵》："魄音托。"惟《史记酈生传》："家贫落魄。"应劭注："音薄。""褻然上坐"本《汉书董仲舒传》："褻然举首。"师古曰："盛服貌也。弋授反，音诱。"与"褻敛"之"褻"音蒲侯切、"褻贬"之"褻"音甫彪切皆一。"长夏"出《黄帝素问》，谓六月也。王太仆注："上声，音掌。"河间纪氏云："杜诗'长夏江村事事幽'亦读上声，然'长物'、'冗长'等仍读如尚。""妯娌"，《广韵》："柱六切，音逐。""抵掌"音纸，手侧击也，"抵几"从此。"粥粥"。见《礼记》："粥粥若无能也。"《注》："音育。""群雌粥粥"从此。"大言炎炎"出《庄子》，应读谈。"瓠落"出《庄子》："瓠落无所容。"《注》："音，亦音获。""滑稽"，楚词："突梯滑稽。"崔浩云："滑音骨，注酒器也。"姚察云："滑稽犹俳谐也。滑读如字，稽音计，言谐语滑利如计疾者也。""稽首"之"稽"音启。"夏楚"出《礼记》："夏、楚二物，收其威也。"《注》："音贾，地名。""负夏""阳夏"从此。"纂"，《汉书艺文志》："书之所起远矣，至孔子暮焉。"孟康云："音撰。"姚鼐辑《类纂》，自作此字，非"纂"也。"逗留"，《说文》："止也，音住。"

女诗人周链霞诗，余《诗话三编》已署载之。其诗秀媚在骨，无尘秽滓其笔端，锦心绣口，本之天授。链霞字紫宜，江西吉安人，有《螺川诗屋稿》。《冬夜遇馄饨担》云："风寒酒渴人如梦，街静灯疏夜未央。何处柝声敲永巷，一肩烟火踏清霜。"《自题画柳》云："残烟漠漠雨蒙蒙，消尽春光转眼中。我与垂杨同瘦损，漫将迟暮怨东风。"《轻寒》云："为有轻寒入梦迟，生憎又见月圆时。一灯细煮愁如酒，化作红笺小字诗。"律句亦可喜，《秋宵》云："宵来凉意透纱拢，谁向尊前笑语同。珠箔无情闲好月，银监有梦怯秋风。烧残香篆烟犹紫，灰尽相思豆不红。怪底难消离别恨，断肠时节太匆匆。"检点啼痕在绣巾，离愁谙尽又添新。簪花楷细灯前字，侧帽词新梦裏人。瑟瑟西风增半臂，迢迢秋水忆双鳞。只今一片团园月，却向红楼照独颦。"他句如"已惯生涯如水淡，未妨姓字少人知"、"黄花骨傲秋无价，明月光寒梦有诗"、"离怀欲写书难寄，密语将缄字又删"，皆婉挚动人，足徵扫眉才调。

廖药庵《古意》云："妾住吴江曲，郎去楚云端。含愁吃梅子，心口一般酸。"秦伯未《月子弯弯曲》云："月子有圆缺，妾心无断绝。圆时长相思，缺时长相忆。"凄音怨调，如读《子夜歌》。伯未有民谣云："舌赤犹如火，足以焚汝身。身焚无完肤，甚於刀杀人。"又云："金性柔似水，水流乃为潮。东家如潮落，西家如潮高。"警世语，不可多得，然其奥峭颇似寒山。

朱避庸先生诗，余前《诗话》录犹未尽，兹复钞存一二。《题陆放翁集》："杰句雄辞属放翁，吟来字字惬心胸。寻诗野外常忘远，卖药街头不讳穷。老骥那堪千里伏，古梅聊藉一尊同。壮图京洛思恢复，谁念微忱献曝忠。"癸酉辽海失守，末联有感而发。《月下作》云："难得中秋遇好晴，云开万里气澄清。纵无弦管催繁奏，合有诗歌纪胜情。共此域中天远大，果然分外月光明。今宵准拟迟眠睡，听取霓裳曲再赓。"此为丙子以积闰计重宴鹿鸣作也，科举废，此典已成虚器，然其意兴故未减。余与先生订文字交始於丙辰之和余《红梅》诗，诗存篋中，亟为录出："寒窗坐剔蟬鱼稿，飞来简札和诗草。开缄手盥蔷薇香，苦恨神交晚不早。展书三复还诵诗，束皇为我开清昊。老眼蒙眈隔花雾，胜刮金篦霎时好。"青溪坛坫苔岑多，《秋柳》明湖诂足道。曰余索居絮蛩蚓，蹉跎未向名山讨。沧桑经历刹那间，幸可闭门成却扫。九在望泖波润，欲往从之写倾倒。"又有赠诗云："瘦东沈子清妙姿，宅傍青溪工作诗。峰屏泖镜日在眼，杜圣李仙相与期。贻我散乱诗一束，编年庚子经六期。放翁万首易易耳，看取牛腰束笋时。"颇似山谷。其日记记及余者甚多，曾见其一段云："此君清狂好色，诗却远胜其乡人某。"余少於先生三十岁，不谓事隔二十年即余选其诗，先生安能前知，此殆佛氏之所谓缘。

南汇张啸山先生文虎，周浦人，博闻强识，精《说文》、天算、音律，旁该泛览，著有《舒艺室正续编》及《舒艺室诗存》。尝游曾文正公幕，文正称为"有儒者气象"。乱定，自金陵告归，寓居松江钱氏复园。有一子，早卒，遗一女，嫁其县人王赓九，王不善治生，先生遗书为其斥卖净尽。余家从曾叔祖锐卿公与先生交好，唱和颇多，藏有《舒艺室全集》，雕刻绝精，余尝假观。倭难时失之。先生有《示姚吉

《仙女史》一律云："诗裹寻诗岂有诗，工诗要以古为师。花非蜂酿难成蜜，叶到蚕眠始作丝。食字不仙须待化，借书能读岂云痴。即今奉母犹多暇，自理何愁向学迟。"女史不知何县人，然玩诗意，必系名门女弟子。尔时闺秀，略能为五、七言已为难得，乃先生谆谆以读书规之，与子弟无二。随园、湖楼请业者虽多，未闻为此言也。又有句云："功名莫恨儒冠误，只恐功名更误人"、"压担新书夸暴富，百城归去比封侯"，皆为时人传诵，而集中无之。时南汇丁时水工词章，颇负才名，先生斥为无本之学。

蛻园自辛亥起，岁首必有《元旦》七律一首，大都家庭聚散之情。甲寅云："承欢彩服添花胜，献岁香暖酒卮。"乙卯云："撰杖园林承暇景，开樽花尊遂天伦。"丙辰云："庭陔日永青芝长，壶耸春深白发醺。"壬戌云："奉母将雏今日醉，醉裁诗寄远一年心。"癸亥云："玉梅送暖香添座，彩服归娱远念亲。"甲子云："爆竹声长深破睡，浮萍客久远思亲。"己丑云："尘土功名从宦拙，儿童嬉戏得亲欢。"丙寅云："循陔自有天伦乐，贿履还思天上时。"己巳云："屠苏一盏无余事，爱日闲居好奉亲。"疚斋先生所云"麟笔纪春王"，殆指是。忆有人赠樊山云："春华终不谢，一洗穷愁声。"我於蛻园诗亦云。

蛻园少时才名藉藉，尝师事湘绮老人。老人赠以诗，云："雏凤真宜世掌纶，傅家文笔信清新。香奁百福双花胜，寿酒三元嫩麴尘。求友愿交真国士，通经须作济时人。莫言一日能干里，解惜分阴最爱春。"其跋云："兑之年未及冠，文章浩博雅正，方为作家，因举求友、通经二义，以赞过庭之训。"时为晚清辛亥之春，蛻园初婚，故有"香奁花胜"之句。此诗今悬寓斋。辛卯初冬，蛻园招巨山、果园、文无等小饮，有诗云："昔年湘绮翁，曾荷誉黄童。即今对题句，只觉负春风。"即指是。果园云："湘绮题诗小友呼，册年手迹未模糊。於今易米知多少，一字犹能抵一珠。有客时停下泽车，入门但见满书。两三人似野航坐，斋额应题恰受居。"盖戏谓其寓斋颇小云。

上海秦伯未，以医著称，嗜酒懒散，尝却全国中医考试襄试委员之聘，然其诗亦甚工。余虽未通缟紵，而各有倾襟之雅。去岁，以朱君诚斋之介，辱先以诗见赠，云："天生人未薄，授才乃为苛。怀之无所用，矧更患其多。青溪有介士，曾向名山过。倦游隐乡曲，日对横云歌。非遂忘奋发，岂甘长蹉跎。笔砚得佳友，江湖愁风波。瓶粟足供养，庭柯间抚摩。时世一以变，如秋叶辞柯。情孤渐寡累，视短当受诃。病躯戒酣饮，衰颜不复酡。苦吟留诗史，坐令双鬓皤。"旋奇其诗稿，使商榷。余小有献替，多虚心翕受。伯未诗抗心希古，不为时风世尚所移。五言律体力追王孟，高者几於入室，为举如干首如下。《秋感和黄太玄先生》云："抱愁似烟树，况值暮秋天。落叶黄不扫，夕阳红欲然。孤怀着何处，幽兴托无弦。寂寂同游意，孤洲共此年。"《北海分凉阁远眺》云："分凉合上立，所爱在西山。澹极浑无迹，苍然忽满颜。天随云势转，帆带夕阳还。峭听风铃语，僧孤白塔间。"《南口》云："驱车向南口，深入万山行。白日澹相照，苍烟时复生。水流争野涧，林断露危城。未

上最高处，先怀今古情。"《宛平城楼望芦沟河》云："树锁孤城暗，潮声北战场。高冈吹晓角，残月在河梁。野草三春绿，流沙一线黄。不因来惜别，杜宇断人肠。"《浙东道中》云："秋草西兴路，欣然此日情。地留阮公社，山入越王城。远渚浮烟白，疏林向日明。清游来得得，懒与计行程。"《月湖谒贺监祠》云："弃官兼舍宅，老监尚存祠。寂寂一湖月，悠悠千载思。狂名甘自受，幽愤少人知。休唱乌栖曲，汀洲柳似丝。"古诗得柳之趣，《春雨》云："仲春苦溪霖，举体无一美。终日贪醉眠，家人呼不起。起视中庭树，芳草茁如指。延望南陌头，苍然足生理。贵者营於朝，贱者营於市。我心窖与俱，膏沐良可喜。"《秋仲重过湖上》云："听钟南屏下，掬水南湖滨。幽境有独得，四顾谁相亲。山头旧时月，空照今时人。逝者无消息，存者多悲辛。平生敦交谊，眷念俱成尘。迂怀暂披豁，邈余七尺身。一朝委黄土，秋至徒思春。"《五十生辰追暑云林》云："听水可终日，遂憩壑雷阴。白日光且烂，夏木郁以森。晨风收宿雨，湿翠黏冠襟。曦影不到地，松籁自成音。濯足漱尘齿，一瓢还复斟。既得清静趣，蠲诸热恼侵。形迹脱暑尽，细务亦消沈。敛华杜德机，只余方寸心。百年弹指顷，乐此山缘深。"其他七言古、七言绝则只步趋宋贤而已。《秋雪庵观芦花并谒两浙词人祠》云："晴风卷雪飞不起，十里芦花一湾水。片云飘落北山阴，秋光尽贮孤庵裏。庵荒僧去寂钟鱼，簫簌簌堆庭除。小楼高奇得幽意，微吟犹接古欢余。举杯相酌娱清景，俯仰百年弹指顷。问谁低按玉田词，白鹭下滩悄无影。"《饮严氏不读书斋》云："竹裹炊烟午饭香，新春红稻隔年粮。清腴味在河豚上，韭叶初齐燕笋长。"宿里湖复居堂云："门对西泠第二桥，渡头舟子惯相邀。打钟洗钵寻常事，独向松间挂酒瓢。"其余律句云："栋风吹断续，梅雨弄阴晴"、"晓烟轻似縠，树影静於山"、"寒葩黄染蜡，老干绿生铜"、"药纸间临画，花瓶自洗罍"、"庭深留雪迹，树老助风威"、"寺深岩作壁，佛古草为衣"、"古书作伴高连屋，短墨相磨静掩关"、"自写疏梅遮坏壁，天留残雪煮清茶"、"菡萏浸醪浮瓮白，樱桃经雨滴阶红"、"春色暗随流水远，风华消向落花多"、"四壁虫喧人入定，一窗灯淡月专光"、"春静掩门云自锁，烧余延步草还苏"、"盘中樱笋春风软，湖上尊鲈旅梦迷"、"上市小鲜肥割鲙，垂绳寒水绿浮瓜"、"湖上听经猿鹤熟，都中典酒肃霜轻"、"已无亲眷输财易，尚有人来乞药忙"，多有剑南、石湖风味。伯未诗间有一二俗言语，经余指出，伯未即曰："我生平最恶此，不知如何亦犯笔端，该打手心十下。"快人快语，其从善如流，亦非恒流所及。

伯未兼工画，又能篆刻，尝云："题画诗极不易作，题花卉尤难，既殊咏物，又议事，在若即若离、有意无意间出之，饶有趣味，斯为上乘。冬心为此别辟蹊径，深得三昧。今之画人，不堪共一语矣。"余谓昔郭频伽亦云："题画之作，别是一格。工诗者未必知画，能画者未必工诗。云林、石田之外，盖亦寥寥。"皆於言外隐然自寓。然此文人通病，不害为古之狂也。录其《题枇杷》云："累累黄金丸，一梢堆满盘。只怜花似雪，谁向冷中看。"《蜡梅》云："蜡分颜色梅分韵，最爱花开磬口时。"山谷咏水仙云："山矾是弟梅是兄。"终是类谜，此则落落大方，与题者有别。《玉簪花、黄菊》云："搔首易生愁种种，秋来一例不胜簪。"《芭蕉、蔷薇》云："芭蕉庭院宜听雨，我吾初晴坐绿天。读罢唐人诗一卷，日长风软众花眠。"又有论印诗

数绝，如云："论印平生不敢私，缶庐野气未能辞。"又云："恐见分庭相抗礼，皖江完白武陵丁。"又云："二陈稳健钱苍莽，后起还当属次闲。"可以知其向往。

伯未又介其友南汇杨永璇《静斋诗稿》来，属为点定。《寄谦斋》云："乍别秦淮海，江头无限情。哦诗酬短李，对酒忆长庚。堂上同存母，天涯尚苦兵。故园风物好，篱落老梅横。""堂上"十字，关怀家国，至性至情。又十四夜月云："能邀千里共，无碍一分亏。"下句可悟处世之道。《春游》云："诗思一腔消不得，村前又听卖声。欲待提壶沽美酒，春帘隐隐杏花村。""萍波绿浸鳧宅，杏雨红黏峡蝶衣。摇落风帘花万朵，一庭细雨逗香来。"皆清言如锯。

各地诗人时有投赠见怀之作，兹并录之，岁月先后不论也。泰县沈本渊（世德）《读瓶粟斋诗钞》云："贻我新诗卷，临风倦眼开。隔江遥载拜，阅世老弥哀。家国犹多故，乾坤此俊才。如何托颓废，政仗起衰来。"笔笔转，句句承，章法极活。南通瞿镜人（竞成）云："瘦东诗老今东野，愧我闻声廿载前。小住海隅慙一面，长吟山字耸双肩。老怀淡泊真人外，逸话披寻尚酒边。若论躬行亦颜李，松梅遥对岁寒天。"镜人少攻博士业，行欲售矣，光绪乙巳学使先校士，江南试事未毕而停止科举之诏下，江北诸学遂向隅，镜人年老犹为学校教师云。上海秦伯未《闻瓶翁来沪讯，每把盏念及，预呈长句》云："端居成懒失交游，乍见欢然转欲愁。旷士终怜无近想，残生何忍话清流。斟来美酒一青眼，吟到好诗俱白头。莫逐东风便归去，故人新筑小山幽。""旷士"一联，语极沈郁，千锤乃得。未谓柴君志香新於蒲溪筑室，意谓可下榻也，其情之笃如此。江阴唐侣笙（鸣凤）云："瞥见云间落雁翰，休文词笔似龙盘。君真媲美兰台令，我愧虚沾柏署官。松菊已孤三往望，蕨薇犹胜万钱餐。闲将今古诗评隋，玉尺裁量子细看。"侣笙尝任江西法官，故四句云云。通体工秀和雅。江阴谢冶庵云："神交濒十载，风雨切调饥。只恨两交臂，难期一展眉。菲葑蒙下采，珠玉荷先施。愧乏琼瑶报，参差几度吹。"诸诗可谓极倾襟之雅，惟奖借语增余惭愧耳。

伯未云："志香不但人好，诗亦好。"因钞示其《壬辰立春喜谦斋见过》，云："乍见真如隔世人，一般心事两酸辛。人生最是销魂处，投老逢君正及春。"以为是多情人语，良然。谦斋，伯未号。

拙著《瓶粟斋诗话初》、《二》、《三编》，悉由诸朋好助资，用活板印行。承海内有道长者不诃为谰言梦护，纷沓投书，督促继续。南通孙沧叟师至集契文书联见赠，云："现代文词，簇簇生春，四续五续；名山著作，孳孳忘老，千言万言。"其奖勉之意可感。兹复续成《诗话四编》上、下两卷。正拟将上卷先付书局排印，不谓事与愿违，不得已，改用钢板缮写，恐无以饜读者之望也。至是编之印，仍由诸同好捐款赀事，尤深感谢，爰缀数行，以志勿谖。五编正在纂辑中。壬辰闰五月，瓶翁跋。

●四编·下卷

余作《诗话》，不尽话其人之诗也，或其性行，或其出处，苟他日足以徵闻里见闻、资乡邦掌故，靡不略及之。又余即非板本家，然其集苟为佳槧，虽在光宣间，亦必略记其卷数一二、作序者姓名及刊刻年月，以为丁此铅字石印风行之际，剞劂之工恐将绝迹，识之亦少，足助考证，此区区微憎也。或以此为问，亦即掬以告之。又曰：《随园诗话》，世多嫌其滥，然除其自装门面语外，闲言语却绝少。石遗便不能矣。可见前人自有不可及处。至於评隙诗品，素不解爱古薄今、是丹非素。石遗尝自述其论诗，谓“孙师郑不厌其严，冒鹤亭时恶其刻”（《见石遗室诗话》卷十二。）余学识冥陋，严既不能，刻亦何敢？惟文字之交，视如骨肉，其或捃瑕规过，中心藏之，此则差可自信者。然世多尹士，宵能一一喻之乎？

唐牛僧孺文字常被刘梦得涂窜，后二人相见甚欢。清代张皋文《茗柯文集》眉端有憚子居评语，纠绳极严，读之不特悟文法，并见良友规箴之美，二编以后即无评语，想非大云定本矣。余弱冠即存稿，四十便刊行，寻颇悔之。癸酉冬，晤山阴任董叔董，欲乞其痛芟。董叔有坠言矣，不意其逾年即捐馆。今春，镇海金君雪塍索观拙集，因复以此事浼之。未几，雪塍来书云：“合观诸作，无体不备，噌咳者如大吕黄钟，静穆者如瑶琴清瑟，或明净如枫霜竹月，或韶艳如美女时花，而四始五际之能事毕矣。（四始五际之说出於《齐诗》，汉翼奉能通其学。瓶翁注。）猥承谬爱，属加评选，自维劣下，何敢造次下笔，自显其妄。且人之嗜好每有不同，譬之於色，燕瘦环肥，不无偏爱；譬之於味，南清北膩，未易尽谐。尤不敢以我之所见如此，而谓人人皆然也。往者强村老人晚年重定词稿，为《语业》两卷，将前刻词卷删汰过半，弟当时曾面叩老人，何斧削之甚？老人谓芟萝愈甚，精神愈出，非轻其所弃，即重其所存，自有深意。冀遇知音，未易喻之人人也。今於大集即作是想”云云。雪翁但溢美而无溢恶，然其述强村语已见弦外之音。余甚惭且感，苦无辞令复之，因忆瞿蜕园有句云：“本望评弹存直道，转於宽假见真知。”不啻如祖腹中所欲言矣。一书一诗，文章措词之婉妙如此。蜕园亦尝以稿委余去取者，故有此赠句云云也。

明末王州子士骥，取当代名公卿碑表传志，益以野史，编成一书。士骥没，为钱牧斋所有，乃更益新稗及见闻所记，傅会其中，尤善述名贤隐过，每得一事，必旁引曲证，如於吏断狱然。因漫题其卷曰：“《讳史》其意，以为彼名贤实然，欲便於盖己遇。”未几，所谓“《讳史》”者与绛云俱烬，此见宋徵与《林屋文稿》，云梅村与言之。徐巨源与陈伯玠书，亦言牧斋晚年文字专好人，至传语相警戒。余读其《答王于一秀才书》至云：“恒思之藁，凭藉嬗玷；黎丘之鬼，雄长桓文。牛羊之眼，但向一隅；蟋蟀之声，不达九里。”此是底言乎？赵瓯北《题梅村集》云：“犹胜绛云楼下老，老羞变怒人多。”诛心之论，殊快人意。余谓古来诗人，天性笃挚无有过於少陵者。其於友朋，往往往复繾綣，但有榆扬而无诋诃。如於白则曰：“我意怜才。”於孟则曰：“高山仰止。”於郑虔有“忘形尔汝”之语，於苏端有“才兼鲍照”之语。尝

曰："不薄今人爱古人。"真有味乎言之也。

虞山论《何将军山林》诗第十："幽意忽不乐，归期无柰何。"以为"八句之内，势变多端；尺寸之间，移形换步"，此老不容易放笔如此。又曰："古人诗，暮年必大进；诗不大进，必日落。虽欲不进，不可得也。欲大进必自变始，不变则不能进。"

俞君运之闻河东君墓被发，赋此寄叶遐庵，属其商略重修，云："胜践难忘《访墓图》，（遐庵有《虞山访墓图》）乡亲推分到薜萝。浇花已阅人天劫，发冢何来大小儒。狼藉香桃伤委蜕，凄凉绸发暴枯颅。（棺木尽毁，髑髅外暴，历时甚久。有过者兄而悯之，畚土掩盖。）怜才应有陈颐道，蛾壤重封德不孤。（墓为嘉庆时陈伯重修。）"运之於四部书俱有根抵，故言皆典赡，而用经尤不入陈腐，所谓"诗人之赋丽以则"也。

随园云："诗之作意用笔，如美人之发肤巧笑，先天也；其徵文用典，如衣装首饰，后天也；至於腔调涂泽，则又似裹足穿耳，功更后矣。"福建林欧齐（寄图）言："诗才从天分中带来，有是种方有是树。"建宁张亨甫（际亮）尝戏语其友云："君等譬之学佛，半路修行，我乃自幼出家。"欧斋谓："车甫可谓有是种有是树矣，惜才气有余，学殖不足。"余两释之，曰："松栝尽矮，终与蒲柳不同。"

"暮春三月，江南草长，杂花生树，群莺乱飞。"又曰："仲秋御景，离蝉欲静，颺颺晓风，凄凄夜冷。"春秋景物，皆於十六字尽之，而各有其妙。六朝人文字正复不可及。

《左传》："心则不竞，何惮於病。"（僖七年）此郑孔叔引当时谚，是"竞""病"二韵已见於古。《南史》："曹景宗奏凯还，帝见於光华殿宴饮联句，（校"光华殿"，《南史》作"华光殿"。）景宗求赋韵，韵已尽，惟余'竞'病'二韵。景宗援笔即成，曰：'去时儿女悲，归琅笳鼓竞。借问路旁人，何如霍去病。'"此正相值之巧。东坡诗："将军竞病有诗名。"盖用南史事。

古来帝王大都起自微贱，粗识文字而已。然如高帝之《大风歌》，气象自是壮阔。项王虽失败，而"虞兮"一曲亦复声情激越，梅村所谓"古来名与色，英雄不能忘"。若吴越王之"玉节还乡兮衣锦衣，父老远来相追随"，则殊有鸿乙之分。

论史贵有识，贵有理致。梅村咏虞姬云："博得美人心肯死，项王此处是英雄。"余曰："帐中夜饮，悲歌泣下，此正儿女情长、英雄气短时也。一女子之死，岂足以尽项王。不然，绿珠、碧玉皆甘於一殉者，彼石家、乔氏二夫果得为英雄否乎？"余最爱随园《铜雀台》云："生对河山常感慨，死犹歌舞是英雄。"魏武千秋，此十四字足以论定。

长洲吴翊凤笺注《吴梅村诗集》，徵引书籍略不剪裁，颇嫌繁冗。亦有作者原用甲事，而注则误引乙事者；有习见不必注而反见，隐僻当注而反不见者，非善本也。惟《清凉山赞佛》五首，为诗中疑案，而独不注来历，省却多少葛藤，尚为有见。此诗世多谓为清代章皇帝悼念董妃而作，或谓满蒙无汉姓，因又谓董妃即秦淮名姬董小宛者。然董鄂为满湘一部落，"董"亦作"拣"。《皇朝文献通考》载："孝献皇后拣鄂氏，内大臣鄂硕女，顺治十三年十二月封皇贵妃，十七年八月薨，追封皇后，谥曰'孝献'。"则"董"疑即拣鄂氏。至小宛归如皋冒襄为姬，张明弼《董小宛传》云在壬午春，崇祯十五年也。余怀《板桥杂记》："小宛事辟疆九年而没。"则在顺治七年。辟疆作《影梅庵忆语》哭之。小说家以小宛入京属之顺治十四年，徵之诸家记载，小宛固前卒矣。然读者终当多间阙疑可也。全集四十卷，诗集十八卷，嘉庆甲戌吴中严氏刻，光绪十年湖北官书局重刻，首列严氏原序，次为太仓顾湄、泽州陈廷敬《梅村先生行状》与《墓表》，雕槧极精。惜编制体裁甚俗，且注者姓名下不曰"某某笺"，而曰"某某撰"，亦未合也。

梅村乃馆阁中一名手耳，若必谓之诗人，则未也。梅村於唐宋金元诸名大家集未尝下苦功，《四库提要》谓其"歌行一体，尤所擅长"，亦止描画沈末、四杰之眉角，而"此时"、"此日"、"谁家"、"何处"等套语，殊厌其烦。其所取材，《南》、《北史》稗官之说而已，甲、丙两部之书未尝用也。其诗在同时介乎秋筵、秋华之间，未足与云间诸子抗手。古诗累於铺，无多大论议。如《雁门太守行》为孙传庭作，夫潼关之败，文武吏民皆夺气，关以内遂无坚城，此关系明之存亡甚大，乃仅曰"沙沈白骨"、"雨洗金创"，与寻常哀挽何以异乎？因叹陈涛青坂之悲篇幅无多，而都人敌忾之心、官军轻进之罪，是非得失，千载昭然。作者手段高下，固不可同日语矣！即《陈圆圆》一曲，为世所脍炙，起二语便不贯串。凡诗句每换一意必立一主词，如"汉家尘烟在东北，汉将辞家破残贼"，"汉家"、"汉将"主辞也。此云"鼎湖当日去人间，破敌收京下玉关"，明明上句指思宗，下句指吴三桂，两句两意，只说得一个思宗，则"破敌收京"者何人耶？此诗不过"全家白骨成灰土，一代红妆照汗青"二语最警策。集中如"枝上杜鹃啼碧血，路傍少妇泣罗裙"、"青衫憔悴卿怜我，红粉飘零我忆卿"、《投马督》曰"伏波家世本南征"、《赠嵇叔子》曰"风流中散旧家声"、《赠耿青藜》曰"好时家声指顾收"、《送曹秋岳》曰"江东才子汉平阳"等，俗套颇多。昔人讥青邱诗太熟，余谓梅村熟而兼俗，读者尤须审辨，毋徒震其盛名，为所误也。

《呈座主李太虚，南昌兵变，避乱广陵》八首之六云："世路长为客，家园况苦兵。酒偏今夜醒，笛岂去年声。一病余孤枕，千山送独行。马当风正紧，捩舵下湓城。"通体沈郁；《梅村》云："枳篱茅舍掩苍苔，乞竹分花手自栽。不好诣人贪客过，惯迟作答爱书来。闲窗听雨摊诗卷，独树看云上啸台。桑落酒香卢橘美，钓船斜系草堂开。"通体浏亮，二首为梅村集中之隽。《送林衡者归闽》云："五月关山树影圆，送君吹篷柳阴船。征途鸚鵡愁中雨，故国桄榔梦裏天。夹潦草荒书满屋，连江人去雁飞田。无诸台上休南望，梅色秋风又一年。"调高响逸，何减何李。《丁未三月廿四日从山后过湖，宿福源精舍》："千林已暝色，一峰犹夕阳。拾级身渐高，樵径

何微茫。回看断山口，树抄浮湖光。松子向前落，道人开石房。橘租养心性，取足鬓眉苍。清磬时一声，流水穿深篁。我生亦何幸，暂憩支公。客梦入翠微，人事良可忘。"五言古尤非梅村所长，此诗先从上说下，省却许多闲句，殊简要。"橘租"十字谓资此为颐养耳，句未稳，可节。集中如此种累句尚多。其他佳联如"老树连书幌，孤村共酒瓢"、"无家忘别苦，多难爱书稀"、"山深惟杖策，云尽却闻钟"、"远帆看似定，独树去何迟"、"酒尽河声合，灯残剑影斜"、"支颐苍鹿过，坦腹白云流"、"浊酒一杯今夜醉，好花明日故园春"、"画就烟云连泰岱，诗成书札满江湖"、"猿愁客倦晨投果，鹤喜人归夜听琴"、"北地诗名三辅少，西风客思五原多"。至俊伟之句，如"奇鹰出架雕弓动，稚觅登盘玉馐分"、"岱顶摩崖看日出，海边吹角对秋清"、"云生大漠龙方起，河出昆仑日正长"。又如"栈紫秦岭干盘细，水落巴江万里流"，则本杜"山连越隗蟠三蜀，水散巴渝下五溪"；"城高赤坂鱼盐栈，日落黄河鸟鼠秋"，则本杜"水落鱼龙夜，山空鸟鼠秋"；"谁道尽提龙武将，翻教远过阖闾城"，则本杜"岂谓尽烦回纥马，翻然远救朔方兵"；"月明函谷鸡声远，木落萧关塞马肥"，则本青邱"函关月落听鸡度，华岳云开立马看"，均有摹拟痕迹。

梅村句"烟青入飞鸟"、"归心入春雨"、"春梦入翠微"、"秋多入众音"、"石门干镜入"、"鹭远入湖光"，皆本杜"决眦入归鸟"句。

我邑胡吟鸥先生鸣玉，潜心著述，雍正、乾隆间两举鸿博。沈归愚尚书尝赠以联，云："汉南诗老犹存社，鲁国诸生半在门。"盖以东南宿学尊之。所著《订謁杂录》十卷，著录文渊合，《四库提要》谓其"偶然失检，时亦有之。要其但引古书，互相参证，不欲多生新意，自见所长，所以言皆有据"。张颉蚨孝廉《味莼移笔记》谓："尔时诸大儒著述未出，故於字体、音训，不免小有疏舛。然大辖之作，始於椎轮，不足为病。盖其年辈於吾乡先哲中，尚在述庵侍郎之前也"云云。俞樾《春在堂集》中有《订胡》一篇，此《订讹》之订讹也。先生撰述颇多，以当时文字狱，恐牵染，尽为家人焚弃。

我邑诸亩香，自谓其诗风华不如补山、秀丽不如得砚、雄俊不如爱筠，惟於超脱处似有微长。得砚，蔡文治；爱筠，陈琮；补山，忘其名。余谓其诗不脱摹拟，正坐欠"超脱"二字，然其清新雅丽亦自胜人。如"山借桃花色，风调燕子声"、"新诗多在画，好梦不离山"、"一庭空似水，万响织成秋"、"孤馆梦迷灯影外，相思人在雨声中"、"笛含南浦三更雨，诗剪横塘一片秋"、"弓悬虎帐分旗影，镜抱龙楼拂剑花"（《咏关山月》）、"自家鬓上添多少，翻为庭花怨晓霜"，皆似《灵芬馆集》中语。晦香当时声华藉藉，尝客兰溪，随园约其弟子林远峰，至有"欲渡江一见"之语。其集正、续四卷，木刻，而近时坊本石印分八卷，且与木刻者多不同，不知何故。

余於《诗话三编》曾转载毕氏《芳菲菲室诗话》青浦许定生女史诗，而张颉蚨孝廉《味莼移笔记》亦载其诗，且谓不知女士为何如人。近松江杜君诗庭（鎬）钞示昭文蒋宝龄《墨林今话》数则，於女士家世言之綦详，不觉狂喜，亟为节录如下："许

淑慧字定生，乾隆庚辰进士青浦穆堂侍御宝善女孙，梅甫（荫基）次女。幼颖绝，数岁即通琴理，工写兰，人物、山水、花卉，无不臻妙。适兰溪郑潮为继室，三载而孀，无所出，依母侨居维扬。女史尝问余学诗，所作五律、七古，皆清超有笔。邗上诸闺秀善琴画诗者，咸愿与游，且重其节也。余尤赏其松菊大幀，因作《论画诗》绝句云：'潦倒维扬久住家，许询有女慧堪夸。铅华洗尽闺中习，大叶粗枝画墨花。'（《墨林今话》卷十二。）梅甫善水墨写意花卉，尤长松、竹、梅、兰，悬腕中锋，落纸清劲，得江阴夏澹缘传。为人落拓，不拘小节，喜朋交，胸无畦畛，酒酣耳热，生气流露。自昆山移居吴门，嗣侨寓维扬。配胡氏相端，号智珠，大兴人，乾隆乙未进士、常德太守文铨女，能诗，善鼓琴，尤工钩染花卉，著有《抱月楼小律》及《散花天室稿》。上海归兰皋题其集云："镂雪雕琼思若何，泠泠七字应云和。但专一体堪千古，绝执由来不在多。"谓其专工七绝也。梅甫兄日子与（希仲），字墨痴，诸生，吴门钱竹汀宫詹，家城，亦工诗、书、画、篆刻。俱见《墨林今话》。许氏一门风雅，而《青浦诗传》既缺，如《光绪志许宝善传》亦只寥寥数行，二子荫基、希仲亦不附见；女士母女及其著作，《列女传》、《艺文书目》均不著录，殊可怪也，因并附记於此。

古人遗迹，方志往往牵涉多误。九小昆山原系昆山，陆容菽《园杂记》："昆山在松江府华亭县界，晋陆机兄弟生其下，皆有文学，时人比之昆山片玉，故名今昆山县。治北之昆山原名马鞍，亦称玉峰，盖拟之耳。"倪芸庄倬《泖湖擢歌》云："一碧昆山玉样清，陆家兄弟并英英。梁朝自有昆山县，小却吴中二俊名。"辨今人於昆山加一"小"字以别之之妄。赵屯在皖口，见《入蜀记》，而《县志》以陆游诗附会之。邹葆荪《屯溪》诗云："尽有高人隐此中，竹篱茅舍赋秋风。笑他方志多依附，拉个诗人陆放翁。"

闽诗人，我於海藏无间然，石遣则往往挟长卖名，时有率笔。近时老辈，墨巢自是名家，其弟释戡亦能竞爽，录其《辛卯九日集康乐酒家寄彦行，时彦行病，未至》云："重阳寒露未为霜，（是日寒露）高阁风微翠筱长。簪菊相逢惟白发，生枫回念隔红妆。（己丑重九饮醉叶楼）欢怀老共秋云薄，楔事今输往日忙。携手江（翊云）陈（赵亭）同里闾，可无天壤病三郎。"《四叠韵酬兼与、彦行》云："肝脾自圣江山助，歌哭无端日月忙。"《早起公园看菊，五用韵酬兼与、彦行》云："园丁兵法枝头勒，老子诗情酒外忙。欲奇无因还缩手，蓬山肠断遇冬郎。"自注："韩偓诗：'自吟自醉无人会，肠断蓬山第一流。'"近时家园艺菊者，多喜用樱缚，绝无横卧倒侧之势。余见三山园日本人所种菊，竟圆扁如一大筛。"园丁兵法"，妙能形容，"忙"韵皆用心。《小雪寄晚华渚阳兼询少卿七用韵》云："老我间歌悲笔秃，是谁吹管定场忙。梁尘动处禁相忆，飞逐今看廿五郎。"连用元微之诗渲染梨园，殊为雅切。

樊山、病山皆有咏百门泉诗，长篇钜制，互争雄奇，而晨汀江翊云先生云："片瓦无存水竹村，天寒风紧日黄昏。名泉海内看都遍，喷薄终须让百门。"此以少许敌多许。

也。百门泉即《卫风》所谓"泉源在左",朱《传》:"泉源,百泉也。"李濂《河南通志》:"百泉源出苏门山,以泉通百道,故又名百门泉。"山川游览之广,时人谓无过江叔海先生,翊老盖能济美,"名泉"七字非夸语也。顷自平原省归,以《和疾斋罗浮仙蝶》寄示,云:"茗坐深谈到夕阳,又知仙蝶下君堂。长歌远迈陈元孝,('四海安足飞,来下君子堂。'《独漉堂集》中句也。)老眼应夸冒辟疆。难并飞鸿留指爪,欲同威凤斗文章。翩翩若令江郎见,定指银瓶索酒尝。"

胶西柯凤荪学士劭志,曾撰《元史》数百卷。其《蓼园诗集》纯乎学杜,在清末诗人中为不肯随时尚者,惜为史学名所掩。其子燕龄(昌泗),亦工诗,燕龄外大父为桐城吴挚甫,内外家学并得真传,乃甫及五十而没,人亦鲜知其能诗者。有《挽绍兴寿石工五十韵》,中一段云:"汉晋无龚壮,燕齐有鲁连。初归华表鹤,重见霸陵仙。人海藏於密,天机静者便。迷阳伤却曲,失路匪迤遭。高楫群公际,含毫众吏前。风流窥豹管,身世忘鱼筌。缣素书家重,盘盂笔阵圆。客讥玄尚黑,自喜砚弥坚。凡骨金丹换,幽情石墨镑。漆书仿科斗,猎碣辨骅骝。远举吾丘衍,旁搜郭恕先。昆刀斲不律,缪篆押于阗。写物穷风露,行吟被蕙荃。竞歌新乐府,都付小婵娟。韵倚清真和,词偕《珠玉》联。山中云澹沲,花外语缠绵。逋峭难为态,纤徐却尽妍。弓衣驰绝徼,井水唱屯田。函牒封龄石,文章妙贾捐。智囊托讽醉,经笥答嘲眠。洛水逸民楔,天池令绰畋。每传《嘉话》绚,更录《剧谈》骈。槐市随缝掖,瓠尊习豆篷。同门来结驷,都讲拾飞鲈。一自尘中隐,徒存象外诠。涌云嗟凤德,无复志鹏骞。邺咏称徐干,蜀才礼范贤。北乡决策语,南岳隐名笺。"(君向在戎幕,某帅初起行间,常左右之,定昆弟交。帅既当路,君已易名市隐,求之不复。或相见,时出一语,往往有裨大局。君初名乃韶,字韵孙,后又字印侯,寓都门,以粥书卖文为活。石工、樱尤,其自号也。)运典工雅,非学人不办。石工平生亦鲜为诗,仅见其赠蛻园伯仲二律,忆第二首下四句云:"!代衣冠惊一昔,他乡泉石竟如归。月泉汐社同招隐,今瘦终应逊古肥。"

余与孙雪泥(鸿)以文字由相知而成相识,交逾二十稔。雪泥弱余一龄,恒弟畜之。其为人不拘绳检,疏财好客,鲜车怒马,美酒红裙,咸能享受。尽有声称。喜为山水游。家故亭林所居,曰枕流小筑。杭州玉皇山莲花峰下华津洞,境地绝幽,尝与叶誉虎、冯超然等十人合置别业,因自署华津一士。二十年前在沪创生生美术公司,沪南漕溪路购置厂地,颇有园林之趣,经乱旋毁旋复。性恬易,家室怡怡,然晚境少啬,顾不以此为喜愠也。其诗风情宕逸,大抵秉之天授。《日本西京杂忆》云:"记得西京看落霞,温泉浴罢奏琵琶。清流一曲栏干外,银阁《寺名》酣眠到日斜。"《谢家丝竹东山主,我辈冠裳上国宾。醉倒筵前无客礼,三山缥缈梦神人。"《南洋群岛》云:"不因红豆生南国,投老炎方岁已秋。醉卧舵楼惊海浪,至今犹梦过琉球。"《蠡园》云:"石栏妥贴压沧波,曲折长廊挂薜萝。一簇晚莲新结子,王家庭院得秋多。"自注:"园为王禹卿别墅。"《宿鼇头渚》云:"水气寒浮南独山,片帆天际落松关。夜来欲枕鼇头宿,万顷烟波带雨看。"《生生印制厂独坐》云:"夜深露气凝丛薄,烟际灯昏失远村。今夕无端眠独晚,坐来已觉石温。"《紫燕》云:"

紫燕飞来认旧家，凌风双剪掠檐斜。故巢衔得新泥补，穿过桃花入李花。"《雨余》云："雨余石笋龙鳞活，风过晶盘佛手香。日暮归来人已倦，借他藤榻受风凉。"《梅花奇瓶翁》云："颠倒梅花不是痴，无花无酒夜眠迟。东君解得诗人意，先向铜瓶放一枝。"《窗外和瓶翁》云："一片清阴竹树交，墙根莎草细如毛。纵无清露煎茶吃，恰有梅花入粥熬。"二诗俱有本事。《秋蟬》云："不曾款曲到秋蟬，长日昏昏学坐禅。君饮露华吾饮酒，不知若个是神仙。"好句如"卷帘花满户，拂镜月中天"、"新笋抽篁初放叶，短篱挂蔓乱开花"、"石坪雨湿鸡冠艳，秋水池寒鸭脚知"。雪泥题画紫藤可称双绝，今春大做紫藤花诗，如云："细雨微斜断绢丝，天然绣出挂风枝。分明夺自闺人手，一串穿成费巧思。"春风错认蓼花秋，易老时先我白头。病里曹腾三月过，紫藤新叶恰初抽。"《藤花谢》云："雨过仙人褪紫衣，风来都作雪花飞。残英狼藉君休埽，一日辞藤一日稀。"余常以"孙紫藤"呼之，君亦云："文长未筑青藤馆，留得藤花让雪翁。"其命意可想。雪泥言"诗可通俗，不可庸俗"，余叹为知言。雪泥祖籍金陵，太平军时徙籍华亭云。

南通徐修五（宣武），别署玻土士，吟咏，洗马工愁，长卿善病，多缘情之作。壬子春重至白门云："回首前欢恨不消，依依风月太无聊。秦淮柳色浓於染，绿到莲花第五桥。"《梦韩姬》云："岂期生死经年别，犹睹风华一瞥欢。"他如《顾高桥九日作兼呈缉师》云："飒飒西风动暮寒，重阳独少菊花看。穷乡避乱忘经岁，古堡登高念旧欢。老眼渐知诗律细，病怀不耐酒杯宽。师门郁郁愁云裹，南望家山泪未乾。"又句云："开到杏花春有脚，归来燕子梦无痕。"皆佳。病五十生辰，贵阳陈庸庵、侯官沈鲁青、无锡杨筱荔、德清俞阶青、奉贤朱避叟诸遗老皆有唱和诗，而俞诗最清隽，云："频年烽火阻江关，投我琼章一展颜。腹有诗书能愈疾，身经离乱喜消闲。委心栗里陶元亮，感事江东庾子山。他日林中同把臂，时清便拟故乡还。"年五十六卒，著有《病存稿正》、《续编》、《病酬唱录》等。尝绘《把卷行吟图》，自题其上，云："书生积习未成除，把卷行吟意态舒。参透个中滋味好，敢云清福有谁如。"劫后犹留善病身，摹来旧影见丰神。挟书耻作干时计，独立苍茫自远人。"族人一瓢题云："吾宗兀傲几诗人，铉铛齐名总绝伦。谓介弟咏绯得地老梅何碍病，为家陋巷不妨贫。驰驱满有饥寒在，孤冷惟宜道义邻。消息简中谁省识，俺然玉立出嚣尘。"病任小学、大学国文教师二十余年，桃李极盛。悯其弟咏诽孤露，为督课二十余年，且颜其室曰双桂以相勸。及没，咏绯乞吴郡袁安圃樊、杭县唐侠尘云两君为绘《双桂室授读图》，海内善其友爱，多为题咏。江都董逋叟（玉书）云："桂萼联芳萃一庐，怡怡偕读古人书。孔怀屋住东西陆，绝学家承大小徐。笔擅江花传不朽，春生谢草梦如初。梅魂虽化诗常在，冰雪香中念友于。"如皋冒疚斋广生云："老桂南枝又北枝，阿连监火忆儿时。病梅诗好人何在，乔木阴清泽尚遗。"万载辛心禅际周调桂枝香云："青监一豆，照双影婆娑，老桂依旧。凄绝树犹如此，恨人难寿。当年斗室融融乐，有埽簾、迭吹齐奏。死生长别，陈惊如梦，问何时又。记从读、勺龄还幼。几携撝庭前，金粟盈袖。草促卅年过眼，隙驹匆骤。秋风循例催花绽，剩销凝、冷香孤嗅。病诗在，闲来检诵，那堪回首。"我邑戴果园云："紫琅山下读书斋，回首当年笃孔怀。岁岁秋风触愁绪，寥天依旧雁行排。"他俟钞得再登。

余题云："紫琅聂愿江涛走，海甸山川孕灵秀。当时虾蟆虹玉楼，藜火青荧射牛斗。谷湮陵壑三百载，通德门板不遑守。古砌都荒带草春，青箱旋散香芸旧。君家表海清芬余，世世能诵先人书。清惠拔薤本儒术，孝安折桂留乡誉。桂树团团荫书屋，桂分双影人双读。孙传祖砚启貽谋，颖得坡师蹑芳躅。凄凉忽罢梅花曲，《修五自号病梅》影事卅年如转烛。画中景物故依然，一点青灯映金粟。绯也友爱今所稀，故山不归悲采薇。为君染翰增惆怅，江上风高秋雁飞。"题徐氏《虹玉楼图》者甚多，摘录数家。江都秦曼青（更年）云："廿一世旧家，三百年老屋。岩叟泽孔长，乡人仰乔木。华屋山丘感，桑田沧海间。废与安若命，好作画图看。"镇海金雪滕（贤棠）云："瞿轩署虹月，陈堂题玉烟。惟此虹玉楼，徐氏所世传。楼在南通城，凤皇桥之边。虹采辉而丽，王德温且坚。得一已足贵，何况二者兼。故家有乔木，迢迢三百年。海桑世迭更，楼岂无变迁。追远诵清芬，谁及贤裔贤。"丹徒吴眉孙（庠）调《临江仙》云："三百年来兴废感，海天几度扬尘。摩挲乔木想清门，鄙书真富贵，花竹小经纶。兄弟两头分占屋，园名珠媚犹存。闲将祖德语儿孙。试从新画本，认龠々巢痕。"余亦调《玉漏迟》题云："故家乔木渺。名园不尽，栖鸦残照。矗矗楼阴，供与后人凭吊。（徐氏虹玉楼建於明末清初。）闲话长虹化玉，想曩日、经生风调。头白了。流传几卷，宛余丛稿。（明诸生大绅著有《易旨玄珠》、《孝经正解》等书。）儿时况味依稀，记曾此凭栏，南山瞻眺。（述咏绯语）岁月匆匆，一晌逝同飞鸟。指点凤皇桥畔，但流水、无情围绕。休懊恼。诗材画题多少。（楼於廿年前为族人典弃，咏绯倩钱塘江南苹女史采、同邑尤无曲其侃为绘图，并徵题咏，以存梗概。）"闻道长安不易居，瑶函读罢渺愁余。适逢铃语鸣空际，未觉灯光透绮疏。但使厨中犹有米，不妨江上叹无鱼。白头我已惭先友，对颖怀坡入梦初。"此贵阳陈庸庵《壬午冬日答徐咏绯见讯》诗也，写倭乱时海上情景逼真。庸庵与咏绯大父为乙亥同年，故末联及之。"对颖怀坡"，并及咏绯兄修五，科举时重视年谊如此。

蕲春桂末卒先生，原名子芬，改名铸西，曾著《校正增注康熙字典》一书，凡是正一万八千余条。近酌举《字典》之误差及高邮王引之《字典考证》之误差各若干条，先印成一小册，名曰《校正增注康熙字典序例》，承以见示。老而好学，二武不能专美，为随记一二条。土部塾，原文："《山海经》：'机谷多馱鸟，食之已塾。'"《校正谓》："塾为塾之讹，塾，羸困也。"引《左传》成六年："民愁则塾隘。"《注》："又委顿也。"引《左传》襄九年："夫妇辛苦塾隘。"《注》："《山海经》中次五经经文已塾，不外此义，塾应改入塾。"宀部宦，原文："又日光所漏入处。孙氏云：'日侧之明，是宦明也。'"《校正》引《曲礼》："为人子者，居不主奥。"疏《正义》曰："《尔雅·释宫》文，郭璞注：'隐奥之处，西北隅谓之屋漏。'孙氏曰：'日光所漏入东北隅谓之宦。'孙氏曰：'日侧之明，是宦明也。'则"日光所漏入"，孙氏原释"屋漏"句，与"宦"字无涉。"日侧之明，是宦明也"释"东北隅谓之宦"句。《字典》既不注明出《曲礼疏》，而又以释"屋漏"之文？混入"宦"义，殊属不合，应从《曲礼疏》改正。又"宦"七画误作六画。凡此皆精确不移。其他如纠正《汉书汲黯传》误《唐书》、《史记淮阴侯传》误《史记韩信传》之类颇多，此皆习见之书，因怪一

代煌煌鉅制，当时衮衮儒臣，何疏脱乃尔！先生言桂氏先塋世在幽燕，原与曲阜桂氏为同宗，五代时刘仁恭之乱始南迁，居江南贵溪；厥后，散处闽、浙、湖、广、川、滇诸省，皆贵溪一支也。先生清末以名诸生优等毕业京师大学，授中书科中书，资送美国留学。民国初，历宰本省夏口、浙江衢县、上虞、缙云诸繁剧，寻解组归隐西湖，乃遍游普陀、天童、雪窦、黄山、香岛、桂林、阳朔诸胜。倭乱侨居沪蠕。辛巳年六十，有《述怀》诗二十四首，如云："万间广厦人如海，一战文场笔有神。"言湖北省学堂考七次皆冠军。"春风岁岁燕台柳，青眼看人万里情"，指甲辰入都。"归燕故国应识主，烂羊今日又封侯"，言辞副总统府顾问，归时眩△竞争正烈也。"管弦好续房中乐，伉俪犹深廩下情"，言继娶黄陂黎氏。"毛生捧檄缘将母，漠上题襟好赋诗"，言任夏口时遂板舆之奉，湘绮入都，道出汉皋，与之唱和也。丁丑得围地四亩於月桂峰下，清流一泓，绿树千章，去仙芝馆才数十武，爰相度地势，筑茅屋三楹拟落成后移友仙山馆图书於此，庶几可以终老。乃甫毕工，而国难作，曾未一朝居，感赋一律云："平生惯说买青山，买得青山鬓已斑。月桂前围四亩，仙芝岭外屋三间。多留佳树供摩抚，一任闲云自往还。烽火无端惊梦醒，柴门人去日常关。"曩散木尝语余"此后衡泌栖迟，恐亦不易"，观此益信。辛卯年七十，复有《述怀》诗六首，大都纪乱离时事，录其一，云："移家只为避强秦，抛得杭州十四春。仙馆有情应入梦，圣湖无计可栖身。六桥烟柳牵情绪，十友图书化尘。孤负名山好风月，海滨犹是未归人。"自注："昔年在杭筑有友仙山馆，并踵宋李成季故事辟十友园，小蒔花木，分贮法书图画。倭难作，化为乌有。"先生诗大抵抒写性灵，不为叔诡艰苦之言，而天真自然流露。

余性雅不近治经，以为古今解经之书浩如烟海，非博览典籍则靡由折中。古人读书不务驳杂，其失也，在锢蔽，如郭景纯注《尔雅》，但以经解经，而多所未详：贾公彦《周礼义疏》，九经之外，多取伪辑，而於诸子百家之单辞精义，以至文字之假借、音读之异同，未能疏证发明。有清朴学，度越前代，乾嘉诸儒，或借训诂为沟通，或引百氏为左证，於是经子之难解者，咸有门径可寻；其敝也，往往失之穿凿。近时宝山金巨山先生其源专精斯学，巨老少从其里人施琴南广文（赞唐）受经，广文有所论撰，辄命为检校，故蚤岁了然於汉学之渊源。乃积数十年之心得，成《读书管见》一书，太仓唐蔚老（文治）、如皋冒鹤老（广生）为序行之。是书於晚明顾氏（日知录）、晚清俞氏《经》、《子平议》外，独能湛思博辨，别辟畦畛，洵为现代经师鉅著。余庚寅春尝一访之於海上之寓庐，巨老年已七十余，须麤皓然，言谈渊懿，望而知为好古之士。余曩与广文亦托忘年之末，因相与道及其身世，同为慨叹。别后寄以诗，曰："各有襟期一笑看，天容海包寓楼宽。鲁人犹识灵光殿，越俗奚求章甫冠。历历星榆仙所种，离离带草古之欢。红蟑桥后蟠桃熟，皓首笺经业未弹。"三联喻百籍终古灿然，而抱残守阙者之有其人也。末联言其能承衣钵。槁蟬，广文晚号也。巨老与邑中张氏有昏媾之谊，昔时曾多往还云。

古人诗中字与今人平仄异读者颇多，略举一二。"四弦不是琵琶声"、"金杯翻污麒麟袍"、"烛泪堆盘垒蒲桃"（皆白居易）句，"琵"、"麒"、"蒲"皆读仄声。"尽捻书籍卖"

(杜甫句)、“乐府散婢媛”(列子晕句，上句“昼堂空锁钥”)、“乡原世尽谓醇儒”(张来《孔光诗》，)“捻”、“婢”原皆读平。其他平仄可随意者，“摘尽枇杷一树金”(戴复古诗、)“况对东溪野枇杷”白居易句，“枇”平声，白诗读作仄，从俗音。“犹胜白门穷吕布”、“犹胜江左狂灵连”，皆东坡句，然“胜败”之胜，应从径韵。中兴(杜诗“百年垂死中兴时”)、猷猷(杜《羌村》诗“感叹亦敛猷”，押入寔韵)、颜行(杜诗“王孙丈人行，垂老见飘零”)、苍茫(白诗“寒消春苍茫”)、长物(洪亮吉《岁朝图》诗“无妨馈岁无长物”，)诸如此类，尤不一而足。明人多不谙音训，晚明梅村诗尤甚，如“孤军摧韦粲”(下句“百战死王琳”)、“轮困形虽老”(下句“芳辛味独存”)、“醉来惟扪腹”(下句“兴极在垂髫”)，“韦”、“困”、“扪”皆读仄；“丈夫失意须潦倒”、“一向鲑菜定何如”，“潦”“街”皆读平。武进吴樵长颇精究音训，近又举杜诗数则见示，如《陪李金吾花前饮酒》：“细草偏称坐。”(下句“香醪懒再沽”)。《巴山》云：“乘舆恐未迴。”(上句“盗贼还奔突”)。“称”、“乘”音平义仄。《柴门》云：“足了垂白年，敢居高士差。”押入麻韵，而义从支韵，作差等解。《寄峡州刘使君》云：“刺史诸侯贵，郎官列宿应。”“应”音平，义如响应。又云：“瓠落叠韵，借为廓。《方言》：‘张小使大谓之廓。’御览九百七十九引‘瓠’正作‘廓’，是其证。”又举苏诗“不妨常过左阿君”(《陈季常自岐亭见访》诗、)《汉书陈遵传》“寡妇左阿君”，下无注。而近人郑海藏《呈栗兄》云：“忧患如山容一罅，聊凭春酿醉阿兄。”“阿”皆读平，不知其出。余谓“阿”有二义：一为发语辞，读入声，魏晋以来已然，如《木兰词》：“阿爷”、“阿母”、“阿姊”之类，《韵会小补》为元明间书，亦云“阿”入声；一《说文》：“大陵曰阿，引申为长大之义。”(此说前人亦言之，忘其书。)”“阿”读平声，尊敬之，犹言长兄、大兄也。佛名阿难、阿弥陀，或平或仄，亦均可。

我邑徐宗石先生，少时有“柳丝油碧晚梳风”句，为时传诵。

族叔祖梅舶公功章，梦中得“软褥春塘草”五字，以语余。余曰：“此亦东坡之‘蟋蟀悲秋草’也。”(《王注苏诗》二十五卷)公少工词翰，光绪中佐台抚邵筱村中丞友濂幕，章奏皆出其手，邵颇倚重之。诗皆随手抹去，没后，所可诵者只此五字而已。

诗人所咏，撝节琦行也，《蓼莪》之於父母、《常棣》之於兄弟、《柏》舟之於夫妇、《伐木》之於朋友，尽之矣。近世伦常不饬，间有一二孤标独行，尤不可无诗人歌咏之。奉贤朱粥叟有《乞赵令撰立方孝子墓碑歌》，其序云：“孝子名炳荣，居泰日桥镇东南里许，业农而事母孝。县令郭重光迎之署中，舆盖送回。孝子没后五六年来，人皆称方孝子，乃请县令赵倡青为撰墓碑。”云：“方孝子，炳荣字。身为佣，亲虔事。养老母，奉甘旨。四十年，无少怠。(一解)维兰斯馨，畴不赏之。维松斯翹，畴不仰之。请诸长官，官曰奖之。型方训俗，无以上之。(二解)开我麒麟阁，张我玳瑁筵。孝子来作客，芝玉扬其前。(郭公宴方，其公子为之觴酒。)舆盖送之归，观者巷为填。人皆有父母，难得琴堂贤。(三解)天壤伊谁不朽，扮榆艳美到今。一片南村宿草，荒丘与客登临。村树白杨斜照，村溪流水琴心。借问斯人何去，哑哑乌叫寒林。四解辅轩之采高天闻，绰楔之荣厚地载。门第寒微事

迹真，出妻负米名贤再。安得燕许大手笔，片石书丹寿百代。自来激浊在扬清，作歌吁我神明宰。"中二解似古乐府，笔歌墨舞，濡染淋漓。秦伯未有《古人重结交行》，序云："宋君庆之之砌，遗孤男子三、女子一，稚者方襁褓。越四载，又遭失恃，其友人凌君慧庵代尽教养婚嫁之责，天灾人祸，颠沛流离，凡二十三年，而卒偿其愿，并作诗告慰宋君亲友。秦子闻之，歌此以彰凌君之义。"云："古人重结交，千金一然诺。莫逆惟此心，死生相寄托。《一解》谁云古道孤，遂诬今人无。有客痛过黄公圻，炉边粥粥者群雏。《二解》孤儿呼天天无语，孤儿呼亲亲无睹，孰使群雏得其所。（三解）覆以翼兮，食以粟兮，嗟弱息兮，若命续兮。（四解）天人祸，百千劫。覆巢下，以长立。亲有友，通呼吸。友视儿，悲喜集。（五解）作诗告亲友，故人今有后。孤儿泣抚膺，父母恩义同高厚。（六解）云惨淡兮风萧骚，金兰折兮青松雕。一歌兮涕沾袍，再歌兮中心焦，君不见任西华、刘孝标。"一结忽作变徵之声，可歌可泣。余每叹世间有事可传、人可传，而为之歌咏者不得与之俱传，为可惜也。

定海应氏，世以贤雄里中，至次耿（烽），祖世业寝替。次耿一字荪舱，为人朴讷，居闾市而有士行，好学博古，度置佳槩，好写书画，碑板甚富。尝挟策游敖四方，所历名都巨邑、海内佳山水殆遍，名流俊士，莫不与交。事母孝，母没，筑心园於金塘故居之西北，志不忘父母之邦，遵遗命也。中有梅石山馆、待雨轩、对山读书楼、印心池诸胜。园经始於癸酉，毁於倭乱。慈溪冯都良（贞胥）嘉其善体亲心，为之补记。余以雪叟之介得交於君，授简投挑，情谊至渥。今春以北魏普泰比丘尼法光造像拓本乞题。像旧为郑叔问（文焯）所藏，后藏崇明童心安（大年）绿云庵，君既得之，榜其室曰法光精舍，其造像文曰："比丘尼法光为弟刘桃扶北征，愿平安还，造观世音像一躯，又为忘父母，造释迦像一躯。愿见在眷属、一切众生共同斯福。普泰二年四月八日造记。"余题云："北魏普泰之初年，并汾河朔兵相缠。尔朱仄败不自救，贺六跋扈成权专。邺城残局已鱼烂，士苦甲冑叽虱缘。刘家有女性孝友，为弟桃扶祈生还。为忘父母追冥福，为众生愿同安全。女也僧尼号法光，造二佛像昭诚虔一释迦文一大士，年虽久远形巍然。龙门造像天下最，而此不载《金石编》。（王氏《金石萃编》）邇来瘞藏多发露，世代陵谷纷移迁。记中桃扶即桃拔，《汉西域传》公休笺。或从双声或叠韵，刺取其一从所便。（《汉书西域传》："乌戈国有桃拔师子。"孟康曰："桃拔一名符拔。"《后漠章帝纪》："月支国这使贡扶拔师子。"曰"符拔"、曰"扶拔"实皆"桃拔"，一物也。"符扶"为叠韵，"扶拔"为双声，则"桃拔"亦可言"桃扶"，无疑也。）辟邪天禄亦其物，宗资碑列南阳阡。（《后汉灵帝纪注》："邓州南阳县北有宗资碑，旁列二石兽，镌其膊，一曰天禄，一曰辟邪。"王士禛《易录》："天禄、辟邪总谓之桃拔。"）古人义取武猛耳，名之假类宜无鲁。忘亡音训本如一，试徵醴辞《绿衣》篇，（《士冠礼》醴辞："寿考不忘。"郑《注》："不奄忽遽尽则忘，即亡也。"《诗绿衣章》："曷为其亡。"朱传："亡犹忘也。"）为文凡五十有七，壬子佛日记厥鏤。（善泰二年岁在壬子）应侯好古得此石，藏以精舍薰沈烟。此石旧为大鹤弃，童氏绿云想后先。昨贻拓本乞题咏，顾我荒陋惭群贤。吁嗟劫运终不灭，玄黄战血盈原川。古今何者非人子，安得生生受护香火禅

。"君仲子可勤，空军中尉，戊子飞机失事殉职，追赠上尉。此诗结穴所以致慨也。

鄞县周岐隐（利川）、采泉（浞）兄弟，俱重然诺，笃气谊，奉化孙翼父（诒）、永嘉赵百辛遣稿皆由岐隐、泉为之印行，扬微挾隐，尤人所难。己卯春，岐隐自沪来商印书事，因留饮瓶粟斋。别后，蒙以长歌见赠，云："兀兀一叟穷而坚，胸有千秋灶无烟。搜诗摘句意拳拳，持论严谨无颇偏。我闻其人见无缘，羌欲从之沧江边。黄浦青浦百里悬，轻车飘瞥箭脱弦。叩门剥啄意甚虔，相视莫逆言不宣。矮屋打头小如船，横溪前横清且涟。煮字为粮石为田，饥卧不死人亦仙。为我沽酒烹小鲜，水阁虚明如坐天。媵以《诗话初续编》，字字万选之青钱。正声徽茫久失传，非古君子道孰肩。缔交私幸托忘年，清语雅不落言诠。尘事催人苦牵，出门一别百缠绵。后会丁宁倘不愆，黄花九月迟吟鞭。"朱弦清越，不务嘈晰。今岁又钞示近作，《过芳草斋赠王芷青女史》云："桑海余生比落花，故家乔木剩栖鸦。春阴如梦诗人老，刻意清吟遣有涯。"自注："芷青为沈文肃公葆楨后裔亮秋之室，工诗善画。""春阴"七字，名隽似玉田词句。《物理有可喻人事者，诗以咏之》云："剔去乌 墨，白晳知凝脂。不贪心自洁，人莫相其皮。""螯性最凶残，鼎铛置以待。螯剖龟亦烹，貌似岂无罪。""鸟恨泉之鸩，人厌泉之音。生儿能食母，母乃是佳禽。"三诗如鲠在喉，得吐为快。采泉诗才清丽，不啻谢家之玄晖矣。《过芳草斋，赠王芷青大家》云："又见蓬莱海作桑，乌衣王谢阅兴亡。梦中蝶化留痕浅，{ 鬢 }上蚕枯织锦香。此日清门余寂寞，晚年黄卷遣悲凉。人间辛苦都尝遍，爱向君家喝枣汤。（大家款客，辄设枣汤。）"佳句如"故家涕泪家初破，泉路亲朋骨已凉"（感怀）、"年换才从窥镜见，春回初自减衣知"（遣怀）、"诗难积稿风前雪，梦不留痕雨后云"（霜夜）、"云敛天光成薄暮，风提海气作高寒"（佛顶山）、"是非休说金缄口，忧患频侵锡灌肠"（和玄冰）、"落地更无随水意，横天留有战霜枝"（落叶）、"苦吟身与戎行似，刁斗声严睡不浓"（苦吟）。

梁溪程君景溪（日动），笃信好学，喜与贤豪长者游，虽托迹市门，而献歌勿辍。顷介果园以所著《霞景楼诗稿》见示，《万卷楼，南宋尤文简公读书处，在惠麓二泉亭上》云："涧松鸣逸响，知奏五弦琴。南渡朝廷小，西神洞壑深。泉甘许廉汲，境静得微吟。千载思高致，风清月在林。"通体骨重神寒，俨然四十贤人也。《暂归》云："妇具珍羞如款客，儿矜娇养竞牵爷。兼旬旅邸寻诗苦，不道诗原在我家。"写初到家情景，与老杜"平生所娇儿，颜色白胜雪。见爷背面啼，垢腻脚不袜。瘦妻面复光，痴女头自栉。问字竞挽须，谁能即嗔喝"数语同一工妙，盖愈琐屑乃愈逼真。可知世间诗料不尽在山林风月也，即家人妇子言笑食饮之间，会心不远，何在非诗？结语揭破真谛，令人恍然。《送黄丽生赴汴》云："尊前折柳动离情，怕唱《阳关》煞尾声。嘶马秋风黄叶路，真成入洛少年行。""云山叠叠路漫漫，置酒旗亭着意看。雁使北来休问讯，轻裘明日过江寒。"亦倜傥有致。句如"簿云和雨寒欺酒，桦烛当筵夜媚人"、《梅园》云："银海看成千树雪，春风吹暖一山云。"皆佳。"银海"句从苏诗蜕出，"春风"七字较伊墨卿"树树梅花乱白云"尤隽永。程氏三代好吟咏，而多非出於咕毕，尤为难能。景溪祖字轸云，讳登瀛，事亲有孝行。少习贾，游湘

赣，遇太平军起，乃依其戚江阴洪氏为木商，以勤苦起家。有日记近百卷，皆端书。诗曰《学言草》。《和履安咏雪》云："一夜西风到处匀，皑皑庭院白如银。饥禽觅食频偷眼，稚子冲寒欲塑人。沽酒乍疑山市改，寻梅忽觉灞桥新。江山如此惊奇绝，踏遍鸿泥认未真。"揣诗意，殆为记时事而作。首联自河山变色景象，次联写避离者流离之苦，"塑"当谐读恕，三联写兵燹时庐舍之改观，末联犹云不知鹿死谁手，故作惆怅语。如此读去方有味，不然，乃一平常咏雪诗而已。孟子言诵诗在"知人论世"，自有深旨。《惠山》云："九龙山下二泉流，岁岁清明记胜游。除却泥人与烧饼，泡茶争坐御书楼。"移他处不得。景溪尊甫颂嘉（宏远），优廪生，肄业南菁高等学堂，服务教育界三十余年。有《宝砚斋诗》，多散失。其《题许芝庭蓉湖秋泛图》绝句云："先生五岳在心胸，小隐诛茅傍九龙。最是年年秋色好，一湖烟水泛芙蓉。"如题而止，颇不费力。甲子齐卢之战，无锡戒严，居民相率远避，而颂嘉处危城自若，有口占两绝句云："迭经忧患已余生，又见潢池盗弄兵。岁晚偏多朋旧乐，同岑相处是危城。""朱门富贵余粱肉，世乱民贫一饭难。等是几茎菜菔菜，清腴味胜大官餐。"素患难行乎患难，非涵养深者，不能道也。程氏谱系，自晋新安太守元谭历世次至景溪，四十六代矣。家世婺源，至轺云先生懋迁苏常间，遂隶籍无锡。

金柏荪（咏棠），住北门，工篆刻，性迂怪，尝慕陈老莲、金冬心为人；方亚琴（锁），住南门，性和易，少从吴兴高濂溪（元廷）学画，工人物写真，然皆清介刻苦。柏荪课徒为生，亚琴卖画自给，顾皆喜莳花。余以有同好与之交，各在三、四十年前，为平生友朋之最早者。柏荪艺兰菊与人，其菊幼苗时蟠其茎於盆，及秋一盆能放数十花，其枝插月季无不活。叩之，则曰："恒其阴阳向背之所置，知其燥湿肥瘦之所喜而已。"殆古人所谓"神入於花，与之俱化"者。亚琴亦善栽月季，盆景尤美，老槎断枋才尺许，拳曲臃肿，有类百年物者。二人未尝致功於诗，而皆好为诗。柏荪有作，匿不肯示人，惟间以示余，辄相与拊掌狂笑。尝见其《题卖布翁醉归图》云："破缴遮头两脚泥，上街卖布买东西。却愁路远归家晚，呷碗烧刀鬼不迷。"稿乱后皆失。亚琴诗颇多，有《忆家园》云："家住青溪柳水东，春来日日看花红。而今不在花红处，花在家园依旧红。"韵复字复，竟无以易之。二诗俗语雅说，各有风趣。柏荪长余十八岁，甲申年卒，年七十四。亚琴长余十岁，今七十五矣，尚无恙。

表兄邹葆荪（尊德），五、七言古大抵托体风骚，顾时流於冗，苟少为删节，佳制特多，惜余无其才也。顷其嗣君循三尽出其《幻园全稿》，委为订定。诗近二千首，为录其精者。《香溪曲》云："采香径畔草凄迷，响屧廊边莺乱飞。溪边未醒鸳鸯梦，吴王一去几时归。""轻烟画舫荡柔橈，山色空蒙弄眉妩。卷麓尚作捧心颦，垂柳犹能折腰舞。""图销歇麋台空，梧宫秋老又春风。可怜呜咽香溪水，并入胥江直向东。"葆荪绝句最饶风趣，《酒家杂题》云："柳丝隔岸低衔水，我饮当初柳未栽"、"举杯一吸须当尽，怕见杯中雪满头"、"留我固佳归亦好，夕阳初月两多情"。《夜泊见邻船女郎》云："相逢何必曾相识，暂作江边一夜邻。"《除夕》云："梦回犹道

来催债，风雪三更乱打门。"《薄暮吟》云："移榻凉扬拂簟来，帘低瞥见石榴开。竹梢翡翠梳翎下，花落墙阴买碧苔。"篱掩垂杨屋盖茅，息机鸥鹭聚塘。廉纤细雨江村晚，帆影时时出树梢。"一抹浮岚黛色添，低含云影媚疏帘。人间已是斜阳尽，犹有微红恋塔尖。"《板桥临溪绿梅》云："狼藉东风琐碎寒，劳人草草泊江干。一枝清绝无人赏，自向春流照影看。"偶句"月出蛩吹墙外笛，雨余蜗和壁间诗"、"秋来身似参禅罢，病后人如遇赦归"、"淡墨自书赊酒券，乱砖都叠护花栏"、"微雨庭前收暑去，好风花外送香来"、"乳燕池塘垂柳暗，鸣鸠门巷落花多"、"水涨顿开鱼世界，泥融易就燕功程。"、"爱眠翻作尊茶论，甯死羞吟乞食诗"、"且食蛤蜊知许事，任呼牛马本无名"，皆有剑南风味。他云："碧藕甘调酱，青梅脆蘸盐"、"矮罐泥封罗汉菜，古盆石养水仙花。"、"点饥自制油酥饺，佐酒新尝水蜜桃"，则大似《春在堂集》中"吴体诗"。余住城南时，葆荪频过半野亭，饮酒看花无虚月。五十后病风，诗多不能手钞，遂多零落。葆荪画学甚深，著有《画话》一卷，其弟湛如有《插秧词》云："鸿初出浴燕衔泥，节遇黄梅水拍堤。向晚秧歌在何处，一蓑烟雨小桥西。"风调亦似乃兄。《别后寄瘦东》云："小别成遐想，高怀抗古今。趣从言外得，乐向醉中寻。诗冷江湖梦，花含天地心。相期常捧手，披链细论文。"情意拳拳。邹氏出忠公浩后，世居无锡，继迁姑苏，至其祖板圃先生，以营钱业赚田宅於我邑，墓庐咸在焉。葆荪继母兼葭泾邵氏，与先妣为姊妹行。

辛卯春，湘中老名士章先生行严（士钊）过沪，将北上，沪上名流闺秀都为饯别。北上后，各有奇怀诗，有友人录以见示者。余爱其《赠周链霞女士》一律，云："江左佳人爱落霞，早惊楚赋出长沙。红裳压坐先揜袖，白社输心旋斗茶。岸远马闻嘶绿草，帘虚人不卷黄花。乌丝桦烛争今夕，奈我空随静女车。"诗为补体，首言链霞才华，次写裙屐敦盘盛况，三纪宴集时所见闻，末联结出惜别之情，章法谨严。而"帘虚"七字，尤为篇中名句。

邵晴岩（晓）有句云："但得读书原是福，也能藏酒未为贫。"随園称其妙。（见诗话卷七）近赵渭舫《咏海上福湖楼》亦云："买书能读方为福，乞米犹艰那得湖。"乞米"句翻东坡"欲向君王乞镜湖"意。二诗笔意相似，然一则辞气春容，自是承平时语；一则词气激切，便为叔世人语矣，所谓"诗可以观"者如是。福湖楼在福州、湖北两路间，故名。金山高卷叟寓庐在其处，而不知者多误求之。故渭舫点"福"、"湖"二字为之解，又续其下云："无以名楼名以此，慰情聊似胜於无。"意盖伤其遇耳。又有《冒雨至福湖楼访卷叟，谈聚甚惧，用谦斋韵为赠》云："心似闲闲境自幽，藏身人海百无求。春风得意宁非梦，吾道称尊此一楼。阅世幸余书可读，知名不断句相投。浮家泛宅寻常事，莫更山庐忆枕流。"自注："卷叟《望江南》词有'山庐好，及'故里且休提'等句。"此诗起结用"人海"、"浮家"、"枕流"等字面，皆所以暗衬"湖"字也，意极静细。渭舫一字苇佛，名祖望，京江名士也。

杨无恙贺人扶正诗云："风前极意扶杨柳，日后无诗及海棠。"扫去"星月"、"牡丹"、"芍药"习见语，而推陈出新，此为独绝。余庚寅为沈姬正闻，和诗颇多。果园云："

洞房堆得花篮满，笑指何如解语花。"又曰："小虹桥畔娟娟月，常照闺人卸晓妆。"风趣嫣然，为时传诵。文无云："家人贞吉占中鲭，名位柔嘉称小童。"笕风云："省却彩舆才免俗，点将红蜡便成亲。"一用经语，如闻旧葡_一香；一用俚语，能使靡芜浓笑。修伦云："老我彭宣腰脚嫩，后堂无分醉芳筵。"志孟云："事业名山应已定，又添新稿付红妆。"则似擅举太过矣，然修伦自是为弟子语。聊止调《鹊桥仙》云："老郎本好，新郎更妙，（原唱有'老郎重复作新郎'句）莫厌镜中霜鬓。诗人迟莫例温柔，且笑把、合欢酒进。姬人本妙，夫人更好，分定先须名正。良缘已属掌书仙，想邂逅、无愁邢尹。"谑而不虐，为之解颐。

张船山诗："丈夫原不受人怜。"邹葆荪云："宁死羞吟乞食诗。"然此事谈何容易。其实饥而乞食，常事耳，能生受而生报之，斯亦於心何疚？若絮酒只鸡已冥报矣。然究愈於负恩者也。梅村云："古来贫贱难自持，一餐误丧平生守。"随园云："人生惟有平时恩，如螯戴名蚕含怨。"皆於此处踌躇感慨如此。

拙编《瓶粟斋诗话四编》下卷又告出版。惟是上、下两卷，凡襄助、校讐、接洽、印刷，皆由戴果园、徐仲采两先生分任其劳，两先生诚笃恳款，乐成人美，一可感也；聚珍匪易，刻楮亦难，幸知交为缟素之投，美人有错刀之赠，乃得乐观厥成，二可感也。鄙人学识谫陋，方藏拙之不暇，何敢妄下雌黄？第夙好操觚，以为犹贤於博奕。乃上卷越缙、樊山师弟倒置，未免为通人嗤点，是固无可讳者。嗣后如有匡我不逮，当拜嘉言，且此意於《诗话》中亦屡有表示，若少陵所谓"当面输心背面笑"，则非所以爱我矣。《五编》仍在纂辑中。壬辰十月，瓶翁跋。

瓶粟斋诗话五编

●五编

《诗人玉屑》一书，亦诗话类也，言诗者皆知之。书为南宋魏庆之著。庆之字醇甫，号菊庄，闽建阳人。首有淳佑甲辰玉林黄显（叔阳）序，略言“自《三百篇》、《骚》、《选》而下及宋诸公之诗，名胜之所品题，有补於诗道者，尽录之”，又言“醇甫有才而不屑科第”。序中引合学游公受斋先生云云，按受斋，建甯游九功也，九言弟；九言字默斋，《宋史》皆无传。淳佑，理宗年号。显亦闽人，玉林其号也，又号花庵词客。早弃科第，以诗受知九功，时以泉石清士目之，有《花庵词选》俱见《福建通志》。“显”乃升字篆文，语详《四库提要·词曲类·散花庵词》条下。书凡二十二卷，楷字精刻，实为明覆宋本出，故於宋朝讳皆空一格。每卷列“明胡文焕德父校字”一行。文焕，钱塘人，善琴。书之编制，先标大字为纲要，次条列其目。卷一曰《诗辨》，首取沧浪禅喻，谓“汉魏、盛唐为第一义，临济下也；大历之诗落第二义，曹洞下也；晚唐则声闻、辟支果也”。其说空洞玄奥，为说诗者之魔障。五、六两卷曰《风骚句法》，乃巧立“嫦娥奔月”、“公明布卦一洛神凌波”、“挂印还乡。诸名目至百数十之多，直类优人剧单，阅之如坠五里雾中，尤堪发笑。惟八、九卷所采诸家诗说尚多可从，序云“有补诗道。者，仅此耳。十三卷考证亦赡博。十五卷以下，则为两汉、六朝、唐、宋诸家诗矣。末卷附释道、闺秀、仙灵之作，而殿以诗余。其所论列，大都摭拾诸家诗话中语，支离烦碎而已，则无所发明，所谓“得玃羽而失鹏鲸”者也。然山林隐逸、畸人贞士赖此见者不少，此可取耳。

余《诗话·四编上卷》录袁君安圃诗，略及其先世明嘉靖间吴中袁氏有“六俊”之誉，而志山先生讳裘，行居六，遣有手书诗稿真迹。顷承袁君以影印本见示，凡古、今体诗二百余篇，盖其晚年手自选存者。王西庄跋谓其“词秀调雅”。余谓其五言律高淡闲远，功力尤深，故其所录独多。《再送子行兼怀谷虚兄》云：“抗手与君别，问君何日还。壮游瞻魏阙，明发动吴关。杯酒花前雨，片帆江上山。官衙春画永，休沐想清闲。”《登静海寺玩咸亭》云：“与客遇兰若，逢僧开草亭。洞阴风瑟瑟，苔润画冥冥。淮水寒流碧，江山暮岭青。偶来消俗虑，聊尔听谈经。”《辛亥腊八日过宝华山中，见梅花烂开，折赠沈白浮，兼赋短律》云：“寒日依岩曲，梅开讶早春。因之怀驿使，聊以赠山人。闭合成诗易，巡檐索笑频。知君吟榻上，清夜落香尘。”《过清凉寺东江亭》云：“夹道围苍柏，平桥俯细湍。竹光侵坐湿，江气入亭寒。雨霁奇峰出，云深法磬残。断碑苔藓积，读罢一凭栏。”瞳园谓“诗有通体佳，而不以一联一句见长”者，此类是也。偶句如“竹密鸟窥院，虚山近人”、“木奴庭下橘，草圣壁间书”、“扫榻云移近，开帘月上初”、“小宴不妨淹秉烛，暮年相见劝加餐”、“人日已过梅径白，客星常聚草堂清”，多可书作楹帖子。先生书法锤王，此稿真行相间，弥为可爱。明末有讳于令者，字药庵，为四俊卧雪先生褒曾孙，安圃从十世祖也，官荆州守，以《西楼记》、《玉簪记》、《金锁记》等传奇著名。安圃出三俊谷虚先生褒后，少时亦善音律，夔弄昆曲，为古娄俞宗海粟庐、吴中吴梅（瞿安）弟子。

余《诗话·初编》，偶与名山翁讨论诗有所谓“辘轳体”、“葫芦格”者，引诚斋诗为例。而不谓吴樵翁竟遍检《诚斋集》，抄其诗题见示，谓“有前三同韵末押通韵者，如葫芦倒悬；又有前后韵同而中一异者，如葫芦之腰，殆皆‘葫芦格’之变。可见律诗在宋已起变化”云云。余不欲没其耄学苦心，且为好学“诚斋体”者便於检查，为抄存其目：《城上野步》（卷十一），《中秋病中不饮》、《重九日雨仍菊花未开》（皆十四），《奇题刘凝之坟山壮节亭》（二十三），《碧落堂暮景》、《明发生米市西林寺》、《小憩土坊镇新店》（皆二十五），《送颜几圣龙学尚书出守泉州》二十六，《与长孺共读东坡诗》，《嘲淮风》、《过淮阴县题韩信庙》、《过鹭社诸湖》（皆二十七），《题龟山塔》（二十九），《过若山坊》（三十三），《咏绩溪道中牡丹》（三十四），《自金陵得郡西归舟中望九华山》（三十五），《万花川谷海棠盛开》、《四月二十八日祠禄秩满喜罢》（三十七），《雪后奇谢济翁材翁联骑来访》（三十八），《夏日小饮分题得菱》、《九日招子上子西尝新酒》（皆四十一），《再入城宿张氏庄早起》、《寄张功父姜尧章》、《雨霁看东园桃李行溪上》（皆四十二），以上题有辘轳进退格字者。《丙戌上元后和昌英叔李花》、《又和闻蛙》、《贺澹庵先生胡侍郎新居落成》、《和昌英主簿叔求潘墨》（皆卷三），《袁州路遇雨》（卷四），《换郑恭老少卿》、《和庆长怀麻阳叔》（皆卷五），《罗元通挽诗》、《罗价卿母李氏挽诗》（皆卷六），《题吕子明国谕退庵梔子花》（卷七），《雪晴》（十一），《早炊杨家塘》（十三），《克信弟坐上赋梅花》（十四），《社日南康道中》、《三月一日过摩舍那滩阻雨》、《晨炊光口砦》（皆十五），《风雨》（十六），《督诸军求盗梅州宿曹溪》、《野炊白沙沙上》（皆十七），《招陈益之李兼济二主管小酌》、《醅醑》、《跋姜春坊梅花诗集》（皆二十），《归途观刘寺新叠石山》、《李仁甫侍讲阁学挽诗》（皆二十二），《谢张功父送牡丹》、《侧溪解缆》（皆二十四），《初夏玉井亭晚立》（二十五），《待家酿未至且买姜店村酒》、《题十里塘夜景》、《船过砚石步》（皆二十六），《兰花五言》（二十五），《柳絮》（三十一），《山村》、《入建平界》（皆三十二），《题王亚夫检正岷湖堂》（三十三），《风花》、《新路店道中》、《过主岭》、《过胡貉坑》、《宿黄土宠五更闻子规》（皆三十四），《午憩马家店》、《猎桥》、《午憩坐睡》、《送丘宗卿帅蜀》、《舟至湖心望豫章西山》、《阻风乡口一日诘朝船进雨作》、《过池阳舟中望九华山》（皆三十五），《喜雨》、《雨后子文伯庄二弟相访同游东园》、《夏夜诚斋望月》（皆三十六），《题子文弟南溪奇观》、《朱伯勤同子文弟幼楚侄来访书事》（皆三十七），《贺张功父寺丞新长凤雏》、《腊前月季》（皆三十八）；《谢淮东漕虞寿老实文察院寄诗》（三十九），《同刘季游登天柱冈》、《夜饮》、《送族弟子西赴省》（皆四十），《瑞庆节日同王式之诣云际寺满散》（四十一），《赠临川严泰伯秀才》、《病起揽镜》（皆四十二），以上题无辘轳进退字而格同者。又卷二十六《过金台望横山塔》“东东冬冬”，卷三十四《安乐庙头》“元元寒寒”，此即双出双入格矣。又猥以数疑端见质，云：“诚斋《跋符发所录上蔡语》云：‘符君天秀擢炎方，茧足担簦学北方。’”（卷三十）。《积雨小止暂到东园雨作急归》云：‘咫尺东园十里遥，欣逢小霁略逍遥。’”（卷三十七）。韵皆连押。“余谓字同而义异，古人

不避。《诗人玉屑》已历举之，惟皆古风。"炎方"、"北方"，义同而势顺，故趁笔。《公无渡河》、《垓下歌》两句皆"河"、"何"韵是也，所引杜诗"前年渝州杀刺史，今年开州杀刺史"例同，又"顾泰"、"瞻岱"。"诗集中"郎如青铜镜，妾似芙蓉花。将花持镜照，知镜喜新花"，韵全首不易，似创。"余曰："唐人送兄诗：'别路云初起，离亭叶正飞。所嗟人异雁，不作一行飞。'有先例矣，非创也。"余腹笥空虚，原不值一叩，樵翁得毋嗤我为强解乎？

又云："杜诗：'恰似春风相欺得。'引陆游诗话：'白乐天'为问长安月，如何不相离"，乐天用"相"字多作思必切，读入声，似本杜句。"余谓诗之音调，本如词曲之入律谱，或平或仄，求其叶宫商而已。"相"在此处自当读仄，谓"相"有平仄二音，非也。唐诗"红阑三百九十桥"、"南朝四百八十寺"，"十"字不能不读平，与此同例。唐人律句多第三、第五字。而元遗山颇多第六字，如"邻村烂漫鸡黍约"、"春波淡淡沙鸟没"，"黍"字、"鸟"字原无平声，然欲求其声之扬，亦不妨读平。

归人描写到家情景，随园云："钱塘到家近，心急路转遥。。郭频伽云："约略近家心转急。"近人祥符周季贶星贻亦云："近家心转急。"皆不如我家锐卿公树铎"家近觉舟迟"五字，为简明而不费力也。

诗太刻画，非纤巧即费力。梅村云："江远去帆如不动。"不及唐王湾之"风正一帆悬"；张子野"云破月来花弄影"，不及韦应物之"流云吐华月"；唐诗："山僧不解数甲子，一叶落知天下秋。"不及陶诗之"虽无纪历志，四时自成岁"；秦伯未"一春多雨虚佳日"，不及嘉兴李宾日之"一雨尽春声"。宾日名寅熙，见频伽《诗话》。

余前评江翊云先生诗妙造自然，颇近其乡人林古度。林诗《入白门》云："依旧客情无别绪，逢人都问武夷山。"《浔阳送正汝》云："明月中秋九江水，愁人无暇作乡书。"然渔洋《居易录》言其诗集皆为锤谭所丹黄，乃为删其甲子后诗，殆尽以其濡染楚派也。《诗话》又载其《芳草诗》，云："春风催百卉，草色相侵。到处没马足，有时惊客心。遥连空汉上，远漾碧波浔。独有明妃冢，青青恨至今。"此诗机轴，全效乐天"离离原上草"一首，不知渔洋何以取此？

乐天云："天下无正色，悦目即为姝。"荆公亦云："文章如女色，好恶只系於人。"（《诗人玉屑》卷十九）

武进庄通伯，以余《诗话》尚无外国人诗，因以朝鲜申紫霞诗集见示。申氏名纬，字汉叟，紫霞其晚号也，平山人，世为汉京贵族。诗初曰《警修堂集》，后经其国人花开金沧江（泽荣）选印时易之。首有金《序》及金撰《年谱》，中谓："我东之诗，以高丽李益斋为宗，益斋之诗，为朝鲜三千年第一大家。而本朝宣仁之间，作者有李紫峰、车五山、许夫人、权石洲、金清阴、郑东溟诸家，大抵皆主丰雄高厚之趣。英庙以下，风气一变，如李惠寰、锦带父子、柳冷斋、朴楚亭、李姜山之伦

，或主奇诡，或主尖新，其一代升降之迹，方之於古，犹盛、晚唐焉。紫霞生英祖晚季，直接姜山诸家之踵，初学盛唐，后改学东坡，时出入於王摩诘、陆务观之间，为我韩五百年第一大家云。"述本国诗人及源流派别如数家珍。朝鲜，古箕子封国，汉时为三韩，故又称韩国。汉末有扶余人高氏据其地，因改国名曰高丽。五代时，国王为王氏。明初，李成桂篡之，仍曰朝鲜，传至今世，为中国外藩。序中或曰"朝鲜"，或曰"高丽"，盖以时代言之；曰"本朝"，指李氏也。紫霞诗温润缜密，故为海外之雄。如《广岩路傍小憩赏花作》云：谁家量笏园，覆茅如笠舍。纺车响隔，客至无人迓。门临车马道，庭植自姬姪。芍药稚扶栏，蒲萄狂上架。玫瑰出篱外，明妃愁远嫁。碧桃浅淡妆，文君方新寡。杂英颇细碎，脂粉矜艳冶。小松栋梁姿，退然意待价。借坐深静观，须臾鞍马卸。经眼即我有，久已忘真假。"深得坡翁法乳。《贝勒巴多尔济求扇》诗云："风飘法曲度华茵，万岁声长放鹤辰。仙侣逶迤同荡桨，御厨络绎几分珍。贪欢偶值佳公子，饱德何安远道人。最是西园飞盖夜，镜天花海梦中身。"亦有唐人冠冕气象。按《年谱》纯祖十二年壬申，奉命入清京。即乾隆十七年也。其他新簇可喜者，《闰六月十五夜月极明》云："明月寻人直入房，原无约束绝商量。那堪睡熟更深后，独转回廊过短墙。"又曰："万家楼阁人初定，管领宵光是百虫。"又曰："只恐冰轮无出处，凤城鱼钥锁沉沉。"又曰："须眉照影清如许，早已将身卧月宫。"《秋柳》云："只恐秋光无处着，水边黄柳陨霜初。"又曰："每年柳絮飞时节，不待悲秋已是秋。"《柳絮》云："剧旖旎时光丽歉，奈缠绵意不分明。不为莺巢工借暖，偶黏蜂蜜化成甜。"《西江》云："重来照水愧华颠，不见西江二十年。洗尽一春桃李眼，野人篱落菜花田。"《小园绝句》云："石榴红与海棠红，猩血燕支染不同。衬出一庭官绿色，苍苔雨湿夕阳中。"。"涝以青松蒸石翠，乱云堆里杜鹃红"，此画家渲染法也；"卧溪杨柳压篱杏，妆点黄茅八九间"，此画家饰景法也，自是有声画。律句佳者云："夜水肥知帆影凸，晓花晴觉鸟声工"、"鸣鸠唤妇妇嗔雨，乳燕哺虫虫打人"、"社酒醪钱鸠杖集，渔照字蚌灯光"、"溪女笑时花侧鬓，野僧归后树参云"、"芦笋特长随过母，莺雏生小自呼名"、"觅句不须寻纸笔，溪边恰好细沙书"，皆剑南家数。有似太白语者，云："天地大染局，幻化何太遽。丹黄点飘莛，红素吹花絮。"有似昌黎语者，云："治心剪葛藤，窥古理灰烬。"集中异称，如年月曰"年条"、周甲曰"回甲"、棺曰"魂宫"、禁中曰"内下"。又《年谱》云："以正庙时与於抄启文臣之选，加一资，得进嘉义阶。"抄启文臣，殆如翰林院学士；"一资"，犹一级也。紫霞兼工书，尤善墨竹。入都时，翁覃溪一见倾倒，因书《警修堂》篇赠之。呈嵩梁、端木国瑚等多与唱和。

紫霞《读东坡和陶诗》云："子瞻百谪荣达人，渊明一生枯槁士。口气於此判不同，《和》陶诗果似不似。"又曰："区区执迹可论士，礼乐钟鼓玉帛云。二公为诗本无诀，玉堂束篱浩一源。"杜陵评诗语其至，阴铿庾信鲍参军。"自注："阴何苦心，何关李白豪放。庾子山、鲍明远之比，亦可以类推。透此一关，可以论人、可以论诗。"言当求其志趣，不在体貌之同异也。其论绝高，锤记室之说可废。

清末金氏流寓南通，境颇困而操节甚坚，张啬庵师极爱重之。啬师《文录》中载有

《朝鲜金沧江刊申紫霞诗集序》，今诗集无之，因节录於下云："沧江於紫霞之诗，可谓有颦嗜者矣。比与余书：'子方劫劫然忧天下之不活，而仆忧一诗人之不传，度量相越甚远。'余语沧江：，活天下难，若子传一诗人，亦不易。'相与大笑。世变之棘也，举天下之人，方将视易色而听易声，年少子弟瞽焉；方将攘臂蹀足，刳狗中原之文物，何有於诗？夫诗固养生之术也。人之生，宣郁必噫，吐怀必鸣，诗以美其噫与鸣云尔。人情宁有不愿闻噫与鸣之美而喜其恶者？欧人为诗，乃必专家。人之欲宣其郁而吐其怀者，悉属之代为诗，以寄其噫与鸣。然则将胥天下之性情而活之，诗其一矣。光绪三十三年丁未，金氏遇南通，与申氏遇大兴亦先后辉映。"

京师崇效寺牡丹、极乐寺海棠、法源寺丁香，为旧时朝士清流游观觴咏之所。李蕤客有《己卯看花》绝句二十四首，余所谓"诗好多为佛寺游，花棚藤架惬句留"者也，为录其十绝句。"海棠百树列东西，红萼干枝点缀齐。谁识画廊回绕意，独来花下解偏提。""晨旭猩红万点葩，夕阳皆展碧城霞。不须羯鼓唐宫法，一杵斋钟已放花。""高度金轮足十寻，花身量比玉杯深。端相恨乏边鸾手，写上吴娘软绣襟。""出寺苍然对远山，凤城又见折花还。独行理咏平生惯，不似今年此日闲。""隐几清风松下生，偶来鸟雀绝人行。花阴一缕茶烟湿，刚与诸天界晚晴。""欲赏城东下泽车，天宁去探牡丹芽。山姬为语春衣尽，且自关门数落花。"手种朱藤一架余，葳蕤深锁子云居。清香满院无人至，日坐花间勘异书。""消得余春十日闲，（见平声）绿阴如水动轻纨。不须乞米还书帖，一顿藤花足饱餐。""红药丰台尽入城，满街喧听卖花声。乱书堆裏香重叠，插遍瘦壶折脚铛。""长日闲居待细论，李桃结子竹生孙。一年花史编诗讫，朝事从他到耳根。"放翁《春时游诸家园》诗专咏海棠，此则诸寺花木多有之。陆诗豪宕，李诗冷逸。

应君荪ぎ（烽）以冯君木（开）《回风堂诗文集》、陈无邪（训正）《天婴室丛稿》寄示，二君皆慈溪人，负文望，时有"冯陈"之目。冯集首列《前录》二卷，为其十六至三十岁所作，自为删存；《回风集》七卷，乃没后天婴为之厘定，合前后诗五百余首、文八十篇，民国辛巳活字印行，天婴等有序弁其端。回风，光绪丁酉拔贡生，官丽水训导，改宣平教谕，未行。三十后，栖迟里闾，与天婴及陈晋卿（镜堂）、郑念若（光祖）、冯汲蒙（毓孳）、应叔申（启时）、钱仲济（保杭）、魏仲车（友枋）、姚贞伯（寿祁）诸子结剡社，以气节学艺相砥砺。颇局脊危时，侵寻贞疾。忧生念乱之言，十居七八。年五十九卒。其诗，古风胎息魏晋、六朝，间亦染指温、李、昌谷诸家；近体办香江西，大抵蚤年诗清婉秀逸，中岁最警健，晚年多应酬，不无颓唐之作。录其《伤心谣》，云："去年苍天死，泪海荒荒流不止。今年黄天立，鬼伯虚空闻太息。雌雷压顶逋厥魂，攀天偃蹇天无门。王虺夜哭忽不见，照眼桃花烂秋电。"《为徐朗西题寒鸦荒冢图》云："婵娟三尺桃鬟红，娇莺稚燕声在空。美人含睇花玲珑，黏天贴地皆春风。""桃花一夕变枯树，下有深深埋玉处。莺耶燕耶渺何许，但听老鸦作鬼语。"《申江候潮》云："潮落舟低闸，天空月下城。笙歌两岸雨，灯火一江晴。亦觉此间乐，难为遥夜情。思乡清不寐，明发又长征。"《喜句羽自鄂至》云："惘惘经年别，相逢倍眼明。眉横楚天碧，诗带汉江

声。阅世增萧瑟，论文觉老成。吾心久无着，为汝发深情。"《寄天婴》云："去作杭州客，飘零称汝才。江山清可念，诗句淡能哀。"《不死》云："死亦寻常事，其如不死何。将愁支旦夕，无意惜蹉跎。久病人同弃，余生累尚多。一杯知所息，扶眼望山阿。"《余姚》云："湛湛江水清不埃，令人却忆黄南雷。大贤此地所生长，昔岁今朝曾到来。载酒风尘仍故我，感时怀抱向谁开。推篷一读《明夷录》，回首人间亦可哀。"《同厉虞卿同年（玉夔）登陶然亭》云："残阳疏柳隔城闉，暇日登临客感新。终古危亭此秋色，近来长句属何人。酒尊惘惘依空旷，意思萧萧出苦辛。憔悴京华吾与汝，但飘涕泪落烟尘。"《有感》云："西湖居士骨应槁，宛丘先生屋打头。但觉襟裾非俊物，可堪出入有奇愁。唤回天上述离罗，招到人间飒沓秋。十丈金风肯相借，愿吹心泪滴沧洲。"《春日杭州寄妇》云："劳歌草草惜华年，晚晚春阳只惘然。念汝人间又天上，相思树下即门前。故山芳草生哀怨，燕寝清香隔渺渺。识得佳人词笔苦，夕晖红到鹧鸪天。"《遣兴口号》云："荐绅先生难言之，婆娑府县欲何为。陶潜毕竟可人意，一首光明《乞食》诗。"平生本无肉食相，天下自有利齿儿。朝朝笼手看山色，此意时人那得知。"《旅病杂诗》云："东屋嘈嘈箫笛声，西屋切切箏琵琶。病夫别有闲思想，梦倚白杨听老鸦。"姑射仙人瘦不肥，胃肠如雪映朝晖。九天咳唾随风落，散作桃花片片飞。（玻 咯血，其色绝丽。）"以上所钞律绝，皆摹双井之神。其他佳句可入主客图者，五言云："排愁成寂寞，存想到苍茫"（《雨夜上海旅店》）、"吟多增茗思，话久费炉烟"（《重九日石蚕冒雨过存留连竟日而去》）、"叶坠关冥想，云飞剩独看"（《迟巨摩不来》）、"意悴花能识，思深雁与沈"（《独处》）、"夜游良有以，日饮更亡何"（《吴缶翁、姚虞琴招饮晨风庐》）；七言云："狭径秋深风走叶，短廊人静月扶藤"（《客夜》）、"情无可遣惟孤坐，病已难堪况异卿"（《秋夜病中寄内》）、"酒边堕月无情碧，眉外残山有限青"（《弹指》）、"傍山湖水阴阴黑，出树墟烟的的明"（《岁不尽二日与石蚕踏雪东山》）、"草树飘凉生夕气，肺肝将病入新秋"（《医院与句羽夜坐》）、"亲故渐看无好境，人生何苦到中年"（《返里视亲友》）、"直欲呕心空四海，坐看缩手了千年"（《返里视叔申疾》）、"脑盘芒踢龙蛇气，腹有瞿塘水石声"（《胸腹患作》）、"春盘嫩火消佳夕，小雪深灯映薄寒"（《岁暮集江上楼》）、"中年日月为欢暂，末世文章适性难"（《答李审言》）、"未免有情谁复遣，此间得趣少弥佳"（《戊辰新岁次未林太史韵》）。时吴兴朱古微、桂林况夔笙（周颐）、长沙柱子大（颂万）、安吉吴昌硕（俊卿），并世名宿也，皆推重之。散原老人为之铭墓。

天婴著作，乙丑以前所印谓之（前辑），余未之见也。此为乙丑至庚午，年六十所作，曰《塔楼》、《北迈》、《圣塘》三集，则诗、文、词杂羈者；曰《缆石秋草》，纯为诗；曰《缆石春草》，纯为词；曰《缆石幸草》，纯为文；又有词曰《未丽》、《吉留》、《紫英》三种，总谓之《天婴室丛稿二辑》。录其《旅次青岛》，云："吾生好冥游，落想穷天外。仙瀛与神都，闭目往往在。传闻有青岛，著胜冠东海。昔者梦过之，习睹恬无怪。谁知佳山水，心窄不受载。悬摹已多奇，躬历始欲骇。吾来当炎月，天地常苦隘。此岛何清凉，耳目时为快。沆瀣塞四海，草木都

春态。入市断嚣闻，飘风苔天籁。泉澄碧於酒，山浓青若黛。征人道其间，襟屐自忘惫。忆昔秦嬴氏，遵海曾东迈。仙山望不见，鲍鲸沙丘待。吾今亦何幸，车马少烦殆。飙轮若搏云，靡远勿吾届。垂老作壮图，放览有余慨。道涂结生平，兹游会当再。"五律发端佳者，《孤往》云："出门辙孤往，莽苍适吾踪。极意寻幽径，回头得乱峰。"《雨后江村夕眺》云："一雨虫声出，秋生万树颠。湿空流夕翠，暝色动高蝉。"皆有杜味。《胶莱道中》云："胶莱河畔草烟平，万里沙头日色明。牢落天心照荒土，混茫海角倚孤城。燕台古木秋风早，郑谷残禾石马横。闻道此邦真不夜，至今陌路戒鸡声。（戒鸡，坡名。）"《登千佛山四览有作》云："千佛山头看落晖，东南有雀正飞飞。征云目断吴天碧，旅草风吹大野低。半谷人声巡骑至，满城鞞策放营归。昏途戢戢牛羊下，万点苍烟带夕扉。"《湖山杂咏》云："十月桃花六月霜，传疑传信事荒唐。如何秋眼分明里，一路西风放海棠。（山行见野棠盛开。）""陌上花魂不可招，钱王艳迹黯然销。而今铁弩无才思，日日江头逐野潮。"《归自圣塘》云："落木千山云失据，荒郊独客月同归。"此最为天婴诗之高朗者。余谓天婴文动宕，不似回风之奥蹟；回风诗生新，不似天婴之刻琢，犹之元白同为长庆体，而面目不同也。如云："槛外夕阳一萤死，烟边归鸟万山啾"、"烟喧水荻生初白，叶落山枫失故朱"，则真呕出心肝矣。集中《金虎》乐府，以成於丙寅而名。自言时多忌讳，动招嫌怨，故一事一名，深自韬匿。诗陆离光怪，迷其所指，然虽不能名其器，亦自知为宝也。以篇多未录。天婴字杞怀，一字玄婴，光绪壬寅举人，留学日本。清季与从弟布雷主《天铎报》、《商报》笔政，历任杭州市长、民政厅长等职。著述宏富，有《读礼籀记》、《睨言》、《睨林》、《甬语名谓攷》、《泽畔吟》、《岁寒述学》、《掖县志》、《鄞县通志》、《定海新志》等。卒年七十二。

孙景初言："粗茶淡饭饱即休，不贪不妒老即休。"山谷曰："此安乐法也。"东坡亦云："醉饱高眠真事业，乃知书空咄咄、鼓缶呜呜，皆非处世存生所宜。"雪叟《和凌晏翁庚寅除夕》云："片砚胜十亩，无虑蹊牛者。鼎鼎百年来，门风著清雅。"自乐道安素语。雪叟年十五成诸生。又云："尊边斋暂开，香前佛频礼。犹存严陵裘，并无彭泽米。"自谓晚耽禅悦。又暑月畏风，而凌赠诗有"闻披五月裘"句也，自养晦安贫语。晏翁亦云："循分各安贫，习让谁谄斗。一笑指颠毛，有银早自首。"亦是淡泊忘怀语。晏翁曾任银行经理而贫，年六十余，能诗画。"有银者自首"，近事也。

名山先生诗全以理胜：古诗鞭辟入裹，味淡而腴，而摹写人情物理，芬芳悱恻，得怨悱之遣，此为独绝；其次为绝句；又其次为律句。近吴樵翁以遣集四册见饷，木板聚珍本，乃其程氏为之印行者，都古今体诗十三卷，而别以长短句殿之。兹最录如干首，以见其诗自成家数也。乳雀云："乳雀羽未成，学飞堕不起。女孙喜得之，抚字意良美。雀母时来观，呕食常对觜。见人复惊去，疑我非君子。小庭无树阴，日暴忽憔悴。老人翔知医，饮以清冷水。岂知须臾间，足直眼双闭。女孙太卤莽，弃之入朽秽。谁知老雀来，反复更巡视。昨夜复今朝，其来未有已。校一无悲声，岂不知其意。谁无父母心，生死长已矣。"《饮僧冶开茶》云："上人龙井来，饮我

明前叶。谁云滋味近，曾及春天雪。气清不须苦，味淡何用涩。颇似五柳诗，悦心在恬逸。寻常一瓯绿，芽尖几百摘。何功还造化，残此颖秀质。当使洁性情，不惟濯诗骨。用之醉饱余，天意良自惜。""悦心"五字，殆先生自道。其诗下半首有胞与为怀气象。《访熊浪仙》下半首云："君虽老病气能豪，惜我名字藏蓬蒿。我时微笑不可语，举头惟觉青天高。晓击湖心冰，夜踏湖上月。莫但围炉费拨酷，犹能解带凌空碧。千年所学无一长，惟有耐寒君不及。"放旷似太白。放眼云："放眼青蚨去，临时莫惘然。从来愁苦意，不是为无钱。"《明月》云："买珠厌珠黄，看花惜花谢。明月下弦时，不及初三夜。"即"夕阳无限好，只是近黄昏"意也。《符离》云："淮山点点水淅淅，此地年来足鼓鼙。青史几多如意事，一天残照过符离。"《老梧》云："大叶能为一院阴，落花不要人家惜。当年何限碧桃花，玛瑙殷红久消歇。"《夏水大发鱼罾设焉感赋》云："世事冥冥未易知，几多涸辙慕天池。岂知一夜逢罾网，正是江湖水发时。"以上三诗皆有所指，而《符离》尤婉而多讽。《咏陶》云："西畴归去酒盈尊，菊满东篱柳挂门。我忆柴桑似天上，柴桑犹是忆桃源。"《梧叶》云："梧叶苍时子满身，紫薇碎落画楼阴。疏篱一夜清秋雨，浓煞瓜花朵朵金。"《十月菊》云："一竿红日上东隅，漠漠轻云散太虚。十月黄花浑不健，夜来小雨要人扶。"《郭门》云："郭门酒罢更闲行，吹面东风醉复醒。莫道东郊无韵事，蒲花开满栖舟亭。"咏史诗亦多精卓，《陶宏景》云："山中宰相住茅山，踪迹皇都咫尺间。若到罗浮天姥去，君王何处问神仙。"《贬阮》云："已经司马门前客，那有胸中暑块来。"骂尽一般充隐名流。《读温公集》云："熙丰新政太纵横，海内贤豪意未平。亦有小园名独乐，不须开口骂渊明。"《哭谢柳湖》云："伤心儿女离爷惯，不改长年笑语声。"《阻雨黄山慈雪寺》云："莫道人间幽绝处，泉光如雪照人来。"言"笑语"愈觉可悲，言"泉光。正见幽绝，皆用反笔，尤佳。《咏九龄儿》云："何必文章惊海内，乃翁四十作村师。"此与余《香花桥开学谣》"读古人书数十年，瞰饭之地乃至此"貌异心同。先生咏忠孝节烈事，无不蹈厉奋发，惟於时事则往往过於激切。其《自题名山集》云："轩重叠碧云堆，一卷《名山》手自开。莫向寥天唱清角，九秋风雨逐人来。"余亦题云："梦寐陶诗与《楚辞》，孤怀千载有谁知。《名山》一集愁开卷，天气严寒欲雪时。""世间怪异可胜书，笔挟风霆快一舒。幸是名山九年死，不然孤愤又何如。"盖先生甲申年没也，集中有《孤愤吟》，故云。番禺汪憬吾（兆镛）有赠先生句云："呕心文字千秋泪，希发阳阿一代人。"平生风范，十四字尽之矣。律句如。诗高亡国后，气尽白云边"（死去）、"两朝前进士，十步小人家"（《桃源杂句》，按此谓寓居海上之桃源村。）"沙净正逢前夜雨，风高不动上方云"（《玉皇顶》）、"友如霜叶存逾少，诗似秋花色不妍"《病起》、"旧梦转疑成实事，亡害原只在当前"（老态）、"见猎都无堪喜事，观棋已到不言时"（甲戌《新春》），皆名隽。集中《伤静芝》为哀其女甥吞磷火而死作，效《孔雀东南飞》；《韩娥行》为某尚书死后，其女沦入乐籍而作，效长庆体，以限於篇幅，不备录。

名山诗，佳处在能达情适意，不为吊诡艰险之言。其《论诗》诗云："《湘灵鼓瑟》数峰青，幽意寥寥画不成。读遍唐人三万首，诗情谁似考功清。""白傅清通自尔奇，涪翁生硬未堪师。"又云："遣山笔力高千古，不及云林字字珠。"晚年尤好放翁，

如云："谢家池塘春草生，李白芙蓉出水清。惟有山阴知此意，文章原本是天成。"尝讥学江西派者，云："人世希逢盖代珍，江西诗派枉求新。海中明月原难得，辛苦沙头拾蚌人。"其诗自负甚高，尝云："平生快意事，诗句高一世"（岁暮）、"八百年来风雅尽，尚将诗句接山阴"（《散学得句》），《示览》云："名山诗句高千古，莫遣黎丘诳尔曹。"生平不喜和人诗，故《读乐天集》云："乐天篇什滥，十九和微之。岂有金玉音，沿街互唱随。"《选诗》云："和韵重重浑未读，难将死罪告苏黄。"其与余论杜，谓"杜多生硬句法，时未圆熟。宋人一代诗，大都为所误"，有句云："诗贵清通始是才，不教后学费疑猜，莫将遗恨吞吴句，苦待东坡说梦来。"余尝谓古今诗体虽源分派别，要不出词胜、理胜工途：词胜者喜浓至，然苟天机滞钝，则涂泽堆垛，真灵全失；理胜者喜淡朴，然使襟怀不超，则吐属凡近，风骨何存？譬之熊掌非不膏厚也，鱼腹非不鲜腴也，寝假烹炮失宜，则有胶膩燃姑之厌。六朝迄唐，颜、庾、温、李，熊掌也；陶、谢、王、孟、韦、白，鱼腹也。其浓淡得中者，李、杜、韩、苏数家而已。故学诗须有天赋，又须能悟，才到圣处。

先生好胜游，凡吴越名区与夫匡庐、泰岱、黄山、雁荡无不至。好蓄人间希见之书，好自印其诗文杂著。木字活板，惟常州所独，先生岁必印二三十叶，先后成七集，集四册，皆资之修脯。七集以后，值倭难，或铅印、或油印，不复整齐矣。今程氏所印无序文，是否为先生手订，或他人选定，不可知也。丁卯，余四十生朝，辱先生过我，信宿。时盐城汤正智，小贩也，从余游，慕先生学，来谒，并助印书金。别复赠以诗曰："太湖樵子谈王道，青浦摊头读古书。香草香花湘水上，春风乐死楚三闾。"太湖樵子"姓殷。又有《之青浦望小昆山张闻远先生隐居处》云："戴发笈经苦节凶，小昆山远见高风。首阳只在云间路，数到东南第九峰。"亦他年小珍闻也。

邹葆荪五、七言古，前《诗话》未尽登，兹录其超脱者。《旅夜杂感》云："浮生逐萍末，抑邑难自豪。颇矜心气壮，渐与白日消。惧筵散如梦，重阖睨天高。掷杯酒未醒，几席生蓬蒿。剧怜城南树，未秋叶先凋。鸢鸟捩寥廓，得势振长飚。鸾皇锻其羽，霞彩沈九霄。"《舟中独夜，郁郁谁语，就所欲言，拉杂成诗》云："古今一死生，俯仰一天地。大者或能知，余事皆微细。上寿不百年，所历能有几。事变至纷颐，安能一一记。古来旷达人，约畧会其意。舍本而逐末，精神亦徒费。读书贵会通，要以意逆志。何必求甚解，此语殊有味。"富贵与功名，我生两不欲。偶来人间世，妄羨清闲福。少时不自主，父兄苦羁束。期我虽甚深，腾蹕安能卜。先人爱此乡，墓庐今已筑。三泖半顷田，九三间屋。可游亦可钓，半耕兼半读。优游乐余年，此愿吾已足。或谓尽如子，谁与持世局。吾谓尽如我，本无事逐逐。"郭隗不在燕，尔马空悲嘶。秋风泣乌桕，塞草连天衰。少年几同学，立志在匡时。扬鞭历危阪，尻肋疲奔驰。岂无真驹龙，苦受勒施。谁与斩荆棘，坦途无寄。落日悬危崖，悲笳动边陲。触目增我感，中心梗郁伊。明知终无补，但当一陈辞。天门万里遥，踟躕将奚为。"九月橘柚黄，晓行霜满湖。年年当此时，来收鱼蟹租。舟中了无事，坐卧一卷书。我闲已自得，尚婉湖中壳。渔人水为家，临流结茅庐。岸浅才

没踝，水清能鉴须。对我澹无辞，情敦礼节疏。供给循旧例，浊酒兼霜鲈。此情宜入诗，此景堪作图。欲往从之游，我不如老渔。""人心愈益险，世变愈难测。贵是贱则非，懦屈强乃直。舟中夜已午，茫茫百感集。推意不见星，天地惨昏黑。白杨两三树，叶秃风无力。秋坟闻鬼唱，其声凄以恻。恍非吟朋欵，慰我中宵寂。"《病中简瘦东》云："我爱沈休文，论诗契真宰。文谯聚南郊，一尊意千载。高文辅元气，喷薄弥大海。岂知造物心，炫耀忌文彩。修竹自姬娟，古梅破蓓蕾。自顾衰柳姿，对之气先馁。缠绵天半云，离合不相待。飞梦江湖间，知交更谁在。"《常熟登祖师，直上望海楼》下半首云："摄衣来揖上方祖，梵呗无声檐铎语。定心不扰旃檀香，了然无住返初古。老藤络干作阴霾，树头白日树底雨。牟尼出世无灾，螭龙幻作诸天舞。天花一拂开大荒，芙蓉涌现金银间。虫听蚊视嗤大块，到此渐觉眉飞扬。飞瓢可挂不须酒，倒持珠斗倾天浆。孤心未了万劫换，会驱我梦凌扶桑。"尚有近体可录者，《淮提庵访月上人圆成》云："拍堤水没钓鱼矶，云敛湖光罨翠微。莲鉢花开僧入定，竹炉烟烬客来稀。塘阴细雨鱼苗长，篱落春风燕子飞。最是旧游未忘处，门前鸥鸟自依依。"《旅况》云："病余眉亦瘦，乱后泪愈酸。"《江上逢蒋大》云："青山犹识我，白发太欺人。"《藏海寺》云："病花春恋瘦，古树昼凝寒。"《幽居》云："径因屡扫无苔滑，意不须关有树遮。"《醉兴》云："看来万事不如醉，穷到一生惟剩狂。"《曲水园》云："树阴泼地浓於靛，荷气袭人凉到杯。"《次韵答瘦东》云："浮海已伤人渐老，闭门无那日初长。"

余居城南，花时辄邀三五吟朋，觞吟於半野亭。花事之盛，以癸丑赏桃、戊午品玉兰、庚申宴杏为最。其余一岁中，或月季、或菊，每一花开，亦无不杯酒流连。而葆荪无谯不与，无与不有诗。姑录数首，以志鸿爪。《初夏饮半野居》云："芟草开新径，编篱接小亭。高谈辄终日，入坐互忘形。镜里鬓初白，尊前眼忽青。莺声啼不断，隔叶雨冥冥。"《重阳日访瘦东次韵》云："忽忽又重阳，兀兀未离席。日夕事苦吟，笑我蛰居壁。偶作城南游，径造休文宅。迩来兴颇佳，幸无催租檄。"《简瘦东》云："林外提壶唤，殷勤劝一卮。苦吟怜尔瘦，说梦笑人痴。溪冷鸥还聚，梅开蝶未知。别来四五日，可否有新诗？"尝欲为余画《半野亭觞咏图》，故云："古树苍霞郁暮愁，思君有梦到江头。何时载酒凭商酌，来写城南一段秋。"

无锡华西洲（重协），嗜吟咏，与里中谢冶庵、唐侣笙、程景溪诸知交唱和，顾皆随手抛弃。没后，谢君等以其晚年略存之《意园稿》见示，惜十九皆应酬之作矣。兹录一二，以存鳞爪。《夜坐感赋》云："一静翻教百虑牵，孤灯坐烬不成眠。作千秋想名为累，得半日闲意欲仙。绿鬓惊心微有雪，黄金逐手总如烟。几回悟澈逍遥旨，且读《南华》第一篇。"《宿法善寺》云："游踪暂憩借僧，觅句远思供法王。山鸟窥窬呼客起，一痕诗梦落云房。"《听雨》云："夜雨响潇潇，花信知何似。小宪人未眠，灯影淡於水。"《咏雪》云："斜斜整整没遮拦，飘忽无归势散漫。非米非棉浑乱下，人间那得救饥寒。"原本律诗，改为绝句较胜。《春日偶兴》云："炉烟古似秦斯篆，书味浓於陆羽茶。"《云栖》云："万竹际天浮碧海，五峰送客赠青云。"《咏老贾》云："白发灯前权子母，黄金袖底结公卿。"《老妓》云："风光杨柳

三春后，身世琵琶一曲中。"《老仆》云："世及乃翁兼乃祖，名甘呼马复呼牛。"皆刻划尽致，而《老贾》尤入木三分。又有诗钟稿一本，以例不录折枝诗，故不载。西洲已酉试拔萃，未获隗。平生尽瘁教育，垂三十年。华氏本大族。稿中有《贺宗贤艺珊（文川）先生八十重游泮水诗》，艺珊，余三十年前同游邓尉者也。

黄素庵（重固），兼葭泾人。父字镜清，同治丁卯举人。渊甫先生恩照族孙。画山水，有声海上。性拓落，嗜酒，鼻鼾如火。日下春，辄倾卖画钱，从客诣墟头赏饮数斗，后转温克，清辩滔滔，移时方去。民国辛巳卒，年五十许。只见其题画二十八字云："嵩华已负幽人诺，老屋萧然傍松壑。行歌樵子荷薪归，林花飞逐斜阳落。"

吴江画师陶诣孙，居周庄，其所作画，为人题句绝。近见胡心敷先生则忠遣陶画团扇一柄，有一绝云："久别重逢谊更深，河梁风急感苔岑。相思此后知何似，白石青松一片心。"并跋云："心敷先生就馆西乡十余年，其间离合亦屡矣。今自紫阳告假言归，濒行，以扇属画。临别赠言，余怀渺渺。诗画之工拙，不计也。"末署"己卯岁暮，诣孙陶焘。"胡氏世居北门外，上世有与我宗姻通者。先生学行渊懿，咸丰间避地淀西，绘有《淀滨钓隐图》。其孙伯承（善继），诸生也。课徒海上，嗜酒狂率。辛、王之际，屡於酒家遇之，抱其祖图乞为题。未几下世，此图不知流落何许。

鄞周泉诗已载入前《诗话》，顷又奇示其近作。《咏雪用尖叉韵》中云："风掣红旗翻不得，冷衙门外自交叉。""冷"字贴旗说，细玩自有味。又云："通衢人似乱盘鸦，盈耳雷声记里车。"自注："电车按站卖票，亦可称为记里车。"又云："惊鸿踏向瑶台路，新样弓鞋步步尖。"善能描写时代形形色色，与泛咏雪者不同。他云："九天咳嗽霏霏玉，五夜歌吟昔昔盐"、"谁云天上乖龙甲，此是人间免税盐"、"湿云破败惊奇句，散发棕榈张夜叉"，运用《五代史》及唐王、清赵翼诗意，皆见典雅。《次韵果园元旦》一起云："履端筮《易》得咸临，却为书红一试吟。"熟韵生押，语羞雷同，能见用心。

泉同乡诗人王秋垞（玄冰）寄其自选《秋垞诗剩》一小册来，始自丁丑，迄戊子，乃三十六岁后作。其自序谓"少耽吟咏，年十六始学作五、七言诗。嗜之既笃，至以诗废学。丁卯后，足迹不越邦域，生涯安定，衣食粗足，心无旁骛，益肆力於诗"云云。秋垞师事慈溪洪佛矢（允祥），诗盖近赵紫芝、翁灵舒一派，佳什固多，顾时杂一二粗犷语，亦瑾瑜之瑕也。兹钞其幽闲峭蓓者。《春院》云："春院沈沈夜色阑，阶前小立有余闲。竹光烟搅明虚幌，花影风扶上假山。梦似箏弦偏易断，诗如庭草不常删。轻云暖护溶溶月，照我愁边黯悴颜。"原句"明"为"冲"，嫌太力，偶"上"失轻重，易之。《招凉》云："竹榻招凉设，松轩面月开。侑吟疏雨润，闹梦乱蛩哀。"《山居杂诗，在鄞西林村作》云："粼粼白石映澄潭，涧道云深锁翠岚。众绿中间黄一颗，乱山如茧裹茆庵。"洞口冥迷碧草萋，幽禽迎客尽情啼。阴崖日冷岚光薄

，山果无声堕小溪。""云意懒如人乍起，鸟声欢似客初还。千林落叶都归涧，百道飞泉竞下山。""意影幢幢纳树阴，空庭画静下幽禽。疎钟徐与白云堕，落叶不知流水深。""磴道盘纡历几重，褰衣仄径陟西峰。两行修竹扶人上，何异随身有短筇。"浙中山家生计，竹为大宗，竹身都漆书岭主户名。余昔游天目，所过诸岭，丛篁蔽亏，攀援下上。读此诗，情景宛然。秋垞好参倚语禅缘情之作，颇似义山，殆深於情者乎？如云："啼红枕角看偏艳，唾碧襟痕久更鲜"、"梦里依然花解语，枕边微觉泪成冰"、"愿为明镜收花影，昨梦银屏现蝶身"、"香萦绿蜡何心剪，泪沁红棉有梦知"、"欲使惓心着余绮，彩丝绣个小蒲团"、"花影如人追不转，随风飞去落谁家"、"闲情赋后风怀淡，人到中年节到秋"、"我比渊材多一恨，不逢绝色是虚生"。律句可入主客图者，"酒悔愁中醉，花怜病后看"（《抽身》）、"暗荷沈沼气，疏柳织灯痕"（《游上海复兴公园》）、"酒酸微渍泪，梦远已无春"（《小极》）、"梦非诗可续，思与月俱沈"（《爱律》）、"赌水夕阳凉似月，遮楼山影淡於云"（《冬日幽居》）、"夜雨做成秋意思，暮云消损月精神"（《愁遣》）、"思穷自塞聪明窍，梦好空升福爱天"（《独夜》）、"小阁点茶娱独夜，虚廊行饭遣萧晨"（《偶述》）、"山如好女能浓笑，天做人情弄淡晴"、"水阁帘摇丁字水，芳洲花弄午时妍"（《湖上》）、"阴阴月气浮凉吹，楚楚灯痕媚晚卮"（《爱惜》）、"家居屏事闲如客，夜话无人默对妻"（《追暑》）、"写渠倩影宜冰照，乱我乡愁伴雪飞"、"一枝奇去春能语，半树埋来雪亦香"（《咏梅》）。尝与周采泉唱和"欢难"韵至数十叠，旁观敛手。近掌教甬上，而诗筒走大江南北无虚日。其《题自选秋垞稿》云："尽删少作归清正，不着腴辞爱率真。毁誉何干人好忌，讽吟能辨味酸辛。"可以见其雅尚。"毁誉"一联，尤获我心。其哲嗣孟显亦能诗，尝远游婆罗洲。

秋垞又有《湖上杂诗》云："湖似美人通体媚，山怜骚客到时迟。平章烟月余陈迹，检点风花入小诗。""叶叶风荷泻露圆，依依水荇刮清涟。疏灯隔柳疑藏月，小榭凌波似坐船。""筒筒诗囊浅浅杯，生涯寒素称疏才。湖船食饮无珍品，只袖瓜犀杏酪来。""五月榴巾炫芰裳，个中风味爱清凉。湖心藕粉糖霜洁，龙井茶旗雀舌香。""迎凉喜有晚来风，竹榭花廊面面通。爱煞木公奇丽句，残阳点叶作秋红。"自注："冯君木先生有'积水弥天带江色，残阳点叶作秋红'一联。似此等好句，不如集中复有几许？""榆钱稠叠荷钱小，柳榭苔砖旖旎阴。他日重游须是夜，要看秋月点湖心。"诸绝句清丽而不流宕，多胜《随园诗话》中杨次也作。

近日浙东人士，多喜为清微幽远之作。柴志香，亦鄞县人，卜居沪，自署大龟居士。有《秋夜观豆花，寄怀谦斋》云："布置庭园一角方，豆棚经暑入秋凉。紫茎渐欲迎霜老，绿荚偏能带露香。""怪石嶙峋捆竹斜，清阴贴地薄如纱。新秋做冷风先竖，乘月还来看豆花。""镇日柴门懒不开，醉余独自踏苍苔。谁能领略荒园趣，花下秋萤自去来。""疏星点点澹银河，为问幽怀近若何。我欲寻君话闲趣，豆花零落已无多。"《秋园夜步》云："独步秋园夜，纤云卷碧空。松多还受月，柳瘦不牵风。人意清如许，天光澹与同。漏深忘归去，霜气满楼东。"

丹阳荆梦蝶，工诗。没后，武进章百熙谋代印其遗著。抗战后，章无音信，恐其诗稿亦散失矣。近由谢半农钞得其《咏蚕》三绝句，不啻吉光之片羽，云："丝抽乙乙吐文章，尽有聪明比蕙娘。费尽锦心成底事，为他人作嫁衣裳。""微躯自缚果何为，意太缠绵计太痴。垂死情丝终不断，他生依旧化蛾眉。""人世恩仇总不平，负他衣被若为情。可怜功茧同功狗，一例难逃鼎烹。"殊耐寻绎。三十年前，有荆梧栖者，名凤冈，住丹阳皂塘镇，与余诗简往还颇久。梦蝶与梧栖同族与否、名辈先后，皆不得而知。

自桐城姚氏创为"学问之道，义理、考据、词章，三者不可偏废"之说，湘乡曾氏首先服膺。其后，南皮张文襄益畅其旨，曰："由经学入史学者，其史学可信；以经学、史学入词章者，其词章有用。"於是同光文字，兼重训诂。姚曾二家，自是前人教后人读书为学之道。时南汇丁时水（宜福）颇以词章名，与我邑俞稷卿（廷扬）、金鰲虹（玉）、庄侠君（世骥）齐称，而张啸山（文虎）目为无本之学，余《诗话》载其说。啸山精小学，宜为是言。而周浦姚君养怡以此见诘，余乃以此意复之。

《诗话》又载有啸山赠姚吉仙女士一诗，顾不能道其详。养怡曰："余曾祖姑也。为啸山诗弟子，嫁时水为继室。"因奇其所辑《周浦南荫堂姚氏丛刊》一巨帙，中有女士《吟红馆》、《双声阁》、《古井居遣诗》三种，约二百余首。姚氏，周浦名族。女士姊妹六人：蕊仙、兑仙、吉仙、佩仙、素仙、忆仙，皆能诗，而吉仙名最著。吉仙为室女时，绛帐课徒，恒为人书楹帖扇叶，得润以奉其母。兼善画花卉，然自矜贵，人不易得。嫁时年三十三矣。又六年而寡，仍为女师。时值丧乱，故其诗芬芳悱恻，幽贞独抱。《秋蝉》云："砌蛩谁和汝，高柳一蝉鸣。傲世原无意，忧时自有情。噪余残暑退，听罢晚凉生。共此孤怀洁，商声更觉清。"《暮春即事》云："番风吹遍尚清和，可惜芳菲客里过。满树绿阴深院静，闲愁如海落花多。"《杂感》云："病到秋来一半眠，怕寒呼婢替装棉。莫嗤人比黄花瘦，领略西风已卅年。"律句云："一帘花影棋枰静，半榻松风枕簟秋。"皆佳。卒年六十一。

忆仙名其慎，上海李梯云徵君邦彞继室，有《六宜楼吟草》。诗清婉，略与吉仙相埒。《钱春》云："水精帘卷绿阴肥，小白长红历乱飞。百五韶光容易过，一盘樱笋钱春归。"《春柳》云："似我经春腰瘦损，为谁作意态翩斜。"亦录自《姚氏丛刊》。此书乃养怡网罗其先代著述，附以闺秀，共四十余种，为一编印行之。阐发幽潜，其苦心孤诣，亦复难能可贵。

崇明女诗人施学诗（淑仪），辑有《清代闺阁诗人徵畧》一书，采掇宏富。其师汉寿易实甫（顺鼎）为之序。尝蒙以见贶，倭乱失之，屡从人求索，不可得。去岁，其邑人朱贯微先生诵韩另奇女士遗著《湘痕吟草》、《冰魂集》各一册，诗可四百余篇。女士父稚桐，清末宦游湘中。夫蔡南平，日本留学生，早卒。女士为女校教师甚久，既寡，又遭丧乱，怆怀家国，时为漆室倚柱之吟、木兰从军之咏。兹录其高朗秀杰者。《龙井归途谒于忠肃公祠墓》云："南北双峰一望收，湖云祠树两悠悠

。新宫赫奕英魂在，断碣荒凉正气留。社稷功高君返国，圣明煊蔽事多秋。那堪凭吊斜阳里，暮霭苍苍不尽愁。"《苏堤》云："苏公遗迹至今传，位置天成本自然。闲向锁澜桥畔望，绿波如画柳如烟。"《即景》云："修竹排墙笋正肥，一帘细雨又霏微。枕边书卷纵横满，卧看新巢燕子飞。"《仲夏即景》云："槐花落尽绿阴繁，梅子圆时静闭门。双燕不来帘半卷，孤灯暮雨又黄昏。"《次韵秋白见怀之作》云："满幅琳琅系我思，茂漪才笔左芬辞。谢庭咏到因风句，政是天寒欲雪时。"《丁未赴湘省亲，夜泊洞庭感赋》云："萧萧落叶漾清波，重过湘江唤奈何。极目天南秋色远，枫青月白吊湘娥。"《咏月夜秋海棠》云："知是诗魂与月魂，秋红楚楚怨黄昏。美人梦醒瑶阶冷，自抱寒香泪痕。"以上二绝，乃悼亡后作，故幽咽如此。《西施》云："千里江山供一笑，苏台人去有谁颦。"言女色徒能祸国吴沼，而鸱夷一舸，甯复哀之！"颦"字如此运用便新，便有议论。《月夜》云："细读道书忘夜永，一天凉露湿松花。"若云他花，便非读道书，差不得一字。《病后》云："柳花似雪东风紧，兜上千愁万恨来。"着一"兜"字，移贴他花不得。律句佳者，"明月有情随我转，青山依旧送人行"（《夜泊街阳》）、"疏帘暮雨春将去，病枕昏灯夜不眠"（《风雨感怀》）、"客思偏生明月夜，吟魂常绕海天秋"（《寄南平东京》）、"千里思亲残梦远，一身多病早秋知"（《枕上口占》）、"一林风冷虫声急，四野天高夜气清"（《南翔中秋》）、"借酒偶为消俗虑，爱诗翻悔费深思"（《四月初八夜枕上》）、"事当百岁终归尽，胸有千秋不算痴"（《家庭杂感》）、"千里客归桃叶渡，一双人语木兰舟"（《四十自述》）、"枕上梦回惟有泪，天涯神契但凭诗"（《寄颖楣颖湘，兼示仲青》）、"十顶蜡残名士屐，一生吊尽美人魂"（《次韵答易哭庵先生》）。《赠夏蕉饮年伯》（《曰践》）云："闲鸥浩荡隐松滨，衡泌栖迟近十春。"又云："烟云供养饶清兴，绀素编摹发古香。"自注："先生宿擅书名，尤精铁线篆。淑仪素蒙垂青，不啻犹子视之"云云。《冰魂集》，易君左序之，云："我父以一代诗人而无女弟子，有之，学诗一人而已。"集中附哭庵赠诗云："梅酸语讫莫重论，天地常留一卷存。得句似闻孤鹤唳，选诗尽返万花魂。""罗兰侠女同肝胆，湘竹灵妃共泪痕。巾幗河汾兼屈宋，骚坛讲席两称尊。""新篇风格试评论，仲则渊如与稚存。字字秋弹斑竹泪，时时春返玉梅魂。""滴来姑射冰为质，剪取吴淞雪有痕。欲向闺檐谈庾鲍，何时相对一开尊。"

壬戌、癸亥间，余与女士书尺往还。会钱静方先生学坤有《青浦闺秀诗存》之辑，因介余乞女士为序。翊年，江浙兵祸作，音问隔绝。今钱氏此书亦已无多，因录其序，以存梗概："昔胡稚威徵君谓古今人皆死，惟能文章者不死。诚哉，其言之感人深也！然古人往矣，其书不能自传，传必待於后之人。昔贤故谓掇拾人诗文而存之者，其功德视掩骼埋骼为尤胜。况吾侪女子，足不踰闺闼，虽有蹈蹕之才，无所於发摅，仅藉文艺以写胸臆，冀万有一传於世。此其零章断句，幸存天壤，宜为士君子所爱护珍惜，而不忍听其湮没者也。在昔选家，自萧梁《文选》外，以徐陵《玉台新咏》为最古，而古代女子之诗，亦赖此以传。然观徐氏所选，自汉迄梁，寥寥十许人，而入选之诗又多不过人三数章。其后唐代诗称极盛，而见於《全唐诗者》，宫闺女冠并计，尚不过百四五十人。殆流落人间者，吉光之片羽耳。宋元以降，

年代较近，闺合之诗，传者稍多。然非有人各就所闻知及时裒辑，以广流传，久且有散亡渐灭之惧。青浦钱君静方，尝辑其乡邑闺秀自元管道升至清咸同间都六十余家之诗，为《青浦历代闺秀诗存》。猥以淑仪为粗知诗，转辄请属为序。钱君虚怀若谷，诚君子之用心也。忆往时尝读王侍郎昶所选《湖海诗传》，於乾嘉诗人搜采略备，独於女子之作，一切遗弃。其《诗话》并诋《吴会英才集》之殿王薇，以为无此体裁。侍郎又选其乡人诗为《青浦诗传》，淑仪未得读其书，而以《湖海诗传》推之，其体例当亦相类。今钱君为侍郎乡后进而选辑闺秀诗，乃适足补侍郎之所未备，其与《湖海诗传》并重於世，无疑也。淑仪亦尝妄事搜辑，於青浦闺秀已略采数人。钱君此书，足以广见闻而匡我不逮也，岂浅哉？淑仪生长崇明，去青浦不甚远，而崇邑僻处海隅，风气横家，自来女子无一人一诗传於世者，岂竟无其人耶？抑有其人、有其诗，而不为士君子所爱惜，以听其湮没耶？此尤不胜钦慕於钱君之所为，而不能不引为深愧也夫。癸亥二月。”

俞因字季则，女词家也。慈溪冯君木妻。《点绛唇咏草用林君复韵》云：“春浅春深，离亭一片浑无主。故人何处，日日风和雨。行色匆匆，又是春将暮。征车去，闲愁无数，绿遍天涯路。”况蕙风先生极赏之，谓其浑成而淡，的是宋人词。余谓其诗亦多含有词味。《秋日病起》云：“细风吹雨湿苍苔，镇日重门掩不开。十二栏干人寂寂，秋阴都上画帘来。”《君木以诗见奇，即次其韵》云：“寂寥无语倚香篝，忆着前尘总是愁。么鸟踏枝栖不稳，凉云吹散一帘秋。”“两写秋帘，与石帚”西山外，晚来还卷，一帘秋霁”异曲同工。有《妇学斋词》一卷。

《石遣室诗话》：“古人诗文合一，真理相通。断无真能文而不能诗，真能诗而不能文者。”（《诗话》卷二十六）。桐城叶浦荪先生玉磨，今之古文家也。出马通伯门下。著有《灵赋轩文集》行世，然诗亦颇工。先生年近八旬矣，寓居沪滨，余以雪叟之介，以诗文质正。旋荷损书，并赐和章。不佞获遇名师，以为平生之幸，又转恨相知之晚也。谨录存其书，附以唱和诗，以为印证。“十二月二十三日，玉麟顿首：奉书及大著，伏读数四，敬佩无已。过蒙眷厚奖借，只增愧耳。足下老而好学，洵如东坡言‘不独今人难，古人亦少’，然亦自有味，放翁故屡述之。斯文垂绝，不图海角孤星，犹耿耿也。麟悠忽老耄，多愧父师。平生好为文，数十寒暑，未尝废书。少时读张濂聊先生校刊、归方平点《史记》，深耆之，嬉壹无他好，故腹俭。乡者二三老辈颇见许。自通伯先师作古，此道遂孤，近且无人谈及。然读书学道虽非为文，文亦自不可废。士君子既尚友古人，则一切是非、毁誉、名利、得丧、忧悲、忻愉，皆可度外。往侍陈伯严丈於先府君旁，许以可学。后从马先生游，署窥门径，恨其不能发愤早用力也。今维姚仲实先生所著《文学研究法》，阅之又得端倪，名家各自道辛苦所得，皆有见地。要之，无膾昌黎《答李翊书》，字字皆其所自得，实千古文章家一大法门。古文渊源六经，观史公《报任少卿书》中述，文王拘而演《周易》，仲尼厄而作《春秋》’，颇与《孟子》‘舜发於畎亩之中’一段相似，大畧可知矣。眼花，苦作字，谨和大作，殊愧拙，聊为彼此订交之证，何如？麟顿首。”诗曰：“百里遥相望，残年会合坚。眼中人物尽，世远古香传。四壁清秋气

，神洲白日悬。东南閔灵蕴，在野有遣贤。"拙唱云："万古江河在，中流砥柱坚。茹经谁辈行，（谓唐蔚老）惜抱此薪传。杖履春风健，云山客思悬。楚狂有歌者，寤寐石林贤。"

先生《和徐师竹表兄，别三十有五年，以诗存问》云："晚岁亲知影渐零，短檠留得旧时青。年光销尽归吟卷，付与江潮一夜听。""秣下西风丁酉秋，帘波长挂隔生愁。晓钟残月平生侣，坐想清吟到白头。""桑江易改落风烟，老忆明时各惘然。记得开元种杨柳，似闻双鹤语尧年。""老树花虽掩丑枝，忖除哀乐更无诗。谁知淮海矜年少，剩有苍茫独立时。"风流蕴藉，何减渔洋。《答雪叟赠诗并馈药饵》云："药饵扶衰惫，相看不世情。緘愁孤月口，闻性隔垣声。旧馆来今雨，高梧立快晴。扶持无尽意，何处着平生。"朴老，神似杜陵。他云："秋灯看人老，冷砚向花磨"、"柳摇三日雨，寒色半江城"（《次韵雪叟赠诗》）、"晚山横翠黛，支枕属秋灯"（《无题》），皆名句也。先生恒言诗非所长者，谦词耳。哲嗣葱奇（虔）为海藏之，亦能诗。曾见其《题应次耿阳朔秋泛图》云："山横组绣玉翻澜，藕孔犹容意暂欢。回首胡尘不到处，低回泪向画图弹。"盖为避倭乱有感而作。

题上海严氏《三世耄耄图》者，沧趣、海藏、回风等，皆有名作。载如云："并世名辈，大抵皆入我彀中。"其言颇张。顷阅《回风堂集》，见其诗云："海上有严氏，其家多寿人。晚得佳孙子，写图存其真。蔼然八十翁，有子八十一。有子又有孙，八二岁方毕。二百四三龄，仅以三人分。易世必加寿，得一已足珍。温温祖妣氏，齐眉亦三世。有盈而无戾，添寿循定例。"又曰："异姓已不易，何况一姓合。一姓已不易，何况三世接。三世已不易，何况尽偕老。偕老已不易，何况增寿考。"盖载如高祖建雄，讳正邦，年八十，配氏桑，年七十六；曾祖羲棠，讳凤岐，年八十一，配氏王，年八十三；祖殿卿，讳应钧，年八十二，配氏陆，年八十六，洵人瑞也。诗忌质与拙，此诗佳处正在质、拙二字，惟质与拙，乃能尽其辞。杜诗《示从孙济》、《送从表兄王朱评事》等篇可细玩。载如大父殿卿公夫妇同庚，亦重谐花烛。

壬辰秋，海上诗坛连丧名宿二人：一闽县李墨巢先生，年七十七；一南通孙沧叟先生，年八十六。李氏诗为闽派钜子，见重於海藏、石遗。蛻园挽云："正始风犹在，元嘉纪又更。委衾无颇恋，带 尽平生。鹤想来双阙，人徒叹九京。寿堂亲写赞，谁是赵那卿。"又曰："法嗣玄风畅，归墟碧海深。"又曰："蛟螭腾宝篋，缚鮓改凶仪。"下句言时盛行火葬，饰终之典多不备具也。果园联云："硕果难存东海滨，又弱一老；办香永奉西江派，自足千秋。"硕果，其亭名也。沧师，光绪癸卯举人，宝山训导、四川青神知县，以廉节著。为学治《公羊春秋》。书工殷墟文。其在故乡创办学堂，有四十余处之多。辟园建楼，藏书数十万卷，经乱俱烬。晚岁南下避兵，赁居一楼，粥书自给。没之日，冒鹤老、高葩叟往哭之，私谥"殷文"，葬上海江湾市立第一公墓。蕲春桂末辛先生挽云："携将宛委山中秘，都到春申江上来。奇籍百城供寝鲭，小楼一角绝尘埃。才高班马俦能敌，运厄龙蛇事可哀。太息伏生今逝矣。"

，逸书长恐没秦灰。"又曰："白首论交气味深，高山流水感知音。先施许醉重阳酒，侍坐分题汉上襟。"自注："己丑重九社饮，承简招觴咏。"又曰："佳节月明今岁好，少微星陨故人愁。"果园联云："患难共十年，昕夕过从孔北海，坐上客常满；达穷皆千古，后先辉映张南通，乡望公能齐。""达穷"五字，奖括大节，他人未尝言也。文无联云："先墨巢九年生，后墨巢九日死；愧丈人与我厚，知丈人与世真。"天然凑合，而运用杜诗，尤极浑成。师干局瘦小，外温恭而内介特。尝念余贫，至屡分笔润以相响。余故哭之云："砚池自饮无多润，犹念池边吻渴人。"又曰："人间举火寻常事，偏爱茶村一段奇。"下联取师赠诗意也。闻挽两先生之诗、联佳构尚多，惜未之见，容俟续访。

诗家於典故，以沿讹久而习用者颇多。相传吕氏《东莱博议》成於新婚时才一月，於是后人遂据以入之催妆，虽乾嘉诸名家，亦不能免。实末之深考也。本书自序谓"屏居东阳之武川里，有从游者谈余语隙波及课试之文，乃取左氏书理乱得失之迹，疏其说於下，旬储月积，寢就篇帙"云云，固无一语涉及新婚也。又按《吕公年谱》："初娶韩元吉女在绍兴二十七年时，居信州，不居东阳。后乾道三年，持母丧，居明招山，学子有来讲习者。四年，乃成《博议》。五年，服除，乃继娶韩氏女弟。"则是书成於丧制中，今施之新婚，更误矣。近季鸣贺徐君咏緋续娶，有"玉台今日添新咏，不数《东莱博议》书"之句，故偶载其说於此。咏緋新夫人张氏，贺者多有用张敞故事者。如吴镜芙云："携将奁内家传笔，赠与郎君画远山。"季鸣云："做得儿家京兆笔，不须更问入时无。"别有寄托，亦佳。赵苇佛云："京兆画眉传韵事，郎君妙笔也能描。"余亦云："玉人自有新眉样，不向郎君借彩毫。"诸联自以镜芙作为最工妙。至全体之工者，宜兴徐还庵（攘）二律云："宝瑟重调叶羽商，百年好合缔鸾凰。西方彼美青绡帔，东海倦人白玉林。月裹婵娟原字素，寰中姓氏雅推张。紫琅山色锺灵秀，珠璧联辉恰两当。（张女士亦系南通人，与君同乡。）"夫人字素芳，故第五句云云。"翰墨风流记最宜，（君长於小品文字，尤擅记述。）催妆互写定情诗。携来张敞家中笔，倩画梁鸿案上眉。十月芙蓉春小日，双星 鹊夜填时。胶弦喜有同心续，好看将雏傍母慈。（君前室钱夫人遗有允信、允惚二子。君曾作《忆凤楼图记徵诗》。）"工切典雅，可压倒元白。还庵字云石，清末拔贡生，礼部主事。

邑人徐企商（彭龄），居王元街，光绪癸卯进士，派往日本游学。民国初，为本县首任民政长，入京宫大理院刑庭长。生平无著作，仅传其有《新婚》联云："张氏旧传京兆笔，彭郎新得小姑山。"企商妻，张雄伯孝廉家镇妹也。

绍兴孙伯绳有《追忆》六绝句寄余，其词凄黯，颇与余癸酉春咏青琴事相类。如云："拣得花枝浪得名，探骊共一珠莹。"余亦云："拣得花枝称意归，青琴自小即相依。"又曰："十年别馆浑成错，修到鸳鸯又独飞。"与余"杨花自是无情物，不化浮萍故故圆"意同。又曰："白头谁举梁鸿案，翻见相如卖赋愁。"与余"后夜月明惟吊影，无人横玉叫苍烟"又事异意同，盖余姬善弄笛也。又曰："盈城传唱三姝媚。"而余姬亦

有艳称。惟其诗用举按事，当系嫡室。而篇中"青蝇"、"白璧"、"种瓜得豆"等语，当有本事，不能强为悬揣。余姬喜临《宣示表》，文亦楚楚。壬申倭乱，驻军有来余家修衅者，家人患苦，姬单身走谒其师长某，某立以军律惩之。事解，寻有军官单某委币欲通殷勤，姬匿不出。事余八载，武林、武邱之游、名公胜社驱车之访、题襟之宴，往往与俱。一夕，忽饮泣潜去，余为神伤。又不知伯绳所忆，生离抑死别耶？

牡丹有名"玉楼春"者，然梔子亦有"玉楼春"之名，余昔戏改之为"欲留春"。近读周烁园《赖古堂诗》，有"再到虚堂全是雨，何如但种欲留春"之句，盖为梔子咏也，古人已先得我心矣。

徽钦北狩，为中国一大耻辱。幸西湖有岳鄂王祠墓、灵岩有韩蕲王祠墓，犹足为吴越湖山生色。余三十余岁时游木渎，曾瞻拜蕲王祠墓，有诗，刊诗时竟削而不存。顷发篋得其稿，吟讽数四，觉通体沈郁悲凉，且颌联即能发挥斯意，不知当日何以弃此。己所删拾，犹无定见，可知选他人诗，其遗珠必多矣。然敏手汰金，古人亦未能免也。因钞存其诗於此，云："阴风惨淡飒灵旗，古墓犹存十丈碑。箫鼓千年哀北狩，松楸一气接南枝。军中卧虎威如昨，湖上骑驴事可知。惆怅灵岩山下路，岩花无语发丛祠。"